

Empeto Zupotian  
16 assib; 16q1/

VALL

सं. १०११६ अक्षर  
१०११६ अक्षर

१०११६

8.25.4.12 1

# SIX SERMONS

DE LA NATVRE,  
ESTENDVE, NE-  
CESSITE', DISPENSA-  
TION, ET EFFICACE  
DE L'EVANGILE.

*Us sont tous imprimés in 8.<sup>o</sup>*

Par MOYSE AMYRAUT

Pasteur & Professeur en Theo-  
logie à Saumur.



*vial*



A SAVMVR,  
Pour CLAVDE GIRARD, &  
DANIEL DE LERPINIÈRE.

M. DC. XXXVI.

T







# P R E F A C E

au Lecteur.



L y a enuiron dix-  
huiët mois, qu'un  
homme de qualité  
nouuellement ve-  
nu en nostre profes-  
sion, & toutesfois menaçant as-  
sez apparemment dès lors du  
changement arriué depuis, auoit  
accoustumé de dire entre ses  
familiers que la doctrine de la  
Predestination, telle qu'elle est  
enseignée en nos Eglises, luy fai-  
soit de horreur. Et repetoit  
souuent que c'est chose enne-  
mie de la nature de Dieu & de  
son Euangile, de croire qu'il ait

P R E F A C E

créé la plus grande partie des hommes de propos délibéré pour les damner. Ceux à qui sa constance en nostre religion importoit particulièrement, craignans que la sinistre impression que quelques Predicateurs de l'Eglise Rom. luy auoyent donné de nostre creance en ce Point, ne causast en fin quelque scandale, me prièrent avec toute instance d'essayer a y remedier au plustost, & de mettre la main à la plume pour luy esclarcir ceste matiere. Ceste priere ayant semblé non a moy seulement, mais aussi à Messieurs mes Collegues, personnages dont le merite est assez connu, digne d'estre considerée, ie me resolus d'y obtemperer : me croyant obligé de contribuer un peu que Dieu m'auroit donné a l'instruction d'une personne dont, outre le salut qui luy en deuoit

reuenir , la perseuerance eust esté en edification a plusieurs, & en vtilité a l'Eglise. Pour le faire i'estimay que la meilleure methode seroit de représenter ceste doctrine d'une façon qui sans faire aucun tort à la iustice de Dieu ny a sa liberté, rendist sa misericorde souverainement recommandable. Pource que l'Euangile est proprement destiné a estaler les compassions de Dieu deuant les yeux du genre humain , pour conuertir les hommes a salut , & s'ils demeurent obstinez ; mettre l'exécution de sa iustice a tel point, que l'esprit humain n'y trouue rien à blasmer qu'avec vne extreme impudence. Cependant ie ne laissay pas de iuger entièrement necessaire de maintenir d'un costé le souverain droit de Dieu dessus ses creatures, & de l'autre monstrier par raisons in-

# P R E F A C E

vincibles, que les esleus ne doi-  
 vent leur election qu'a sa pure  
 misericorde, ny leur vocation  
 efficace qu'a ceste election:  
 en adioustant quant & quant;  
 autant que le volume le pour-  
 roit souffrir, les consolations  
 qui reuiennent à chacun fidele  
 de la certitude de sa foy & de sa  
 perseuerance. Le dressay donc  
 sur ce dessein le petit traitté de  
 de la Predestination, dont il me  
 falut, par le conseil de ces mes-  
 sieurs que j'ay nommez, hastier  
 promptement l'edition, afin de  
 ne manquer pas l'occasion  
 qui luy auoit donné sa naissan-  
 ce. Cet escrit estant venu au  
 iour, receut l'approbation de  
 beaucoup de gens, & mesmes  
 de quelques vnes des plus bel-  
 les lumieres de nos Eglises.  
 Mais pource qu'il est composé  
 d'une methode fort eslongnee  
 de la conception de nos aduer-

AV LECTEUR.

• faires de l'Eglise Romaine touchant la doctrine de Calvin en cet article, & que de longuemain on est persuadé que nous suiurons entierement les sentimens de ce personnage en France, plusieurs ont estimé que l'en vouloy faire accroire. Car chacun sçait combien odieuse est la maniere en laquelle les ennemis de ce seruiteur de Dieu proposent sa doctrine, notamment en cet egard, & qu'on n'oit presque autre chose retentir de ~~leurs~~ chaires sinon que Calvin fait Dieu le plus cruel de tous les tyrans, qui n'a créé les hommes pour autre raison que pour estre l'obiet de ses vengeance. Ceste consideration avec quelques autres m'ont mis en l'esprit le dessein de faire voir plus au long par tesmoignages indubitables, & en langage capable de s questions prouon-

# P R E F A C E.

des de ceste matiere & qui puisse estre entendu des autres nations, que la doctrine de mon liuret en ce Poinct, est celle de Calvin mesme; voire que les expressions desquelles ie me suis serui sont celles que bien souuent il employe quand il traite de ceste matiere. Afin que désormais le blasme dont on diffame son nom estant essuyé, nos Eglises en suite soyent deschargées de celuy qu'on leur donne. Mais pource que c'est vn ouurage que mes occupations ne me permettent pas de produire si tost, & que cependant il estoit comme necessaire de donner au peuple quelque esclarcissement en ces choses, ayant, outre l'eschantillon que vous trouuez cy apres, fait depuis peu quelques sermons sur ce subiet, ie me suis resolu de recueillir mes meditations sur le papier,

& les laisser aller au iour. Car  
i'espere que d'autres pourront a-  
voir par les yeux quelque part au  
contentement que ceux qui les  
ont ouïs prononcer sembloient  
y prendre par les oreilles.

Ils monstrent assez d'eux-  
mesmes que ie n'y ay cherché au-  
cune estime d'estre bien disant.  
Ie sçay que ceste louange est  
trop haute pour que i'y puisse  
atteindre. Mais outre cela c'est  
à mon aduis vn but si indigne  
de ceux qui preschent l'Euangi-  
le de Iesus Christ, que i'ay tous-  
iours voulu qu'il fust encore plus  
esloigné de mon dessein que de  
ma puissâce. Il me suffit de sauoir  
la croix de nostre Sauueur, &  
d'en faire, selon la petite mesure  
de la grace de Dieu en moy, sen-  
tir l'efficace aux hommes. Mon  
intention a seulement esté de  
demeurer quelques difficultez  
qui se presentent és choses plus

*P R E F A C E.*

importantes de la religion , & servir à l'edification de la conscience par leur intelligence. Cependant il ne laissera pas d'y paroître que si iamaïs homme depuis les Apostres a prêché la miséricorde de Dieu , ç'a esté Caluin : bien qu'à la verité il n'ait peu souffrir que la celebration de ceste vertu en Dieu ait fait preiudice où à la justice par laquelle il punit les pecheurs impenitens , où à la souveraine liberté selon laquelle il luy plaist de dispenser inegalement ceste sienne miséricorde aux hommes. Et quiconque marchera sur ses pas ne deferera iamaïs rien à la volonté de l'homme, ne diminuera rien de la louange de la miséricorde de Dieu , & en faisant tomber sur l'obstination des humains toute la faute de leur perdition , rendra sans doute le nom de sa iustice plus



AV LECTEUR.

illustre & plus glorieux. Si j'ay  
atteint a ce but la louange en  
soit a Dieu. Quoy que c'en soit  
ie luy doibs celle de m'auoir  
donné d'y viser, ma conscience  
me rendant tesmoignage que ie  
n'ay eu autre pensée. Il ne faut  
donc chercher en ces sermons  
que ce qui pouuoit seruir a ce  
dessein ; & quant aux defauts  
qui s'y trouueront, ceux là, com-  
me ie croy, les supporteront be-  
nignement, qui sçauront qu'ou-  
tre les diuertissemens dont ma  
vie est continuellement trauer-  
sée, la necessité ordinaire de ma  
charge m'a obligé de faire ces  
fixations en trois semaines.



ESCHANTILLON  
DE LA DOCTRINE  
DE CALVIN,  
Touchant la Predestination.

**E**NTRE les choses pour lesquelles les predicateurs de l'Eglise Romaine difament le nom de Calvin, la doctrine de la Predestination semble estre la principale. On oit continuellement retentir dedans les chaires que ce personnage enseigne que Dieu a créé la plus grande partie des hommes expressement pour les damner, mesmes sans consideration de leurs offenses. Que pour l'exécution de cette sienne volonté il a ordonné que le premier homme pecheroit & enuelopperoit en mesme condamnation toute sa race : de sorte qu'il luy a imposé pareille necessité de pecher, que si de sa main, à laquelle on ne peut resister, il l'auoit precipité en vne ruine ineuitable. D'auantage

*Eschant. de la doct. de Calvin.*

NE  
pour  
teurs  
e dif-  
luin,  
se m-  
onti-  
châi-  
que  
des  
am-  
n de  
ion  
on-  
oit  
on-  
rte  
ité  
el-  
re-  
a-  
ge

uantage, que pour aggrauer la con-  
damnation des hommes il leur a  
donné vne loy qu'il est impossible  
d'accomplir, & que puis apres il les  
condamne pour l'auoir transgressée:  
ce que ne font pas les plus cruels  
d'entre les tyrans. Que Dieu voyant  
les hommes en cette miserable con-  
dition, a bien enuoyé son Fils en la  
terre, mais non pas pour faire la pro-  
pitiacion de leurs pechez, son sacrifi-  
ce n'estant destiné qu'à la redem-  
ption de fort peu d'entre les hom-  
mes. Et quē quand il suffiroit pour  
tout le genre humain, c'est inutile-  
ment pour la plus grande part, d'au-  
tant qu'il ne leur en donne aucune  
cognoissance. Pour la fin, que mes-  
mes à ceux à qui la mort de Christ  
est annoncee, Calvin la rend inutile  
de tout poinct, en ostant aux hom-  
mes toute faculté de croire parce  
qu'il esteint le franc arbitre: Et si no-  
n obstant il veut que pour ne croire  
pas ils appesantissent leur condamna-  
tion, & amassent peine sur peine. Puis  
là dessus, comme ordinairement ces  
Messieurs sont vehemens orateurs,  
ils declament contre nous, comme si

e

### Eschantillon

nous estions les plus execrables d'entre les hommes.

Or quant à la premiere de ces accusations, avec qu'elle apparence de raison en peut-on charger ce personnage, qui dit si expressement que si on s'enquiert de la cause qui a emmené Dieu à créer toutes choses dès le commencement, & qui l'induit à conserver toute chose en son estat, on ne trouvera rien que sa seule bonté : laquelle seule denroit bien suffire pour nous attirer en son amour, venant qu'il n'y a nulle creature, comme dit le Prophete, sur laquelle sa misericorde ne s'étende ? Et afin qu'on ne pense pas qu'il l'entende des creatures destituees d'intelligence seulement ( bien que la bonté de Dieu reluise plus clairement en la creation de l'homme que d'aucune autre chose ) Il dit ailleurs que ceste parole du Psalmiste, Pourquoi aurois-tu créé en vain tous les enfans des hommes, vient d'une maxime premiere qui est veritable, à sçavoir, que Dieu a créé les hommes & les a mis au monde afin de se monstrier pere envers eux. Et afin encore qu'on ne pense pas qu'il se soit voulu monstrier pere

*Inst. lib.  
1. chap.  
5. §. 1.*

*sur le Ps  
89. 48.*

*de la doctrine de Calvin.*

en ceste vie seulement, pour prendre plaisir apres aux tormens eternels de ses creatures, mesmes sans consideration de leurs pechez. ( quoy que Brutus & Manlius, pour aigre que fust la trempe dont ils estoient, ne se virent dessus leurs enfans qu'à cause de leurs crimes ) apres auoir magnifiquement discoursu des œuvres de Dieu, & des vertus qu'il y a manifestees, il conclud ainsi. *Il faut donc confesser qu'en chacune œuvre de Dieu,* *Inst lib. 1. ch. 5 §. 10.*  
*& sur tout en la masse vniuerselle, ses vertus sont peintes comme en des tableaux, par lesquelles tout le genre humain est conuié & alleché à la cognoissance de ce grand ouurier, & d'icelle a une vraye & pleine felicité. Et ailleurs encore, que nous ne pouuons penser à la fin pour laquelle nous sommes créés, que ceste cogitation ne nous soit comme un aiguillon, pour nous stimuler & poindre à mediter & desirer l'immortalité du royaume de Dieu.* *Inst lib. 2. ch. 1. §. 3.*

Or ne mets ie pas. cela en auant ou pour dire qu'il y ait pareilles obligations de communion entre Dieu & ses creatures qu'entre les peres & les enfans : car la difference

### *Eschantillon*

est extreme. Où pour rien diminuer de l'autorité absolue que Dieu a dessus toutes choses s'il en vouloit user : car leur ayant donné leur estre, & de plus estant d'une nature infinimēt excellente au dessus de la leur, il a aussi dessus elles vne puissance infinie. Et quand il auroit eu quelque autre dessein en les creant, ce ne seroit pas à elles à ouvrir la bouche en plaintes contre sa volonté. Mon intention est seulement de monstrier que ce grand homme ayant reconnu que Dieu n'use pas de ce sien droit, mais le trempe tousiours en vne bonté inenarrable, a essayé de celebrer cette bonté conuenablement à son excellence. Et partant s'il luy arriue quelquesfois ou de dire que Dieu a predestiné vne partie des hommes à la mort, ou de nier que tous hommes ayent esté creéz pour la vie ; il faut entendre ce mot de creation, non du dessein de la premiere, telle que nous l'eussions eue en Adam, s'il fust demeuré en son integrité, mais de ceste entremise de la prouidence de Dieu qui se monstre en la production des hommes par la generation ordi-

*De la doctrine de Caluin.*

naire, qui est infectee de la contagion du peché du premier homme. Et celuy de Predestination, de l'arrest par lequel Dieu a ordonné ce qu'il auroit a faire de chacun homme tiré de ceste masse corrompue. Comme de vray il est constant par ses escrits que il a creu que la Predestination de Dieu s'exerçoit dessus les hommes considerez comme décheus de leur integrité, & partant ne pouuans plus estre qu'un obiect de sa iustice à les considerer en eux mesmes. A quoy ce beau passage seruira de preuue suffisante. Si quelcun nous assant de ce propos, pourquoy Dieu en a predestiné quelques uns a damnation, lesquels ne l'auoyent point merité, veu qu'ils n'estoyent pas encore: nous luy demanderons d'autre part en quoy c'est qu'il pense Dieu estre redeuable à l'homme s'il l'estime en sa nature. Puis que nous sommes tous corrompus & contaminez de vices, il ne se peut faire que Dieu ne nous ait en haine: & ce non pas d'une cruauté tyrannique, mais par une equité raisonnable. Si ainsi est que tous hommes de leur condition naturelle, soyent coupables de condamnation mortelle.

## Eschantillon

Inst. lib.  
2. ch. 23.  
§. 3.

de quelle iniquité ie vous prie se plain-  
dront ceux lesquels Dieu a predestinez  
à mort ? Que tous les enfans d'Adam  
viennent debatre contre leur Createur  
de ce que par sa prouidence eternelle  
auant leur natiuité ils ont esté denoüez  
à calamité perpetuelle : quand Dieu au  
contraire les aura amenez à se recognoi-  
stre que pourront-ils murmurer contre  
cela ? S'ils sont tous prins d'une masse  
corrompue, ce n'est point de merueil-  
les s'ils sont assuiettis à damnation.  
Encore verçons-nous cy dessous  
quel lieu la misericorde tient en ce-  
ste predestination.

Au  
Traicté  
de la  
Predesti-  
nation.

Pour ce qui regarde le peché d'A-  
dam, ie n'en produiray qu'un passage  
qui deuroit fermer la bouche à toute  
calônie. Quand on parle de la Predesti-  
nation i'aduersty les Chrestiens qu'il leur  
doit sonuenir que tous ceux qui sont  
morts & dânez en Adam sont iustement  
laissez en leur damnation: que ceux qui  
de nature sont enfans d'ire, perissent à  
bon droit. Ainsi, que nul n'a de quoy se  
plaindre que Dieu use de trop grande  
rigueur enuers luy, puis que tous portent  
leur coulpe & damnation en eux mes-  
mes. Le remonstre aussi que quand on



de la doctrine de Calvin.

viendra iusqu'au premier homme, on trouuera qu'il s'est laissé tomber de son bon gré; comme ainsi soit qu'il fust créé pur & entier: & que de là il est aduenü qu'il s'est plongé en perdition avec tous les siens. Car combien qu'il ne soit point cheut sans que Dieu l'ait ainsi preueü & ordonné: toutes fois cela ne fait rien pour le releuer de coulpe ou pour enuëlopper Dieu en la faute d'iceluy. Car nous auons tousiours à considerer qu'il s'est volontairement priué de l'intégrité & droiture que Dieu luy auoit donnée: qu'il s'est volontairement assuietti en la seruitude de Satan: en somme que c'est de son bon gré & de son vouloir qu'il s'est ruiné. Puis il adioust. On amene ceste excuse, qu'il ne pouuoit eniter ce qui auoit esté ordonné de Dieu. Mais puis que la transgression est volontaire cela est plus qu'assez à la rendre coupable. Car a proprement parler la droite cause & naturelle du peché n'est pas le secret conseil de Dieu, mais la volonté de l'homme, qui est toute manifeste. Et en fin il illustre cela par des comparaisons & montre que c'est vne temerité & vne folie insupportable d'aller chercher dans les secrets

### *Eschantillon*

abysses de la prouidence de Dieu la cause de ce dont nous sommes conuaincus par nostre propre conscience. Car au reste de quelque costé qu'on se tourne, & quelque opinion qu'on tienne en l'explication de la doctrine du peché d'Adam, si faut-il y recognoistre quelque conduite de la prouidence de Dieu, quelque mouuement de sa volonté, dont on ne sçauroit sonder les raisons ; ne fust ce que celui du decret de ne l'empescher pas, veu que c'estoit chose entierement en sa puissance.

*Inst. lib. 2. ch. 7. §. 30.* L'accusation de l'impossibilité de la loy donnée expressement pour rendre plus griefue la condamnation des hommes, semble estre la plus atroce, & veritablement est la plus inique. Car en quoy est-ce que Calvin la constitue ? *I'appelle impossible,* dit-il, *ce qui n'a iamais esté veu, & est ordonné par la sentence de Dieu, que iamais ne sera.* Quand nous regarderons depuis le commencement du monde, ie di qu'il n'y a eu nul de tous les Saints, lequel estant en ceste prison de corps mortel ait eu vne dilection si parfaite, insques à aimer Dieu de tout son cœur, de

*de la doctrine de Calvin*

toute son ame, & de toute sa vertu. Je di davantage qu'il n'y en a eu nul qui n'ait esté entaché de quelque concupiscence. Qui contredira à cela ? Je voy bien quels Saints imagine la superstition : c'est à sçavoir d'une telle pureté qu'a grand peine les Anges du ciel soyent semblables. Mais cela repugne tant à l'Ecriture qu'à l'expérience. Je di encore plus, qu'il n'y en aura jamais qui vienne iusques à un tel but de perfection, iusques à ce qu'il soit delivré de son corps. Puis il illustre & confirme cela par exemples & passages de l'Ecriture.

Il faut donc considerer la Loy de Dieu en deux égards : sçavoir, ou bien entant qu'elle presuppose vne pureté & integrité originelle mesmes en ceux qui n'ont point encore l'usage de la raison : ou bien entant qu'elle exige vne obeissance parfaite & accomplie de tous ceux qui en vsent. Pour le premier, le plus vehement des aduersaires de Calvin, s'il porte seulement le nom de Chrestien, l'accusera-t'il d'auoir enseigné que la Loy de Dieu soit en cet égard d'exécution impossible ? Qui est-ce de

*Eſchantillon*

toute la poſterité d'Adam qui ne ſoit infecté du péché originel ? En la puiſſance de qui d'entre les humains eſt-il de ne le pas eſtre ? Noſtre Sauueur en a eſté garenti , comme deuant eſtre le Saint des Saints, & l'agneau ſans macule & ſans tache. Auſſi a il eſté conçu d'une façon extraordinaire , par la vertu du Tout-puiſſant ſans interuention humaine. Deuant ni apres luy il n'y en a iamais eu , il n'y en aura iamais aucun autre. Mais quand la Vierge bien-heureuſe auroit eu cela par priuilege ſpecial (ce que l'occafion ne requiert pas que ie debate maintenant ) cela empêcheroit-il, qu'on ne diſt qu'en cet égard la Loy eſt d'impoſſible accompliſſement à toute la race humaine ? Si donc l'impoſſibilité de la Loy aggraue noſtre condamnation , & ſi pour l'enſeigner ainſi il en reiaſſiſt quelque blaſme ſur la iuſtice diuine , ceux-là en ſont auſſi coupables comme Caluin , qui déchirent ſon nom , & ont autant d'intereſt que nous ſoit à ſoudre la queſtion, ſoit à le defendre.

Quant à l'obſeruation parfaite

*de la doctrine de Calvin.*

de ses commandemens que la Loy exige de tous ceux qui vivent de la raison humaine, si l'impossibilité en dependoit de la nature de la Loy mesme, la creature pourroit ce semble pretendre devant Dieu quelque excuse de son impuissance. Comme si Dieu nous avoit commandé d'arrester le mouvement du Soleil, ou le cours des rivières, & qu'il eust laissé nostre nature en l'estat auquel elle est, destituée des forces nécessaires pour y atteindre. Car ni quand nous aurions le plus grand desir qui se puisse, d'y obtemperer, nous ne le pourrions pas, ni quand Adam en son intégrité l'eust de mesmes voulu il ne l'eust pourtant sceu faire. Mais la Loy n'est pas de ceste nature. Tous ses commandemens se recapitulent en deux, c'est à sçavoir d'aimer Dieu de tout nostre cœur, & de toute nostre pensée, & nostre prochain comme nous mesmes. Si donc vous la considerez en elle mesme, y a-il là rien d'impossible à l'homme si vous n'avez égard qu'aux facultez naturelles d'entendement & de volonté qui sont en luy, & non au vi-

*Eschantillon*

ce qui y est suruenü par la cheute du premier pere? Car puis qu'il a vn entendement, il peut cognoistre Dieu & son prochain; & puis qu'il a vne volunté il peut aimer & l'vn & l'autre, & s'il n'y auoit point de peché en luy, il n'y auroit rien qui l'empeschast d'y desployer ces facultez avec toute sorte de vehemence; & les y desployant avec toute la vehemence qui selon la nature entiere se pourroit, Dieu ne luy demanderoit rien dauantage. Car d'un costé l'obiet du commandement, comme on parle, seroit proportionné à la faculté naturelle qui est en nous; & de l'autre l'action de ceste naturelle faculté à l'excellence de l'obiet mesme. Et partant il n'y a que nostre propre vice qui nous en empeschè.

Il y a donc vne sorte d'impuissance qui vient de ce que nous n'auons pas les facultez naturelles necessaires pour obeir, qui peut estre appelée naturelle elle mesme, mais pour laquelle on ne nous peut pas dire meschans. Et il y en a vne autre procedente de ce qu'ayans les facultez naturelles, c'est à sçauoir l'entendement

*de la doctrine de Caluin.*

ment & la volonté , elles sont si vicieuses en nous , que leur vice nous rend entièrement incapables d'obeir, qui à cette occasion peut estre appelée morale : & tant s'en faut que celle-là puisse nous excuser, que plus elle est grande & profonde en nous, plus sommes nous meschans , & par consequent dignes de punition & de haine. Car ce seroit vne chose estrange que pour estre si auares & si ambitieux , si gourmans & si yuſognes, si adonnez aux sales voluptez de la chair & si opiniaſtres en nos courroux, si enforcelez de l'amour des fausses diuinitez, ou si amateurs de nos opinions erronees, qu'à cause de cela il nous est entièrement impossible d'aimer Dieu & son image qui consiste en pieté & en veru, nous pretédissions n'estre pas coupables deuant Dieu de ce que sa Loÿ nous est impossible. n'eu donc est si bon & si equitable qu'il ne nous donne jamais de loix qui nous soyent impossibles eu égard a ceste premiere sorte d'impuissance : bien loin de nous punir pour les auoir violees. Mais bien loin aussi que ceste secon-



*Eſchantillon*

de le doieue empescher de nous donner celle qu'il nous impose, que s'il ne le faisoit il manqueroit aux choses dignes de sa diuinité, n'y ayant rien plus digne de Dieu que de cōmander aux hommes qu'ils imitent la sainteté dont il leur donne l'exemple. Que si, comme dit Caluin, il a ordonné que iamais homme n'accomplist sa Loy; c'est à dire, resolu de ne sanctifier aucun iusques à ce point qu'il n'y ait rien à redire en son obeissance, il en a de si bonnes raisons que sa creature ne l'en sçauroit accuser, qu'avec trop d'audace. Et ce seroit chose merueilleusement desraisonnable de luy imputer nostre corruption sous ombre qu'il ne la guerit pas, nostre cheute & calamité, sous ombre qu'il ne releue pas nos ruines.

Au moins, disent-ils, apres cela ne deueroit-il pas dénier aux repreneurs le Redempteur qu'il a donné aux autres. Et Caluin enseignant qu'ils n'ont point de part en ceste redemption, ne fait pas Dieu iniuste à la verité en ce qu'il punit les pecheurs, mais iuge dur & seuer merueilleusement, qui n'vse enuers eux



*de la doctrine de Calvin.*

d'aucune misericorde. Certes s'il auoit pleu à Dieu traitter tout le genre humain comme il a fait les demons, sans auoir aucun soin de nous releuer, nous n'aurions dequoy nous plaindre. Combien moins si en rachetant quelcun d'entre les humains il auoit voulu entierement exclurre de cette grace tout le reste? Que si Dieu l'a peu faire s'il l'eust voulu, & si l'Escripture enseigne qu'il l'ait fait, Calvin a peu sans faire aucun tort à la gloire de la misericorde de Dieu, maintenir la verité de l'Escripture. Et si Dieu ne l'a pas fait & que son Escripture ne l'enseigne pas; si est-ce pourtant que puis que Dieu l'a peu, sans blasme de trop de seuerité, quand Calvin l'auroit enseigné, il pourroit bien estre accusé de n'auoir pas entendu l'Escripture en ce poinct, mais non d'auoir attribué à Dieu chose indigne de sa nature.

Mais c'est à tort qu'on luy fait ce reproche. Voicy ses paroles sur ce celebre passage, Dieu a tant aimé le <sup>16.</sup> *16.* monde, &c. *Christ descauvre icy & montre la premiere cause & comme la source de nostre salut: & ce afin qu'il*

## Eschantillon

n'y ait nulle doute de reste en nous. Car nos esprits ne scauroyent trouver de repos insques à ce qu'on vienne à l'amour gratuite de Dieu. Tout ainsi donc qu'il ne faut point chercher toute la matiere de nostre salut ailleurs qu'en Christ, aussi faut-il voir dont Christ nous est venu, & pourquoy il nous est offert pour Sauueur. Icy nous est enseigné l'un & l'autre distinctement : que la foy en Christ apporte vie à tous : & que ce que Christ nous a apporté la vie, c'est d'autant que Dieu aimant le genre humain ne veut point qu'il perisse. Item. Voicy un los excellent de la foy, qu'elle nous garentisse de perdition eternelle. Car il a voulu clairement exprimer que combien qu'il semble que nous soyons nés à la mort, toutes fois deliurance certaine nous est offerte en la foy de Christ : & que par ainsi il ne faut point que nous craignons la mort laquelle autrement nous pend sur la teste & nous menace. Et a mis ce mot de generalité, Quiconque, tant afin de conuier tous hommes à participer à la vie, qu'afin d'oster toute excuse aux incredules. A cela mesme se rapporte aussi le mot de monde duquel il a usé cy dessus. Car iagoit qu'on ne

*de la doctrine de Caluïn.*

trouue rien au monde qui soit digne de la faueur & grace de Dieu, si est-ce pourtant qu'il se monstre propice à tout le monde, quand sans exception il exhorte tous hommes de venir à la foy de Christ, laquelle n'est autre chose qu'une entree en la vie. Au reste qu'il nous souuienne que la vie en Christ est tellement promise en commun à tous ceux qui croiront, que toutesfois la foy n'est point commune à tous. Car Christ est bien offert & comme mis en uenue à tous : toutes fois il n'y a que les esleus auxquels Dieu ouure les yeux afin qu'ils le cherchent par foy. Derechef sur ces mots. Voicy l'Agneau de Dieu, Iean 1.  
29. &c. En disant le peché du monde, il estend indifferemment cette grace à tout le genre humain : afin que les Iuifs ne pensent que le Redempteur soit enuoyé pour eux seuls. Mais de cecy nous recueillons que tout le monde est ensermé en une mesme condamnation, & d'autant que tous hommes sans exception sont coupables d'injustice deuant Dieu, qu'ils ont besoin de reconciliation enuers luy. Iean Baptiste donc en nommant generallement le peché du monde, nous a voulu faire sentir nostre propre misere.

### *Eschantillon*

*re, & nous exhorter à chercher le remede. Maintenant nostre deuoir est de recevoir & embrasser ce benefice qui est à tous offert : tellement que chacun en son endroit soit resolu que rien ne l'empeschera de trouuer reconciliation en Christ, pourueu qu'ils viennent à luy en foy.*

*Rom. 5.  
18.*

*Et au Commentaire sur l'Epistre aux Romains, il dit que l'Apostre S. Paul fait la grace commune à tous hommes, pource qu'elle est presentee à tous, non pas que par effect elle s'estende sur tous. Et en adioust la raison. C'est que combien que Christ ait souffert pour les pechez de tout le monde, & soit offert par la benignité de Dieu indifferement à tous : si est-ce neantmoins que tous ne l'apprehendent pas. Et au liure de la Predestination il soit vne objection presque en mesmes termes. Il obiecte, dit-il, puis que la grace de Christ est espendue sur tous ceux qui ont peché, qu'il faut que tous soyent esleus, ou bien qu'il n'y ait que les esleus qui aient peché. Or ie confesse que la grace de Dieu est tellement vniuerselle, que toutes-fois Dieu n'appelle pas à soy tous hommes selon ce propos determine dont parle S. Paul, qui emporte un mouue-*

*de la doctrine de Calvin.*

ment certain du S. Esprit. Et apres s'estre au mesme endroit proposé l'objection d'un sien aduersaire en ces termes; Puis que Iesus Chsist est le pardon pour les pechez de tout le monde, qu'il faudroit mettre les reprounez hors du monde si on les veut exclurre de la grace de Christ. Il respond que la solution de cet argument se pourroit prendre de ce qui est assez commun. Que Iesus Christ a suffisamment souffert pour tous, mais que l'efficace & le fruit de sa mort ne paruiet que iusques aux estens. Puis apres auoir apporté vne seconde response, il conclud en fin, que la dispute n'est point, à sçauoir, si Iesus Christ est venu pour purger les pechez de tout le monde. Car cela est, dit-il, sans contredit. Mais cependant ceste sentence se doit conioindre à l'opposite, qu'il est venu à celle fin que quiconque croira en luy ne perisse point, mais obtienne la vie eternelle.

Et comme ainsi soit qu'il enseigne vniuersellement que nous ne pouuons obtenir remission de nos pechez qu'a cause de la mort du Redempteur, pource qu'il faut necessairement que Dieu haïsse le peché, & que

*Cōment  
sur S.  
Iean ch  
3. 16.*

## Eschantillon

*Le sang de Christ entretenne afin de nous rendre Dieu appaisé, il dit aussi constamment que Dieu veut que tous hommes soyent saueuz, pourueu qu'ils se conuertissent à luy par foy & repentance. Outre ce que i'en ay allegué ailleurs, ce passage est memorable. Dieu au regard de la Loy & de toute la doctrine des Prophetes prononce qu'il veut que tous soyent saueuz. Et a dire la verité si nous considérons bien a quelle fin tend la doctrine de Dieu, nous trouuerons que tous indifferemment sont appellés a salut. Car la Loy a esté la voye de la vie, ainsi que tesmoigne Moïse, C'est icy la voye, cheminés en icelle. Item, c'est icy vostre vie. Dauantage Dieu s'est luy mesme offert de son bon gré au peuple ancien pour luy faire misericorde: finalement la doctrine celeste doit vinifier vn chacun. Et l'Euangile quoy? c'est la puissance de Dieu en salut à tous croyans, dit S. Paul. Ce que dit icy Ezechiel est tres-veritable, que Dieu ne veut point la mort de celuy qui perit, quant au regard de la doctrine: car, l'exposition s'ensuit incontinent apres, conuertissez-vous & vous viurez. Pourquoi Dieu ne se*

*Cōment  
sur Eze  
chiel ch.  
18. 33.*

### *De la doctrine de Calvin.*

delecte-il point de la mort de celuy qui meurt? pource qu'il conueint tout le monde à repentance & ne refuse personne: puis qu'ainsi est donc il s'ensuit qu'il ne prend point de plaisir à la mort de celuy qui meurt. Et afin qu'on ne luy obiecte pas qu'il attribue à Dieu de témoigner en sa parole de vouloir vne chose que neantmoins il ne veut pas, il dit ailleurs que Dieu ne desire rien plus sinon que les pecheurs reuiennent au chemin de salut : & represente en son Commentaire sur le douzième chapitre de S. Iean, nostre Seigneur Iesus en ceste maniere , c'est qu'ayant laissé pour quelque temps la personne de iuge souverain , il offre le salut indifféremment à tous, & estend benigne-ment ses bras à tous , afin que tous ayent plus grand courage à se repentir. De sorte qu'en prononçant ces mots, Si aucun oit mes paroles, & ne les croit point, ie ne le iuge point, &c. c'est autant comme s'il eust dit : Voicy ie suis icy pour appeller tous, & ayant mis en oubly la personne de iuge , i'ay cette seule deliberation d'attirer tous generalement, & de deliurer de mort ceux qui semblent estre desia deux fois perdus. Puis dere-

### *Eschantillon*

chef : Il est vray que bruslant d'un grand desir de vostre salut, ie me deporté de mon droit de vous condamner, & tasche entierement de sauuer ce qui est perdu : mais ne pensés pas que pour cela vous soyés eschappés de la main de Dieu. Car quand i'auroy la bouche du toût fermée, si est ce toutes fois que la Parole qui aura esté reietée & mesprisée de vous, sera seule iuge competent. Apres cela que veut-on de Calvin dauantage. A-il pas assez tesmoigné qu'il ne tient pas à Dieu que tout le monde ne soit sauué ? Que la porte de la misericorde n'est fermée à personne ? Que par consequent Christ a fait la propitiation des pechez de tous les hommes ? S'il auoit, par maniere de parler, pris le sang de la nouuelle alliance entre ses mains, pour en arrouser, par le commandement de Dieu tout le genre humain, auroit-il fait dauantage ?

Calvin ayant vne fois monstré à ceux de l'Eglise Romaine, qu'il parle de la charité de Dieu enuers le genre humain, en ce qui concerne la mort de nostre Seigneur Iesus, autant & plus auantageusement que sçau-



*de la doctrine de Caluin*

royent faire ceux qui le veulent rendre odieux aux peuples, il ne deuroit auoir procez à demesler avec personne touchant ce que icesle mort de Christ n'est pas également annoncée à toutes les nations de la terre, & que jadis les Gentils n'en ont eu aucune cognoissance. Car s'il y a de la difficulté à concilier ces deux choses ensemble, que Christ est mort pour tous les hommes, & que neantmoins tous les hommes n'ont pas cognoissance de ceste mort par la predication de l'Euangile, il n'y doit pas estre plus empesché que ses aduersaires. De fait, c'est chose entierement inutile de recourir aux eschappatoires de quelques vns, qu'ou bien Dieu refuse la predication de sa parole à certains peuples à cause des pechez de leurs ancestres, veu que tous nos ayeuls, qui sommes Gentils d'extraction, out esté également idolatres. Ou bien qu'il preuoit que la predication ne produiroit point de fruit parmi certains autres, : veu que si Dieu mesme ne desploye la puissance de son Esprit en la conuersion des cœurs, nous l'auons tous également

### *Eschantillon*

dur & incapable d'estre amolli par la seule predication externe. Ou bien finalement qu'il a donné cela aux merites cachez de quelques vns : car, bon Dieu ! quels merites peuuent auoir des gens sur qui, à cause de leur peché, la malediction de Dieu repose naturellement, & qui sont enfans d'ire dès le ventre ? On ne peut donc auoir recours qu'à la seule volonté de Dieu dont il n'y a moyen de sonder la cause.

Et neantmoins encore pourroit icy Calvin prendre quelque aduantage. Car est-ce pas assez à luy d'auoir disertement enseigné que Dieu tesmoigne sa misericorde aux plus barbares nations en sa patience & en sa longue attente ? Apres auoir discouru de la cognoissance qu'on peut auoir de Dieu par la voye de la nature, voici dit-il, *mon intention ; c'est que Dieu non seulement ayant vne fois crée ce monde, il le soustient par sa puissance infinie, il le gouuerne par sa sagesse, garde & preserve par sa bonté, & surtout a le soin de regir le genre humain en iustice & droicteure ; le supporter par sa misericorde, l'auoir sous*  
sa

*Inst. lib.*

*1. chap.*

*2. § 1.*

de la doctrine de Calvin.

sa protection : mais aussi qu'il nous faut croire qu'il ne se trouuera ailleurs qu'en luy une seule goute de sagesse &c. Item, Inst. lib. 2. chap. 3. §. 7.  
Quelle matiere nous donne t'il de considerer sa misericorde, quand il ne laisse point de continuer sa liberalité si long-temps enuers les pecheurs, quelques miserables qu'ils soyent, iusques à ce qu'ayant rompu leur perversité par sa douceur, il les ramene à soy comme un pere ses enfans, voire par dessus toute bonté paternelle ? Et finalement, car cela sera traité vn peu plus ample-  
ment ailleurs, Que le Seigneur en ce qu'il a usé d'autres fois de douceur & benignité enuers les Gentils a monstéré qu'il est celuy auquel il nous faut convertir & retourner, si nous desirons auoir bien & Cōment Rom 2.  
felicité, & quāt & quāt qu'il nous redresse en assurance d'attendre & recēoir mi-  
sericorde de luy. De vray, inuiter à repentance, est assés tesmoigner sa misericorde, & tesmoigner sa misericorde est en quelque façon annoncer le benefice de la mort de son Fils.  
D'où vient que ceux qui l'ont suivi, & qui, si nous auions quelque autre Maître que nostre Seigneur Iesus, se con-  
teroyent entre les disciples de ce

## Eschaniillon

Parents.

personnage, interpretans comme luy  
des Gentils ce mesme passage Rom.  
2. 4. ne cognoissant pas que la benigni-  
té de Dieu te conduis a repentance, y  
dressent ce Commentaire. Conduire  
est plus qu'inuiter; voire mesmes qu'ap-  
peller; car c'est mener comme par la main  
à resspicence. Et partant cest indigne-  
ment qu'on en abuse à pecher licentieu-  
sement. L' Apostre donne donc à entendre  
que les bien-faits de Dieu, mesmes en-  
uers les impies, sont si grands, qu'ils en-  
denroyent estre conduits à rechercher &  
honorer vn Dieu si benin. Ce sont donc  
des bestes & non des hommes, qui n'en  
estans point émeus, en prennent occasion  
de mespriser Dieu davantage. Ce sont  
des fols à toute extremité, qui osent en-  
core se promettre impunité en vne mes-  
chanceté si estrange. Au reste pour bru-  
tale que soit cette stupidité, c'est vne  
ignorance malicieuse; de la-  
quelle ils ne se peuuent excuser: car  
c'est vne espèce de monstre de passer non-  
chalamment par dessus vne chose si ma-  
nifeste. Icy donc nous est enseigné qu'il  
est la cause de la patience de Dieu en-  
uers les impies, afin qu'on ne pense pas  
qu'il ne s'irrite pas de leur meschanceté

## de la doctrine de Calvin.

ou qu'il l'approuue & la recompense. Ce Pere tres-benin les appelle à repentance, differant leurs supplices, afin qu'ils ne perissent en leur impieté. Ainsi deuant le déluge il donna au monde six vingts ans de temps pour se convertir. Ainsi S. Pierre nous enseigne que Dieu differe par sa patience le iour du Seigneur, ne voulant point qu'aucun perisse, mais que tous viennent à repentance. Puis ils adioustent: Or ne faut-il pas croire que cela contrevienne à la iustice de Dieu. Car sa iustice veut que les impies, entant qu'ils sont impies, soyent punis de mort; selon cette reigle, l'ame qui aura peché mourra. Mais la bonté en dilayant les peines innite à repentance les impies, afin qu'ils ne soyent plus impies, mais qu'ils deviennent pures creatures de Dieu, en la perdition desquelles il ne prend nullement plaisir, mais au leur salut, selon ce passage, Je suis viuant, que ie ne veux point la mort de celuy qui meurt, mais qu'il se conuertisse & qu'il viue. Soit donc que les impies viennent à repentance ou non, la bonté de Dieu parvient tousiours à son but, & ne contrarie nullement à sa iustice. Car s'ils viennent à repentance,

la bonté atteint son but en leur salut, en ce que les peines qui leur estoient deuës sont trāsferes sur Christ le Mediateur. S'ils mesprisent la benignité de Dieu, derechef en cela la bonté de Dieu obtient ce qu'elle s'est proposé, c'est qu'ainsi Dieu paroist n'estre point authour de leur perdition, & que sa iustice en les punissant en sera d'autant plus illustre. Et poursuivent, qu'au reste la recom-

*Piscator*

pense que l'Apostre promet soit au Iuif; soit au Grec, en ces paroles, A ceux qui par patience à bien faire cherchent gloire, honneur & immortalité, la vie eternelle, ne peut estre donnée à personne qu'en la seule consideration de Christ, bien que l'Apostre semble parler des bonnes œuvres. Mais qu'il s'exprime ainsi pource que iusques là il n'a parlé que de ce qui se peut cognoistre par la voye de la nature: de laquelle il est aisé de recueillir que Dieu est remunerateur de la pieté & de la vertu, mais non pas que Christ nous a merité le salut par sa mort ignominieuse. Tout cela conformement à la doctrine de ce grand homme dont i'entreprend icy la défense, qui sur ce celebre passage, 2. Pierre 3. 9. ne voulant point

*de la doctrine de Calvin.*

*qu'aucun perisse, mais que tous viennent à repentance, dit, qu'il faut estimer qu'il en prend tout ainsi de la durée du monde, que de la vie de chacun homme. Car Dieu prolongeant le temps à cestuy-cy & à cestuy-là; en endure & supporte iusques à ce qu'il s'amende: semblablement il differe la fin du monde, afin qu'il donne à tous loisir de se repentir. De sorte que c'est un amour de Dieu admirable envers le genre humain, de vouloir que tous soyent sauvez & estre prest de recueillir à salut des gens qui s'en alloyent perir d'eux mesmes.*

Mais en fin, disent ces Messieurs, que sert à Calvin de louer si haut la misericorde de Dieu, veu qu'en despoüillant l'homme de son franc-arbitre, il le rend non seulement incapable de se conuertir aux tesmoignages de la patience de Dieu, mais mesmes de croire en l'Evangile quand on le luy annonce? Car est-ce pas cela dresser vn banquet deuant des gens a qui il est impossible d'en manger, & puis les punir rigoureusement de ce qu'ils n'ont pas estendu la main vers les viandes? Si ainsi est qu'il n'y

### *Eschantillon*

- ait en l'homme aucune faculté de croire en l'Evangile de Christ, ou la sagesse de Dieu le deuoit empescher de le leur offrir ainsi inutilement, ou si l'amour qu'il nous porte l'a induit a le nous presenter indifferemment, il deuoit aussi donner indifferemment la grace d'y croire. Or est-ce
- Rom. 5. 18.* icy ou il faut permettre a ce grand homme de s'esmouuoir, n'estant pas possible que qui a quelque zele à la gloire de Dieu, quelque veine d'humilité chrestienne, supporte cette hardiesse sans indignation. C'est pourquoy à ceste question, *Quel propos y a-il que Dieu appelle à soy ceux*
- Inst. lib. 3. ch. 22. §. 10.* *lesquels il sçait qu'ils n'y viendront point;* il respond en quelque lieu par les paroles de S. Augustin. *Veux tu disputer avec moy de cette matiere? Plustost émerueille toy & t'escrie avec moy, O hantesse ! Accordons nous tous deux en esbahissement, afin de ne point perir en erreur.* Et de vray, si d'un costé la Parole de Dieu enseigne que
- 1. Cor. 2. 14.* *l'homme animal ne peut comprendre les choses qui sont de Dieu :* *Que la chair*
- Rom. 8. 7.* *ne se peut assubiectir à la Loy de Dieu:* *Que les hommes ont naturellement*



*de la doctrine de Calvin.*

*un cœur de pierre, & par consequent inflexible à la volonté de leur Createur: Que de nature ils sont enfans d'ire, morts en leurs fautes & pechez: Que nul ne peut venir à Christ si le Pere qui l'a enuoyé ne le tire, & choses semblables. Et que de l'autre elle nous apprenne constamment, comme Calvin le recognoist, que Dieu veut que tous hommes soyent sauuez, & qu'il les conuie & serieusement & affectueusement à repentance, veut-on, s'il ne peut demester toutes les difficultez qui se presentēt en cela, ou qu'il dero-ge quelque chose à la bonté de Dieu enuers le genté humain, ou qu'il attribue quelque chose à l'esprit humain contre l'Escripture, plustost que de confesser modestement son ignorance? Il luy suffit donc de respondre qu'encore que l'invitation exterieu-  
re n'auance rien sans l'operation interieure de Dieu, on n'en doit imputer la faute qu'à la peruersité de l'esprit humain, & non à la bonté diuine.*

De fait, il faut icy considerer la bonté de Dieu, sa liberté à la dispenser, & la sagesse qui se peut remarquer en ceste dispensation. Quant

Ezech.  
36. 26.  
Ephes.  
2. 1.  
Iean 6.  
44.

### *Eschantillon*

à sa bonté, certes ce seroit vne chose comme prodigieuse si'on s'offensoit qu'il en vst enuers les hommes, veu que c'est son propre d'estre bon & misericordieux ; que nous ne tenons nostre estre & nostre conseruation que de ces siennes proprietéz ; que si nous n'estions point si meschans, l'authorité du commandement par lequel il nous ordonne d'estre benins & pitoyables, ne nous y deuroit pas plus efficacement inciter que le bel exemple qu'il nous en donne ; & qu'en fin pour liberalement qu'il vse de sa misericorde enuers nos voisins, il ne nous en dechet rien pourtant, les tresors de sa misericorde estans aussi ouuerts pour nous, si nous ne nous en montrons point indignes. De sorte que nostre œil ne doit point estre mauuais de ce que quant à luy il est bon, ni enuier sa benignité à ceux à qui il la tesmoigne en quelque maniere. Pour le regard de sa liberté, veu qu'il ne doit rien à personne, que ce qu'il communique de bien à sa creature mesmes parfaitement sainte, c'est de pure bonté ; ce qu'il en fait sentir à la pecheresse, c'est de pu-

*De la doctrine de Caluin.*

re misericorde, qui est-ce qui luy rail-  
lera les mesures de sa liberalité, &  
luy ordonnera d'vser autrement qu'il  
ne luy plaist de sa misericorde enuers  
ceux qui de droit ne peuuent rien at-  
tendre de luy que les vengeance de  
sa iustice ? Luy permettrons nous  
point au moins la liberté qu'aucun  
de nous ne souffriroit qu'on luy ra-  
uist, non seulement de distribuer à sa  
volonté ses biens à ses amis, mais d'en  
faire également, comme il luy plaist,  
ou inegalement participans ses enne-  
mis mesmes ? Finalement quant à sa  
sagesse, c'est vne outrecuidance di-  
gne de toutes sortes de rigoureux  
chastimens, que de vouloir determi-  
ner de ce qui luy conuient ou ne luy  
conuient pas, & penser ordonner des  
actions qui en dependent. Et si non  
les singes seulement & les cheuaux,  
mais les serpens & les insectes se vou-  
loyent mesler de controller le gou-  
uernement des Estats, ils auroyent  
plus de raison que nous de censurer  
la conduite de la sagesse de Dieu  
quelque chose qu'elle entreprenne.  
Mais au fonds qu'est-ce qu'en cela  
nostre raison trouue à reprendre ? Si

*Echantillon*

Dieu inuitoit les arbres & les cail-  
loux a se repentir , on le pourroit  
trouuer estrange. Comme ces crea-  
tures ne peuvent auoir commis de  
peché, aussi ne se peuvent elles repen-  
tir , priuées qu'elles sont mesmes de  
sentiment pour rien soit ouïr soit ap-  
percevoir des inuitations à repentan-  
ce. S'il donnoit des commandemens  
de pieté & de iustice aux animaux de-  
stituez de la raison , il y auroit subiet  
d'estbahissement : ce que ceste sorte  
de creatures a de viuacité d'imagina-  
tion n'ayant aucune proportion avec  
vn si grand effect que de pouuoir  
concevoir la difference qui est entre  
la pieté & l'impiété, le vice & la ver-  
tu , & obtempérer aux loix qui inci-  
tent à l'vn & retirent de l'autre. S'il  
ordonnoit a des aucugles d'admirer  
sa puissance en contemplant le soleil,  
ou a des sourds d'estre attentifs à la  
predication de l'Euangile de son Fils,  
s'il ne leur ouuroit ni les oreilles ni  
les yeux, on s'en pourroit émerueil-  
ler, veu que la priuation des organes  
nécessaires pour cela, engendreroit  
en eux cette impuissance physique  
ou naturelle dont i'ay parlé cy dessus,

*de la doctrine de Calvin.*

qui les empescheroit d'obeir quand ils en auroient le plus vehement desir du monde. Mais puis que ses innu-  
rations, ses commandemens & ses loix s'adressent à des hommes qui ont tous les sens du corps ouuerts aux obiects qui se presentent deuant eux, & l'entendement extrêmement éveillé à toutes autres choses qu'à celles qu'il leur commande, & les affections viues & vehementes à merueilles vers tout ce qui n'a rien de commun avec l'Evangile de Christ, ou qui luy est directement contraire, y a-il rien contre sa sagesse s'il vse, ou de sa bonté pour les ramener par ses invitations à leur salut, ou de son autorité pour leur imposer les loix auxquels la nature de leurs facultez les oblige? S'ils n'obeissent pas, il en faut accuser leur peruersité; s'ils ne le peuvent pas, c'est que leur peruersité est extrême. Mais ni il n'est nullement nécessaire que ceste invincible peruersité resserre tellement les actions de sa bonté, qu'il n'en puisse vse envers eux: ni qu'elle luy oste l'autorité d'exiger d'eux ce qu'ils ne peuvent eschapper sans crime. Il les conue

### *Echantillon*

à se repêtir. Qui les en empesche que leur meschanceté & l'obstination insurmontable qu'ils ont à mal faire? Il leur commande de croire qu'il a esté si pitoyable enuers eux que d'envoyer son Fils en la terre pour les racheter s'ils ne reiettent point ceste grace par incredulité, & le leur a ainsi fait prescher par ses Apostres, & le fait encore continuellement resonner à leurs oreilles, qu'est-ce qui les induit à le dementir en ne le croyant pas, & accuser de fourbe ses seruiteurs quand ils leur annoncent ceste nouuelle? Selon ce que dit l'Apostre, *Que qui ne croit pas, fait Dieu menteur, pource qu'il ne croit pas au tesmoignage que Dieu nous rend qu'il nous a donné la vie en son Vniue.* S'il n'estoit pas vray, ils pourroyent se defendre ainsi deuant son iugement. Il n'y auoit point de raison d'adiouster foy a vne nouuelle non veritable. Mais l'Euangile ne crie autre chose sinon que Dieu les veut sauuer, pourueu qu'ils croient en son Fils, que s'ils perissent il n'y aura que leur incredulité qui en fera cause. Si, encore qu'il soit vray, ils ne le scauoyent

1 Ieans.  
30.11.

*de la doctrine de Caluin*

uoient pas , ils diroyent , comment  
eussions nous creu en celuy duquel  
nous n'auions point ouy parler? Mais *Rom. 10*  
le son de la voix de ses Apostres est  
allé par toute la terre. Et s'il y a quel-  
que nation si esloignée que ceste  
voix , pour forte & resonante qu'elle  
ait esté, n'y ait point encore retenti,  
ce qu'elle se monstre si sourde a la  
voix des Cieux & de la Prouidence  
de Dieu , monstre assés qu'elle ne  
presteroit point l'oreille à celle de l'E-  
uangile. Partant ceste impuissance de  
croire ne vient sinon de pure mes-  
chanceté. Or n'y a il point de raison  
que la meschanceté des hommes em-  
pesche Dieu d'estre bon : encore  
moins que leur obstination en la re-  
bellion l'empesche d'estre Dieu,  
pour exiger d'eux , & ce qui conuiét  
a l'excellence de sa nature pour ce  
qu'il est saint , & ce qui conuiet a  
l'excellence de la nostre , qui auoit  
esté doüee d'incomparables facultés  
pour croire aux choses vraies &  
suiure celles qui sont bonnes. Et cer-  
tes nostre Seigneur nous a comme  
pourtraict deuant les yeux en vne  
excellente parabole , quelle est la na-

*Luc 14.  
16. 37 &  
Juians*

### *Eſchantillon*

ture de ceſte impuiſſance , & combien elle eſt indigne d'excuse deuant Dieu. C'eſt que ce qui empesche les hommes de s'approcher de ce merueilleux banquet qu'il dreſſe deuant eux & auquel il les conuie en ſon Euangile , n'eſt pas vne impoſſibilité ſemblable à celle d'un homme perclus des pieds , & qui ne peut marcher , ou d'un manchot qui ne peut eſtendre la main , ou d'un homme autrement eſtropié de ſes membres, à qui la volonté, quelque vehemente qu'elle fuſt, n'en peut rendre l'vſage. Mais elle conſiſte en ce que les hommes ont naturellement les affectionſ du cœur ſi attachées aux choſes de la terre , qu'il ne ſe peut faire qu'ils ſ'en déprennent. *Iay acheté*, diſent-ils, *vn heritage*, il faut que ie l'aille voir: & *i'ay pris femme en mariage*, il faut que ie m'en aille avec elle: & *i'ay acheté cinq couples de bœufs*, il faut que ie les eſprouue. Juſques à mettre les mains deſſus les ſeruiteurs de Dieu & à les outrager, s'ils les importunent de ſe repentir & de croire. Sur quoy Calvin fait ce Commentaire. *Voila comment il arrive communement que les*



*de la doctrine de Calvin.*

meschans escument plus furieusement contre Dieu, d'autant qu'il les sollicite de plus près de leur salut. Et par ces paroles Christ signifie que les Juifs ont tant esté adonnez au monde & aux choses terriennes, qu'ils n'auoyent pas le loisir d'approcher de Dieu: comme à la verité quand les sollicitudes du monde nous tiennent enuolopez, ce sont autant d'empeschemens qui nous retirent du Royaume de Dieu. C'est bien une honte & grande vilenie, de ce que les hommes estans créés pour la vie celeste, sont du tout transportez apres les choses terriennes & caduques, par une stupidité brutale: mais c'est une maladie commune. Ainsi a peine s'en trouue il de cent vn qui prefere le Royaume de Dieu aux richesses caduques. Et combien que tous ne soyent pas malades d'une mesme sorte de maladie, toutesfois chacun à sa cupidité qui le tire de l'autre part: tellement que tous s'égarent en une sorte ou en autre. Il faut noter dauantage que les hommes profanes prennent de belles couleurs & bien apparentes pour reietter la grace de Dieu: comme si leur lascheté estoit à excuser, quand estans du tout adonnez aux af-

### *Eschantillon*

*faïres de la vie presente, ils ne tiennent conte de l'heritage celeste. Mais nous voyons icy comment Christ nous oste d'entre les mains toutes ces vaines conuertures, sous lesquelles nous nous flattons nous mesmes, &c. Je laisse maintenant à iuger à toute personne raisonnable ou si vne ame naturellement engagee sous des vices de cette nature, si profondement enracinez comme ils sont en nous & en si grand nombre, à quelque franc arbitre par lequel elle puisse d'elle mesme croire en l'Euangile de Christ quand on le luy presente. Ou si n'auoir point de franc arbitre pource que nous sommes entierement sous l'empire de nos passions, nous pourroit estre legitime excuse deuant Dieu, si nous ne croyons pas en son Euangile. Ou pour la fin, si pour représenter la nature de l'homme telle qu'elle est, viue au mal à merueilles, mais entierement morte au bien, & cependant crier si haut que Dieu inuite les hommes à repentance & à salut, Calvin doit estre accusé d'estre ennemi de sa misericorde.*

*Mais quoy que ç'en soit, dira*

*de la doctrine de Calvin.*

peut-estre icy quelcun, tant y a qu'il enseigne que Dieu a predestiné vne grande partie des hommes à mort & condamnation, & d'une predestination certaine & irreuocable : & ce sont termes qui se trouuent assez communement en ses liures. Comment donc est-ce que cela se peut accorder avec ce qu'il enseigne que tous hommes sont appelez à salut, voire avec tant d'affection & tant d'instance? Certainement pour difficile que fust la reconciliation des sentimens de Calvin en ce point, si seroit-il de l'equiré de ces Messieurs d'attremper l'aigreur que cause en leurs esprits la consideration de ceste predestination, de la pensee des choses que ce personnage dit en recommandation de la bonté & misericorde diuine. Je vous prie, y pourroit-il auoir en ses autres expressions quelque chose de si dur & de si scabreux que ces paroles icy n'amollissent? Ceste *injustice*, dit-il, dont par'e l'Apostre en ces mots, Dieu est-il seulement Dieu des Iuifs, ne l'est-il point aussi des Gentils? &c. n'appartient point plus aux Iuifs qu'aux Gentils. Or il

### *Eschantillon*

*estoit bien besoin d'insister sur ce point : afin qu'on donnaſt au regne de Christ son eſtendue par tout le monde. Il ne demande donc pas ſimplement & preciſement ſi Dieu eſt createur des Gentils : ce qui eſtoit tout notoire & hors de doute : mais à ſçauoir mon ſ'il ne ſe veut pas declarer auſſi leur Sauueur. Car puis qu'il a fait egal tout le genre humain, & l'a rangé tout à vne condition, ſ'il y a quelque difference entr'eux, elle vient de Dieu & non pas d'eux, veu qu'ils ſont egaux en toutes choſes. Que ſ'il eſt vray que Dieu veut faire tous peuples de la terre participans de ſa miſericorde, le ſalut & la iuſtice, qui eſt neceſſaire à ſalut, ſ'eſtend auſſi à tous. Parquoy ce mot de Dieu emporte icy vne relation & correſpondance mutuelle, qu'on trouue ſouuent en l'Eſcriture, Je ſeray voſtre Dieu, & vous ſerez mon peuple. Ierem. 30. 22. Car ce que Dieu pour vn temps ſ'eſt eſleu vn peuple peculier, n'abolit point ce principe de nature, Que vous ſont formez à l'image de Dieu, & entretenus au monde en eſperance de l'eternité bien-heureuſe. Toutes-fois il vaut mieux ſ'employer à expliquer vn peu plus nettement la doctrine de*

*de la doctrine de Calvin.*

Caluin, & en accordant ses hypothes donner aux manieres de parler dont il se sert, vne interpretation qui raisonnablement leur conuienne.

Il est, comme i'ay remarqué cy dessus, assés euident par les escrits de ce grand seruiteur de Dieu, que le dessein de la creation d'Adam & de tous ses descendans, s'ils fussent demeurés en leur premier estat, n'a rien de commun avec ce qu'ordinairement nous nômons la Predestination: ceste action de Dieu qui porte ce nom en la Theologie ayant pour obiet l'homme tóbé en malediction & non en l'integrité de sa nature. De sorte que si quelques-fois il s'exprime en telle maniere qu'il semble aucunement mesler le conseil qui regarde la creation, & celuy de la predestination ensemble, il en faut prendre la raison de ce que tous les conseils de Dieu estans eternels, & formés, s'il faut ainsi parler, en vn mesme moment, pource que Dieu n'a pas besoin d'agencer, comme nous faisons, en sa pensée, ses conseils les vns apres les autres selon la difference des obiets ou de leurs qua-

lités, ce personnage conſidere quelques fois tous ces décrets en gros. Mais au reſte il ne laiſſe pas ailleurs de diſtinguer exactement entre les diuers reſpects que ceſte volônté de Dieu ainſi conſiderée en confus, a aux diuers obiets qu'elle ſ'eſt propoſée, ou aux diuerſes qualités & conditions qui peuuent eſtre en vn meſme obiet en meſme temps, ou ſ'y ſucceder les vnes aux autres. Or en la premiere integrité de l'homme, la qualité que Dieu conſideroit en luy eſtoit ſa ſaincteté, & partant Dieu traittoit avec luy ſelon la relation qu'il auoit avec ſa pure & ſimple bonté, ſans aucune fibre de miſericorde. Mais Dieu ne peut plus conſiderer l'homme en cet eſtat puis qu'il en eſt decheu : il faut neceſſairement qu'il le conſidere comme pecheur, & partant comme ayant vne qualité qui ſe refere ſoit a ſa iuſtice, ſoit a ſa miſericorde, ſoit en diuers egards a toutes ces deux propriétés enſemble. Dieu donc ayât pour obiet deuât les yeux les hōmes en cet eſtat, eſtoit en pleine & abſoluë liberté de le punir ſelon ſa iuſtice ſ'il vouloit, ſans vſer d'aucu-

*De la doctrine de Calvin.*

ne misericorde enuers luy, non plus qu'enuers les Anges deceus de leur origine. Mais neant moins ce que Christ & l'Apostre S. Paul appellent en Dieu vne certaine inclination à aimer les hommes, ( ce qu'ils semblent ainsi nommer comme par excellence, en comparant l'homme avec les autres ouurages de Dieu, quels qu'ils soyent ) ayant preualu, il a resolu d'vser enuers luy de misericorde. Et partant c'est en la dispensation de cette misericorde qu'il faut considerer la predestination.

Calvin donc considere la misericorde de Dieu en deux manieres. Car premierement il remarque en la parole de Dieu vne soit vertu, soit propriété en luy, qui le rend enclin à pardonner vniuersellement à tous ceux qui sont repentans, mais aussi qui exige necessairement la repentance de la creature pecheresse. De façon que si elle ne se repent & ne croit, il est impossible que Dieu luy pardonne. Voila pourquoy il dit, que la *misericorde de Dieu est ouuerte à tous les pecheurs : mais pourueu qu'ils y recourent par foy. Que Dieu ne desire rien plus*

*Iean 3.*

*16.*

*Tit. 3. 4.*

*Comm.*

*Rom. 11*

*32.*

## Eschantillon

sinon que ceux qui perissoient & se precipitoient en la mort, retournent au chemin de salut. Mais qu'il faut noter comment c'est que Dieu veut que tous hommes soyent sauuez, assauoir apres qu'ils se seront conuertis de leurs voyes.

Côm. 2. Que Dieu veut que tous hommes soyent  
Pier. 1. sauuez. Mais qu'il faut obseruer cet ordre que Dieu est prest de recevoir tous à repentance, afin que nul ne perisse.

Comm. Rom. 9. 17. Que pour iouyr de cette miserable succession de peché, il suffit d'estre homme, pource qu'elle reside en la chair & au sang : mais que pour iouyr de la iustice de Christ, il faut necessairement estre fidele, d'autant que la communion d'ice-luy s'acquiert par foy. Et pour n'accumuler point beaucoup de passages, ie me contenteray d'un qui en vaudra plusieurs autres. Sur ces mots,

Ezech. 18 21. 22. Et si le meschant se conuertit de toute son iniquité, &c. Il escrit ainsi. Dieu par cette sentence en donnant esperance de pardon, inuite & exhorte à repentance tous ceux qui ont transgressé la Loy. Or ceste doctrine est sur toutes digne d'estre bien notee, c'est à sçauoir que Dieu a les bras estendus par maniere de dire, & se presente de son bon gré



*de la doctrine de Calvin.*

prést à recenoir tous ceux qui se voudront amender. Car le desespoir nous precipite en vne rage : & d'auantage il endurecit nos cœurs par obstination. Voila pourquoy il est necessaire que Dieu nous tende la main pour nous inniter à repentance. Voila donc à quoy sert ce passage du Prophete, à sçauoir si tost que le pecheur se sera conuertí de son impieté, que Dieu le recerra à mercy. Nous voyons maintenant qu'il ne nous reste aucune excuse, si nous ne sommes incitez & émeus quand Dieu nous innite si doucement & humainement nous testifiant qu'il nous sera propice, si nous desirons de tout nostre cœur de nous reconcilier avec luy. Mais il requiert vne repentance vraye & non feinte. Or c'est icy vne bonté de Dieu qui ne se peut assez priser, de ce qu'il luy plaist mettre tous nos pechez en oubly, si tost qu'il aperçoit que nous auons desir de nous retourner à luy, voire à bon escient & sans fiction.

Puis apres il considere cette misericorde entant qu'elle ne se contente pas d'exiger la repentance, comme vne condition necessairement préalable à la remission des pechez; mais

### *Eſchantillon*

qu'elle a reſolu de creer elle meſme  
ceſte condition en la creature à ce  
que reellement & de fait elle obtien-  
ne la remiſſion des offenſes. Et au lieu  
que la precedente eſt vniuerſelle, cel-  
le cy eſt particuliere: au lieu que celle  
là depend d'une condition, & que  
par conſequent l'euenemēt eſt en cet  
egard en ſuſpens, celle icy engendrāt  
la condition rend l'euenement cer-  
tain & neceſſaire: au lieu que celle-là  
eſt conſtante autant comme la con-  
dition l'eſt, celle-cy eſt inuariable,  
pource que d'elle vient neceſſaire-  
ment la condition & la perſeuetance  
d'icelle. De celle cy donc il parle en  
cette maniere ſur ces mots, *L'auray*

*Rom 9.* *mercy, &c. Par cet oracle Dieu a de-*  
*15.* *claré qu'il n'eſt detteur à homme quel-*  
*conque : & que tout le bien qu'il leur*  
*fait procede d'une beneficence & libe-*  
*ralité gratuite : en apres que cette be-*  
*neficence ſienne eſt libre, tellement qu'il*  
*en uſe enuers ceux que bon luy ſemble:*  
*finalment que ce qu'il fait bien à cer-*  
*tains hommes & eſtend ſa bonne affe-*  
*ction enuers eux & non pas enuers tous,*  
*il eſt impoſſible d'en trouver cauſe*  
*plus hante que ſa volonté. Car les mots*  
*emportent*

de la doctrine de Calvin.

emportent autant comme s'il eust dit, celui auquel i'ay une fois determiné de faire misericorde, iamais ie n'en osteray ma misericorde : & ie continueray ma benignité à iamais enuers celui vers lequel i'ay arresté d'estre benin. Certes en parlant ainsi il allegue son decret volontaire, pour la souueraine & la plus haute cause de ce qu'il fait grace, & quant & quant donne à entendre qu'il a specialement destiné sa misericorde à certaines personnes. Car d'un costé ceste façon de parler precisément & qu'il tranche ainsi court, exclut toutes causes venans d'ailleurs, comme quand nous voulans attribuer une puissance de disposer de quelque chose, nous disons, ie feray ce que ie feray : D'autre part aussi ces mots, à qui, expriment notamment que la misericorde ne sera point commune indifferemment à tous. Car c'est oster à Dieu cette liberté, depuis qu'on vient à lier son eslection aux causes externes.

Et de cette diuerse maniere de considerer la misericorde de Dieu, resultent necessairement deux choses. La premiere, que posant, comme nous l'auons remarqué cy dessus, qu'il est impossible que Dieu nous

### *Eschantillon*

soit propice sinon par la satisfaction de Christ, d'autant *qu'il est necessaire qu'il haïsse le peche*, & par consequent ceux en qui le peché se trouue, il parle de la mort de Christ en deux diuerses manieres. Car entant qu'elle a osté l'empeschement à cette premiere sorte de misericorde qui est cōme vne espece de vertu en Dieu & a sa relation à quelque condition qui est en la creature, il dit, comme nous auons veu cy dessus, *qu'il est mort vniuersellement pour tous hommes, pour uen qu'ils croient en luy*. Mais entant qu'il n'y en a que quelques-vns. que ceste seconde sorte de misericorde regarde il dit qu'il est mort pour ceux là, voire pour ceux là seulement. Pource que quant à ceux là, il n'est mort pour eux sinon à la condition qu'ils croient. Pour ceux cy, d'autant qu'il est absolument ordonné qu'ils croiront, il peut estre dit absolument mort pour eux : pource que le decret par lequel il leur est donné de croire, enclōst necessairement celuy du salut qu'on obtient par la foy. Car puis que la foy est l'vnique moyen pour paruenir au salut, comment se pour-

*de la doctrine de Calvin.*

roit il faire que Dieu eust ordonné de donner la foy a quelques vns, sans viser quant & quant au but auquel la foy est destinée?

L'autre chose est, que selon ceste diuerse maniere de considerer la misericorde de Dieu, il parle diuerfement de la volonté de Dieu touchant le salut des hommes, & des promesses de salut qui nous sont faites en Iesus Christ. Car eu égard à la premiere, il dit que Dieu veut que tous hommes soyent sauez; mais pourueu qu'ils croient. Il dit que c'est vn decret de sauuer les hommes; mais reuocable & conditionel. Il dit que Dieu promet indifferemment le salut à tous hommes: mais que ces promesses sont conditionnelles. Et cela est clair par vne infinité d'endroits de ses escrits; cestuy-cy entre les autres. Nos aduersaires amènent à l'opposite ces sentences; *Que Dieu veut que tous soyent sauez; & qu'il ne veut point la mort du pecheur; mais qu'il se conuertisse & qu'il viue.* Mais tantant que le Prophete exhorte le peuple à penitence; ce n'est pas merueille s'il dit, *Que Dieu veut que tous hommes soyent sau-*

### *Eschantillon*

nez. Mais la correspondance qui doit estre mutuelle entre les promesses, montre assez que telles promesses sont conditionnelles. Dieu declare à ceux de Ninive, comme aussi aux Roys de Gerar & d'Egypte, qu'il fera ce qu'il a déterminé de faire. Apres qu'ils ont eue la punition dont ils estoient menacez, lors il appert qu'elle ne leur a point esté denoncée sinon qu'ils fussent demeurés obstinez: & toutesfois, la menace estoit simple & precise comme si c'estoit un decret qui ne se peust renouer: mais apres que Dieu les a humiliez & estonnez par le sentiment de son ire, il redresse ceux qui ne sont point du tout desesperés, leur donnant esperance de pardon: afin qu'ils sçachent qu'il y a encore remède à leur mal. Aussi à l'opposite, les promesses qui conviennent tous les hommes à salut, ne déterminent point precisement que c'est que Dieu a déterminé en son Conseil estroit: mais ce qu'il est prest & appareillé de faire à tous ceux qui seront amenez à foy & à repentance.

Mais vient-il à parler de ceux là seulement que Dieu a esleus d'entre les autres pour les donner réellement à son Fils? Alors il ne craint pas de

*de la doctrine de Calvin.*

dire que les promesses de Dieu leur appartiennent priuatiuement aux autres. Pour ce qu'il considere tellement les promesses conditionnelles de l'Euangile, que quant & quant il y insere celles qui sont absoluës d'engendrer la foy en ses esleus. Ce passage en fera foy entre les autres, qui vient immediatement en la suite du precedent. *C'est chose certaine que les hommes ne sont point conuertis à Dieu par leur propre mouuement, & que le don de penitence n'est pas commun à tous. Car c'est l'un des deux articles de l'alliance, laquelle Dieu ne promet point faire sinon avec ses enfans & en son peuple élu: à sçauoir d'escrire ses loix en leurs cœurs. Car nul homme de sain iugement ne dira que cela soit promis generalement à tous.* Jerom. 31.

Puis quand il faut traiter de l'euement de ces promesses, il fait tousiours dépendre les conditionnelles de celles qui sont absoluës, & l'exécution de celles qui sont absoluës, de la pure élection de Dieu, qui selon ceste seconde sorte de misericorde en a esleu quelques vns & laissé les autres en arriere. Ces beaux passages en

## Eschantillon

tesmoigneront pour tous. Il ne s'en-  
Comm. suit point autrement aucun profit de la  
Rom 10 parole, sinon quand Dieu esclaire par  
16. la lumiere de son Esprit: & voila la  
difference qui est entre la voix exte-  
rieure de l'homme & la vocation interie-  
ure: laquelle seule est accompagnée  
d'efficace, & est propre aux élus  
seulement. Dont il appert facilement  
comment aucuns concluent fort hors  
de propos, disans que tous hommes  
indifferemment sont esleus, pource que  
la doctrine de salut est uniuerselle, &  
pource que Dieu conue à soy tous hom-  
mes indifferemment. Car la generalité  
des promesses seule & en soy, ne fait  
point le salut commun à tous, mais plu-  
stost au cōtraire ceste reuelation speciale  
dōt le Prophete fait mention, le restreint  
aux élus. Item, La dispute n'est point  
Autrai-  
té de la  
Prcde-  
stinitatiō. à sçauoir si Iesus Christ est venu pour  
purger les pechez de tout le monde. Car  
cela est sans contredit: mais cependant  
cette sentence se doit conioindre à l'oppo-  
site qu'il est venu afin que quiconque  
croira, &c. Iean 3. Et defait nous ne  
sommes pas sur ceste question, à sçauoir  
quelle est la vertu de Christ, quel bien il  
nous a apporté, ou que c'est qu'il a en soy:



*de la doctrine de Calvin.*

*mais a qui c'est qu'il se donne & lesquels il fait vraiment participans de sa grace. Or si la iouyssance que nous auons de luy consiste en foy, & la foy procede de l'Esprit d'adoption, il s'ensuit que nul ne peut estre participant de Christ, sinon celuy qui a esté adopté, & choisi de Dieu pour estre de ses enfans. Car aussi S. Iean chap. ii notamment, exprime que l'office de Iesus Christ est de recueillir par sa mort les enfans de Dieu en un. Donc ie conclu que combien que la reconciliation faite par luy se presente a tous, que c'est un priuilege special aux esleus, d'estre assemblez en l'esperance de vie. Et au mesme liure. Il semble a beaucoup que puis que Iesus Christ est Redempteur de tout le monde, & qu'il a commandé que son Euangile fust communément presché à tous : que cela ne s'accorde point avec une election speciale de certain nombre. Car l'Euangile est un ambassade de paix pour reconcilier le monde avec Dieu, tesmoin S. Paul; & se presche comme luy mesme dit, afin que ceux qui l'oyent soyent saueux. Je respō briuelement que Christ a tellement esté ordonné à salut a tout le monde, qu'il sauue ceux qui luy ont esté*

## Eschantillon

donnez du Pere : qu'il est la vie de ceux  
desquels il est le Chef : qu'il reçoit &  
accompagne avec soy en tous ses biens,  
ceux que Dieu a voulu adopter par son  
bon plaisir, pour estre ses heritiers. Il  
n'y a rien de tout cela qu'on puisse nier.  
L'Apostre dit que ce passage d'Esaye a  
esté accompli en luy, me voicy & les en-  
fans que Dieu m'a donnez. Et Iesus  
Christ prononce haut & clair qu'il gar-  
dera tout ce qui luy a esté donné du Pere,  
afin que rien ne puisse perir. L'Escri-  
ture tesmoigne par tout qu'il n'espand la  
vie sinon en ses membres. Or quicon-  
que ne confesse que c'est un don special,  
que d'estre enté au corps de Christ, n'a  
iamais deuëment leu l'Epistre aux  
Ephesiens. De la il s'ensuit que la ver-  
tu de Christ n'appartient sinon aux en-  
fans de Dieu. Nos aduersaires con-  
fessent que la grace uniuerselle qu'ils  
mettent en auant ne peut mieux estre  
estimée que de la predication de l'Euan-  
gile. Parquoy le nœud de la matiere gist  
en cela que nous sçachions comment la  
doctrine de l'Euangile offre salut à tous.  
Je ne nie pas qu'elle ne soit à tous salu-  
taire de sa nature : mais voicy la que-  
stion que nous debattons, Si Dieu en son

## de la doctrine de Caluin

conseil eternel a ordonné à tous indifféremment salut en icelle (c'est à sçauoir d'un decret absolu,) C'est chose notoire que tous sont appelez en commun à foy & penitence : qu'un mesme Mediateur est proposé à tous pour les reconcilier à Dieu son Pere. Mais d'autrepart cela est aussi notoire, que nul ne iouit d'un tel bien sinon par foy, afin que ce passage de S. Paul soit accomply. Que l'Euan-gile est la puissance de Dieu en salut à tout croyant. Item. En l'Euangile Dieu tend la main indifferemment à tous : mais il ne prend par la main pour amener à foy, sinon ceux qu'il a eleus deuant la fondation du monde. Et finalement. Nous recueillons de ces paroles que Dieu choisit du monde ceux qu'il luy semble bon pour estre heritiers de la vie : & que ce choix n'est point fait selon le merite des hommes, mais depend de son bon plaisir & pure grace. Car ceux qui constituent la cause de l'election es hommes, il faut nécessairement qu'ils commencent par la foy. Or Iesus Christ pronõce apertement que ceux qui luy sont donnez estoient à son Pere. Et il est certain qu'ils luy sont donnez à ce qu'ils croient, & que la foy deconle de cette donation, &c.

Cõment  
2. Pier.

Cõment  
Iean 17.  
6.

Et c'eſt pourquoy il fait en quel-  
que lieu cette belle diſtinction de le-  
giſlateur & de Pere. On dirapent eſtre  
dit-il, que Dieu aura double volonté.  
Ce qui eſt contre raiſon, veu qu'il n'y a  
nul changement ne diuerſité en luy. Et  
ſemble bien que Dieu ſe mocqueroit des  
hommes en faiſant ſemblant de vouloir  
ce qu'il ne veut pas. Mais ſi nous con-  
ioignons enſemble ces deux articles,  
Que Dieu veut que le pecheur ſe con-  
uertisse & vine : toute calomnie ſera  
aiſement abbatue. Dieu demande qu'on  
ſe conuertisse. Par tout où il trouue con-  
uerſion, il ne veut nullement frustrer  
du loyer de vie qu'il promet. Ainſi en-  
tendons que Dieu veut la vie du pe-  
cheur comme la conuerſion. Or quant  
à la conuerſion, il la veut ſelon qu'il y  
conuie & exhorte tout le monde par ſa  
Parole. Or cela ne contrenient point  
à ſon conſeil ſecret auquel il a deter-  
miné de ne conuertir ſinon ſes eſleus. Et  
ne faut point que pour cela on le repoute  
variable, en ce qu'en illuminant tous  
hommes par la predication exterieure,  
il fait office de Legiſlateur, & ainſi ap-  
pelle tous hommes à vie : & cependant il  
ſe monſtre Pere ſeulement enuers

*De la doctrine de Calvin.*

*ses eleus, les regenerant par son Esprit.*

Et cela pource premierement que les legiflateurs se contentent de faire publier leurs edicts exterieurement, & ne donnent point la vertu d'y obeir: au lieu que si vn Pere en donnant des loix a ses enfans auoit la puissance de l'executer ainsi, il s'eschiroit sans doute leurs cœurs a obeissance. Et puis apres ceste bonté que Dieu tesmoigne indifferement aux hommes en leur faisant proposer la doctrine de salut, deuenant à la pluspart inutile a cause de leur incredulité, il n'y paroist plus que l'autorité du commandement dont le mespris attire malediction dessus leurs testes. Au lieu que l'efficace de l'Esprit conuertissant les cœurs des eleus, la bonté de Dieu y reluit mesmes au dessus de l'autorité du commandement, & l'auenement en gist en ce glorieux titre d'enfans de Dieu, & en la possession de l'heritage du Pere celeste, dont l'esprit d'Adoption est vne arre & vn gage indubitable.

Si donc nous voulons recognoistre bonne foy, Calvin parlant de

*Ie an 1.  
12.  
Rom. 8.  
15. 16. 17*

### *Eſchantillon*

la Predeſtination n'a nullemēt egard  
a ceste premiere maniere en laquelle  
il faut conſiderer la miſericorde  
druine. Car il n'y peut auoir de Pre-  
deſtination ſelon le ſtile de l'eſcriture  
& de la Theologie , ou il n'y a ni  
election des vns ni reprobation des  
autres , & ou Dieu eſt egalement  
preſt de receuoir a ſalut tous ceux  
qui ſe conuertiront & embrasseront  
par vne vraye foy la ſatisfaction que  
ſon Fils luy a renduē. Car la repro-  
bation emporte excluſion , & icy nul  
n'eſt excluſ pourueu qu'il croye. Et  
election emporte ſeparation &  
diſtinction de quelques vns d'auec  
les autres : & en cet eſgard la condi-  
tion de tous eſt egale : ils ſeront tous  
egalement ſauués s'ils ſe repentent  
tous veritablement & s'ils croient.  
Et le mot de Predeſtination eſtant tel  
que ſelon le langage de l'Eſcriture il  
emporte quelque choſe d'abſolu &  
de determiné, dont l'euēnement eſt  
infallible, il ne peut proprement con-  
uenir a ce qui eſt purement condition-  
nel. Et partant ſi quelcun ſ'en ſert  
il faut que ce ſoit ou par alluſion , ou  
par conceſſion ; en ſ'accommodant  
au ſtile

*de la doctrine de Calvin.*

au stile de son aduersaire, ou pour rendre la dispute moins embarrassée & plus coulante : comme l'Apostre S. Paul appelle souuent contre leur nature non l'Euangile seulement, mais la grace de l'Esprit de sanctification, vne Loy, pource qu'il disputoit contre les Iuifs, qui auoient tousiours le mot de Loy en la bouche. Mais Calvin a égard a ceste seconde maniere de considerer la misericorde de dieu, selon laquelle elle n'exige pas la condition, mais la crée en l'homme. Car c'est là qu'il y a election & reprobation : Dieu en ayant voulu choisir les vns pour leur donner la foy afin de les amener à salut selon son propos arresté, & laissant en ceste dispensation selon sa iuste seuerité & la souveraine liberté de sa volonté, tous les autres en arriere.

Or est-ce proprement l'elction qui s'appelle Predestination selon le langage de l'Apostre. Pource que c'est vn decret non seulement absolu & entierement irreuocable, mais qui consiste en la volonté ferme & arrestée d'exécuter quelque chose reellement, en telle façon que  
é é

### *Eschantillon*

cela ne depende que de la pure volonté de Dieu & de l'employ de son infinie puissance : c'est à sçauoir de créer la foy és hommes. afin qu'ils embrassent Christ le Sauueur, & que par ce moyen ils paruiennent à la vie. Et non de la créer en telle façon qu'il depende puis apres de la volonté de l'homme de la conseruer ou non, mais de la y maintenir inefbranlable iusques à la fin : dautant que comme nous auons veu es paroles de Calvin cy dessus, cet amour de Dieu est immuable. Mais quant à la reprobation, ce n'est pas predestination proprement, pource qu'encore que ce ne soit pas, comme on parle, sans y penser, que Dieu ait ordonné de ne donner pas la foy à quelques-vns, & par consequent de ne les amener pas efficacement au salut, ains que ce soit vn conseil deliberé, il ne consiste pas pourtant en vne volonté de Dieu resoluë & determinée d'exercer quelque chose par sa propre puissance, mais seulement de ne donner pas cela sans quoy il est absolument impossible d'auoir le salut. Comme de vray tous les hommes estans na-



*de la doctrine de Calvin.*

tûrellement morts en peché, & par le peché aſſubiectis à condamnation de mort, ſi Dieu a arreſté de toute eternité, comme certes il l'a fait, d'en reſſusciter quelques vns, il n'eſtoit point beſoin qu'il fiſt de decret de faire mourir les autres. Il n'a rien fa- lu ſinon les laiſſer en leur naturelle corruption, & en la condamnation qui neceſſairement ſ'en enſuit. Car au reſte comme vn corps mort, ſi Dieu ne le retire de la mort par ſon infinie puiſſance, va toujours ſe pour- riſſant & empuantiſſant dauantage: ainſi vn homme que Dieu ne rege- nere pas par la vertu de ſon Eſprit, accumule ſans ceſſe peché deſſus pe- ché, & ſ'enveloppe de plus en plus en vne malediction irremediable.

C'eſt pourquoy ſi ce grand per- ſonnage ſe fert ſouuent de cettę ma- niere de parler, que Dieu a predeſti- né vne partie des hommes à la mort, il la faut interpreter par les lieux où il met cettę predeſtination en vne re- iection pure & ſimple : & encore en vne reiection par laquelle il les a laiſ- ſez en arriere au decret de la diſtri- bution de la grace de la foy, dont la

### *Echantillon*

reiection du salut suit par consequence certaine & y est necessairement enveloppee. Ainsi escrit-il en son Commentaire sur l'Epistre aux Romains, chap. 9. vers. 11. Car deuant que les enfans fussent nez, &c. *Il commence maintenant à monter plus haut, & vient à monstrier la raison de cette diuersité, declarant qu'elle ne consiste qu'en la seule election de Dieu. Car iusques icy il auoit touché en peu de paroles qu'il y auoit quelque difference entre ceux qui sont enfans d'Abraham selon la chair: à sçauoir, combien que par la Circoncision ils soyent tous appelez à la participation de l'Alliance, que toutesfois la grace de Dieu ne monstre pas son efficace en tous: & par ce moyen que ceux là sont enfans de la promesse lesquels sont participans du bénéfice de Dieu. Voila la difference qui est entre ceux qui croient, & ceux qui ne croient pas. Quant à l'exterieur ils sont appellez à l'alliance de Dieu indifferemment, mais pource qu'ils ne croient pas tous, ils n'en entrent pas tous indifferemment en reelle iouissance. Mais d'où procedoit cela, il s'en estoit tenu, ou pour le moins n'en auoit touché que quel-*

*de la doctrine de Caluin.*

que mot en passant, & assez obscurément. Or maintenant il rapporte ouvertement toute ceste diuersité à l'élection de Dieu, voire & icelle gratuite & laquelle ne dépende aucunement des hommes : tellement que quant au salut des fideles il ne faut rien chercher de plus haut que la bonté de Dieu. Pource que c'est luy qui l'offre misericordieusement, & donne aussi misericordieusement d'y croire. Et quant à la perdition des reprenez, il ne faut chercher rien de plus haut que sa iuste severité. Pource que bien qu'il leur ait offert le salut, il les a voulu justement laisser en leur aveuglement & corruption naturelle, de laquelle vient necessairement l'incrédulité. Voila donc pour la premiere proposition. Comme la benediction de l'Alliance separe la nation d'Israel d'avec tous autres peuples, ainsi l'élection de Dieu discerne & fait la difference entre ceux mesmes qui sont d'icelle nation, entant qu'il predestine les uns à salut, les autres à damnation éternelle. La seconde proposition est, Il n'y a autre fondement de ceste election que la pure bonté de Dieu, & mesmes, apres la cheute d'Adam, mi-

### *Eſchantillon*

*ſericorde, qui embrasse ceux qu'il luy  
plaist, sans auoir du tout aucun egard  
aux œuvres. La troisieme, le Seigneur  
en son election gratuite est libre, & n'est  
point obligé ou astreint a vne necessité de  
conferer à tous également la mesme gra-  
ce : mais pluſtoſt au contraire il LAIS-  
SE ceux qu'il veut, & prend ceux qu'il  
want. De sorte que cela ne s'appelle  
Predestination sinon eu egard à ce  
qu'il ne s'est pas fait temerairement,  
mais par bon conseil : & que l'euen-  
mēt en est aussi certain, a cause de l'in-  
uincible corruption de l'hōme, com-  
me est certain l'euenement du decret  
par lequel Dieu a resolument ordon-  
né d'amener ses esleus par la foy à la  
vie eternelle. Mais icy la cause pro-  
pre de l'euenement est le decret de  
Dieu, qui execute puissamment ce  
qu'il a resolu. Là la cause propre de  
l'euenement est l'inuincible dureté  
du cœur humain, qui ne peut estre  
amolli par la simple inuitation exte-  
rieure.*

Partant la premiere & principa-  
le controuerſe de Calvin avec ses ad-  
uerſaires en reuient là, que Dieu ayant  
esté si bon que de creer tous les hom-

*de la doctrine de Calvin.*

mes à la vie, s'ils fussent demeurez en leur estat; qu'ayant esté si misericordieux que de leur vouloir donner son Fils pour racheter vniuersellement tous ceux qui se conuertiroyent à luy d'une serieuse repentance, & croiroient en ce Redempteur, il faut chercher la raison pourquoy les vns croient & les autres ne croient pas, les vns refusent le salut qui leur est offert, & les autres l'embrassent. Pelagius a enseigné autresfois que cela vient de la part de l'homme, qui use des facultez qu'il a de croire, comme il luy plaist, mesmes sans aucune assistance de la grace de l'Esprit: plusieurs autres auoient bien icy quelque grace de l'Esprit, mais veulent neantmoins que l'usage en depende de la liberté de la volonté de l'homme, pour croire ou ne croire pas comme bon luy semble. S. Augustin entre les autres, au temps de l'Eglise ancienne, Calvin en ces derniers temps, entre ceux qui ont mis la main à la reformation, ont maintenu selon la Parole de Dieu que cela vient de la pure efficace de la grace, qui convertit les vns interieurement, & se

*Inst lib.*  
*3 ch. 24.*  
*§ 16.*

contente d'inuiter exterieurement les autres. Et cela paroist, outre vne infinité d'autres semblables, par ce beau passage. Combien que les promesses du salut soyent vniuerselles, toutesfois elles ne contrarient nullement à la Predestination des repreneux : moyennant que nous regardions l'accomplissement d'icelles. Nous sçauons que les promesses de Dieu nous sont valables quand nous les receuons par foy : au contraire quand la foy est aneantie, qu'elles sont abolies. Si la nature des promesses est telle, regardons maintenant si elles contreniennent à la predestination de Dieu : c'est qu'il est dit que Dieu a déterminé dès le commencement lesquels il vouloit prendre en grace, & lesquels il vouloit reietter : & neantmoins qu'il promet indifferement salut à tous. Je dy que cela conuient tres-bien. Car le Seigneur en promettant ainsi, ne signifie autre chose sinon que sa misericorde est exposée à tous ceux qui la chercheront. Or nul ne la cherche sinon ceux qu'il a illuminez. Finalement il illumine ceux qu'il a predestinez à salut. Or ceux là experimentent la verité des promesses seure & certaine, tellement

## de la doctrine de Calvin

qu'on ne peut dire qu'il y ait quelque contrariété entre l'élection éternelle de Dieu, & ce qu'il offre le tesmoignage de sa grâce à ses fideles. Mais pourquoy nomme l'Escripture tous les hommes ? C'est afin que les bonnes consciences re-reposent plus seurement, voyant qu'il n'y a nulle difference entre les pecheurs moyennant qu'on ait foy. Et d'autre part que les iniques n'alleguent point qu'ils n'ont nul refuge pour se retirer de leur misere: veu qu'ils le reiettent par ingratitude. Comme ainsi soit donc que la misericorde de Dieu soit presentee aux uns & autres par l'Euangile, il n'y a que la foy, c'est à dire l'illumination de Dieu, qui discerne entre les infideles & incredulés: à ce que les premiers sentent l'efficace de l'Euangile, les seconds n'en recoient nulle utilité. Or ceste illumination a l'élection éternelle de Dieu pour sa reigle.

De là naissent d'autres questions. Car pource qu'il n'y peut auoir vne si grande difference en l'euenement, qu'il n'y en ait pareillement au conseil dont l'euenement depend, on dispute quel doit estre ce conseil qu'on nomme predestination, qui

met cette différence entre les hommes. Ceux à qui Calvin en à tirent la raison de la predestination de Dieu, ou de la preſcience des merites cachés de ceſtuy-ci où de ceſtuy-là, où de la preuiſion du bon vſage de la grace, dependant de la liberté de la volonté humaine. Calvin inſtruit par la parole de Dieu reſpond, que ſi vous cerchés en particulier la raiſon pourquoy Dieu a eſleu ceſtuy-ci & ceſtuy-là, vous n'en trouuerés aucune autre que ſa pure miſericorde. Et ſi pourquoy Dieu a reprouué les autres vous n'en-rencontrerés aucune que ſa iuſte ſeuerité, qui les a voulu laiſſer ſans leur faire aucun tort, en leur naturelle corruption. Mais ſi en les comparât les vns avec les autres, vous vous enquerés de la raiſon pourquoy il a pluſtoſt eſleu ceux cy que ceux là, veu qu'ils eſtoient tous egale- ment perdus & corrompus, vous n'en trouuerés aucune que ſa libre volonté, ſuiuant cet oracle, *I' auray mercy de celuy de qui i' auray mercy, & feray miſericorde a qui ie feray miſericorde.*

En ſuite, pource que Dieu eſt ſi bon & ſi ſage qu'il n'agit en ſes creatures que conuenablement à la natu-



*De la doctrine de Calvin.*

re qu'il leur donne, & qu'on s'imagine que l'homme ayant vn entendement & vne volonté, doit estre le maistre de ses actions, on debat quelle est la nature de l'efficace de la grace en l'esprit de l'homme, & quelle est la façon de la rencontre de ces deux choses ensemble en sa conuersion. Ceux contre qui Calvin dispute, soustiennent que Dieu agit en telle maniere qu'il laisse en la puissance de l'homme de resister ou de ne resister pas à sa volonté, & de rendre sa grace efficace ou frustratoire. Mais ce personnage bien enseigné par la Parole de Dieu, tient ferme pour le parti contraire : & recognoissant qu'il ne faut que deux choses en toute cause intelligente pour produire necessairement son effect ; à sçauoir la puissance & la volonté, la puissance de Dieu estant infinie & sa volonté de créer la foy en quelques vns d'entre les hommes, determinement absoluë, quelle que soit la nature de l'esprit & de la volonté de l'homme, il faut necessairement que celui en qui Dieu agit de ceste façon là, croye, l'esprit de Dieu illuminant

tellement ſon entendement , & ſa main ſe rendant tellement maĩtreſſe des mouuemens de ſa volonté , qu'il eſt ineuitable qu'elle ne ſe face ſuiure

Et en fin , le ſalut n'eſtant paſpromis a quelque apparence de foy ſeulement , qui meue legerement l'eſprit de l'homme & pour vn peu de temps , mais a vne foy conſtante & d'une inuincible perſeuerance : on conteſte encore a qui doit eſtre renduë la louange de ſa fermeté. Les aduerſaires de Caluin l'attribuent encore à la meſme liberté de la volonté de l'homme : & par conſequent en rendent la perſeuerance douteuſe, & tout ce conſeil de noſtre ſalut , de perilleux euenement. Au lieu que Caluin reprenant la choſe dès ſa ſource , & conſiderant que cet amour duquel Dieu a embrasſé quelques vns dès les temps eternels , & les a eſleus pour leur donner la foy afin que par elle ils viennent au ſalut , n'eſt fondé que en luy meſme & en ſa volonté abſoluë , immuable comme ſa nature : & que d'ailleurs cet amour ſe redouble infiniment à meſure qu'il nous conſidere comme membres de ſon Fils,

entez

*de la doctrine de Calvin.*

entrez en son corps par la foy, il enseigne que celuy qui a commencé en nous ce bon œuvre le parfera, & ne permettra pas que chose quelconque nous ravisse nostre esperance. Ioint que quiconque croit en Christ est desia en quelque façon en possession du salut, en ayant receu l'Esprit d'adoption & de sanctification : or qui y a vne fois mis la main, ne le peut perdre. Que Christ intercede enuers son Pere pour ceux qui luy ont esté donnez : Or ceste intercession ne peut estre que souverainement efficace. Et finalement que Christ nous a promis de nous garentir & a pris nos ames & nostre salut en sa garde : or est-il plus puissant que tous nos ennemis, & si nostre corruption & l'inconstance de nostre volonté fait que nous n'ayons point de pires ennemis que nous, il est plus puissant que nous mesmes.

Que donc les aduersaires de Calvin regardent maintenant si pour auoir enseigné que l'homme ne peut rien en son salut, en auoir attribué toute la gloire à Dieu, & en ce qui regarde la Predestination ou election,

### *Eſchantillon*

& en ce qui concerne les choſes qui en dependent, & aſſeuré à chacun fidele la conſolation de l'aſſurance de ſon adoption, & ſon eſperance, a merité d'eſtre le perpetuel obiet de leurs inuectives, & que ſon nom ſoit entr'eux en yn ſi merueilleux diſſame. Mais quoy qu'il en ſoit, ce nom ſera en immortelle benediſtion entre ceux qui aiment la verité. Et bien que ce Perſonnage ſe ſoit reconnu homme comme les autres, & qu'il eſtoit ſi modeſte qu'il euſt ſans doute ſoumis ſes ſentimens au iugement de l'Egliſe de Dieu, que Chriſt a rachetée par ſon ſang, & qu'il gouerne par ſon Eſprit, ſi ne doute-ie pas, s'il eſtoit reſſuſcité d'entre les morts, qu'il ne maintint de nouveau ceſte verité à la gloire du Seigneur Ieſus. Voire il le feroit d'autant plus viuellement & plus conſtamment que la lumiere celeſte dont ſon ame bienheureuſe eſt maintenant remplie la haut, luy feroit encore voir plus clairement qu'autreſfois celle de la verité que Dieu nous a reuelée en ſa Parole.



TEXTES DES SER-  
MONS SVIVANS.

SERMON I. EZECH. ch. 18. v. 32.

*Prendroy-ie en aucune façon plaisir  
à la mort du meschant dis le Sei-  
gneur l'Eternel, & non plustost  
qu'il se destourne de son train &  
qu'il viue.* Page 1.

SERM. II. ROM. ch. 1. v. 19. 20.

*Ce qui se peut cognoistre de Dieu a  
esté manifesté en eux : car Dieu  
le leur a manifesté. Car les cho-  
ses inuisibles d'iceluy, à scauoir  
tant sa puissance eternelle que sa  
Diuinité, se voyent comme à l'œil  
par la creation du monde, estans  
considérées en ses ouurages : afin  
qu'ils soyent rendus inexcus-  
ables.*

pag. 48

SERM. III. 1. COR. ch. I. v. 12.

*Depuis qu'en la sagesse de Dieu, le monde n'a point connu Dieu par sagesse, le bon plaisir de Dieu a esté de sauver les croyans par la folie de la predication. pa. 109*

SERM. IV. 2. COR. ch. 3. v. 6.

*Dieu nous a rendus suffisans pour estre ministres du nouveau Testament : non pas de lettre, mais d'Esprit. pag. 163*

SERM. V. ROM. ch. II. v. 33.

*O profondeur des richesses, & de la sagesse, & de la cognoissance de Dieu ! que ses iugemens sont incomprehensibles, & ses voyes impossibles à trouver ! pag 227*

SERM. VI. S. IEAN, ch. 6. v. 45.

*Quiconque a ouy du Pere, & a appris vient à moy. pag. 274*

SERMONS



SERMONS  
DE LA NATURE,  
ESTENDVE, NECES-  
SITE, DISPENSATION, ET  
Efficace de l'Euangile.

SERMON I.

Ezechiel chap. 18. vs. 32.

*Prendroy-ie en aucune façon plaisir  
à la mort du meschant, dit le  
Seigneur l'Eternel, & non plu-  
stost qu'il se destourne de son  
train & qu'il viue?*



I d'un costé vous voyez  
aujourd'huy dressée de-  
uant vos yeux, mes freres,  
la table sur laquelle on  
vous propose le pain qui est la com-  
memoration & le gage de celuy qui  
est descendu des Cieux pour la vie

A

du monde, avec le vin qui represente le sang du Nouveau Testament: & d'autre costé entendez de vos oreilles prononcer pour estre matiere du propos par lequel on vous doit inuiter a la participation de ces graces, vne sentence tirée des liures de l'âciene alliance, vous ne le deués point trouuer estrange, côme si ces choses ne s'accordoïent pas bié ensemble. Bien que ce soit l'Éternel qui se face entendre en ces paroles du Prophete, & qu'au Vieil Testament ce mot ait ie ne scay quoy de grand & de maiestueux, qui remplit plustost l'ame de respect & de reueréce, qu'il ne l'alleche & conuie par sa douceur; c'est pourtant le mesme Dieu qui s'est manifesté en ces derniers temps en son Fils, plein d'une douceur incomparable, & portant vn visage merueilleusement attrayant & paisible. Bien que ces gages du corps & du sang de Christ soyent les asseurances de ses plus ardentes & vehementes compassions, si representent ils pourtant ceste misericorde dont le Prophete parle en ce passage. Bien que ce soit au peuple d'Israël



que sadresse cette voix, si a t'elle esté prononcée pour le peuple Chrestien, & ne resonne point si haut qu'en l'Euangile. Bien que nous soyons inuités a manger le corps de nostre Seigneur-Iésus, & à boire son sang par la celebration de ce Sacrement, les fideles d'autres fois ne l'ont pas moins mangé que nous, qui ont eu recours avec vraye foy, a ceste misericorde que le Seigneur l'Eternel leur a offerte en ces paroles.

La difference est extrêmement grande en vn point C'est que celuy par l'organe duquel Dieu tenoit autresfois ce propos a son peuple, estoit vn Prophete grand & signalé, en l'esprit duquel celuy de Dieu auoit excité des lumieres excellentes & extraordinaires, pour luire au milieu de ce siecle si tenebreux; au lieu que celuy qui parle maintenant a vous est vn foible instrument de la grace de Dieu en vostre endroit, qui n'a rien de semblable. Neantmoins ce defauantage se trouuera abondamment recompensé, si vous venez à recognoistre qui est celuy qui nous a commis ce ministere, & qui par con-

sequent parle a vous par nostre bouche: c'est à sçauoir, nostre Seigneur-Iesus, qui en dignité & excellence a de si loin deuanté tous les Prophetes. Car depuis le commencement de la predicatiõ de l'Euágile iusqu'à la consommation des siècles, ces paroles ont leur lieu & leur verité, c'est que Dieu ayant iadis parlé a diuersesfois & en diuerses manieres a nos peres par les Prophetes, a parlé a nous par son Fils en ces derniers temps. Voire quelque infirmité qu'il y ait és Ministres de l'Eglise de maintenant, si peuuent ils dire cela à la louange de la grace de Dieu enuers vous, a qui les derniers temps sont paruenus, qu'ils ont vne plus claire & distincte cognoissance de la doctrine de salut par l'Euangile de Christ, que n'en auoyent autresfois les Prophetes, nonobstant l'excellence de leurs inspirations & reuelations celestes. Car celuy qui est le plus petit au Royaume des Cieux, est en ceste chose plus grand que Iean Baptiste, qui neantmoins pour ce qu'il estoit le precurseur de nostre Seigneur Iesus, & qu'il à eu l'hon-

neur de le voir de ses yeux, a esté plus grand en cela mesme que tous les prophetes. Et partant mes freres l'infirmité de ceux qui vous repetent encore aujourd'huy cette voix, ne doit rien diminuer de l'attention & de l'honneur que vous luy devez rendre. Nous entreprendrons donc avec l'assistance de la grace de Dieu de la vous exposer, & cela d'une methode vn peu differente de ce que nous auons accoustumé. Mais toutes choses ne conuiennent pas a tout temps & à toutes occurrences.

On demande, mes freres, comment se doit entendre ceste sentence la, Que Dieu ne veut point la mort du pecheur, mais qu'il se conuertisse & qu'il viue: veu que non seulement il punit & punira à l'aduenir tant de gens pour leurs pechez, mais mesmes qu'il en laisse si grand nôbre gisans en leur misere naturelle, a qui tât s'é faut qu'il face sentir l'efficace de la grace de son esprit pour croire en Christ quand il leur est annoncé, que mesmes il ne le leur fait pas annoncer. Comme il appert de tant de miserables nations parmi lesquelles il n'est

point presché, & l'estoit encore moins du temps que le Prophete parloit, pource qu'on n'en auoit cognoissance en aucune nation qu'en Iudée. Encore si vous en faites comparaison avec la lumiere du Nouveau Testament, la cognoissance qu'on en auoit en Iudée, estoit elle fort obscure. Si nous disons la dessus, que ce passage enseigne que Dieu ne veut point la mort du pecheur, qui se conuertit; mais que s'il ne se conuertit pas Dieu veut sa mort necessairement, pour ce que le Iuge veut le supplice de celuy qui est coupable; bien que nous disions la verité, si est-ce que cela ne remplira pas tout le sés, ny n'egalera pas toute l'emphase de ce passage. Car premierement qui peut douter que Dieu ne prononce ces paroles pour inuiter les pecheurs à repentance? Et qui peut douter encore, qu'il n'ait, s'il faut ainsi parler, enuie que les hommes se repentent? C'est à dire qu'il ne prenne vn souuerain cōtētement en leur conuersion; puis que les Anges, qui ne sont pas sans doute si bons que luy, se réjouissent es Cieux quand vn pecheur

se conuertit en la terre? Et pourtant il prononce, & veut qu'on prononce cela avec affection, qu'on le presche, & qu'on y insiste comme pour vne chose qui luy est extrêmement agreable. Or nul ne voudroit ainsi parler de la Iustice de Dieu; que pour ce qu'il en ayme l'exercice, & qu'il y prend plaisir, il prend aussi plaisir que les hommes commettent les pechez qui luy en donnent le sujet, & sans lesquels il n'y auroit point d'exercice de Iustice. Ce seroit vne predication directement opposée à la nature de Dieu & de son Euangile. Et pourtant il faut qu'il vueille la vie du pecheur & prenne plaisir en sa conuersion, d'une autre façon qu'il ne veut sa mort: car de penser seulement qu'il prenne plaisir au peché, c'est vne horreur, & vn blaspheme.

Et de vray, outre ce que c'est le but de Dieu & de son Prophete non en ceste sentence seulement mais en toutes ses semblables au V. & N. Testament, les paroles mesmes du texte ont vne particuliere efficace. Car il ne dit pas seulement

qu'il prend plaisir en la vie du pecheur, mais qu'il prend plaisir en sa conuersion. *Je ne prens point plaisir a la mort du pecheur, Mais à ce qu'il se conuertisse & qu'il viue.* Or la conuersion de l'homme peut estre considerée en deux manieres: ou bien entant que c'est le moyen de venir a la vie, & que sans cela le pecheur ne l'obtiendrait pas: ou bien entant que c'est outre cela vne chose belle & agreable a Dieu d'elle mesme, d'autant qu'elle consiste en l'illumination de l'entendement, & en la cognoissance de ce qui est beau, iuste & honneste, qui tire apres soy les vertus de pieté & de iustice esquelles consiste l'image de Dieu mesme. Or paroist il clairement d'icy que Dieu ayme la conuersion du pecheur entant que c'est comme vn moyen pour venir a la vie. Mais qu'il ne l'aime qu'à cause de cela, cest vne chose indigne de l'excellence de la nature de Dieu, du quel la souueraine perfection consiste en ce qu'il est saint, & qu'il ayme souuerainement la sainteté qui le represente en sa creature. Et partant il faut qu'il y ait icy quelque chose

qui tesmoigne de la vehemence d'auantage, en ce plaisir que Dieu prend en la conuersion & en la vie du pecheur, que non pas en celuy qu'il prend en l'exercice de sa Iustice.

Adioustez à cela que Dieu fait icy vne manifeste comparaison ou opposition plustost, entre le plaisir qu'il prend en la vie du pecheur & en sa conuersion, & le plaisir qu'il peut prendre en sa mort quand il demeure impenitent en son vice. *Prendroy-ie dit il, plaisir en la mort du pecheur, & non plustost en sa conuersion & en sa vie?* Or est il clair que les comparaisons & les oppositions qui se font en ceste maniere, se font expressement pour releuer l'une chose par dessus l'autre, & pour en faire comprendre le grand & comme incomparable auantage. Aussi nos interpretes ont adiouste ce mot, *en aucune façon*, ou pour représenter l'emphase de cette opposition, ou pour exprimer celle de la phrase hebraïque dont s'est serui le Prophete. Et semble qu'encor la maniere de prononcer ceste sentence y adiouste beaucoup d'energie. *Prendroy-ie plaisir à*

*la mort du pecheur, &c? Car qui ne  
 ſçait que ces interrogatiōs marquēt  
 vne ſinguliere vehemence? Et qui  
 ne ſçait encore que la vehemence  
 vient de la chaleur de l'affection &  
 de l'emotion que nous ſentons en  
 nos cœurs, qui nous fait parler plus  
 viuement qu'à l'ordinaire? C'eſt  
 pourquoy ce qui eſt icy prononcé  
 par interrogation de ceſte façon là,  
 l'eſt au trente-troisième de ce meſ-  
 me liure, non avec interrogation,  
 mais meſmes avec encore d'auantage  
 d'efficace. *Toy donc, fils de l'homme  
 di a la maiſon d'Iſraël; vous anés ainſi  
 parlé & dit: Puis que nos forfaits &  
 nos pechés ſont ſur nous, & nous de-  
 cheons en iceux: & comment pourrions  
 nous viure? Di leur: Je ſuis viuant, dit  
 le Seigneur l'Eternel, que ie ne prē point  
 plaisir a la mort du meſchant, ains plu-  
 ſtoſt que le meſchant ſe deſtourne de ſon  
 train & qu'il viue. Deſtournés vous  
 deſtournez vous de voſtre meſchant  
 train. Et pourquoy mourriés vous, ô  
 maiſon d'Iſraël? Car ceſte expreſ-  
 ſion ſi graue, ſi maiestueuſe, avec vn  
 ferment conçu en paroles ſi vene-  
 rables, ſeroit en vn homme, s'il par-**



loit ainsi, vn tesmoignage indubitable, que ce ne seroit pas seulement vne telle quelle emotion d'esprit qui le feroit parler avec quelque ardeur, mais qu'il auroit en quelque façon en horreur qu'on pensast de luy au contraire. Comme si vn homme accusé de quelque chose dont il n'est point coupable, s'eschaufe en se defendant, c'est signe qu'il a la matiere a cœur, & que le tort qu'on luy fait à excité de l'emotion en son ame. Mais si apres cela il vient à leuer la main vers le ciel, & dire non plus avec interrogation, mais avec vne parole graue & composée, i'atteste Dieu & ma conscience que ie n'en suis pas coupable, c'est signe qu'il a passé la simple emotion, & qu'il en vient iusques à l'execration de la chose dont on l'accuse. Or les paroles qui sont attribuées a Dieu sont elles prises d'ailleurs que du langage des hommes? Ou ces émotions, ces interrogations, & ces sermens, sont-ce autre chose sinó des moyens par lesquels Dieu nous veut tesmoigner, qu'il sent autant comme l'excellence de sa nature le peut souff-

frir, les affections qui nous agitent?

Et certes l'occasion pour laquelle Dieu prononce ces paroles, n'y eust il point d'autres raisons, nous induit a leur donner toute la force qui se peut. Israël estoit en captiuité, & Iuda prés d'y estre mené en vne desolation lamentable. Endurcis pourtant qu'ils estoient en leurs pechez. & auugles en leurs propres fautes, ils s'imaginoient qu'ils estoient ainsi mal menés, non à cause de leurs pechez, mais pour les pechez de leurs ancestres. D'où ce prouerbe estoit venu en commun

*Exech.*  
*18, 2.*

*vsage : Nos peres ont mangé l'aigret, & nous en auons les dents agacees.* Ce qui tendoit non seulement à blasmer ouuertement la seuerité de Dieu, mais à accuser sourdement sa iustice. C'est pourquoy Dieu par son Prophete apres vn long propos, où il explique qu'elles sont ses inclinations à receuoir à mercy celuy qui se retourne à luy par repentance, & qu'elle est l'administration de sa iustice à ne point punir l'vn pour l'autre, & au lieu des peres, les enfans, fait cette si pathetique interrogation, & repe-

te cette protestation avec vn serment, comme nous vous auons desia dit, si venerable. A peu pres comme si vn Prince qui auroit maintes & maintes fois offert sa grace à ses subiects rebelles, contrainct par leur obstination de mettre la main aux armes, & soupçonné de cruauté en leur punition, disoit; Pense t'on que ie prenne plaisir au carnage de mes subiets? Est-ce pas par leur propre dureté & obstination qu'ils meurent? I'atteste Dieu que ie ne prens pas plaisir à leur sang ni à leur mort: I'aymeroy' sans comparaison, mieux les voir viure, voire les voir viure à leur aise sous ma protection, si leurs cœurs estoient capables de s'amollir & de venir à repentance. Combien donc que la iustice de Dieu soit inexorable sur les pecheurs impenitens, si y-à t'il pourtant vne tres-notable difference entre les inclinations qu'il a à l'exercer, & celles qui le portent à desirer la vie du pecheur, & sa repentance.

Vray est que quelques fois il fait ainsi des sermens d'executer sa iustice, qui tesmoignent vne grande ar-

deur de courroux. Comme en ce 33. chapitre d'Ezechiel: *Ainsi a dit le Seigneur l'Eternel; vous mangez la chair avec le sang, & vous leuez vos yeux vers vos dieux de fiente, & respandez le sang, & vous possederiez le pays! Vous vous arrêtez sur vostre espee, vous commettez abomination, & souillez vn chacun de vous la femme de son prochain, & vous possederiez le pays! Tu leur diras ainsi. Ainsi a dit le Seigneur l'Eternel, Je suis viuant que ceux qui sont en ces lieux là deserts tomberont par l'espee: & que ie liureray aux bestes celuy qui est parmi les champs, afin qu'elles le mangent: & que ceux qui sont es forteresses & aux caernes, mourront de mortalité. Et au 32. du Deuteron. Je leue ma main vers les cieux & di, ie suis viuant eternellement. Si i'aiguise la lame de mon espee, & si ma main saisit le iugement, ie feray tourner la vengeance sur mes aduersaires, & le rendray à ceux qui me hayssent. Mais outre ce que Dieu ne fait iamais cela sans auoir auparauant présenté sa misericorde aux hommes; encore y mesle-il souuent quelque tesmoignage de regret, de ce que par ma-*

niere de parler, il est contraint à les punir, comme en ce 32. du Deuter. *O s'ils eussent esté sages! s'ils eussent esté aduisez en cecy, & eussent considéré leur derniere fin!* Et au Pseau. 81. 14. *O si mon peuple m'eust escouté, si Israel eust cheminé en mes voyes!* De plus ce n'est iamais en faisant cette opposition, prendroy-je plaisir à la conuersion du pecheur & à sa vie, & non plustost à sa mort? Encore moins; (& cela ne se pourroit penser sans horreur) inuiteroit-il avec cette vehemence les iustes à pecher pour les punir, comme il fait les meschans à se conuertir pour leur donner la vie.

Il vaut donc mieux sans comparaison s'en tenir à l'interpretation que donne à ce passage cet incomparable Calvin, à qui principalement apres Dieu l'Eglise doit sa reformation, non pas seulement en France, mais en plusieurs autres endroits de l'Europe. Car voicy ce qu'il en dit, en ses commentaires. Le Prophe- te confirme le mesme propos par autres paroles, asçauoir que Dieu ne desire rien dauantage sinon que tous ceux qui perissoient &

„ se precipitoient en la mort, re-  
„ tournent au chemin de salut. Et  
„ pour ceste cause aussi l'Euangile  
„ est-il non seulement auioird'uy  
„ publié par tout le monde, mais  
„ Dieu a voulu rendre aussi tesmoi-  
„ gnage de tout temps & en tous aa-  
„ ges combien il est enclin à faire  
„ misericorde. Car combien que les  
„ hommes profanes n'eussent point  
„ de Loy ny de Prophetes, Si est ce  
„ toutesfois qu'ils ont tousiours eu  
„ quelque goust de ceste doctrine.  
„ Il est vray qu'elle à esté suffoquee  
„ de plusieurs abus & erreurs; mais  
„ si trouuerons nous tousiours qu'ils  
„ ont esté poussez a demander par-  
„ don, par vn mouuement secret &  
„ occult, a cause qu'ils auoyent ce  
„ sentiment & persuation engrauee,  
„ comme naturellement, en eux  
„ mesmes, Que Dieu est prest de  
„ faire grace à tous ceux qui le  
„ cherchent. Mais Dieu a testifié ce-  
„ la plus clairement par la Loy & par  
„ les Prophetes. Quant a l'Euangile;  
„ nous sçauons comme il nous con-  
„ uie doucemét, en nous promettant  
„ pardon & grace. Et cest aussi la

science de salut, d'embrasser sa mi-  
sericorde laquelle nous est offerte  
en Iesus Christ. Dont il s'ensuit  
que ce que dit icy le Prophete est  
tres-veritable; que Dieu ne veut  
la mort du pecheur. Pource qu'il  
preuient de son bon gré; & n'est  
point seulement prest de receuoir  
à mercy tous ceux qui ont leur  
refuge en sa misericorde: mais il  
les rappelle a pleine voix pour re-  
tourner a luy, quand il voit qu'ils  
sont comme du tout alienez de  
toute esperance de salut.

Mais il faut noter le moyen  
comment Dieu veut que tous  
soyent sauuez, asçauoir *apres qu'ils*  
*se seront conuertis de leurs voyes.*  
Dieu donc ne veut pas que tous  
soyent sauuez en sorte qu'il ren-  
uerse toute discretion & iuge-  
ment entre le bien & le mal. Ains  
il fait, comme il est icy dit, que la  
repentance precede la remission  
des pechez. En quelle façon donc  
Dieu veut-il que tous soyent sau-  
ués? Asçauoir, pource que le S.  
Esprit condamne aujourd'huy le  
monde par l'Euangile, de peché

„de iustice & de iugement , tout  
„ainsi comme le temps passé il le  
„condamnoit par la Loy & par les  
„Prophetes. Dieu donc fait cognoi-  
„stre aux hommes combien ils sont  
„miserables , afin que par ce moyen  
„ils ayent occasion de se retirer à  
„luy , il fait vne playe afin de la  
„guérir , il tue pour viuifier. Nous  
„entendons maintenant donc que  
„Dieu ne demande point la mort  
„du pecheur , pource qu'il appelle  
„tout le monde indifferemment a  
„repentance , & promet qu'il sera  
„toufiours prest pour le receuoir  
„a mercy , moyennant qu'il ait vne  
„droicte repentance. Maintenant si  
„quelqu'vn allegue qu'il n'y a donc  
„point d'Electiō de Dieu , par la-  
„quelle il en a predestiné vn nom-  
„bre certain a salut : la responce est  
„facile ; asçauoir que le Prophete  
„ne parle pas icy du secret Conseil  
„de Dieu , ains qu'il rappelle les  
„pauures pecheurs qui sont au che-  
„min de desespoir , afin que s'asseu-  
„rans de la remission de leurs pe-  
„chez , ils embrassent le salut qui  
„leur est offert, & que par ce moyen



ils se changent. Si on replique de-  
rechef que par ce moyen nous fai-  
sons Dieu double : la responce est  
preste a cela, que Dieu a tou-  
siours vne mesme volenté ; mais  
c'est en diuerfes manieres, voire  
lesquelles nous sont incognuës.  
Combien donc que la volenté de  
Dieu soit simple, tant y a qu'il y a  
quelque varieté qui y est impli-  
quee, au regard de nostre sens &  
conception. Pourtant ce n'est  
point de merueilles si nos yeux  
sont esblouys d'une lumiere infi-  
nie & incóprehensible, en sorte que  
nous ne pouuons iuger ni discer-  
ner comment est ce que Dieu veut  
que tous soyent sauuez, & neant-  
moins qu'il ait destiné a perdition  
eternelle tous les reprouuez qu'il  
veut qui soyent damnez. Puis  
apres que ce grand homme a dit  
plusieurs autres choses a ce pro-  
pos, & monstré comment encore  
que Dieu vüille que tous hom-  
mes soyent sauuez, neantmoins  
c'est de la seule efficace de sa grace  
que ses esleus se conuertissent, il  
retourne a la solution preceden-

„ te Et dit que par maniere de par-  
„ ler Dieu iouë icy deux personna-  
„ ges. Car, dit-il, en cecy Dieu veut  
„ que l'on face iugement de luy se-  
„ lon sa parole; Et comme i'ay dit  
„ le Prophete ne dispute pas icy sub-  
„ tilement de son conseil qui est in-  
„ comprehensible; mais il veut tenir  
„ nos sens comme liez & attachez  
„ a la parole de Dieu. Or mainte-  
„ nant qu'est-ce que contient la pa-  
„ role de Dieu en soy! cest a dire la  
„ Loy les Prophetes & l'Euangile?  
„ C'est que tous sont appelez a re-  
„ pentance, & que salut leur est  
„ promis apres qu'ils se seront chan-  
„ gez; Neantmoins vne telle volonté  
„ de Dieu qu'il no<sup>9</sup> propose en sa pa-  
„ role, n'empesche point cependant  
„ qu'il n'ait ordonné & decreté de-  
„ uant la creation du monde ce  
„ qu'il auoit a faire de chacun hom-  
„ me particulierement.

Esquelles paroles cet excellent  
seruiteur de Dieu nous donne deux  
choses memorables. La premiere est  
vn bel aduertissement de modestie  
és choses qui concernent les conseils  
incomprehensibles de Dieu. Cest

afçauoir que quand il nous a reuelé quelque chose en fa parole touchant la dispensation de sa volonté enuers les hommes, ce n'est pas a nous a sonder si cela conuient a sa nature ou n'y conuient pas; si cela met en Dieu deux volonte<sup>z</sup> opposees ou ne les y met pas : comme si sa nature estoit chose qui peust estre comprise par nos entendemens. Il y a en elle des abyssmes que non seulement l'esprit des hommes, mais mesmes l'intelligence des anges ne peut approfondir. Et pour ne nous pouuoir pas demesler des inconueniens que par cette chetive raison nous pensons suivre des choses lesquelles il nous a reuelees ; ce seroit grieuement pecher alencontre de luy, que d'abandonner ou de tordre la verité de sa parole, & luy donner quelque espee de gehenne, pour luy faire dire ce qu'elle ne veut pas. Quoy? pensons nous auoir l'œil de l'entendement si clairuoyant, qu'il n'y ait aucune obscurité és choses, qu'il ne puisse esclaircir? Oa le pensons nous auoir si ferme & si assésuré qu'il n'y ait en la nature diuine rayon de sa gloire qu'il

ne supporte? Si c'est par la prouidence de Dieu que le peché d'Adam soit arriué, Dieu en est donc l'autheur. Sil est dit qu'il a endurci le cœur de Pharaon, il punit donc les pechez & les vices que luy mesme il crée. Sil a voulu reprouuer la plus grande partie des hommes, donc il ne les veut pas tous sauuer. S'il nous declare qu'il les veut tous sauuer, donc il n'y a point de predestination & eslection precise & absoluë de quelque petit nombre seulement. Si Iesus Christ est mort pour tous les hommes vniuersellement, donc l'Euangile doit estre presché également clairement par toute la terre. Si l'Euangile n'est pas clairement presché par tout: donc Dieu ne conuie pas le reste des hommes a repentance. Si par la voye de sa prouidence il conuie tellement les hommes a repentance qu'ils soyent inexcusables s'ils n'ont recours a sa bonté, donc c'est pour neint qu'il a fait prescher son Euangile. S'il a fait prescher son Euangile distinctement en nos temps, donc il a autresfois abandonné les nations en telle

façon, qu'il ne leur a pas présenté la moindre estincelle de sa miséricorde. Bon Dieu; qui accordera ces conséquences? Chetifs & misérables que nous sommes, qui ne voyons non plus a la splendeur de la vérité que les chauvesouris a la lumière, sinon autant que Dieu nous esclaire intérieurement par la vertu de son Esprit, est ce a nous a luy prescrire ses conseils, & a luy tailler ses chemins & ses voyes? Mais principalement quand il est question de la gloire de ses vertus; entre ses vertus, de celle de sa miséricorde, qu'il a voulu estre plus claire, plus viue, plus esclattante que les autres & par maniere de parler, les esbloüir toutes en quelque façon de la grandeur de sa lumière; sous ombre qu'il semble qu'elle tire apres soy quelque difficulté que nous ne pouuons resoudre, rabbattons nous pour cela le moins du monde de sa loüange? Non mes freres; quand d'un costé la parole de Dieu m'enseignera qu'il en a reprovez quelques vns & adiugé aux peines eternelles; & que d'autre costé ceste mesme parole m'apprendra que

Dieu veut que tous les hommes soyent sauez, qu'il les inuite a repentance, qu'il leur tend les bras, qu'il va au deuant d'eux, qu'il les appelle a haute voix, qu'il ne tient qu'a eux qu'il ne les face participans de sa grace, bien que ma raison trouuaſt la dedans des choses qui ſemblafſent ſ'entrechoquer, bien que quelque effort que i'y fiſſe, ie ne les peuſſe accorder ni reconcilier enſemble, ie ne laiſſeray pas de tenir ces deux doctrines pour veritables pourtant, & n'entreprendray pas, ſi la parole de Dieu ne m'en donne le moyen, de composer le differend de ces deux volontez de Dieu qui ſemblent ſi repugnantes. Ou Dieu nous donnera quelque iour plus grande illumination de ſon Eſprit; ou au moins en l'apparition de ſon fils, manifeftera t'il toutes choses. Cependant ie garderay ce qu'il m'a reuelé, & ne permettray pas que la hardieſſe de ma raison face aucun tort a ſa grace innarrable enuers les hommes.

La ſeconde choſe que ce grand personnage nous donne en ſon commentaire, eſt, ſi nous y ſommes attentifs,

tentifs ; vne excellente ouuerture a la solution de ceste difficulté ; au moins certes autant comme il en faut pour contenter vne raison sobre & modeste. La parole de Dieu, mes freres, nous presente sa misericorde a considerer en deux manieres. Car ou bien elle la nous propose comme vne vertu grande & infinie a la verité, mais neantmoins telle que pour se faire sentir reellement & produire ses effects au salut eternel des hommes par la remission de leurs offences & la jouyssance de la vie, elle requiert en eux vne certaine qualité prealable, sans laquelle il est impossible qu'elle leur pardonne. Cest qu'avec assurance & repentance ils ayent recours a elle. Le vous prie, feroit il sentir la vertu du sang de son fils a ceux qui le foulent aux pieds ? Donneroit il l'esprit de sanctification a ceux qui le blasphemēt ? Logeroit il dans sa maison ceux qui demeurent obstinez en la haine que naturellement ils luy portent ? Cela certes ne se peut. Et pour ne parler pas de la repugnance qu'il y auroit en ce procedé, avec sa sagesse, ie di que

cest vne chose impossible en elle mesme. Car l'obiet de la iustice & celuy de la misericorde, ne peuuent estre vn mesme obiet: il faut necessairement qu'ils soyent diuersement constituez. Or celuy de la iustice est le pecheur impenitent. Parquoy l'impenitent ne peut receuoir misericorde. Il faut donc qu'il arriue quelque changement au pecheur auant qu'il recoiue le salut: & ce changement est ce que nous appelons la foy & la repentance. Or est ce de ceste misericorde que depend la promesse de la remission des pechez qui nous est faicte en l'Euan-gile. *Si tu crois tu ne viendras point en iugement: Si tu ne crois point tu es desia condamné.* Et, Dieu a tant aimé le monde qu'il a enuoyé son fils au monde afin que quiconque croit en luy ne perisse point, mais ait la vie eternelle. Et, cest icy le pain qui est descendu du Ciel, si quelqu'un en mange il ne mourra point. *Qui croira en moy ne verra iamais la mort. Qui ne croit point l'ire de Dieu demeure sur luy.*

L'autre maniere en laquelle elle nous presente ceste misericorde a cōsiderer



est entât qu'elle ne requiert point ceste qualité, mais qu'elle se desploye a la former és hômes. Qu'elle ne la presuppose pas, di-je, mais la y cree. Qu'elle n'exige pas ceste condition de la creature, mais la y engendre. Et de ceste misericorde parle l'Apostre S. Paul quand il dit; *Ce n'est point* Rom. 9.  
16.  
*ne du voulant, ne du courant, mais de Dieu qui fait misericorde.* Car il oppose ceste misericorde non a la iustice par laquelle il venge les pechez, mais à cette libre dispensation de sa volonté selon laquelle il n'appelle point efficacieusement à sa grace grande partie des hommes. Et celui qu'il nomme le *Dieu qui fait misericorde* en cet endroit est celui mesme qu'il nôme le *Dieu qui appelle.* C'est à dire, Dieu non considéré entant qu'il iustifie pource qu'on a creu, mais qu'il fait sentir la puissance de sa grace pour amener les hommes à croire.

Or de ces deux soit degrés soit especes de misericorde, car il n'importe comment on les nomme, l'Ecriture nous apprend que l'usage de la derniere est purement, & simplement & absolument libre. C'est à di-

re que s'il auoit pleu à Dieu n'en vser point, les hommes fussent demeurez miserables en la condamnation de leur peché: mais ils n'eussent eu aucun subiect de se plaindre. Car qui se plaindra que Dieu ayant créé l'homme droit & heureux, & l'homme s'estant precipité soy-mesme de son bonheur, Dieu le laisse là gisant en ses ruines? Quelle loy y a-t'il soit és cieux soit en la terre qui l'oblige à luy tendre la main? qui ne l'obligeast plustost à verser dessus luy toutes les vengeancees les plus espouuentables de sa iustice? Et s'il auoit pleu à Dieu donner à tous les hommes de croire en son Fils, qui pourroit tirer en cause ou sa sapience ou sa iustice? De sa sapiéce, qui en sçait les profondeurs? Et sa iustice a-t'elle pas esté contentee en son vniue, & son sacrifice est-il pas suffisant d'expier les pechez de tous les hommes du monde? Que s'il lui a pleu, cōme certes il lui a pleu, en laisser les vns en leur condānation, & appeller les autres à la participation de sa grace, qui luy fera rendre raison de cette diuersité, qu'à des gens également perdus, il ait donné

des graces si inegales? C'est pourquoy l'Apostre cite à cette occasion ce passage. *I'auray mercy de celuy de qui i'auray mercy, & feray misericorde à qui ie feray misericorde.* Quant à l'autre, l'usage n'en est pas également libre en Dieu: il y a vne grande difference. Ce n'est pas que Dieu ait quelque loy au dessus de luy qui l'oblige à rien faire: mais c'est qu'il est sa propre loy à soy mesme. Ce n'est pas qu'il y ait aucune necessité au dessus de sa majesté: mais c'est qu'il est sa propre necessité. Et plus grandes sont ses vertus en luy, moins scauroit il faire les choses qui leur sont contraires. Comme donc si la creature est bonne & sainte, Dieu ne peut qu'il ne l'aime: non pource qu'il doive rien à la creature, mais pource qu'il est infiniment bon: ainsi si la creature est corrompue, il ne peut qu'il ne la haïsse à cause de son péché: non pource qu'il ait à rendre raison de ses actions à autre qu'à soy; mais pource qu'il est infiniment iuste. Et ainsi encore si la creature pecheresse a recours à sa misericorde, il ne se peut qu'il n'en ait compassion:

Exod:

33. 19.

non pource qu'il y soit obligé , mais pource qu'il est infiniment misericordieux.

Or est-il singulierement à remarquer que toute la dispensation de Dieu enuers sa creature , en ce qui regarde les peines & les recompenses, la vie & la mort, tout cela depend des alliances que Dieu a traitées avec elle. Si sa bonté remunere sa creature entierement sainte, c'est en vertu de l'alliance de la nature. S'il la deliure de la mort & luy donne la iouissance de sa gloire, c'est en vertu de l'alliance de la grace. S'il la punit à cause de son peché, c'est en vertu ou de l'alliance de la nature , ou de l'alliance legale , ou en consequence de cette iustice vengeresse qu'il a attrahie à l'alliance Euangelique. En apres est à remarquer que toutes ces alliances contractées entre Dieu & la creature , ont leur rapport à ces vertus qui sont en luy, qui requierent en l'homme quelque qualité prealable. En l'alliance de la nature, nul ne peut auoir la vie, s'il n'est parfaitement saint. En l'alliance de la Loy, nul ne la peut obtenir, s'il n'a accom-

pli tous ses commandemens: En l'alliance de la grace, nul ne peut obtenir le salut, s'il ne croit, & estoit impossible que l'alliance de la grace eust son rapport à cette miséricorde de Dieu, qui ne presuppõe point la condition de la foy en l'homme, mais l'y cree. Car quelle alliance seroit-ce que cela, si vous croyez; ie vous donneray de croire? Et partant, ces paroles qui sont au 31. de Ieremie, *C'est icy l'alliance que ie traiteray avec eux, c'est que i'engraueray mes loix en leurs cœurs, & les escriray en leurs entendemens;* ne nous monstrent pas qu'elle est la nature de l'alliance Evangelique en foy, mais quel est le conseil de Dieu de luÿ donner vn tout autre euenement que n'auoit eu la legale. Car la legale n'auoit iustificié personne, pource que personne ne l'auoit obseruee. C'est pourquoy Dieu se plaint qu'elle a esté rendue inutile & enfreinte. Mais l'Evangelique deuoit auoir vn tout autre euenement; car Dieu a arresté en son conseil eternal de donner à quelques vns de croire. Et ainsi c'est vne promesse absolue, & non pas une formule conditionnelle d'alliance. L'Alliance

Euangelique donc a son rapport à cette autre miséricorde qui exige la condition; Si tu crois, tu seras sauué.

Voyons donc maintenant, mes freres, comment ces observations serviront à accorder ces deux volontez qui semblent repugnantes en Dieu, & par mesme moyen à expliquer la solution qu'y donne ce grand homme. Certes comme il n'y a point de contradiction entre ces deux sortes ou ces deux degrez de miséricorde, aussi n'y en a-il point entre les deux volontez qui en despendent. Il veut que tous hommes soient sauuez: Il est vray: & le veut avec affection: mais c'est selon cette miséricorde qui presuppose la condition & non autrement. Si la condition ne se trouue pas en eux, il ne le veut pas. Il veut que peu d'entre les hommes soyent sauuez: Il est vray: mais c'est selon cette seconde sorte de miséricorde qui n'exige pas la condition, mais la cree: qui ne la presuppose pas, mais la fait en l'homme. Et pour expliquer cela plus populairement nous ne craindrons pas de nous servir des comparaisons de l'Escripture, prises

dès affections que les hommes ont pour rechercher les femmes en mariage. Vn homme peut-il pas aimer vne fille iusques à ce degré, que de la vouloir espouser, pouruen que telles & telles conditions s'y rencontrent? Il l'aime, & l'aime mesme avec quelque vehemence. Mais il ne l'aime pourtant que iusqu'à ce poinct. Si ces conditions ne se trouuent en elle, il ne contractera point avec elle ses alliâces: c'est à dire, il ne la prendra point pour sa femme: au contraire, il l'a prendra en haine si elle vient à mespriser sa personne & ses recherches. Là où ce mesme homme viendra à en aimer vn autre tellement, qu'encore que ces conditions n'y soyent pas; il l'a veut espouser. Si on luy dit; elle n'a point de bien: il respondra i'en ay pour nous deux. Si on adioust; elle n'est pas de bonne extraction: il dira, i'ay de la noblesse assez pour elle. Si on presse encore, mais elle n'est pas belle: posé qu'il ait la puissance de l'executer, il dira, & ie la feray belle. Quoy que ç'en soit ie la veux espouser, & la veux espouser pour ce que ie l'aime, & l'ai-

me pource que ie l'aime. De cette premiere sorte d'amour Dieu a aimé tout le genre humain. De cette seconde il a aimé son Eglise: qu'il a trouuee gisante en son sang, que son nombril n'estoit point accommodé, qu'elle eust fait de l'horreur à qui l'eust contemplée, & n'a pas laissé de la vouloir espouser en ses compassions éternelles, pour se la rendre vne épouse chaste, pure & sainte, en nostre Seigneur Iesus.

Quant à la response de ce fermier de Dieu, voicy comment ces observations seruent à l'esclaircir. Pour engendrer cette foy és hommes, il faut nécessairement deux choses: l'efficace interieure del'Esprit, & la predication exterieure de la Parole. Pour le regard de l'efficace de l'Esprit elle depend de cette seconde sorte de misericorde: c'est à dire de cette volonté de creer la foy és hommes, que nous appellons l'eslection. Car Dieu ne l'a fait sentir qu'à ses esleus; & il n'y a que ses esleus qui ayent esté aimez de cette sorte. Mais quant à la predication exterieure de la Parole, elle depend de cette autre sorte de



mercy. Car elle consiste à offrir extérieurement la grace a tous ceux qui se repentent: & n'auons point accoustumé de prescher autrement, sinon croy, & tu seras sauué, car Dieu est pitoyable & misericordieux en son Fils enuers ceux qui se repentent. En vn mot la predication externe n'est rien autre chose sinon la publication authentique de ces infinies compassions que Dieu presente aux hommes pourueu qu'ils les recoient. Que veut donc dire Calvin, que le Prophete ne veut pas subtilement disputer de ce secret conseil de Dieu, mais qu'il veut tenir tous nos sens liez à sa parole? Certes qu'il ne veut pas parler du decret qui depend de cette seconde sorte de misericorde dont le conseil est si libre qu'on n'en peut sonder les raisons, & n'en peut-on alleguer aucune que son bon plaisir: de sorte que quand on vient à examiner pourquoy les vns croient, & les autres ne croient pas, pourquoy Dieu a donné de croire à ceux-cy & non a ceux-là, il se faut arrester là comme sur le bord d'un abyssine, & s'escrier, *O profondeur dee richesses,* & *Rom. II.*

de la Sapience de Dieu ! Que ses ingemens sont incomprehensibles & ses voyes impossibles à trouver. Mais que l'intention du Prophete a esté de parler de cette premiere sorte de misericorde, & de cette premiere sorte de volonté selon laquelle il veut que tous hommes soyent sauez pourueu qu'ils croyent, & les y conuie par la predication de sa Parole. C'est là, mes freres, la solution de ces difficultez, c'est là l'explication de cette solution qui autrement eust peu sembler obscure & difficile.

Que si nous voulons encore approfondir la chose plus auant, vous verrez plus clairement la pertinence de sa responce. Ces deux sortes de misericorde nous sont enseigneés en la Parole de Dieu, & il veut que les ministres de l'Euangile annoncent l'une & l'autre selon que les occasions s'en presentent. Mais neantmoins il y a grande difference entre ces occasions, & doit la predication de chacune estre employee selon la nature des occurrences. Est-il donc question d'induire les hommes à la foy & à la repentance ? Vous ne ferez pas  
alors.

alors mention de cette deuxiesme  
sorte de misericorde & de la volon-  
té qui en depend. Vous ne luy direz  
pas; croy, car Dieu a ordonné de to  
donner de croire:encore moins,croy;  
car il n'y a que Dieu qui puisse faire  
que tu croyes : encore moins, croy,  
car tu es reprouué,& iamais Dieu ne  
te donnera de croire. Mais vous luy  
direz, croy, car si tu crois tu seras  
sauué : croy,car si tu ne crois,l'ire de  
Dieu demeure sur toy : croy; car c'est  
là la seule voye pour paruenir à la  
vie. Et pource que cette misericorde  
est vniuerselle, vous la preschez à  
rous les hommes indifferemment, &  
leur dites que Dieu les a tant aimez  
qu'il a enuoyé son Fils au monde,  
afin que quiconque croit en luy ne  
perisse point,mais qu'il ait la vie eter-  
nelle. Et plus haut vous loüez cette  
misericorde, plus vous l'estendez au  
lóg & au large plus vous la faites vni-  
uerselle,plus vous en représentez les  
affections tendres & vehementes,  
plus est-elle à la gloire de Dieu, &  
plus la rendez vous efficace à la  
conuersion des ames des hommes.  
Car d'où vient cette conuersion que

de l'admiratiō de cette bonté enuers nous? Et si vous la representez grande, l'admiration en sera-elle pas plus grande de mesmes?

Mais vous employez la predication de la seconde, notamment en trois autres sortes d'occurrences. Et premierement pour induire les hommes à humilité. Car si vn homme qui a creu est en quelque façon chatoüillé de l'opinion des forces de son franc arbitre; comme si c'estoit par la force de sa nature ou par la liberté de sa volonté, qu'il eust creu; au lieu que les autres sont demeurez en leur incredulité naturelle: vous luy dites;

1. Cor.

4.7.

Phil. 2.

13.

*Qu'as-tu que tu n'ayes receu? Et si tu l'as receu pourquoy t'en glorifies-tu? Employez-vous à vostre propre salut; & comment? avec crainte & tremblement: c'est à dire en yne humilité & submission profonde. Car ce n'est pas de vous que cela vient: c'est Dieu qui fait en vous & le vouloir, & le parfaire selon son bon plaisir. En apres, pour remedier au scandale de l'incredulité des vns & de la reuolte des autres. Car quand vous voyez tant de gens à qui l'Euangile est presché;*

le reietter avec vne si grande obstination, y a-il pas en cela beaucoup de matiere de scandale à l'infirmité de la chair ? Pour y remedier l'Apostre S. Paul va au deuant, & sur l'estonnement qu'on pouuoit prendre de ce que les Iuifs qui auoyent tant de prerogatiues d'alliances, de propheties, d'oracles, de promesses, n'ont point creu; il dit qu'il ne se peut pourtant faire *que la Parole de Dieu soit decheute. Que tous ceux qui sont d'Israel ne sont pas pourtant Israel;* & que Dieu auoit assez monstre au type d'Esau & de Iacob, à quoy il s'en falloit resoudre. C'est que *deuant que les enfans fussent nés, & qu'ils eussent fait ne bien ne mal, afin que le propos arresté selon l'election de Dieu demeurast, non point par les œuvres, mais par celui qui appelle, il fut dit, le plus grand seruira au moindre.* Et s'il arriue à quelcun faisant profession de la verité, d'en dechoir, le mesme Apostre vous apprend 2. Timoth. 2. en l'affaire d'Hymence & de Philete qui s'estoyent deuoyez de la verité, à dire, *que toutesfois le fondement de Dieu demeure ferme, ayant ce seau, le Sei-*

Rom. 9.  
6.

Rom. 9.  
11.

gneur cognoist ceux qui sont siens. Finalement pour donner vne consolation merueilleusemēt sensible à ceux qui ont creu. Car l'infirmité de la chair vient-elle quelques-fois à luitter contre l'assurance de la perseuerance? Les afflictions mesmes qui accompagnent la condition des enfans de Dieu, semblent-elles quelquesfois capables d'esbranler nostre constance? Alors viennent en vsage les paroles de l'Apostre Rom. 8. *Que toutes choses aident ensemble en bien à ceux qui aiment Dieu, & qui sont appelez selon son propos arresté. Que ceux que Dieu a precognus, il les a aussi predestinez à estre rendus conformes à l'image de son Fils. Que ceux que Dieu a predestinez il les a aussi appelez; que ceux qu'il a appelez, il les a aussi iustifiez, & que ceux qu'il a iustifiez, il les a aussi glorifiez. Que dirons-nous donc à ces choses? Si Dieu est pour nous qui sera contre nous? Qui est-ce qui nous separera de la dilection de Christ? sera-ce oppression, ou angoisse, ou famine, ou nudité, ou peril ou espee? Ains en toutes ces choses nous sommes plus que vainqueurs en celuy qui nous a aimez. Et de fait*

si ceste volonté arrestee de nous appeller à Christ n'est fondée que dessus le bon plaisir de Dieu, & n'a point d'autre cause hors de luy mesme, pourquoy la changeroit-il? Et si Dieu nous a tant aimez du temps que nous ne le cognoissions point que de vouloir nous appeller efficacement à sa cognoissance, pourquoy maintenant que nous le cognoissons ne nous donneroit-il pas de continuer à le cognoistre?

Mais pource que d'un costé les occasions de cette doctrine ne se presentent pas si souuent aux Ministres de l'Euangile, & que de l'autre elle n'a son vſage sinon vers ceux qui sont desia conuertis, au lieu que la predication de l'autre misericorde a ses occasions comme continuelles, & qu'elle est destinée & à conuertir ceux qui ne le sont pas, & à confirmer en la foy ceux qui l'ont desia receuë; (car c'est l'ordre vniuersel des choses de cette nature, qu'elles se nourrissent & s'entretiennent de la mesme façon qu'elles ont esté premierement engendrées.) l'Apostre appelle cette doctrine icy, comme

Rom. 10  
6, 7.

par vne prerogatiue speciale, la parole de la foy. Ne di point en ton cœur qui montera au ciel? cela est ramener Christ d'en haut. Ou qui descendra en l'abyssme? cela est ramener Christ des morts. Mais que dit-elle? La parole est pres de toy, en ta bouche & en ton cœur. C'est là la parole de la foy, laquelle nous preschons. Car si tu confesses le Seigneur de ta bouche, & que tu croyes en ton cœur que Dieu la ressuscité des morts, tu seras sauué. Car de cœur on croit à iustice, & de bouche on fait confession à salut. Et nostre Seigneur Iesus donnant la commission à ses Apostres leur dit, Allez-vous en par tout le monde & preschez l'Euangile à toute creature. Qui aura creu & aura esté baptisé sera sauué : mais qui n'aura point creu sera condamné.

Marc 16  
15, 16.

Or aurions-nous maintenant, mes freres, si le temps le pouuoit permettre, & à vous annoncer cette premiere sorte de misericorde, & à vous ramenteuoir & rauier en vos cœurs le sentiment de l'autre. Dieu, freres chers & bien-aimez, ce Dieu, di-je de compassions, ce Pere de misericorde, prend si peu de plaisir en



la mort des pecheurs , prend vn si grand contentement en leur vie & en leur salut, pourueu qu'ils se repentent & qu'ils croyent, que pour ce que sa iustice mettoit empeschement a l'vsage de cette sienne misericorde , & que tant s'en faut qu'il y eust en vous condition aucune qui peust conuier sa bonté , qu'il n'y auoit au contraire que peché, qui prouuoit son ire à la vengeance; il a enuoyé son fils , son vnique en la terre, pour faire la propitiation de vos pechez, & l'abandonner à vne ignominieuse croix pour vostre vie. C'est en luy que les misericordes de Dieu vous sont desployees. C'est là, si vous en voulez iouyr , que vous deuez auoir recours: c'est le seul nom donné aux hommes sous le ciel pour estre sauué: & anatheme disons nous à tous ceux qui escriuent, qui parlent , qui pensent & qui penseront iamais au contraire. Tout ce que Dieu a iamais tesmoigné de sa misericorde aux Gentils , comme ce grand autheur que nous vous auons nommé , dit qu'il l'a fait par la voye de sa prouidence: tout ce qu'il en a iamais reuelé en la

dispensation de la Loy : tout ce qu'il en a fait dire par ses Prophetes ; tout ce qu'il en a déclaré en l'Euāgile, où il nous a mis à nu ses richesses deuant les yeux : tout cela a esté pour ce que son fils a souffert ; pource que son fils deuoit souffrir : sans luy il n'en eust iamais paru au monde vne estincelle. Tous ceux qui sont sauez sous l'aliance de la grace ; tous ceux qui l'ont esté pendant que la Loy a regné ; tous ceux qui l'ont esté auant que la Loy fust donnée , ont esté sauez par par Christ, ne l'ont peu estre sans luy, nul ne le fera iamais iusques à la consommation des siecles. C'est ce Christ que nous vous présentons icy mort pour vos offenses & ressuscité pour vostre iustification ? Il a souffert que son corps ait esté rompu en la croix pour vous. Il a voulu que son sang ait esté respandu pour le lauement de vos ames. Il vous donne maintenant sa chair à manger , il vous donne son sang à boire : c'est à dire, les gages de l'un & de l'autre, pour vous asseurer que si vous croyez, vous auez en luy la vie. Mais ie di si vous croyez. Que ceux qui ne croient pas que c'est

leur Redempteur, que ceux qui pensent se pouuoir passer de ce Redempteur, ne s'approchent pas de la Table; ne pensent pas auoir aucune part en ses graces. C'est la source dont vous auez a puiser vostre salut; & le moyen de le puiser c'est la foy. C'est l'arbre de vie dont vous auez a manger; & le moyen de le manger, c'est croire. C'est le serpent esleué dans le desert de ce monde, par lequel vous deuez estre gueris, & le moyen d'estre gueri, c'est de le contempler. C'est le Sacrificateur & la victime par laquelle vous auez a estre sanctifiez; & le moyen d'en estre veritablement sanctifié est d'estre couuert de son sang, & le recevoir auidement, quand par la predication de l'Evangile & l'administration des Sacramens on vous en arrouse. C'est le rocher frappé dont vous auez a estre rafraischis & desalterez; & le moyen de se rafraischir, c'est de boire, c'est de croire.

Mais que di-je, si vous croyez? Reuoqueray-je cela en doute? Aurions nous tant fait resonner ce nom de nostre Seigneur Iesus a vos oreil-

les, sans qu'il fust entré en vos cœurs? L'aurons nous si viuement peint deuant nos yeux, sans que le saint pourtrait de la Croix se fust engraué en vos ames? Non mes freres; nous esperons meilleures choses de vous & plus conuenables a salut. Nous ne vous disons pas, si vous croyez approchez vous; mais pource que vous auez creu, venez a ceste table. Vous y auez la nourriture de vostre foy, vn des moyens desquels Dieu se sert pour l'augmenter, la fomentier en vous, la confirmer en vne inuincible perseuerance. Car icy il vous abreuve de son Esprit, l'Esprit de consolation; & de ioye inenarrable; Esprit qui rend tesmoignage a vostre espoir que vous estes du nombre des enfans de Dieu: & si vous estes enfans, vous estes d'oc heritiers, heritiers de ie de Dieu & coheritiers de nostre Seigneur Iesus. Si du temps que vous estiez ses ennemis il vous a donné son fils, afin de viure en luy en y croyant, comment ne vous entretiendroit-il pas en ceste vie? Si du temps que vous estiez comme le reste des hommes, gisans en vos fautes & pe-

chez, & si auengles que vostre auenglement estoit inuincible à toute autre chose qu'à la toute puissance diuine, il a voulu vous illuminer pour contempler les richesses de ses compassions au redempteur : maintenant qu'il vous a donné de le contempler, d'y mettre la main de la foy, & d'en entrer en iouissance, permettroit-il que vous perdissiez ce thresor & que vous retournassiez en vostre misere ancienne? Non mes freres ; il est puissant de paracheuer l'œuvre qu'il a commencé en vous ; il est fidele pour ne vous donner point de tentation par dessus vos forces, mais avec la tentation il vous donnera l'issuë, en telle maniere que vous la pourrez supporter. Le Pere qui vous a appellez des tenebres à la merueilleuse lumiere, le Fils qui vous a rachetez & qui est la lumiere mesme : le S. Esprit qui vous fait sentir sa vertu en consolation & sanctification, vous parface, vous affermisce, & paracheue en vous ce bon œuvre. Et à luy, vn seul Dieu benit eternellement, soit gloire és siecles des siecles  
**A M E N.**



## SERMON II.

R O M. chap. I. v. 19. 20.

*Ce qui se peut cognoistre de Dieu , a esté manifesté en eux : car Dieu le leur a manifesté. Car les choses inuisibles d'iceluy , à sçauoir, tant sa puissance eternelle que sa diuinité, se voyent comme à l'œil par la creation du monde , estans considerées en ses ouvrages : afin qu'ils soyent rendus inexcusables.*



**V** Ous entendistes Dimanche dernier , Mes Frerès, qu'outre ceste seconde sorte de misericorde, que Dieu desploye a creer la foy en ses esleus ; il y a encore en luy vne vertu que nous appellons communement du mesme nom, qui le rend souuerainement

nement enclin à pardonner à ses creatures pecheresses, pourueu qu'au prealable elles se conuertissent serieusement de leurs pechez, avec foy & repentance. Et vous fut alors exposé comment c'est de ceste seconde sorte de misericorde que depend la vocation exterieure des hommes à salut, par la predication de la Parole. Vous vous souuenez aussi que nous vous allegasmes à ce propos les paroles de ce grand seruiteur de Dieu, Calvin, qui dit en ses commentaires sur le passage que nous expliquions, que Dieu a tousiours voulu qu'on ait cognu au monde ceste sienne inclination a la pitié. C'est pourquoy non seulement auourd'hui l'Euangile est presché en l'yniuers, mais mesmes les profanes, c'est à dire, les Gentils, qui estoient destituez de la Loy & des Prophetes, ont eu quelque goust de ceste doctrine. Et bié qu'elle fust estouffée en plusieurs grâdes erreurs, si est ce pourtât que par quelque secret mouuement ils ont esté amenez à demander pardon: d'autant que ce sentiment estoit comme né en eux, que Dieu est aisé a ap-

païser vers tous ceux qui le recherchent.

Mais pour ce que nous employâmes le temps à autre chose, nous ne peusmes nous arrester à la consideration particuliere de ce qu'il auoit dit des Payens. Et toutesfois l'importance de la chose, & les circonstances du temps & des occurrences sont telles, qu'il n'est ni raisonnable qu'on exige de nous, ni à propos que nous nous resoluions de nous mesmes, de passer entierement ceste doctrine sous silence. Estimans donc que le texte que nous venons de lire deuant vous, pourroit fournir de matiere à ce propos, & de solution aux difficultez qui se presentent en ceste rencontre, nous l'auons choisi pour theme de ceste action, en laquelle nous desirons, moyennant la grace de Dieu, abbreger & restreindre vne matiere fort ample. Et vous prions encore de ne trouuer pas estrange si nous ne suiuous pas nostre methode accoustumée en ceste sorte d'actions, & si nous ne taschons pas à anatomiser ce texte en toutes ses parties. Ni le temps ne le permettroit pas quand



nous le voudrions : ni nostre dessein de maintenant ne permet pas que nous ayons ceste pensee. Estant icy question des Gentils seulement, comme il est clair par la suite du propos, & non de la nation Iudaïque ; Et l'Apostre disant ouuertement que Dieu leur a manifesté en ses œuvres ce qui se peut cognoistre de luy, afin qu'ils soyent rendus inexcusables, nous auons intention d'y considerer seulement ces deux choses. Premièrement quelle reuelation est-ce là, & si ce qui se peut cognoistre de Dieu, comprend aussi en quelque façon la manifestation de sa misericorde. Puis apres, en cas que cela comprenne la cognoissance de sa misericorde en quelque façon, à quelle fin, ou avec quel succès ceste reuelation leur a esté faite. Mais auant que d'entamer ni l'un ni l'autre de ces poincts, nous auons a vous aduertir expressément d'une chose, qui neantmoins se pourroit assez entendre d'elle mesme. C'est qu'il s'agit icy, non pas de sçauoir si Dieu a reellement & de fait vsé de ceste misericorde enuers les Gentils en leur pardonnant leurs pechez. Si cela

estoit, puis que Dieu ne pardonne les pechez sinon aux pecheurs penitens, il faudroit presupposer qu'ils se sont conuertis par repentance. Et c'est ce que l'Escripture non seulement ne nous dit point ; mais mesmes elle enseigne disertement le contraire. Mais nous cerchons si Dieu leur a donné quelque reuelation de ceste sienne misericorde, afin de les amener à se repentir. Car nous traittons icy de la dispensation de la bonté diuine enuers les humains : non de la corruption de l'homme qui le rend incapable de recognoistre ceste bonté & en faire son profit.

Pour ce qui regarde le premier point, il pourroit sembler que l'Apostre parle seulement en ce passage des œuvres de la premiere creation, & qu'il reduise toute ceste manifestation des choses appartenantes a la cognoissance de Dieu, a deux seulement : la puissance eternelle, & la diuinité : ou tout au plus a trois ; la diuinité, la puissance, l'eternité. Car qui dit qu'en Dieu il y a vne puissance eternelle, recognoist aussi par vne cōsequēce necessaire & tout

euidente, l'eternité de son essence. Puis donc que la misericorde est en Dieu vne vertu qui ne se desploye que dessus la creature pecheresse pour la remission, si elle se conuertit, la premiere creation des choses & le premier estat de l'homme estant sans peché, & par consequent sans repentance, estoit aussi sans aucune declaration de l'usage de la misericorde.

Neantmoins plusieurs grandes raisons nous font estimer au contraire. Et nous ne dirons pas icy vne chose que toutesfois nous estimons considerable. C'est que le vray & legitime seruice de Dieu consistant en quatre sortes de deuoirs: la confiance que la creature doit prendre en sa bonté: l'innocation de son nom, pour obtenir ce qui est de nostre necessité; l'action de graces pour ses bienfaits: & l'obseruation des choses qui luy sont agreables en pieté & en iustice: Bien que la misericorde n'eust point esté cognue en la creation, si est ce que les œuvres de Dieu donnoient assez de cognoissance de ses vertus, pour induire les hommes à ces quatre choses. Posé donc le cas

qu'il se soit trouué parmy ces nations: que l'Apostre S. Paul appelle icy inexcusables, vn homme qui par la contemplation des ouurages de la creation, ait esté induit a rendre à Dieu tous ces deuoirs en la sincerité & en la plénitude que Dieu exige de sa creature raisonnable: (Ce qui a esté entièrement impossible eu egard à la corruption de l'homme: mais n'eust pas esté impossible à Dieu s'il luy eust plu employer sa puissance infinie, pour en repurger quelcun de sa corruption dès son enfance) on peut demander si cet homme conçu en peché originel, & neantmoins amené iusques à ce point de sanctification, seroit sauué ou non, encore qu'il n'eust point cognu ceste miséricorde par laquelle Dieu remet les offenses. De penser qu'il deuroit estre eternellement perdu, & que l'ignorance de la miséricorde de Dieu luy osteroit l'esperance du salut, c'est ce que ie ne sçay pas si quelcun des hommes pourroit dire; mais au moins croy-ie que Dieu est trop misericordieux pour le faire. Mais comment? Pourroit-il estre sauué?

sans la misericorde de Dieu ? Néany-  
certes. Car il ne le pourroit estre  
sans la remission de son peché origi-  
nal. Or toute remission de peché  
depend de la misericorde. Mais ie  
me tairay de cela , pource que  
quelcun pourroit respondre que de  
là il ne s'ensuiuroit pas pourtant que  
Dieu eust reuelé sa misericorde en la  
creation des choses. Quoy que s'il se  
pouuoit faire qu'un homme fust sau-  
ué par la misericorde de Dieu , sans  
en auoir eu aucune prealable intelli-  
gence ; il ne deuroit pas sembler  
estrange qu'un homme peüst estre  
sauué par elle mesme , apres en auoir  
eu quelque cognoissance , quoy  
qu'obscure & peu distincte en com-  
paraison de telle que nous auons par  
l'Euangile.

Ie pourroy dire aussi que des  
vertus de Dieu qu'il a reuelees en  
ses œures, vne ame que son propre  
vice & sa naturelle corruption n'a-  
ueugleroit point , pourroit monter  
par la ratiocination iusques a quel-  
que cognoissance de celles qu'au-  
cuns notables effects n'auroient ma-  
nifestées. Premièrement pour ce que

ces vertus qui se sont déclarées en leurs ouurages, comme la sagesse, la puissance, & la bonté, monstrent assez que la nature en laquelle elles sont, doit estre souverainement parfaite. D'ou il semble qu'il ne soit pas malaisé de passer a ceste conclusion, que si elle est ainsi parfaite, elle doit avoir toutes sortes de vertus en soy. Puis apres il y a certaines vertus qui ont de l'affinité entr'elles, & qui se rencontrent volontiers en vn mesme sujet. Si vous voyés vn homme parfaitement genereux & magnanime, a peine croirés vous qu'il soit ni chiche ni cruel. La clemence & la liberalité sont vertus, qui ordinairement accompagnent la magnanimité qui est en vn degré fort recommandable. Et si vous voyés vn excellent sculpteur, a peine croirés vous qu'il ne sçache quelque chose en la peinture; pour la conformité que ces arts ont ensemble. Comme donc encore que Dieu n'eust iamais fait de bien particuliere declaration de sa iustice aux hommes, ni par punitions, ni par menaces, i'estime qu'ils ne laisseroyent pas d'auoir

quelques alarmes de leur peché, & de sentir quelque chose de l'œuvre de la Loy en leurs cœurs, par l'accusation de leurs propres pensées. Et cependant que la nature divine ne peut estre telle, qu'elle ne soit souverainement sainte: & elle ne peut estre souverainement sainte, qu'elle ne haïsse le peché. C'est pourquoy il seroit tres-malaisé que la cognoissance de sa sainteté d'un costé, & de l'autre celle de sa puissance, ne fissent craindre la végeance. Ainsi, bien que Dieu n'eust iamais fort expressément tesmoigné sa miséricorde ni par promesses ni par effets, il n'est pas à presumer qu'une ame bien lumineuse, comme deuroit estre celle des hommes, de la cognoissance de ceste infinie bonté que Dieu a tesmoignée en la creation du monde, & notamment de l'homme, ne peust parvenir iusques à quelque intelligence de sa miséricorde. Toutesfois ie ne mettray pas cela en avant, pource que peut estre quelqu'un respondroit que la conscience du peché troubleroit ces raisonnemens, & que l'aprehension de la iustice donnant des

alarmes & des angoisses a l'ame, l'empescheroit en ceste agitation, de se pouuoir fermement arrester sur l'obiet de la misericorde. Combien que si l'homme n'estoit point encore plus meschant qu'aisé a espouuancer, où il n'y a point d'irreuoicable denonciation de la pünition, il deuroit pour le moins auoir autant de bonne opinion de la misericorde de Dieu, comme d'apprehension de sa iustice.

Je diray seulement que ce que nous appellons la Bonté de Dieu, qui paroist en la creation de ses ouurages, garde ce nom de bonté, eu egard a la creature raisonnable, a qui il auoit donné la possëssion & l'empire du monde, pendant qu'elle demeure en son integrité originelle. Mais depuis que la creature a degeneré, si ceste bonté persiste en son endroit, elle change de nature & de nom, & passe iusques a ceste vertu que nous nommons Misericorde. Pource que la creature qui a peché contre son Createur, a dés ce moment là meritë d'estre abyssmee dans les enfers; demeurer en estre apres le peché, iouir



de la lumiere du Soleil, vser des biens de la terre, auoir encore le credit de leuer les yeux vers les cieux, n'estre point foudroyé quand on prend la hardiesse d'y leuer les mains, est vn tesmoignage que si Dieu est iuste pour la vengeance des pechés, il est tardif a les punir pourtant, & plein de compassion pour attendre la repentance. Et partant ce que nous traduisons icy, *par la creation du monde*, deuroit, comme de grands personnages l'ont remarqué, & nostre version mesme le porte en la marge, estre plustost tourné, *depuis la creation du monde*. Pour monstrier que l'Apostre ne parle pas seulement de la manifestation que Dieu a faite de ses vertus en la creation des choses, mais de celle qu'il a continuee en leur conseruation, & de iour en iour confirmee & comme estalee en sa prouidence.

Defait, ce mesme Apostre qui parle ainsi en cet endroit, en deux autres passages du liure des Actes nous donne assez a entendre quel est son sentiment en ces choses. Car au chapitre dixseptieme, parlant aux

Atheniens, il dit, que Dieu a créé d'un mesme sang tout le genre humain, pour habiter sur toute l'estendue de la terre, ayant déterminé les saisons qu'il a auparavant ordonnées, & les bornes de leur habitation. Qui sont choses arrivées depuis le péché. Puis il adjoute la fin pour laquelle Dieu l'a fait.

Afin, dit-il, qu'ils cherchent le Seigneur si en quelque sorte ils pourroyent l'atoucher comme en tastonnant. Combien qu'il ne soit point loing d'un chacun de nous. Car c'est par luy que nous avons mouvement & sentiment & estre. Paroles esquelles vous voyez manifestement deux choses. La premiere, que si en ceste recherche il faut aller comme a tastons, ce n'est pas la faute de la revelation. Car comme dit cet incomparable Autheur sur ce passage ; Dieu n'a point couvert sa gloire d'ombrages obscurs en cet ouvrage du monde ; mais il a engravé par tout des marques si apparentes, que les aveugles mesmes les pourroyent recognoistre en tastonnant. En effect, faudroit il tant chercher ce que nous avons si près de nous & en nous mesmes ?

Mais

Mais la faute vient de nostre auement & corruption naturelle. L'autre est, que Dieu s'est reuelé aux hommes de ceste façon depuis le peché par ces belles œuvres de sa prouidence, afin qu'ils le cherchent. Or qui le pouuoit auoir induit depuis le peché à les conuier ainsi, que sa misericorde ? Et eux comment pouuoient-ils recognoistre que Dieu les inuitoit, qu'ils ne recognussent en ceste inuitation ceste misericorde mesme ?

Au chapitre quatorzième, parlant aux Lycaoniens, il dit qu'à la verité Dieu a laissé les Nations cheminer en leurs voyes. Mais il interprete cela incontinent, & adioute. *Quoy que iamais il ne se soit laissé sans tesmoignage.* Tesmoignage, de quoy ? *En bien faisant, dit-il, & nous donnant pluies du Ciel & saisons fertiles, & remplissant nos cœurs de viande & de ioye.* C'est donc tesmoignage de bonté, qui en cet estat là ne pouuoit estre prise par les Gentils, s'ils se fussent mis à la contempler comme il faut, que pour yne declaration qu'il les attendoit patiemment, & qu'il les

vouloit destourner de leur mauuais  
 train, & les attirer a foy par cordages  
 de beneficence. C'est pourquoy Cal-  
 „ vin dit sur ce passage, que Paul &  
 „ Barnabas ostent icy toute couuer-  
 „ ture d'ignorance aux Gentils. Car  
 „ quoy que les hommes se plaisent  
 „ en ce qu'ils ont controuué, si est-ce  
 „ toutesfois que finalement se sen-  
 „ tans conuaincus d'erreur, ils vien-  
 „ nent à ce refuge, qu'il ne leur faut  
 „ imputer aucune coulpe; mais plu-  
 „ stost que Dieu a esté cruel, qui n'a  
 „ point daigné seulement siffler,  
 „ pour retirer de peril & de ruine  
 „ ceux qu'il voyoit perir. Paul &  
 „ Barnabas preuiennent ceste obie-  
 „ ction friuole, quand ils monstrent  
 „ que Dieu s'est tellement caché,  
 „ que cependant il a rendu tesmoi-  
 „ gnage de foy & de sa diuinité:  
 „ voire qu'il a donné tel tesmoigna-  
 „ ge de foy qu'il n'a point laissé le  
 „ monde errer entât qu'on luy estoit.

C'est à dire, en ce qui regarde  
 l'invitation exterieure.

Mais ie vous prie, mes freres,  
 comment est ce que les benedictions  
 de Dieu n'eussent point rappellé les

hommes a luy, veu que ses iugemens mesmes faisoient sans doute cet office? Nostre Seigneur au treiziesme chapitre de l'Euangile selon S. Luc, sur le rapport qu'on luy fit de la cruauté de Pilate qui auoit meslé le sang des Galileens avec leurs sacrifices, dit, *Cuidez vous que ces Galileens fussent plus pecheurs que tous les autres Galileens, pourtant qu'ils ont souffert telles choses? Non, vous di-je, mais si vous ne vous amendez vous perirez tous semblablement.* Paroles qu'il repete touchant dix-huict sur lesquels tomba la tour de Siloë en Ierusalem. Pensez vous pas, mes freres, que ce soit là vne ratiocination prise de la nature de la chose mesme? C'est a sçauoir que ce que Dieu fait tomber ses iugemens sur quelques vns en ceste vie, c'est a fin de destourner les autres de leur peché par de si terribles exemples? Ou estimera t'on que Dieu vst autrement de ses iugemens enuers les autres hommes, qu'enuers les Galileens, & qu'il ne se souciait en aucune façon de les amender par les enseignemens de ses vengeancees? Ou que les Gentils

n'eussent pas deu, voire s'ils n'eussent point esté aueuglez de leur peché, n'eussent pas peu entrer en des raisonnemens semblables ? Combien croyez vous qu'il y en'ait eu en Galilee & en Ierusalem qui n'ont point fait profit de ces aduertissemens, & qui sont peris en leur obstination, & qui neantmoins le Seigneur enseigne qu'ils estoient destinez ? Dieu auoit-il donc tant de soin des reprenez en Iudee, pour n'en auoir du tout point de ceux qui l'estoyent en Armenie.

Quoy que c'en soit, les Payens mesmes l'ont ainsi pris. Car des calamités insignes arriuees a cestuy ci ou a cestuy là, ils ont quelques fois tiré des argumens qu'il se faloit conuertir a la Diuinité, & amender sa mauuaise vie ; & y en a d'excellamment beaux traits dans les historiens, les philosophes & les poëtes. Iusques à ramener, par maniere de dire, les ombres mesmes des enfers, pour aduertir les hommes d'apprendre la iustice & ne mespriser pas les Dieux. Mais en cela ont ils indignement abusé de ces aduertissemens, &

qu'ils ne s'en sont pas émeus comme il falloit, & qu'au lieu de se retourner au vray Dieu createur des cieux & de la terre, qui gouuerne toutes choses par sa prouidence, & de la main de qui venoyent ces iugemens, ils sont allés vers les dieux qu'ils auoyent forgés eux mesmes. Au lieu de se repentir par vn vray & serieux amendement de leur vie, ils se sont contentés de faire des processions aux Temples de Iupiter & d'Apolon, & des encensemens a leurs statues. Au lieu, comme dit Dauid au Pseaume cinquante & vniesme, de presenter a Dieu vn cœur véritablement contrit, & vne ame ouuree du sentiment de son offense, ils se sont amusez a tuer des genices & des taureaux, & a charger leurs autels du carnage de leurs victimes. Au lieu d'auoir recours a la misericorde de Dieu, qui seul leur pouuoit pardonner leurs pechez, seul pouuoit trouuer le moyen de satisfaire a sa iustice, pour expier les meurtres commis ou par precipitation de courroux, ou par appetit de vengeance, ou par quelque maudite trahison, ils

en faisoient de nouveaux, en offrant mesmes des hommes viuans en sacrifice. Ce qui non seulement n'apaisoit pas l'ire de Dieu, mais l'irritoit & l'enflammoit encore dauantage.

Mais à quoy faire tant de raisonnemens? L'Apôstre au chap. 2. de ceste mesme Épiſtre, nous dit expressement, que *les richesses de la benignité de Dieu; & de sa patience & de sa longue attente, ont tousiours conuie les hommes a repentance.* Paroles dont chacune merite d'estre singulièrement pesée. Car il dit premierement que Dieu monstre sa benignité. Et toute benignité tient de la misericorde quand il est question de la creature pechereſſe. Puis il parle de sa longue attente. Qui est vn degré de ceste reuelation de misericorde qui inuite a repentance, merueilleusement considerable. Car comment les hommes ne sont-ils point entrez en ce discours? Il est iuste, & le monstre quelques fois par des iugemens espouuantablos. Neantmoins il attend ordinairement vn fort long temps a les enuoyer. Que peut ce



donc estre autre chose sinon qu'il veut tesmōigner qu'il est pirovable enuers ceux qui n'abusent pas de sa longue attente avec vne obstination incorrigible? Apres cela, il parle de patience, & se sert d'un mot qui presente ceste sorte de patience qui est conjointe avec quelque espee d'ahan, comme si on portoit vn pesant fardeau: dautant que la iustice incitant Dieu a la punition, & le peché de soy mesme estant insupportable a vn iuge si iuste & si amateur de la majesté de ses loix, neantmoins s'il faut ainsi parler, il se fait force, & attend si les hommes viendront a resipiscence. Dequoy il donna vne si belle preuue es iours de Noë, & depuis encore en toute la conduite de sa prouidence. Car de quelle patience mes freres, a-il falu qu'il ait vſé, non enuers les personnes particulières seulement, dont il a supporté les pechez, mais enuers les Empires & les grands Estats, les endurent par tant de siecles tous entiers & commettre tant d'idolatries apres les faux Dieux, & se polluer en tant d'abominations, & exercer dessus

leurs voisins tant de brigandages ? En outre, il appelle toutes ces choses richesses de benignité, de longue attente, de patience. Afin qu'on ne pense pas qu'il y soit eschars & espargnant ; & que ce soit a regret qu'il les desploye. Comme aussi certes si nous regardons qu'elle a esté la multitude comme infinie d'hommes en tant de nations esparfes par tout l'univers, qu'il a supportee de ceste façon en vne si longue suite de siecles, a peine trouuerons nous que le mot de richesses y puisse suffire. Et finalement il adiousté que cela inuite a repentance : mots qui tesmoignent assez sa misericorde quand les autres n'y seroyent point si emphatiques. Car il n'y a que la seule esperance de pardon qui puisse inuiter a se repentir, & n'y a que la seule representation de la misericorde, qui donne ceste esperance. Encore remarque ce grand homme que nous ne pouuons iamais assez louer, que le texte ne dit pas seulement que ces choses inuient a se repentir, mais mesmes qu'elles y conduisent, & y menent comme par la main.

Et ne peut estre douteux si l'Apostre parle des Gentils en ce passage. Quoy que quand ce seroit chose douteuse, ou la longue attente & la patience de Dieu auroit elle eu autre bür enuers les Gentils qu'à l'endroit des Iuifs? ou se pourroit-il dire que Dieu auroit vsé enuers les Iuifs seulement, de sa patience & de sa longue attente? Mais la suite du propos monstre que tout ce discours s'entretient avec le chapitre precedent; & ces mots, *pourtant ô homme, quiconque tu sois*, monstrent qu'ils n'exceptent personne; & ceux-cy, *au Iuif premierement, puis aussi au Grec*, ne donnent en cet égard autre prerogatiue aux Iuifs, sinon d'aller les premiers en ordre soit en la peine soit en la recompense. C'est pourquoy les deux plus grandes & plus limpides lumieres de nos Eglises l'interpretent; l'un des Gentils seulement, à cause de la suite du propos precedent, l'autre de tous les deux peuples, à cause de la contexture des paroles suivantes & de la nature de la chose. Il faut donc en ces mots, *sa puissance eternelle*, comprendre non seulement

Caluin  
&  
Martyr

cette puissance qui s'est monstree en la creation des choses; mais aussi celle qui paroist en leur conseruation. Et en cettuy-cy, *sa diuinité*, toutes les vertus de Dieu dōt les hōmes peuuent auoir eu cognoissance depuis la creation du monde, tant par la contemplation de ses œuvres, comme par la conduite de sa protidence en l'administration des choses humaines. Et considerer les Gentils dont l'Apostre parle, non pas comme hommes seulement à qui Dieu presente ses œuvres à contempler; mais comme hommes pecheurs desquels Dieu a soin, & qu'il appelle à repentance. Et c'est ainsi que Calvin le prend en son Commentaire sur ce passage.

„ On ne peut, dit-il, conceuoir Dieu  
 „ sans son eternité, puissance, sagesse,  
 „ bonté, verité, iustice, misericorde.  
 „ Son eternité apparroist en ce  
 „ qu'il est autheur de toutes choses.  
 „ Sa puissance, parce qu'il tient toutes  
 „ choses en sa main, & fait qu'elles  
 „ consistent par luy. Sa sagesse  
 „ par la disposition compassée d'un  
 „ ordre tres-parfait. Sa bonté, pour  
 „ ce qu'il n'auoit point de cause

d'ailleurs qui le peult mouuoir à „  
 créer toutes choses : & n'y a d'au- „  
 tre raison que cette mesme bonté „  
 qui le puisse inciter à les conseruer „  
 & maintenir. Sa iustice, en l'admi- „  
 nistration & gouuernement de ses „  
 creatures, d'autant qu'il punit les „  
 transgresseurs, & fait la vengeance „  
 pour les innocens. Sa misericorde, „  
 parce qu'en si grande patience il „  
 supporte la peruersité des hom- „  
 mes. Voyons maintenant ou à quel- „  
 le fin, ou avec quel succès ceste ma- „  
 nifestation s'est faite.

• L'Apostre dit, *afin qu'ils soyent  
 rendus inexcusables.* La signification  
 de ceste particule, *afin*, à en l'Escri-  
 ture vn double vsage. Car ou bien  
 elle designe le but auquel propre-  
 ment on a tendu en quelque action,  
 ou bien l'euenement qui en est reüssi.  
 De ceste premiere signification les  
 exemples sont comme infinis, & n'est  
 pas besoin d'en produire. Mais au  
 Pseaume 51. en ces mots, *afin que tu  
 sois trouué iuste en tes parolles, & que tu  
 ayes gain de cause quand tu iuges* : le  
 mot *afin*, signifie l'euenement, & ne  
 peut représenter autre chose. Car ie

ne pensé pas qu'il y eust aucun qui peust croire que David en pechant ait eu pour but de faire paroistre la iustice de Dieu en sa punition, & se rendre de propos deliberé le subiect de la gloire de ses vengeancees. Ce seroit l'vnique exemple de ce zele. Et au chapitre onzieme de l'Epistre aux Hebreux en ce passage. Par foy entendons nous que les siecles ont esté ordonnez par la Parole de Dieu, de sorte que les choses qui se voyent n'ont point esté faites de choses qui apparussent, ou nous traduisons, *de sorte*, pour designer l'euenement, est au texte originel employé le mesme mot duquel se sert icy nostre Apostre. La question donc est qu'elle signification il doit auoir en cet endroit. Or ne pensons nous pas que proprement il se doiué prendre en la premiere. Car quoy? Dieu se feroit-il reuelé à eux pour aggrauer leur peché dauantage? Certes plus vn homme a de cognoissance de Dieu & plus il peche s'il ne luy rend tout honneur & obeissance. Et plus il peche, plus est-il inexcusable deuant luy. Mais a peine cela se pourroit-il conce-  
voir

noir de celuy qui publie si hautement qu'il prendroit plus de plaisir en la conuersion qu'en la condamnation des hommes. Ce n'est pas que ses iugemens ne soyent incomprehensibles, & que ses voyes se puissent sonder par les humains. Ce n'est pas que sa iustice aussi bien cōme ses autres vertus, n'ait quelques fois des profondeurs ou l'esprit d'autune creature ne scauroit atteindre. Mais il n'est pas icy question de ce qui arriue extraordinairement: l'Apostre y parle d'une dispensation cōmune & vniuerselle enuers toutes les nations de la terre. Ioint que ceste dispensation est appelée ailleurs *richesses de benignité*. Or voyons nous bien en la parole de Dieu que les menaces & les effects de sa iustice, seruent a conduire les hommes à la participation de sa bonté. Mais qu'il faee de propos deliberé seruir la declaration de sa benignité a preparer de plus en plus les hommes a estre vaisseaux de son ire, sans auoir autre but ny autre raison des biens qu'il leur fait, c'est ce qui n'est pas si manifeste en sa parole. De plus, il est icy

question de la reuelation que Dieu a faite de soy en la premiere creation, il n'y peut auoir eu d'autre but que d'attirer l'homme en l'admiration de ses vertus. Et si de celle qu'il a continuée depuis le peché tant en la conseruation de l'vniuers comme en l'administratiō des choses humaines, l'Apostre au passage sus allegué du 17. des Actes, dit expressement qu'il l'a fait *afin que les hommes le recherchent.* Endroit ou puis que le mot, *afin*, ne peut signifier l'euenement, il faut necessairement qu'il signifie le but & le dessein. Or n'y peut-il signifier ceste fin de la reuelation, pour en représenter icy vne non seulement toute differente mais toute contraire. Il vaut donc mieux tirer l'exposition de ce passage & de ses semblables de cette vertu de Dieu qu'il conte entre ses plus admirables propriétés, c'est *qu'il est tardif à ire & abondant en gratuité*, & s'en tenir à l'interpretation de ces deux grands hommes dont nous auons parlé cy dessus, dont l'vn repete par deux fois en son Commentaire que cela n'est pas de l'intention de Dieu, & que cela est



arriué par le vice des hommes au re-  
bours du dessein de la reuelation  
de Dieu, qui y auoit eu vne toute  
autre vifée. L'autre, sur ces mes-  
mes mots, afin qu'ils soyent ren-  
dus inexcusables dir: De cecy il ap-  
pert finalement combien les hom-  
mes peuuent profiter par ceste de-  
monstrance: c'est qu'il ne peuuent  
alleguer aucune defence au iuge-  
ment, n'eschapper qu'à bon droit  
ils ne meritent d'estre condamnez.  
Tenons donc ceste distinction que  
la demonstration de Dieu par la-  
quelle il declare sa gloire en ses  
creatures est assez enidente quant  
à la lumiere qui est en icelle: mais  
quant à nostre auuglement, n'est  
pas suffisante. Cependant nous ne  
sommes pas tellement auugles  
que nous puissions alleguer igno-  
rance, que quant & quant nous ne  
soyons trouuez coupables de ma-  
lice & de peruersité.

Mais quel a esté le sentiment de  
ce personnage touchant la fin de tou-  
tes ces choses en egard à Dieu, il  
l'explique sur ces paroles du  
chapitre deuxiesme que nous auons

tantost confiderées , ou mesprises-tu  
 les richesses de sa benignité , &c. en  
 termes qui deuoyent estre engrauez  
 en lettres d'or deuant les yeux & à la  
 rencontre de tous les hommes. Pour-  
 „ ce que volontiers, dit-il, les hypo-  
 „ crites s'enflent de la prosperité, &  
 „ quand les choses leur viennent à  
 „ souhait, comme si par leurs vertus  
 „ & bienfaicts ils auoyent merité de  
 „ sentir la liberalité du Seigneur,  
 „ & ainsi s'endurcissent tous-  
 „ iours tant plus en vn. mespris &  
 „ contemnement de Dieu, l'Apostre  
 „ vient au deuant de leur arrogance,  
 „ & en alleguant la cause toute con-  
 „ traire, fonde son argument là des-  
 „ sus, pour monstrier qu'il ne faut  
 „ pas pour la prosperité externe,  
 „ qu'ils pensent que Dieu leur soit  
 „ fauorable, veu qu'il regarde à vne  
 „ fin du tout diuerse en bien faisant  
 „ aux hommes: à sçauoir à inciter les  
 „ pecheurs à se conuertir à luy. Ainsi  
 „ donc où la crainte de Dieu ne re-  
 „ gne pas, assurance en prosperité  
 „ est vn contemnement & vne mo-  
 „ querie de sa bonté infinie. Dont  
 „ s'ensuit qu'à bon droit ceux là se-

ront punis plus griefuement, les-  
quels Dieu aura espargnez en cet-  
te vie : pource qu'oultre toute leur  
autre peruerfité, il y a eu encore  
vn poinct, c'est qu'ils ont reietté  
cette douceur paternelle de Dieu  
qui les connoit à repentance. Et  
combien que tous les benefices de  
Dieu soyent autant de tesmoigna-  
ges de sa bonté paternelle, toutes-  
fois pource que souuent il regarde  
à vne autre fin, cependant qu'il  
tient les infideles à leur aise, leur  
faisant sentir sa liberalité, ils s'abu-  
sent de se flatter en leur prosperi-  
té, comme si c'estoit vn certain si-  
gne qu'il les aime & a agreables, ne  
cognoissant point que sa benignité  
les conuie à repentance. Car le Sei-  
gneur vsant de douceur enuers  
nous, monstre qu'il est celuy au-  
quel il nous faut conuertir & re-  
tourner, si nous desirons auoir bien  
& felicité ; & quant & quant nous  
redresse en assurance d'attendre  
& receuoir misericorde de luy. Si  
nous ne rapportons à cette fin sa li-  
beralité & bonté, c'est en abuser :  
combien qu'il ne la faut pas rous-

„ iours prendre en ceste sorte. Car  
„ quand le Seigneur traite douce-  
„ ment ses seruiteurs & leur donne  
„ des benedictions terriennes, ce  
„ sont des tesmoignages par lesquels  
„ il declare sa bonne affection en-  
„ uers eux, & avec cela les accoustu-  
„ me à chercher en luy seul la perfe-  
„ ction & le comble de tous biens.  
„ Mais quand il traite en mesme  
„ douceur les trāsgresseurs de sa loy,  
„ vray est que par sa benignité il veut  
„ amollir leur rebellion & obstina-  
„ tion : toutesfois il ne declare point  
„ pour cela qu'il leur soit pour lors  
„ propice: mais plustost il les appel-  
„ le à repentance & amendement.  
„ Que si quelcun replique à cela que  
„ cependant que le Seigneur ne tou-  
„ che point leurs cœurs au dedans,  
„ c'est autant comme s'il parloit à  
„ des sourds: il faut respondre qu'on  
„ ne peut rien blasmer en cet endroit  
„ sinon nostre peruersité.

O paroles dignes de l'immorta-  
lité ! Authentique declaration de la  
bonté de Dieu enuers le genre hu-  
main ! Reproche eternelle d'ingra-  
titude & de dureté au cœur des hom-

mes ! Il en est ainsi ; mes freres. Dieu est misericordieux. Il inuite les hommes à se repentir ; il leur offre la remission, s'ils se laissoient amener par ses inuitations à repentance. S'ils demeurent en leur obstination (comme il faut necessairement qu'ils y demeurent s'il ne touche leurs cœurs au dedans ) il ne luy importe quant à luy, qu'on demande, Pourquoi l'a t'il fait? Preuoyoit-il pas que cela seroit inutile? S'amuse-t'il a des desseins qu'il sçait bien qui n'auront point d'euenement? Il l'a sçeu : il l'a preueu. Peut-il arriuer chose que son intelligence infinie n'ait de toute eternité tres-certainement anticipée? Et en vne si grande & si profonde corruption de l'esprit humain, pourroit-il estre tant soit peu douteux si les hommes s'obstineront contre ces inuitations, pour douces qu'elles puissent estre? Mais cela ne l'a pas empesché de vouloir estre bon, & de tesmoigner iusques à ce degré sa misericorde enuers les hommes. Au reste il veut que nous nous arrestions à considerer ses bontez, & non a sonder les abysses de sa nature. A ad-

mirer ses compassions enuers tous les pecheurs , non à epiloguer sur ce qui est de ses decrets. A imiter sa benignité enuers tous , non à chercher les raisons pourquoy il en a aimé les vns plus & les autres moins ; c'est contenté d'inuiter ceux cy exterieurement, & a laissé leurs cœurs en leur naturelle dureté, és autres il a desployé une insurmontable efficace de sa grace. A luy donner la gloire de toute benignité & douceur, mesmes enuers les meschans, & a eux la faute toute entiere de ce que ses graces leur ont esté inutiles. Pour luy, s'il en faut parler és termes des hommes, il en remporte ceste satisfaction, qu'il a esté bon a merueilles; & n'ayant eu proprement autre but en ses bienfaits, l'ingratitude de l'homme ne l'a sceu empescher d'y paruenir.

Mais outre la louange qui en reuiert à sa misericorde, sa iustice en reluit encore sans comparaison plus pure. Car tant s'en faut, comme nos Aduersaires de l'Eglise Romaine imputent à Calvin de l'auoir enseigné, & d'auoir, comme ils disent, infecté nos Eglises de ceste doctrine, que

Dieu ait predestiné la plus grande partie des hommes aux peines éternelles sans considération de leur péché, que mesmes il ne les prend pas, comme on dit, au pied levé, ne les punit pas tout aussi tost qu'ils ont péché, mais les attend en grande patience : & par la demonstration de ses vertus émerueillables en ses ouurages, & par les benedictions temporelles qu'il leur enuoye continuellement, & par la longue attente dont il use envers eux ; avant que de venir à mettre la main à ses foudres, il fait, sinon ce qu'il pourroit : car s'il vouloit que ne pourroit-il point d'avantage ? au moins certes ce qui suffit selon ceste sorte de misericorde, pour fondre leurs cœurs s'ils n'estoyent point si endurcis, & les reduire à repentance. Apres vne telle benignité mesprisée avec tant d'opiniastreté, que reste-il plus sinon que la iustice paroisse, ie ne diray pas sans tare, mais sans soupçon de tare quelconque ? C'est pourquoy il proteste en trois endroits du Prophete Ezechiel, qu'il ne prend point de plaisir en la mort de celuy qui meurt. Et son Apostre

S. Pierre dit que c'est là la cause pour laquelle il ne se haste pas d'amener le iugement & l'accomplissement de la promesse, *C'est qu'il est patient en-*

2. Pier.

3. 9.

*uers nous, ne voulant point qu'aucun perisse, mais que tous viennent à repentance.* Paroles esquelles Calvin remarque a bon droit vn amour admirable de Dieu enuers le genre humain, de vouloir que tous soyent  
„ sauuez, & estre prest de recueillir à  
„ salut des gens qui s'en alloient pe-  
„ rir d'eux-mesmes.

Cóment donc, dira icy quelcun, si aucun d'entre les Gentils se fust conuertí par la contemplation des œuvres de Dieu, & eust tellement reconnu sa misericorde en la conduite de sa prouidence, qu'il en eust esté ému d'une serieuse repentance, eust il esté sauué ? Certes, comme nous le verrons tantost plus particulièrement, il a esté absolument impossible que les hommes vinssent à la salutaire connoissance de Dieu par ce moyen là. Mais posé le cas que quelcun d'entre eux se fust serieusement conuertí, en renonçant a tant de sortes de superstitions & d'idolatries qui auoyent



alors la vogue en tout l'Vniuers, rendant à Dieu vn seruice pur & esloigné de toutes les corruptions dont le diable & l'ignorance de l'homme auoyent entierement esteint ce peu qui restoit de lumiere de la cognoissance des vertus de Dieu en la terre, detestant ses pechez avec vn vif & sensible regret de les auoir commis, & recourant à la misericorde du Createur des cieux & de la terre avec confiance, il est, ce semble, inirraginable qu'il eust esté enuelpé en vne meisme comdamnation avec le reste des hommes. Il ne se peut pas, di-ie, conceuoir que l'homme se repente deuant Dieu de ceste façon là, & que neantmoins il le perde : Que quelcun espere en luy, & que neantmoins il demeure confus : Que quelcun s'appuye sur luy & qu'il n'y trouue point de support : Que quelcun l'inuoque sincerement & ardemment & qu'il ne l'escoute pas : Bref que quelcun ait recours a sa misericorde & que toutes-fois elle luy manque. Car celuy qui inuite les hommes a repentance pour les sauuer, les damneroit-il apres leur re-

pentance? Comme nous vous au-  
 dit, ceste misericorde qui exige la  
 foy & la repentance de la creature,  
 ne peut qu'elle ne luy pardonne  
 quand elle l'y a rencontrée. Non  
 qu'elle soit obligée a luy pardon-  
 ner pour sa penitence. Ainsi n'ad-  
 uienne que nous ayons ceste pen-  
 sée que la creature pecheresse,  
 quoy que repentante; merite autre  
 chose que la condamnation si on  
 la considere en elle mesme. Com-  
 ment meriteroit le pecheur, veu  
 que la creature parfaitement sainte  
 ne scauroit auoir ombre de merite  
 quelconque? & que si Dieu la vouloit  
 examiner à toute rigueur, à peine  
 pourroit-elle; pour sainte qu'elle  
 soit, subsister en sa presence? Mais c'est  
 que Dieu est infiniment misericor-  
 dieux & qu'il est impossible qu'en  
 ceste occurrence de la serieuse repen-  
 tence de la creature il soit autre. De  
 vray, l'Apostre dit icy que cela a ren-  
 du les Gentils inexcusables. Or si ils  
 ont esté inexcusables, c'a esté de ne  
 faire pas leur deuoir auquel la ma-  
 nifestation des vertus de Dieu les in-  
 uitoit. Posé donc qu'ils eussent fait  
 leur

leur denoir, ils n'eussent pas esté condamnés : Car Dieu ne condamne que ceux qui manquent à le faire. Il atteste, comme nous le vous disions tantost, que Dieu ne s'est point laissé sans tesmoignage de bonté, en enuoyant les saisons fertiles, & remplissant les cœurs des hommes de viande & de ioye. Si donc nous nous figurons que les hommes par les ruisseaux de ceste benignité ayent voulu monter à la source, pour certain ils ne l'eussent pas trouuée assechée & tarie. Il nous enseigne que Dieu a inuité les hommes à le chercher comme en tastonnant. Si donc nous nous imaginons qu'en tastonnant quelcun l'eust cherché & l'eust trouué, sans doute il ne l'eust pas trouué sans sa misericorde. Car sans elle il est vn feu consumant. Or ne les appelloit-il pas a soy pour les haur de son ardeur & les reduire en cendre. Il ne les conuioit pas a s'approcher de luy pour leur faire de l'horreur, & les renuoyer avec espouuatement cōme si sans y penser vn hōme auoit mis la main dans vn fourneau ardent, ou les pieds nuds sur de la braise. En vn

mot l'Apostre dit qu'il les inuite  
a se repentir. Or ne seroit-il pas ain-  
si doux & benin à conuier les pe-  
cheurs, afin, quand ils se seroyent re-  
pentis, de leur monstrier vne face si  
terrible, & de la mesme main de la-  
quelle il les auroit menez au chemin  
de salut, les precipiter en l'abyfme.  
Et sans autre raisonnement c'est assez  
de dire qu'il les y conuie. Car il est  
bon & veritable, & fidele, &, s'il  
faut ainsi parler, serieux : toutes ses  
voies sont verité, & iustice, & mise-  
ricorde. Nos aduersaires de la com-  
munion de Rome nous font tort s'ils  
disent de nous que nous ayons telle  
opinion de Dieu que les Poëtes ont  
eu autresfois de leurs Sirenes, qui  
côuioyét à elles les passans dela dou-  
ceur de leurs chants : puis quand on  
y auoit tourné la voile, faisoient  
faire vn piteux naufrage. Ils nous  
calomnient s'ils nous accusent d'a-  
uoir ceste opinion des cieux, qu'on  
en entende, comme on dit des ca-  
uernes de certaines bestes sauages,  
des voix humaines qui appellent, &  
puis quand on en est approché, on  
n'y void que monceaux d'ossements

de morts, & sang, & meurtre & carnage.

Or n'estimons-nous pas qu'il y en ait aucun d'entr'eux si inique qui pour cela nous voulust accuser de dire que donc il se pourroit faire que quelcun fust sauné sans Iesus Christ, pource que le nom de Iesus Christ n'a point esté cognu entre les natiōs payennes. Arriere de nous, mes freres, vn tel blaspheme, qui ne sçauroit iamais tomber en la pensée d'aucune ame vraiment chrestienne. Auant que l'homme se fust reuolté contre son Createur, il pouuoit auoir de luy la vie & la felicité de sa seule bonté. Depuis le peché commis il ne l'a peu auoir que de sa misericorde seulement, & a esté impossible que Dieu luy fist sentir aucun effect de ceste misericorde qu'à cause de la mort de son vñique. Car comme nous auons dit qu'en Dieu il y a vne vertu que nous nommons misericorde qui exige de sa creature la foy & la repentance auant qu'elle puisse luy donner la remission de ses pechez, mais qui ne peut qu'elle ne luy pardonne ses pechez, quand elle

la void ferieusement & veritablement conuertie ; aussi y en a-il vne autre que nous appellons 'la iustice vengeresse, qui non seulement s'exerce dessus les pecheurs impenitens, mais empesche mesme que cette misericorde qui est si encline à pardonner, ne pardonne reellement sans vne prealable satisfactiō pour les offēses. C'est pourquoy Dieu voulāt vser de misericorde enuers les hommes a ordonné de toute eternité, & depuis reellement executé le decret d'enuoyer son Fils en la terre, afin de faire propitiation par laquelle ceste iustice, qui de sa nature est inexorable, fust appaisée. Et comme vous voyés que pour ce qu'il n'auoit point destiné de Redempteur aux Anges decheus de leur origine, aussi ne leur à il iamais monstre la moindre apparence de pardon, mais leur à incontinent denoncé vne malediction irreuocable : ainsi n'eust-il iamais en maniere quelcōque tesmoigné sa misericorde aux humains, & ne les eust nullement supportés en sa benignité, sinon qu'il auoit arresté de leur donner vn Redempteur, sur qui il fist la

vengeance des pechés de tous ceux qui se retourneroyent à luy par repentance. Car outre que sa iustice eust exigé sans remise la vengeance du peché, sa nature si sage, si veritable & si constante n'eust sceu permettre qu'il eust présenté aucune esperance de pardon, s'il eust absolument resolu de punir nos pechés sans misericorde. Ceste difference donc de la maniere en laquelle Dieu a traitté les Demons, & les hommes, qui par leur peché s'estoyent rendus coupables comme les demons, vient de ce qu'aux vns il a denoncé sous le nom du serpent, qu'ils seront maudits, au lieu qu'il prononce au serpent en faueur des autres, que *la semence de la femme luy briseroit la teste*. De là est venu que toute malediction repose dessus les vns sans esperance de changement; quant aux autres, Dieu attend leur amendement, de sorte que ses iugemens mesmes leur sont aduertissement de repentance. Et c'est pourquoy l'Escripture nous apprenant qu'à cause du peché de l'homme tout le monde est tombé en quelque espee de malediction,

Rom. 8.  
9. 20.

l'Apostre nous enseigne qu'il se sou-  
tient de l'attente de sa restauration  
en la reuelation de la gloire des en-  
fants de Dieu, dont cet oracle a dès le  
commencement donné l'esperance.  
Sur quoy cet incomparable Calvin  
„ dit que c'est de ceste esperance que  
„ toutes choses se maintiennent en  
„ leur estre. Pource qu'en cette mi-  
„ serable dissipation qui a suivi la  
„ cheute d'Adam, il ne se pourroit  
„ faire que quasi d'heure en heure le  
„ bastiment vniuersel du monde ne  
„ vint à s'escouler, & que chacune  
„ partie d'iceluy en particulier, ne  
„ defaillist, s'il n'y auoit vne certaine  
„ fermeté secrette venant d'ailleurs  
„ qui les soustint. Et c'est cet ar-  
rest de les renoueller par le moyen  
de ceste benite semence de la femme.  
Sans cela Dieu eust foudroyé le mon-  
de tout aussi tost : ou s'il ne l'eust  
voulu foudroyer, il l'eust laissé fon-  
dre de soy-mesme, pour exercer la  
vengeance du Createur en écrasant  
la creature pecheresse sous ses rui-  
nes. Il y a donc, mes freres, en la re-  
demption que nous auons par no-  
stre Seigneur deux choses à conside-



rer distinctement : la satisfaction  
mesme, & la cognoissance d'icelle.  
Quant à la satisfaction elle a esté si  
nécessaire pour le salut des hommes,  
que par aucune dispensation de Dieu  
s'il n'eust voulu faire tort à sa iustice  
& violer la maiesté éternelle de ses  
loix, nul homme, quoy que repen-  
tant, ne pouuoit venir à la iouissance  
de la vie par la miséricorde. Pour la  
cognoissance, la nécessité n'y a pas  
esté du tout si estroite. Il est bien  
vray comme nous esperons voir plus  
amplement, que nul homme n'a la  
foy que par l'efficace de l'Esprit de  
Dieu, & que Dieu ne fait sentir cette  
efficace de son Esprit que par l'entre-  
mise de sa Parole, & finalement qu'il  
n'a iamais adressé sa parole aux  
hommes qu'il n'ait donné quelque  
cognoissance de la redemption par  
Christ. Mais neantmoins deux cho-  
ses sont icy singulierement à remar-  
quer. La premiere que mesme par sa  
parole il a fort diuersement dispen-  
sé cette cognoissance. Car pour  
exemple, que contient cet oracle?  
*La semence de la femme, &c.* Certes  
il contient la religion chrestienne,

l'incarnation de la Sapience eternalle, la passion du Redempteur, sa glorieuse resurrection, son ascension es cieux, & toutes ces autres diuines matieres que nous apprenons en l'E-uangile. Mais c'est comme toutes choses sont enuelopees es rudimens de leur origines, de la consideration desquelles nulle intelligence humaine, si elle n'en estoit informee d'ailleurs, ne seroit capable de deuiner & cognoistre distinctement quels auroient à estre les animaux ou les plantes qui en naissent: la conformation de leurs membres, l'usage de leurs parties; la nature de leurs fruits, la distribution de leurs branchages. Et si les sacrifices ont adiousté quelque chose à ceste cognoissance, elle en est reuenue là que l'homme a merité la mort, &, comme dit Calvin, qu'il estoit besoin de quelque propitiation, dont Dieu en sa sagesse infinie, trouueroit bien la maniere. Puis cela s'est augmenté, cette lumiere, s'est éclaircie, à mesure qu'il a plu à Dieu renoueller ses oracles de temps en temps par le ministere de ses Prophetes: iusques à ce qu'en fin

l'Euangile est apparu, & a rempli tout l'vniuers de la gloire de sa lumiere. L'autre chose à considerer est, que Dieu n'est pas tellement astreint à ceste distincte & particuliere cognoissance de la satisfaction de Christ qu'absolument il ne puisse donner le salut sans elle. Car comme ainsi soit que deux choses soyent entièrement necessaires pour auoir la cognoissance de quoy ce soit, l'une est la reuelation de l'obiet mesme, lequel il faut que nous ayons deuant les yeux soit du corps soit de l'esprit; l'autre est que nous ayons la faculté d'appercevoir cet obiet & de le cognoistre. Où l'obiet est reuelé, mais neantmoins la faculté ne peut pas estre en estat de le recevoir, & eela sans aucun vice de la creature, là Dieu est si misericordieux qu'il n'en impute pas l'ignorance. Comme vous voyez que les petis enfans des fideles qui appartiennent à l'election de Dieu, sont sauuez par la satisfaction de Christ sans en auoir aucune cognoissance. Car pour clairement que l'Euangile la nous enseigne, leur entendement n'est pas encore capable de la conce-

noir, à cause de l'empeschement que luy donne l'imperfection de ses organes. C'est pourquoy Calvin dit qu'ils sont sauuez *par vn privilege special*. Et au contraire ou la faculté est en tel estat selon nature qu'elle deuroit cognoistre l'obiet s'il estoit distinctement reuelé, s'il ne l'est pas, Dieu est si misericordieux qu'il ne luy impute point de n'en auoir pas eu vne distincte cognoissance. Mais par vn privilege special encore, si la repentance d'ailleurs ne laissoit pas d'estre sincere, & veritable, & vehemente, Dieu auroit pour agreable la personne qui la luy presenteroit telle. Et c'est ce qui fait que cet incōparable autheur ayant aduoué que la foy de l'Eunuque de la Roynne Candace estoit enueloppée en egard à la personne de Iesus Christ, à sa vertu & à l'office qui luy a esté enioint de Dieu son Pere, le recognoist pourtant entre les disciples de Dieu, à qui appartient la vie eternelle. Que si la cognoissance plus distincte de la satisfaction de Christ est absolument necessaire pour obtenir le salut dont il est autheur, Dieu est si pitoyable,

mes freres, que si quelcun d'entre les Gentils se fust veritablement conuerti, il luy eust plustost enuoyé vn Ange des cieux, en disant, comme il est au liure de Iob, *Garenti-le afin* Iob 33.  
*qu'il ne descende pas en la fosse; i'ay* 24.  
*trouué propitiation;* que de le laisser gisant en sa naturelle condamnation, au preiudice de sa grande misericorde. Mais quand & l'obiet est distinctement reuelé, & la faculté en estat de le pouuoir comprendre, comme quand l'Euangile est presché à des gens qui ont l'usage de l'entendement, adonc la cognoissance distincte en est necessaire d'un façon si exacte & si rigoureuse, qu'il est impossible que par aucune dispensation Dieu en pardonne l'ignorance dont le mespris ou la nonchalance a esté cause.

Or preuoy ie bien, comme les hommes pour médire passent en milles metamorphoses, que quelcun d'entre les aduersaires du nom de ce grand seruiteur de Dieu, qui le diffament d'auoir esté ennemi de sa misericorde, voyant a ceste heure qu'il l'estend en quelque mesure, mesmes

dessus les Payens , tourneront leur accusation de l'autre costé , & diront qu'il ne met nulle différence entre les Gentils , & les Chrestiens , nulle entre l'alliance de la nature , & celle de l'Euangile. Mais encore ainsi , s'ils ne sont desraisonnables tout à fait , ne sera-il pas malaisé de leur satisfaire L'alliance de la nature estoit celle que Dieu auoit traitée avec Adam , & qu'il eust continuée avec tous les hommes s'ils fussent demeurés en leur integrité originelle. Et en ceste alliance , comme il n'y eust point eu de peché si elle eust subsisté , aussi n'y eust il point eu d'usage de la misericorde ny en la remission du peché , ni en l'invitation à la repentance. C'eust esté la seule bonté de Dieu envers sa creature qui y eust regné : car il ne peut qu'il n'aime son ouurage tandis qu'il y void reluire la perfection qu'il y a mise. L'Alliance de la grace est celle que Dieu a contractée avec les hommes pecheurs , & de formais , la creature ayāt degeneré , ceste simple bonté de Dieu ne peut auoir de lieu ; il faut que ce soit ceste propriété que nous nommons misericorde,

corde & qui ne peut auoir autre fondement que le Redempteur: & telles sont ces alliances à les considerer precisément ne elles mesmes.

Cependant si nous regardons la chose vn peu attentiuement, nous trouuerons que des ruines de l'alliance naturelle que le premier peché a dissoute, il a passé des doctrines considerables en celle de la Grace: comme de la creation du monde, & de sa conduite par vne prouidence. Car outre le Poinct de la redemption, ces choses ne laissent pas de s'enseigner en l'Euangile. Et de mesmes, nous remarquerons qu'en ces ruines de l'alliance de la nature, il est passé quelque chose de celle de la grace: comme est ceste misericorde tesmoignee à toutes nations en la patience de Dieu, & en l'administration des choses humaines par sa prouidence. Car la raison droite & vüide de peché en pouoit bien recueillir que Dieu est misericordieux enuers les pecheurs penitens, sans autre instruction de la parole diuine. C'est pourquoy Calvin traittant des deux sortes de reuelation qui conuiennent a ces deux

alliances précisément considérées, les distingue tellement que toutes-fois il les mesle en quelque maniere. Car qui doutera que ces paroles ne conuiennent a l'alliance de la grace?

*Inst. lib.*

*1. chap.*

*5. §. 1.*

» Qu'elle matiere nous donne-t'il de  
 » considerer sa misericorde, quand il  
 » ne laisse point de continuer si long  
 » temps sa liberalité enuers les pe-  
 » cheurs, quelques miserables qu'ils  
 » soyent, iusques à ce qu'ayant rom-  
 » pu leur peruersité par sa douceur, il  
 » les ramene à soy comme vn pere  
 » ses enfans, voire par dessus toute  
 » bonté paternelle? Certes, mes fte-  
 res, c'est vne voix Euangelique. Où  
 la nature est considérée précisément,  
 Dieu despouille la qualité de Pere  
 enuers la creature pecheresse & re-  
 uestit celle de Iuge. Et neâtmoins cest  
 au traicté de la reuelation que Dieu  
 fait de soy par la voye de la nature  
 qu'il escrit ceste belle sentence, com-  
 me de chose que les hommes de-  
 uroyent recueillir de la consideration  
 de la Prouidence. Et au contraire,  
 ou il traite de la cognoissance de  
 Dieu entant qu'il s'est manifesté Re-  
 dempteur, il y mesle des choses qui



appartiennent plustost a l'alliance de la nature. Comme, que nous ne „ pouuons penser ni à nostre premie- „ re origine, ni à la fin à laquelle nous „ sommes créés, que ceste cogitation „ ne nous soit comme vn aiguillon „ pour no<sup>r</sup> stimuler & poindre à me- „ diter & desirer l'immortalité du „ royaume de Dieu. De façon que com- me si vous consideriés seulement en l'alliance de la grace les choses qui y sont venues de celle de la nature, il n'y auroit rien qui empeschast que vous ne dissiez que Dieu se reuele en quelque façon comme Createur aux Chrestiens, pour ce qu'il leur met ce grand ouurage du monde deuant les yeux pour y contempler ses vertus é- merueillables. De mesmes si en ceste dissipation de l'alliance de la nature vous consideriés particulièrement ce qui y a penetré de celle de la grace, vous pourriés dire sans aucun crime que Dieu s'y reuele en quelque fa- çon comme Redempteur, c'est à dire comme celuy par deüers lequel il y a pardon pour ceux qui se cōuertissent avec foy, & bonne & vehemente re- pentance.

Mais neantmoins , pour ce qui regarde l'alliance de la grace, cecy y est considerable. Premièrement , que les doctrines de la redemption par Christ y sont sans comparaison plus lumineuses & plus esclatantes , que celles qui y sont entrées de l'alliance naturelle. Puis apres que nous n'obtenons nullement le salut en vertu de l'alliance naturelle ni des doctrines qui en dependent , mais par la seule satisfaction de Christ. Et pour la fin , que c'est avec ceste seule revelation ou Christ nous est proposé pour Redempteur , que marche l'efficace de l'Esprit de Dieu qui seule convertit les hommes. De façon que la parole est le seul instrument efficaceux, duquel Dieu se sert , pour vne ordinaire dispensation , pour amener les hommes à salut. C'est pourquoy nous l'appellons selon le stile de l'Escripture sainte, l'Euangile, promis comme dit l'Apostre , du temps des Patriarches & des Peres , & depuis pleinement manifesté en l'apparition du Fils de Dieu. Au contraire, en ces restes de l'alliance de la nature sous lesquels les Gentils ont vescu autres-

fois, les doctrines qui luy sont propres y sont en plus grand nombre: ce qui y a penetré du traitté de la grace consistant en cette simple reuelation que Dieu y a faite de sa misericorde en la patience. Et s'il se fust conuertí quelcun par la consideration de cette misericorde, il n'auroit esté sauué que par la redemption de Christ. Et finalement nul ne s'est iamais conuertí par cette voye là, pource que c'est l'efficace de la grace qui corrige la peruersité & chasse les tenebres des cœurs des hommes, & cette efficace n'accompagne point cette dispensation. C'est pourquoy nous auons accoustumé de la nommer, la loy simplement naturelle.

Et de là doit estre prise la raison pourquoy ce grand seruiteur de Dieu disant tant de choses en la recommandation de cette patience en laquelle les hommes, sans le vice si grand & si inueteré de leurs esprits, eussent peu recognoistre la misericorde, ne craint pas de prononcer nettement que cette reuelation n'est pas fondée en Christ le Redempteur. Non qu'il ait pensé qu'il y puisse a-

voir aucune misericorde en Dieu qui regarde la remission des offenses, ou que Dieu en eust iamais voulu donner la cognoissance aux hommes pour les inuiter à se repentir; sinon pource qu'il auoit ordonné de liurer quelque iour son Fils à la mort pour la redemption du monde. Mais pource que ce n'estoit pas là la dispensation que Dieu auoit choisie pour amener les hommes à salut, & qu'il a affecté cette grace par priuilege special à la predication de la parole Euangelique. Ainsi donc la loy de nature, comme nous l'auons descrite cy dessus, tant és restes qui en sont demeurez apres le peché, comme en ce qui depuis le peché y a nécessairement penetré de l'alliance de la grace; s'estend sur toutes nations. Car où est-ce que la voix des cieux ne s'entend point? & où est-ce que Dieu ne supporte point les pechez des hommes par sa merueilleuse patience? Mais l'alliance de l'Euangile ne passe pas les bornes de la predication; & se limite nécessairement où s'est arrestee la voix des Prophetes & des Apostres. Partant ainsi

n'aduienne que nous enseignions que l'Euangile ait esté presché aux Gentils. C'a esté au peuple des Iuifs que Dieu a commis ses oracles : ç'a esté a Israel qu'il a reuelé ses Statuts, & n'en à point ainsi fait à tous les autres peuples de la terre, sinon que depuis que le Mediateur est apparu, il a rompu la paroy qui nous separoit d'auec les Iuifs, & nous a incorporés en ses alliances. Mais au reste bien que la chose en aille ainsi, puis que Dieu a reuelé a tous les hommes leur deuoir en ses ouurages, & en sa patience son inclination a la pitié, & que les hommes sont naturellement doiüés d'entendement & de volonté, facultés destinées a la recognoissance de ces choses, il n'y peut auoir eu que le vice de ces facultés, c'est à dire le peché, qui les ait empeschés de les recognoistre. Et c'est cela seul qui les peut auoir rendus inexcusables. Car ce vice estoit bien à la verité grand & profond, & entiere-ment irremediable à toute autre chose qu'à la souueraine puissance de Dieu. Encore eust il falu qu'il l'eust desployée non à illuminer l'entende-

Rom. 3.

2.

Pf. 147.

19. 20.

Ephes.

2. 14.

ment d'une façon ordinaire seulement, mais a le ravir de celestes inspirations & d'enthousiasmes : comme il est arriué a Iob & a ses amis qui n'estoyent point de ceste posterité d'Abraham a qui la promesse auoit esté particulièrement affectée. Mais la declaration du deuoir de l'homme estoit assés claire, & celle de la misericorde de Dieu suffisante nonobstant les tesmoignages de ses iugemens, & celle de sa sapience assés lumineuse, à ce que la raison de l'homme, si elle n'eust point esté si auant engagée dans la corruption, y eust peu cognoistre le peché commis contre le deuoir, l'esperance du pardon, & que Dieu trouueroit assés le moyen de le faire sentir aux repentans sans endommager sa iustice. Et partant que les hommes s'imputent leur condamnation. Si ce sont gens qui facent profession d'estre Chrestiens & ne le soyent pas, c'est leur incredulité qui les perd, & le mespris qu'ils ont fait du sang de l'alliance. Si ce sont Iuifs, c'est leur ingratitude contre les bienfaits de Dieu, & leur obstination contre les promesses

qu'ils auoyent du Messie. Si ce sont Gétils, ils ont outre les pechés cōmis cōtre la Loy de la nature, *amassé sur eux par la dureté de leurs cœurs, ire au iour de l'ire.* Ainsi donc cognoissent maintenant nos aduersaires de la communion de Rome, si nous sommes ennemis de la misericorde de Dieu, ou non. Certes nous sommes zelateurs de la gloire de cet empire qu'il a sans reserue aucune dessus toutes ses creatures. Ne permettrons iāmais qu'on diminue rien de ceste souueraine liberté qu'il a d'vser de sa misericorde comme il luy plaist, soit à dispenser la predication de son Euangile deçà delà entre les nations, soit à distribuer l'efficace de son Esprit à ce que les hommes y croient comme il les a preuenus de son election eternelle. Encore moins endurerons-nous que les hommes s'attribuent quelque chose en l'œuure de leur salut, ou affoiblissent rien de l'efficace de la grace de Dieu en la conuersion de nos cœurs, ou diminuent rien de la consolation de la certitude de nostre foy & de sa perseuerance, que nous n'y contredisions par

Rom.  
2. 5.

la Parole de Dieu. Hors cela, aucun ne nous preuiendra, aucun ne nous surpassera en la celebration des compassions de Dieu en la redemption du monde.

Cependant, mes freres, bien que Dieu vous ait fait prescher son Euan-gile; ce qu'il a denié à tant d'autres nations; bien qu'il vout ait triez par la grace de son eslection d'entre tant de gens à qui il ne l'a pas faite pareille; bien qu'il vous ait separez par l'efficace de sa vocation du reste des humains à qui il ne l'a pas fait sentir de mesmes, si n'a il pas rompu les liens dont la nature vous a con-ioints avec eux; si ne vous a-t'il pas affranchis de tous les devoirs auxquels cette commune société de l'humanité vous oblige. Au contraire, plus excellente est vostre vocation en Christ; plus ardente & vehemente doit estre vostre charité enuers les autres hommes. Et vous ne sçauriez en donner vn plus bel enseignement qu'en souhaitant le salut de ceux que vous en voyez eslongnez, ne sçauriez rien vous proposer deuât les yeux qui vous y incite plus viuement



que l'exemple que Dieu mesme vous en donne. Car si de ce que Dieu fait leuer son soleil sur les meschans comme sur les bons, & tomber sa pluye dessus les iniustes comme dessus les iustes, le Seigneur tire pour nous vne exhortation à la charité, à ce que nous imitiōs Dieu nostre Pere qui est bon mesmes enuers les meschās, que fera-ce si nous considerons qu'en cela mesme il les aduertit qu'il feroit dessus leurs ames aspersiō du sang de son Fils, si par leur obstination ils ne s'en monstroyent point indignes? Pourra-il y auoir en nos cœurs ou semence d'humanité, ou estincelle de charité chrestienne que la cognoissance de ceste immense benig- nité de Dieu n'enflamme? Soyez dōc parfaits comme vostre pere celeste est parfait, & en faisant du bien a ceux qui vous haïssent, & en benif- sant ceux qui vous maudissent, re- nouuelez sans cesse cette belle prie- re de nos Eglises: *Nous te prions Dieu tres-benin & Pere misericordieux, pour tous hommes generalement, que comme tu veux estre recognu Sauueur de tout le monde, en la redemption fai-*

te par ton Fils Iesus Christ , que ceux qui sont encores estranges de sa cognoissance, estans en tenebres & captiuité d'erreur & ignorance, par l'illumination de ton S. Esprit & par la predication de ton Euangile soient reduits à la droite voye de salut ; qui est de te cognoistre seul vray Dieu , & celuy que tu as enuoyé Iesus-Christ. Ainsi serés vous dignes enfans de vostre Pere qui est és Cieux & qui vous y a preparé son heritage. A luy soit gloire eternelle. A M E N.

SERMON



# SERMON III.

I. COR. I. 12.

*Depuis qu'en la sapience de Dieu,  
le monde n'a point cognu Dieu  
par sapience, le bon plaisir de  
Dieu a esté de sauuer les croyans  
par la folie de la predication.*



LES remerciemens que  
nous faisons à quel-  
cun pour ses bien-  
faits, mes freres, de-  
pendent du ressenti-  
ment que nous en a-  
uons, & le ressentiment vient de la  
cognoissance de la nécessité du bien  
fait mesme. De sorte qu'à mesure que  
nous recognoissons la nécessité des  
graces qui nous sont communiquees,  
& comment il estoit impossible que  
nous nous en passassions, à mesme

K

mesure les actions de graces que nous en rendons à leur auteur, sont elles viues & vehementes. Or sommes-nous icy assemblés pour remercier solennellement la bonté de nostre Dieu, de ce qu'il luy a pleu nous donner encore aujourdhuy les témoignages de sa grace & de la redemption que nous auons en nostre Seigneur Iesus Christ par l'Euangile. Et ainsi il ne pouuoit rien arriuer plus a propos pour l'action presente, que la matiere laquelle nous y auons destinee pour autres raisons prises du temps & des circonstances des choses. Car nostre intention est de vous monstrier, moyennant la grace de Dieu, comment l'Euangile a esté absolument necessaire pour amener les hommes à salut. Et bien que nous ne vous proposerons rien de nouueau & que nous n'ayons autres fois dit deuant vous selon que les occasions s'en sont presentees, si sera-t'il expedient de ramasser ensemble ce qui pourroit auoir esté espars deçà delà en diuerfes autres exhortations, afin que cette doctrine vous estant representee composee de toutes ses

parties en vn corps aussi grand qu'une heure en pourra comprendre en son estendue, vous puissiez voir plus clairement de combien vous estes redevables à Dieu pour la cognoissance de vostre Redempteur, & par ce moyen eschauffer d'autant plus vostre zele à luy en rendre les graces qu'il en a meritees. En ce texte donc choisi expressement, comme vn des passages du nouveau Testament les plus conuenables a nostre dessein, nous auons a considerer trois choses. Premièrement, que c'est que l'Apostre appelle icy la sapience de Dieu. Secondement, ce qu'il entend par la folie de la predication. En troisieme lieu, pourquoy le monde n'ayant point cognu Dieu en sa sapience il a falu qu'il ait sauué les croyans par la folie de la predication.

Or quant a la premiere de ces choses, pour vous expliquer que c'est que la sapience de Dieu, nous nous seruons des termes de Caluin, n'estant pas possible d'en employer de plus beaux, ni de plus conuenables à la chose. Il appelle, dit-il, la Sapience de Dieu, tout l'ou-

„ urage & bastiment du monde, qui  
„ est vne excellente monstre & cui-  
„ dent tesmoignage de sa Sapien-  
„ ce. Dieu donc en ses creatures  
„ nous propose vn beau miroir de  
„ sa sapience admirable: tellement  
„ que quiconque regarde le monde  
„ & les autres œuvres de Dieu, est  
„ contrainct (s'il a vne seule estincel-  
„ le de iugement) d'entrer soudain  
„ en admiration d'iceluy. Et de fait,  
mes freres, nous ne voulons pas icy  
nous arrester a recercher bien parti-  
culierement les secrets de toutes les  
choses de la nature, esquelles ceux  
qui se sont adonnés plus diligem-  
ment à la cognoissance & contem-  
plation de l'vniuers, trouuent des  
merueilles à dire. Il faudroit estre  
Astronome & encore bien excellent,  
pour remarquer & expliquer conue-  
nablement toutes les singularitez  
des cièux & de leurs mouuemens.  
Il faudroit estre Philosophe bien  
profond pour deduire les vertus &  
qualitez des elemens & leur admira-  
ble meslange en la constitution des  
choses. Il faudroit estre Medecin &  
encore non à l'ordinaire, pour detail-

fer dignement la conformation des animaux & l'usage de leurs membres & de leurs parties. Et faudroit auoir toutes ces qualitez ensemble, & mesmes en vn degré bien eminent, pour comprendre bien exactement qu'elle est l'harmonie admirable que les parties du monde ont ensemble; quelles sont les proportions, les nombres & les mesures que la sapience de Dieu y a gardees. Et bien que plusieurs hommes ensemble eussent fondu tout ce qu'ils ont d'intelligence & de sçauoir, voire que chacun d'eux eust l'intelligence aussi pure & aussi lumineuse qu'est celle des Anges, apres auoir bien discouru de la sagesse de Dieu, il en faudroit venir à ces paroles du liure de Iob, Voila, ce sont les bords de ses voyes: & combien est petite la portion que nous en entendons! Ils n'auroient, par maniere de parler, aperçu que les franges de sa sapience incomprehensible; & n'auroient pas atteint iusques au fonds, ni remarqué la merueille du tissu de ses ouurages.

Je ne diray que les choses qui

sont exposees aux yeux de tout le monde, & dont non les Philosophes & les sçauans seulement, mais les femmes & les enfans peuuent estre capables. Qui est-ce qui remarquera ces reuolutions du Soleil & de la Lune, qui font les iours & les nuits, & les mois, & les annees, qui determinent les saisons, & comme en vne machine artificieusement composee, vont & viennent, tournent & retournent, & ne manquent iamais à reuenir chacun à son poinct; ne s'escartent point de leurs routes, ne s'embarrassent iamais en leurs mouuemens, ne se troublent point es fonctions qui leur ont esté assignees, qui ne s'escrie incontinent avec le Psalmiste; *Les cieux racontent la gloire de Dieu, & l'estendue l'ouurage de ses mains. Vn iour desgorge propos à l'autre iour, & vne nuit monstre science à l'autre nuit. Il n'y a point en eux de langage, & n'y a point de parole, & toutes fois sans cela leur voix est oyee. Leur propos est allé iusques au bout de la terre habitable. Car quest-ce autre chose ce langage des cieux, & ce-*

Psal. 119.

119.1.2.

3.



ste voix qui s'entend iusques au bout du monde, sinon vne predication hautaine & esclattante de la sapience de Dieu qui appelle les hommes de toutes parts a la cognoissance & admiration de ses vertus incomprehensibles?

Que si vous ramenez vos yeux & vos esprits vn peu plus bas, & que vous consideriez ceste vaste estendue qui est entre les cieux & la terre, comment elle sert de domicile aux oiseaux, & de reservoir aux eaux dont la main de Dieu arrouse la face du monde en la saison, d'arsenal aux foudres dont il estonne les humains, & quelques-fois punit leurs pechez d'une façon espouuantable; d'où viennent les gresles & les neiges, les tourbillons, & les orages & les vents de tempeste, les messagers qui portent & qui executent ses volontez en la terre; & comment au reste toutes ces choses sont dispensees de sa main en telle façon, que ni les benedictions temporelles ne manquent point aux humains pour leurs necessitez, ni les maledictions pour les aduertir de se conuertir de leurs

mauvais train ; ni le temps & le loisir de contempler attentivement les vnes & les autres , pour venir en fin , si leurs cœurs n'estoyent plus durs que des cailloux , à s'amollir & à rechercher le Seigneur , avec vne serieuse repentance ; vous trouuerez que c'est vne sagesse qui ne se peut assez priser , qui mesmes ne se peut suffisamment comprendre.

Puis venez-vous à ietter les yeux dessus la mer ? Avec quelle sapience est-elle espanduë alentour de la terre ? Le ne parleray pas de l'vtilité de ses poissons pour la nourriture des hommes. Le ne diray rien des choses medicinales qu'elle produit : de l'ambre qu'elle iette a ses bords ; des perles & des precieux coquillages qui se trouuent à ses riuages. Le diray seulement que c'est le lien par lequel Dieu a conioinct les nations les plus eslongnees , le moyen du commerce & de la nauigation , qui a donné aux hommes non seulement l'vsage des choses qui croissent chez leurs voisins , mais l'vsage encore & la connoissance d'un autre monde.

Que si vous venez à regarder la

terre sur laquelle vous marchez , la disposition merueilleuse de ses vallées & de ses montagnes; les riuieres qui roulent au trauers des campagnes & qui sont comme les veines qui portent deçà delà par tous les membres de ce grand corps , le rafraichissement & la nourriture ; ses herbages & ses moissons , les vignobles & les autres plantes ; les minéraux & les metaux, les choses alimentaires & medicinales ; vous trouuerez que la bonté de Dieu y paroist à la verité merueilleusement euidente en l'abondance de tant de biens, mais que la sagesse n'y paroist pas moins en la distribution de toutes ces choses selon leurs vsages.

Et que diray-je , mes freres , des choses qui sont particulieres à chacun pays, selon la necessité de la situation , & la place que Dieu a voulu qu'il ait occupée au monde ? Les bois abondent où les froidures sont extremes : la terre & les pierres se bruslent où le bois manque. Les animaux de voicture supportent plusieurs iours la soif où le pays est destitué d'eaux : où la terre ne porte

point de blé, elle donne des racines pour la nourriture des hommes. Où il n'y a point de vignes qui produisent le vin, on en fait des arbres fruitiers: où vne commodité manque en vn pays, il y a de quoy se recompenser & l'auoir par les commoditez différentes qu'il fournit aux autres. En vn mot la Sagesse de l'Eternel y reluit de toutes parts, & n'y a rien où elle ne donne des preuues indubirables de son industrie. Et force nous est, car nostre dessein n'est pas de nous estendre sur ce poinct, de passer sous silence la sapience qui paroist en l'establissement des polices du monde, accommodees à chacune nation selon son naturel, & qui bigarrent la face de l'vniuers à la verité, mais d'vne bigarrure qui la rend extrêmement belle, par la iuste symetrie de tous ses membres, & le bel ordre auquel tout le genre humain est composé en ses parties. Et ne pourons non plus nous arrester à considerer ni les racines des plantes par lesquelles elles tirent leur aliment; ni la fermeté de leur tronc dont elles se defendent contre les vents;

ni la distribution de leurs rameaux & des faeuillages dont ils reçoient la rosee des cieux , ni la conformation & les diuerſes qualitez de leurs fruits ni les raisons que la nature, c'eſt à dire, la main de Dieu y a obſeruees.

Je diray ſeulement ce que l'Apoſtre S. Paul dit aux Atheniens au chapitre 17. du liure des Actes , qu'il ne le faut pas chercher loin de nous, que par luy nous viuons & auons mouuement & ſentiment & eſtre. Car ſi nous nous conſiderions bien nous meſmes, nous le trouuerions en l'habilité de nos mains, en la viuacité de nos ſens, en la merueille de nos yeux, & ſur toutes choſes en la faculté de nos entendemens ; dont les agitations ſont ſi promptes , la capacité ſi grande, l'induſtrie ſi diuerſe, & la lumiere ſi claire, ſi nous ne l'auions point offuſquee de noſtre propre peché, qu'il y a de quoy aduoüer ne le vouluſſions-nous pas, que comme en nos corps ſe trouue vn abrégé de ce grand vniuers , en nos eſprits il y a vne image de celuy qui a créé l'vniuers meſme. De façon qu'il en faut reuenir à la belle meditation de ce

Payen, qui disoit autres-fois que s'il y auoit quelques gens, nourris dès leur naissance en des cauernes sous la terre, qui tout d'un coup, la terre venant à s'entrebailler, sortissent en ces lieux esquels nous habitons, pour considerer d'un costé la terre & de l'autre costé la mer, & puis en leuant les yeux vers les cieux apperceuoir la grandeur des nueës, la force des vents, le Soleil & sa beauté, & la faculté qu'il a de creer le iour par la lumiere qu'il espend dessus la terre. Puis qui vinssent apres, quand la nuit enuoloppe l'habitation des hommes, à contempler le ciel si orné & si embelli d'astres, la varieté des mouuemens de la Lune, son croissant, son plein, & son declin, le coucher & leuer des estoiles, & leurs courses si constantes & inuariales, ils s'escrieroyent pour le certain, qu'il y a vne Diuinité, & que c'est là son ouurage.

Mais venons au second Point.  
N'y eust-il autre chose qui nous ap-  
prist que c'est que la folie de la pre-  
dication, l'opposition que l'Apostre  
en fait icy avec la sapience de Dieu  
manifestee

manifestée en ses ouurages, & ce que ceste sentence dit que nous sommes sauuez par elle, nous enseigne assez que par ces mots il entend l'Euangile: c'est à dire, la doctrine de nostre Seigneur Iesus crucifié pour la redemption du monde. Car il adioute: *Puis que les Iuifs demandent signe, & les Grecs cherchent sapience. Mais quant à nous, nous preschons Christ crucifié, qui est scandale aux Iuifs, & folie aux Grecs. Mais à ceux qui sont appellez, nous leur preschons Christ, puissance de Dieu, & Sapience de Dieu.* Car bien, mes freres, que si vous considerez ces mots, Iesus Christ mort pour nos offenses, & resuscité pour nostre iustification, c'est vne parole bien tost prononcée, si est-ce pourtant qu'en elle se recapitule toute la doctrine de l'Euangile. Ce n'est pas qu'il n'y ait plusieurs autres belles & grandes doctrines en la Religion Chrestienne. Mais c'est que comme on disoit autresfois du bouclier d'une certaine Deesse, que l'ouurier y auoit si proprement enchassé son image, & y auoit fait rencontrer les iointures de toutes les parties avec

L

tant d'art, que si on l'eust ostée de là tout l'ouvrage s'en alloit en pieces: Ainsi qui oste de la Religion Chrestienne la Croix de nostre Seigneur, c'est à dire la satisfaction pour nos pechez par sa mort, l'assemblage de toutes les autres doctrines se dissout, & n'y reste plus ni fermeté de verité, ni solidité de consolation aucune. Car le peché met entre le Createur & la creature vne separation telle, que pour bon & misericordieux que Dieu soit en sa nature, ( & il l'est infiniment) si estoit-il impossible que la communion s'y renouast, que premierement il n'eust esté fait propitiation & expiation de l'offense. C'a esté par maniere de parler, vn pont basti dessus cet abyssme infini, pour reioindre la communication entre Dieu & nous, que le peché auoit interrompuë. Et celuy qui l'a fait estant vne fois par la grande grace de Dieu, embrassé par foy, luy mesme est establi de par Dieu pour nous conférer toutes sortes de beneficéces. de sorte que c'est, cōme en vne voute, la clef de la Religion, sur laquelle toutes les autres pieces s'adiustent & se reposent.



Ore est cela appellé par l'Apostre, la Predication. Parole qui comme vous voyez n'est qu'une en nostre langage François ; comme aussi à la vérité, elle ne signifie qu'une même chose : mais elle est employée a en représenter deux du texte originel du Nouveau Testament, qui eu égard à la chose se rapportent aussi à un, & neantmoins expriment ce qu'elles signifient, d'une manière différente. Car en cet endroit icy ce mot représente en l'original la doctrine de l'Evangile, entant qu'elle est preschée par ceux qui ont esté ordonnez pour cela, comme ont esté les Prophetes, annonciateurs du Christ à venir, & les Apostres, heraus du Messie desia venu. Ailleurs, comme 1. Thess. 2. 13. & Rom. 10. 16. il la signifie entant qu'elle est ouïe ou reçeuë par les oreilles. Et cela pour la mutuelle & naturelle relation qui est entre l'oreille & les sons, le sens de l'ouïe & les voix, qui quand elles sont articulées & signifiantes, portent les images des choses dans les entendemens, pour y fournir la matiere aux conceptions & aux discours des homes.

Et la raison de cela est qu'en la Religion Chrestienne il y a certaines doctrines lesquelles ont passé de l'alliance de la nature en celle de la grace, qui se pourroyent recueillir par la droite raison de l'homme, de la contemplation des ouvrages de Dieu, & de la consideration de sa propre nature a elle mesme, si l'homme n'estoit point deceu de sa naturelle excellence par le peché. Comme la puissance infinie de Dieu ; de la creation des choses. Sa bonté immense, de ce que n'ayant besoin de rien en l'éternelle & immuable beatitude de son essence, il ne pouuoit auoir autre raison de les creer que ceste sienne bonté. Son émerueillable sapience, de l'ordre qu'il y a gardé. L'immortalité de nos ames, de l'excellence de leurs facultez. La difference qui est entre la pieté & l'impiété, le vice & la vertu, de la consideration de la nature de ces choses mesmes. L'esperance de la remuneration, de la correspondance naturelle qui est entre la sainteté de la creature & la bonté infinie du créateur ; & semblables. Pour entendre ces choses, si nous n'e-

stions point meschans ; il ne nous faudroit ni Prophetes ni Apostres, ni reuelation des cieux ; ni lumiere extraordinaire de l'Esprit. La voix des cieux & de la terre les nous enseigneroit : la seule lumiere naturelle de nostre entendement les pourroit lires es liures de la nature & de soy mesme. Outre cela il y en a d'autres encore qui proprement n'appartiennent pas à l'alliance de la nature, mais sont nees de celle de la grace : que neantmoins Dieu a aucument reuelees par vne voye naturelle, c'est à dire par la conduite ordinaire de sa prouidence, & qui par consequent se pourroyent & se deuoyent recueillir par l'entendement humain sans aucune predication, si par le peché nous ne fussions point deuenus ; ie ne diray pas tenebreux seulement, mais meschans encore. C'est, que Dieu est pitoyable envers les pecheurs repentans, & qu'il inuite les hommes à soy par sa longue attente & sa patience.

Mais quant à la doctrine de la mort de nostre Seigneur Iesus, nul d'entre les hommes qui ne l'auroit

point veüe de ses yeux ne la pourroit deuiner, non eust il l'entendement aussi clair & lumineux qu'auoit Adam en son integrité originelle. Il n'y en a ny marque dans les cieux; ny enseignement en la terre, ny cognoissance naturellement imprimée ou anticipée en nos entendemens. Les Israelites n'ont peü sçauoir qu'il deuoit souffrir, si les Prophetes que Dieu suscitoit extraordinairement ne l'ont annoncé. Les nations esparses dessus la face de la terre ne le peuvent sçauoir non plus, si les Apostres & les ministres de l'Euangile ne le leur preschent. Et bien que nostre Seigneur ait dit que quand il seroit vne fois enleué de la terre, il tireroit tous hommes a soy, il n'a pas voulu signifier pourtant, que la montagne sur laquelle il auoit a estre crucifié fust si haute, & que sa croix deust estre si eleuée au dessus, que tous les hommes l'y vissent, pour apprendre de leurs propres yeux, l'histoire de sa passion ignominieuse. Comment pourroit nostre veüe paruenir si loin? Comment y pourroyent percer les yeux des hommes de l'autre hemis-

phère? Mais il a voulu dire que les Apostres planteroyent sa croix de tous costés par la predication, & que l'efficace de la grace de son Pere venant a s'y desployer, elle emmeneroit les pensees des hommes prisonnières sous son obeissance. Voilà pourquoy l'Apostre au chapitre dixieme de l'Epistre aux Romains, apres auoir dit que c'est icy la parole de la Foy laquelle il preschoit, *Si tu confesses le Seigneur Iesus de ta bouche, & que tu croyes en ton cœur que Dieu la resuscité des morts, tu seras sauvé*: Pour ôter aux Juifs toute excuse de ce qu'ils n'auoyent pas creu en l'Euan-gile de Christ, dit expressément qu'il leur a esté annoncé & qu'il n'a tenu qu'a eux qu'ils n'ayent esté sauuez, & à l'obstination de leurs cœurs selon les oracles des Prophetes. *Comment, dit il, invoqueront-ils celuy auquel ils n'ont point creu? & comment croiront-ils en celuy duquel ils n'ont point ouy parler? & comment orront-ils sans qu'il y ait qui leur presche? Et comment preschera-on sinon qu'il y en ait qui foyent enuoyés? ainsi qu'il est escrit*.  
*O que les pieds de celui qui annonce*

paix sont beaux, voire de ceux qui annoncent les choses bonnes ! Mais tous n'ont pas obéi à l'Evangile : car Esaie dit, Seigneur qui a creu a nostre predication ? La foy donc est par l'ouïr, & l'ouïr par la Parole de Dieu. Mais ie demande, ne l'ont ils point ouï ? Ains leur son est allé par toute la terre, & leurs paroles insques aux bords du monde.

Or appelle il ceste doctrine de la croix de Christ, folie, eu egard au iugement que les hommes charnels en font, & à la repugnance que naturellement nostre entendement corrompu y rencontre. Car combien semble t'il esloigné de la conception humaine de croire en vn homme crucifié ? De s'imaginer que Dieu soit mort ? & mort encore, d'une façon si estrange & si infame ? On nous conte bien, disoyent sans doute les Gentils en eux mesmes, des choses estranges de nos dieux. Qu'ils sont descendus en la terre : qu'ils se sont meslés dans les combats : que mesmes ils y ont esté blessés, & qu'ils y ont respandu quelque peu du sang où est le siege de l'immortalité de leur estre.

Mais qu'ils soyent morts, c'est ce dont nous n'auions point ouy de nouuelles. On nous dit bien que quelques vns sont morts pour deuenir Dieux; mais que ceux qui estoient desia receus au nombre des Dieux, soyent puis apres morts; comment est-ce que la raison le pourroit comprendre? Mais au reste il a esté bien dit par ce grand homme que nous vous auons tantost nommé, que la doctrine de la mort de Christ est vne sagesse profonde & secrette, recogneuë par ceux a qui Dieu donne les yeux de leur entendement illuminez pour apprendre ces mysteres. C'est pourquoy l'Apostre dit, *Les Iuifs demandent signe, & les Grecs cherchent sapience. Mais quant à nous, à ceux qui sont appelez, nous preschons Christ, puissance de Dieu & sapience de Dieu.*

Cependant est icy singulierement a remarquer combien l'Apostre est peu scrupuleux quant aux mots, pourueu qu'on entende les choses. Quelles expressions sont-ce là, mes freres? Depuis qu'en la sapience de Dieu le monde n'a point cognu Dieu par sapience, le bon plaisir de Dieu a esté

*de sauuer les croyans par la folie de la predication ? Item ? la folie de Dieu est plus sage que les hommes , & la foiblesse de Dieu est plus forte que les hommes.*

Certes il n'y peut rien auoir qui excuse ces expressions, que les allusions, & les façons de se ployer & de s'accommoder à la conception de ceux à qui on parle : ou les ironies , ou les sarcasmes , ou la liberté d'employer les termes de son aduersaire mesme ; ou quelque autre raison de ceste nature. Car au reste il y a naturellement entre la chose & le mot, si vous les comparez precisement , ie ne diray pas vne infinie disproportion , mais vn conflict irreconciliable ; voire en l'usage de ces paroles vn outrage contre la puissance & la sapience de Dieu mesme. Mais ou ces raisons trouuent lieu ; comme icy la façon de parler qu'on appelle concession, par laquelle on s'accommodé à la conception d'autrui, est toute euidente, l'Apostre ne craint pas d'employer telles expressions, voire mesme de les consacrer en ces eternels monumens de la verité de Dieu, & en la memoire perpetuelle de l'Eglise.



Venons au troisieme point, auquel nous vous prions d'estre attentifs, deust-il vn peu passer la mesure ordinaire de nos exercices. Nous vous auons dit & repeté beaucoup de fois, & mesmes assez particuliere-ment expliqué que pour obtenir le salut en la misericorde de Dieu manifestee en Iesus-Christ, il faut que la foy precede, comme vne condition prealable. Or pour engendrer la foy és cœurs des hommes, deux choses sont absolument necessaires: la reuelation externe de la doctrine de la religion; & la puissance efficace de l'esprit de Dieu qui dispose interieurement nos cœurs à la comprendre. Pour l'vne donc & pour l'autre de ces choses, il a esté necessaire que la predication de l'Euan-gile fust employee pour conuertir les hommes à salut.

Car pour commencer par la premiere, comme ainsi soit que l'alliance de la grace deust surmonter d'aussi loin celle de la nature, comme le second Adam excelle par dessus le premier, & comme le glorieux estat de l'Eglise par la redemption de Christ,

doit quelque iour exceller la haut es-  
cieux par dessus la naturelle condi-  
tion des choses en leur creation pre-  
miere, il ne conuenoit nullement a la  
sagesse de Dieu de ne donner autre  
corps à la doctrine de ceste nouvelle  
alliance, que celuy qui se pouuoit for-  
mer de ces doctrines lesquelles la  
raison humaine pouuoit recueillir de  
la consideration des ouurages de la  
nature. Cest a sçauoir que Dieu est  
bon, qu'il est sage, qu'il est puissant  
a merueilles, qu'il est immuable, que  
l'homme le doit seruir & honorer,  
qu'il doit mettre sa confiance en sa  
bonté, qu'il le doit inuoker en sa  
necessité, qu'il luy doit rendre actions  
de graces pour ses beneficences; &  
choses semblables. Ce qui en l'allian-  
ce de la nature eust composé tout  
l'edifice de la religion, est deuenu  
en l'alliance de la grace le fonde-  
ment seulement qui ne fait que raser  
la terre. Sur luy puis apres a esté edi-  
fié ce grand & magnifique Palais de  
la doctrine de la redemption, où re-  
luit la reuelation de la iustification  
par la foy, de la sanctification par  
la puissance de l'Esprit, de l'esperance  
de

de l'immortalité glorieuse és lieux celestes. Où vous voyez comme en relief l'incarnation de la Sapience eternelle ; la vie & la conuersation diuine de Dieu manifesté en chair ; la iustification & cognoissance de la diuinité par ses miracles, & notamment par sa resurrection triomphante & son ascension en gloire : & là dedans, comme nous auons dit tantost, le chef-d'œuvre de la sapience de Dieu en la satisfaction à sa iustice, pour pouuoir sans endommager l'autorité inuiolable de ses loix, leuer les bondes à sa grande & infinie misericorde. Et voyez encore au trauers de tout cela meslees les ombres & les profondeurs de la subsistence distincte de trois personnes en vne essence ; de l'vnion de deux natures infiniment differentes en vne seule personne ; de l'election & predestination ; & s'il y en a quelques autres dont Dieu ne nous ait reuelé que les bords & caché le reste à nos yeux, le reseruant en ses conseils impénétrables. La dignité, di-je, du Redempteur requeroit vne reuelation sans comparaison plus excellente.

En apres, bien que depuis le peché commis Dieu eust en quelque façon manifesté deux de ses vertus en la simple reuelation de la nature: sa iustice par ses iugemens, & sa misericorde par sa patience & longue attente: si est-ce qu'ayant ordonné de sauuer le genre humain par la souffrance de la croix, il importoit necessairement à la gloire que le monde cogneust combien ces deux vertus s'y sont monstrees eminentes. Vne iustice si inflexible, si rigoureuse & si inexorable, qu'elle n'a peu estre ployee que par la mort de son bien-aimé: vne misericorde si profonde & si desiruse du salut du genre humain, & singulierement de son Eglise, que par le moyen de la satisfaction elle a rompu les digues de la iustice mesmes. Voila pourquoy l'Apostre dit au troisieme de l'Épistre aux Rom. que Dieu a de tout temps ordonné le Mediateur pour propitiatoire par la foy au sang d'iceluy, afin de demonstrier sa iustice. Et au 5. il recommande singulierement sa charité, en ce que lors que nous n'estions que pecheurs,

Christ est mort pour nous. Ces deux vertus donc estans celles dont , par maniere de dire, il aime la gloire dauantage , ou les eust-il laissees enseuelies en vne perpetuelle ignorance, ou se fust-il contenté de ceste chetive cognoissance qui se peut tirer de la conduite de sa prouidence?

Ioignez à cela que bien que nostre Seigneur Iesus n'ait esté saint que pour estre saint; bien qu'il n'ait fait les miracles que pour la conuersion des hommes; bien qu'il n'ait si diuinement presché que pour leur instruction à salut; bien qu'il n'ait voulu mourir que de l'abondance de la charité qu'il portoit au monde & notamment à ceux qui luy estoyent donnez de son Pere en predetermination eteruelle: si n'estoit il pas raisonnable qu'il fust priué de la gloire de la pureté inimitable de sa vie, de la puissance infinie qu'il auoit monstree en ses merueilles, de la profonde sapience de la doctrine de sa predication, & sur tout de cette charité dont la longueur & la largeur, la profondeur & la hauteur, excède toute cognoissance. Et comment n'en eust-il

point esté priué si cela n'eust point esté cognu que quand & où il a esté fait, & eust esté avec la nation des Iuifs enseveli dans les ruines de la Iudee? Il falloit, mes freres, qu'il fust cognu par les nations, & pour cet effect que les herauts & les trompettes de son nom le publiassent par toute la terre.

Mais voyons de plus pres comment il estoit necessaire pour le salut des hommes mesmes. L'effect de la mort de nostre Seigneur Iesus, se doit considerer ou en l'assemblage du corps de l'Eglise en general, ou en la plenitude de la foy & de la cognoissance de chacun de ses membres. Et quant à l'assemblage de l'Eglise, il estoit absolument necessaire pour le composer, que la croix de Christ fust preschee par l'vniuers. Car posé, mes freres (& nous verrons tantost ce qui s'en doit tenir) que Dieu eust voulu amener ses eleus à la iouissance du salut, en ouurant seulement à chacun d'eux l'entendement par la puissance de son Esprit afin d'appercevoir sa misericorde en sa patience & en sa longue attente, & les conuertir ainsi

à repentance : quelle communion eussent peu auoir les fideles entr'eux, quelle cognoissance de leur foy & mutuelle charité, quelle consolation de se voir avec plusieurs autres, participans d'une mesme esperance. Certes ce n'eust pas esté comme quand le peuple d'Israel voyoit clair en Gosçen, tout estant plein de tenebres au reste de l'Egypte. Car ils estoient tous ramassez en vn corps, & auoyent la consolation de s'entrevoir & de s'entrecognoistre. La condition de chacun fidele eust esté comme d'un homme cheminant tout seul de nuit à la lumiere d'une chandele en vn desert, où il n'entendrait rien que hurlemens de bestes sauvages : tant le monde estoit couuert d'espouuantes tenebres d'ignorance, d'idolatrie, de superstition, & d'erreur : tant cette ignorance auoit rendu les nations en ce qui regarde Dieu, sauvages & barbares. Vn Chretien qui voyage seul parmi les Toupinambouts, a sans doute bien de l'ennuy de sa solitude, & peut bien dire avec Dauid, combien de temps *Psalm.*  
habiteray-je encor entre les tentes de *120. 5*

Kedar & de Mesçek? Mais au moins a-il cétte consolation qu'il sçait bien qu'il y a des Chrestiens en vn autre lieu; il entretient communion avec eux des mouuemens de sa pensee; l'esperance luy demeure tousiours de retourner en son pays; & plus il en voit grande la difficulté, plus l'enuie qu'il en a deuiet-elle vehemente. Que si la mort le surprend entre les barbares, il sçait qu'il trouuera és cieux Abraham, Isaac & Iacob, & s'asferra là haut à table avec nostre Seigneur Iesus Christ mesme.

Mais vn homme illuminé de l'esprit de Dieu iusques à ce poinct que de pouuoir recognoistre sa puissance, sa sagesse, sa bonté, sa iustice, & en quelque façon sa misericorde par les voyes de la nature & de la prouidence, & qui au reste n'a rien dauantage, qu'elle consolation pourroit-il auoir ou de la communion de la foy de ceux qui ont esté deuant luy, qu'il ne peut auoir cogneuë, ou de ceux qui viuent en mesme temps que luy, qu'il ne peut cognoistre non plus, ou de l'assemblée des esprits desia recueillis dans les cieux; dont il n'auroit ja-



mais ouy parler , ou de l'ineestimable douceur de la presence de nostre Seigneur Iesus , le nom mesmes duquel il n'auroit iamais entendu de ses oreilles ? Il falloit donc , comme dit Sainct Paul, *que les vns fussent donnez pour estre Apostres, les autres pour estre Prophetes, les autres pour estre Euan- gelistes, & les autres pour estre Pasteurs & Docteurs, Pour l'assemblage des Saincts, pour l'œuvre du ministere, pour l'edification du corps de Christ: Jusqu'a ce que nous nous rencontrions tous en l'unité de la foy, & de la cog- noissance du Fils de Dieu, en homme parfait, à la mesure de la parfaite stature de Christ. Autrement tous les membres de ce corps eussent esté dissipez, sans aucune cognoissance les vns des autres, par la terre.*

Pour ce qui regarde la plenu-  
de de la foy de chacun fidele, la ne-  
cessité y est encore plus absoluë.  
Car si nous considerons les choses  
vn peu de pres, nous trouuerons  
que ce diuin edifice de la Religion  
Chrestienne, est composé de trois  
sorte de doctrines liées & enchain-  
nées les vnes avec les autres, d'une

façon admirable & d'une connexion indissoluble. Car comme nous vous auons dit, il y en a qui seruent de fondement. Et ce sont celles que la droite raison peut tirer de la contemplation des œuvres de Dieu en la Nature. Comme, qu'il y a vn Dieu & qu'il gouerne toutes choses par sa prouidence : que l'ame de l'homme est immortelle : qu'il y a vne difference naturelle entre le bien & le mal : que vers Dieu il y a remuneration à la pieté en sa bonté, & punition du peché en sa iustice & semblables.

Les autres sont celles que la droite raison ne pouuoit pas d'elle mesme recueillir des ouurages de la nature, & qui par consequent ne pouuoient estre sceuës que par vne reuelation celeste. Et neantmoins depuis qu'elles ont esté reuelees, la droite raison les comprend & y void vne lumiere de sapience admirable. Car pour exemple, qui eust peu deuiner la satisfaction pour les pechez des hommes par la souffrance d'un Homme-Dieu? L'intelligence des Anges mesmes estoit-elle pour y atteindre? Et

neantmoins depuis que cela est reuelé nous en comprenons la raison suffisamment. Nous voyons que la justice de Dieu est trop severe, & le peché de l'homme trop horrible pour estre effacé sans satisfaction. Comprendons cependant que la satisfaction ne pouuoit estre rendue par vn qui fust simplement homme, pource que le peché meritoit vne peine infinie. Qu'elle ne le pouuoit estre non plus par vn qui fust simplement Dieu : pource qu'elle deuoit consister en la souffrance de la peine meritee par les offenses. Et que par tant il falloit que celuy qui la deuoit rendre fust Homme-Dieu : homme, pour pouoir souffrir : Dieu afin que sa souffrance fust d'une valeur infinie.

Les autres finalement sont celles que ni la droite raison ne pouuoit sçauoir sans reuelation, ny depuis la reuelation elle ne les peut comprendre en elles mesmes. Et neantmoins elle void bien la necessaire liaison de verité qu'elles ont avec les precedentes. Telle est la doctrine de la bienheureuse Trinité. Car qui eust peu

comprendre la distinction de trois personnes en l'essence diuine par la contemplation de ses ouurages ? Et depuis que cela est reuelé , qui est-ce qui peut suffisamment conceuoir que trois soyent vn , & qu'un soit trois : c'est à dire, qu'il y ait Trinité de personnes en vnité d'essence ? Certainement c'est vn mystere qui nous est incomprehensible. Et neantmoins nous voyons bien que puis qu'il y a vn homme-Dieu qui a satisfait à la diuinité , il faut necessairement qu'il y ait distinction de personnes en elle. Car la nature diuine repugne à la pluralité : & partant il faut qu'il n'y en ait qu'un en essence. Et la nature de la satisfaction requiert la pluralité des personnes. Car auste est la personne qui souffre ou comme criminel ou pour les criminels; & autre la personne de celuy qui comme Magistrat exige la peine pour la vengeance des crimes. Figurons nous donc que Dieu se soit contenté de la declaration de sa misericorde par la voye de la prouidence , sans reuelation extraordinaire & celeste de ces doctrines émerueillables, nous serons reduits à

cette premiere sorte de verité , sans auoir aucune intelligence des autres. Ce qui est proprement comme si vous ostiez des cieux le Soleil & la Lune, & que vous n'y laissassiez seulement que la simple lumiere des estoiles. A combien petite mesure donc seroit reduite nostre cognoissance?

Encore n'est-ce pas le tout. De ces doctrines qui peuvent estre cognues par la droite raison ; les vnes sont demeurees presque entierement enseuelies dans les tenebres du peché : les autres ont esté extrêmement contaminees du melange de diuerses opinions erronees , bizarres, superstitieuses, estranges, & pleines d'idolatrie. Et au reste ce qui restoit de telles veritez au monde estoit bien amy de la raison ; mais ennemy des passions & des conuoitises humaines. Au contraire, ce qu'il y auoit de faux, d'idolatre & de superstitieux estoit bien ennemy de la raison , mais complaisant aux concupiscences les plus cortompues. Ce qu'il y auoit de veritable estoit bien decoulé des cieux : car ç'en est l'vnique source:

mais il estoit au monde & en l'esprit humain comme en vn pays estrange. A l'opposite, ce qu'il y auoit de faux estoit en l'ame de l'homme comme au lieu de sa naissance. Qu'elle lumiere donc eust il falu donner à l'homme pour separer ce qui estoit si peslemelé & confondu? Quelle efficace de l'Esprit de Dieu pour arracher de l'esprit de l'homme ce qui y auoit ietté ses racines si auant, & y planter des creances qui y estoient deuenues si estrangeres? Quel effort de la grace d'en haut pour chasser de nos entendemens ce que nos conuoitises y auoyent fourré si doucement, & si puissamment estably, & qu'elles y maintenoient avec tant soit de violence en leurs perturbations, soit de charmes és voluptez qui les accompaignent, pour y remettre en son siege la verité, & luy redonner l'empire dessus des passions si turbulentes? le di, mes freres, qu'il n'y auoit que Dieu seul qui peust faire cela: & qu'encore ne le pouuoit-il que comme par vne espece de miracle, donnant de son esprit non en la mesure ordinaire qu'il employe pour conuertir

ses esleus à la cognoissance de son Fils, mais qu'il a fait sentir autresfois aux plus grands d'entre les Prophe-  
tes. Or combien qu'il n'ait pas esté mal seant à Moyse de desirer que tout le peuple de l'Eternel sentist ces prophetiques inspirations, si ne semble-t'il pas conuenir à la sagesse de Dieu de faire ordinairement les choses extraordinaires, & ne conuertir aucun que par des enthousiasmes. Parrant il estoit absolument necessaire que la reuelation des cieux suruint là dessus, & que de la croix de nostre Sauueur & de sa resurrection glorieuse d'entre les morts, reluisist la lumiere qui deuoit illuminer nos tenebres, & descendist la vertu qui deuoit crucifier le vieil homme en nous & esteindre ses connoitises

Mais voyons comment l'Euangile a esté absolument necessaire d'une autre façon, c'est assauoir en esgard à la puissance efficace de l'Esprit de Dieu, qui dispose nos cœurs à comprendre la reuelation de sa misericorde. Dieu à tellement attaché la grace de son esprit par laquelle il conuertit les hommes à la foy, mes freres, à la

declaration de sa parole & de sa verité telle que nous l'auons par la reuelation de ses Prophetes & de ses Apostres, qu'a cause de cela elle est appellée non seulement la Parole de la foy, mais le ministère de l'Esprit: Voire mesmes l'Apostre Sainct Paul faisant opposition de sa predication qu'il dit auoir esté avec demonstration d'esprit & de puissance, avec le ministère de Moyse, prononce que le ministère de Moyse, a esté le ministère de la lettre, & le ministère de la mort, & le ministère de condamnation, & que la lettre tue: mais que le sien & de ses compagnons estant le ministère de l'esprit, est le ministère de vie, & ministère de Iustice, & que l'Esprit viuifie. De sorte que le mesme peuple qu'il appelle l'Israel selon l'esprit, il l'appelle aussi l'Israel selon la Promesse: pour monstrier que ces deux choses; la Promesse qui vient d'une reuelation extraordinaire, & l'Esprit qui luy donne entree en l'entendement de l'homme, s'accompagnent en telle maniere, que si bien la Promesse est exterieurement annoncée, a plusieurs en qui pourtant Dieu ne desploye pas l'efficace de son Esprit



( car il y en a beaucoup d'appellez, mais peu d'esleus) Il ne desploye pour tant cette sienne efficace de son esprit que là où il fait exterieurement annoncer la promesse.

Or encore que ce fust assez que la Parole de Dieu nous eust enseigné cela pour confirmer nos esprits en ceste creance, qu'où bien il n'y a eu aucun des Gentils, eslongnez des Aliances de Dieu, qui se soit conuerti par la voye de la Nature; ou bien ç'a esté vne chose rare, extraordinaire, & comme prodigieuse en la dispensation de la grace de Dieu: si est-ce que Dieu prend plaisir que nous contemplions ses œuures, & la sapience admirable des proportions & des mesures qu'il y a obseruées. Quelle est donc ceste sapience qui se peut remarquer en toute ceste œconomie? Certes, mes Freres, nous pouuons icy mettre deux choses en auant. La premiere, que si les hommes eussent esté sauuez seulement par l'efficace de la satisfaction du Redempteur, sans aucune cognoissance de la dignité de sa personne & de l'excellence de ses offices, ils eussent esté a peu

pres comme les animaux qui vivent  
 es cauernes de la terre de la chaleur  
 viuifiante du Soleil, & si ne voyent  
 point sa lumiere: car la vie de tous  
 les animaux depend de la vertu des  
 rayons du Soleil: & le salut ne peut  
 venir aux humains que de la vigueur  
 de la satisfaction du Redempteur.  
 Mais comme il conuenoit à la sagesse  
 de Dieu en la constitution de ce vieil  
 monde, que l'Apostre appelle icy sa  
 sapience, de ne donner pas seulement  
 la vie aux animaux par l'entremise de  
 la chaleur de ce grand luminaire de  
 l'Vniuers, mais de leur donner aussi  
 la cognoissance & l'vsage de sa lu-  
 miere, afin que les creatures raison-  
 nables ayent ce doux contentement  
 de le voir, & prennent occasion  
 d'admirer l'ouurier en son iourage.  
 Ainsi en ce nouveau monde de l'E-  
 glise Dieu a voulu sauuer ses esleus  
 par la vertu de la Croix de Christ;  
 mais ç'a esté en telle maniere qu'il a  
 pensé conuenir à sa sapience, de nous  
 mettre deuant les yeux ce beau Soleil  
 de Iustice qui porte santé en ses ailes;  
 & pour cet effect que la beauté de  
 ceste lumiere & l'efficace de sa grace

qui nous oste le bandeau de deuant les yeux, se rencontraient ensemble. Afin que comme le Soleil ne fait sentir sa chaleur que par le moyen de ses rayons, le Seigneur Iesus, comme dit le Prophete, ne iustificast & ne sauuaist personne, pour ce qui est de l'ordinaire dispensation de Dieu, que par l'entremise de sa cognoissance. Quoy que comme autre est la lumiere de la premiere aube du iour, & celle qui approche du leuer du soleil, & celle finalement qui accompagne le soleil mesme : aussi autre a esté la cognoissance qu'on a eue du Redempteur au commencement du temps de la publication de la Loy, autre celle qui a esté aux siecles des Prophetes qui sont venus depuis; & finalement autre la splendeur & la gloire de ce bel Orient quand il a paru au monde.

L'autre chose que nous auons à remarquer en cecy est, qu'en la grace de l'esprit il faut considerer deux choses. L'une est son origine; & l'autre son usage. Et quant à son usage il consiste à illuminer l'entendement de l'homme en la cognoissance de la misericorde de Dieu, & à sanctifier

son cœur & ses affections par l'admiration de cette miséricorde. Pour son origine elle est celeste & esleuee au dessus de tout ce qui peut tenir quelque chose de la nature. Elle n'a rien de meslé des preparations, des dispositions, des facultez naturelles de la creature, qui ne peuvent estre qu'enclines à mal avec vne obstination extreme : mais elle fait son œuvre toute seule, & en veut auoir toute la gloire. Dieu donc a gardé vne telle symmetrie entre cette sienne grace de l'Esprit & la declaration eternelle de sa verité celeste, que là où la reuelation a esté diuine & surnaturelle, & neant-moins n'a point présenté la miséricorde de Dieu aux humains, l'efficace de la grace ne s'est fait sentir en aucune maniere. C'est pourquoy l'Apostre appelle le ministère de Moÿse, ministère de mort : d'autant que si vous considerez Moÿse precisely en ce qui estoit de propre à sa charge, il estoit entremetteur de l'alliance legale : alliance legale qui au reste considerée en elle mesme, ne faisoit aucune mention de la miséricorde de Dieu, & ne tonnoit

autre chose que sa iustice. Car les promesses de misericorde qui sont entremeslees deçà delà dans les liures de Moysè, appartiennent à l'alliance Euangelique qui deuoit estre reuelee en Christ, & dont les semences auoyent esté autresfois donnees à Abraham quatre cens ans auant la publication de la loy en la montagne. D'autre costé où il y a eu quelque declaration de la misericorde de Dieu, si pourtant elle ne s'est point faite par vne voye surnaturelle & celeste, là cette efficace de la grace ne s'est point fait sentir non plus : mais il a fallu qu'il y ait eu cette correspondance entre la reuelation exterieure, & la grace de l'Esprit, qu'elles conuinssent d'origine & d'usage. D'origine, estans surnaturelles egalelement. D'usage, induisant conioinctement les hommes pecheurs à recognoistre la misericorde diuine.

Pour donc ne parler pas maintenant de la Loy, car il s'en presentera occasion moyennant la grace de Dieu, quelle a esté cette cognoissance que Dieu a donnee de soy aux

Gentils sans la prédication de l'E-  
uangile? Certes, comme nous vous  
disions, il a reuelé sa puissance eter-  
nelle & sa diuinité par la creation du  
monde: & n'est pas malaisé de trou-  
uer en ses ouurages toutes ces ver-  
tus que nous vous auons cy-deuant  
rapportées. Et il a donné a cognoi-  
stre sa justice manifestement. Car l'i-  
re de Dieu s'est reuelee tout a plein  
du ciel sur toute iniquité & iniustice  
des hommes, qui detenoient sa ve-  
rité en injustice. Et finalement il y a  
donné, si les hommes n'eussent point  
esté obstinez en leur mal, vn goust  
de sa misericorde, en sa longue at-  
tente & en sa patience par laquelle il  
les inuitoit a repentance. Mais bien  
que cela peüst auoir quelque corres-  
pondance avec la grace de l'esprit, si  
vous auez égard à son vsage, entant  
qu'elle est destinée à illuminer l'en-  
tendement des hommes en la co-  
gnoissance de la misericorde de  
Dieu, si n'en a-t-il point si vous auez  
egard à son origine qui est supernatu-  
relle. Car cette declaration s'est fai-  
te par la nature & la voye de la pro-  
vidence, dont la conduite tient de la

nature encore. C'est pourquoy Dieu a laissé faire aux facultez naturelles de l'homme, & n'y a rien adiousté de la vertu de son Esprit de foy ; & les facultez naturelles de l'homme estans corrompues comme elle sont, il a esté impossible que les hommes ayent esté amenez par ce moyen à repentance : non certes par la faute de la reuelation, comme parle cet excellent Calvin; mais par la dureté & obstination du cœur des hommes.

Car voicy comment, outre ce que nous vous auons rapporté cy deuant il parle dessus ce passage. C'estoit „ bien l'ordre legitime que l'homme „ par la lumiere de l'entendement, „ qui est en luy mise de nature, con- „ templant la Sageſſe de Dieu en ses „ œuures, paruint à la cognoiſſance „ d'iceluy. Mais pource que cet or- „ dre est renuerſé par la mauuaistie „ de l'homme, Dieu nous veut pre- „ mierement rendre fols en nous „ meſmes, auant que de nous instrui- „ re à salut : apres pour vn tesmoi- „ gnage de sageſſe, il nous offre vne „ chose qui a comme quelque sem- „ blance de folie. Et c'est l'ingratitu- „

» de des hommes qui a merité vn  
» tel renuersement. Si par le regard  
» des œuures de Dieu les hommes  
» estoient adressez à la vraye co-  
» gnoissance d'iceluy, ils cognoi-  
» stroyent Dieu sagement, ou par la  
» vraye & naturelle maniere d'estre  
» sage : mais pource que ce que Dieu  
» auoit monstre sa Sapience és crea-  
» tures, n'a de rien profité à tout le  
» monde pour instruction, il est  
» apres venu par vn autre moyen à  
» enseigner les hommes. Ainsi il faut  
» imputer à nostre vice & imperfe-  
» ction, ce que nous n'obtenons  
» point vne cognoissance de Dieu  
» suffisante pour nous sauuer, deuant  
» que nous soyons vuides de nostre  
» propre sens. Et c'est icy vn passage  
» excellent duquel appert combien  
» est grand l'auëuglement du sens  
» humain, qui ne void goutte au mi-  
» lieu de la lumiere. Car il est veri-  
» table que ce monde est comme vn  
» theatre auquel le Seigneur nous  
» presente vne representation eni-  
» dente de sa gloire. Toutes-fois  
» ayans vn tel spectacle tout euidant  
» deuant nos yeux nous ne laissons



pas d'estre auengles. Non pas que „  
la reuelation en soit obscure ; mais „  
pource que nous sommes alienés „  
de sens ; & qu'en cecy non seule- „  
ment la volonté , mais aussi le pou- „  
voir nous defect. C'est à dire , que „  
non seulement nous ne voulôs pas le „  
cognoistre en ses œuures , mais mes- „  
mes , tant nostre corruption est pro- „  
fonde , que nous ne le pouuons vou- „  
loir. Et s'il en naist quelques-fois „  
quelque volonté en l'esprit d'aucun , „  
elle est si legere , si errante , si vagabon- „  
des , si egarée de son but , si meslee de „  
pensees non friuoles seulement , mais „  
mauuaises , & corrompuës , qu'il n'en „  
peut reussir aucun bon euenement.  
C'est pourquoy il adiousté que „  
combien que Dieu apparaisse „  
clairement deuant tous : toutes- „  
fois nous ne le pouuons regarder „  
d'autre œil que par la foy : sinon „  
que nous conceuons vn petit „  
goust de sa diuinité , qui est pour „  
nous rendre inexcusables. Et „  
poursuit excellemment des propos „  
de mesme nature.

Quand donc , mes freres , il a pleu  
a Dieu recueillir son Eglise d'entre

les hommes, il a fait rencontrer ces deux choses ensemble : la reuelation de ses compassions par vne voye surnaturelle, c'est assauoir, par les oracles des cieux, par les reuelations des Prophetes, par la predication des Apostres : & la puissance merueilleuse de son esprit, rauissant nos ames en admiration, de ces grandes & infinies misericordes. Puissance, di-jede son esprit, si douce, mais si efficacien se si plaisante, mais si viue, si accommodée a la nature de l'esprit humain, mais si vehemente & si profonde, qu'il ny a n'y tenebres en l'entendement qu'elle ne chasse, ni peruersité en la volonté qu'elle ne corrige, ni corruption es affectiōs qu'elle ne repurge ; ni repugnance & rebellion en l'homme qu'elle ne surmonte, ne obstination qu'elle ne vainque, ni empeschement qu'elle ne force, ni forteresse qui s'esleue alencontre de la cognoissance de Dieu qu'elle n'abate, ni pensée qu'elle n'emmene triomphamment prisonniere sous l'obeissance de Christ.

Or de ces choses iugés vous assés maintenant, mes freres, quel besoin vous

vous auiez de l'Euangile. Que di-je, quel besoin ? Comment purement, simplement & absolument vous ne vous pouuiez passer de l'Euangile. Je ne di pas seulement que vous ne vous pouuiez passer de la satisfaction & de la redemption de Christ : mais que la predication & cognoissance d'iceluy vous estoit entierement necessaire. Car sans ceste reuelatiō vous fussiez demeurez es tenebres esquelles vous estiez naturellemēt, tant par l'ignorance des doctrines qui vous ont esté reuelees par la parole de Dieu, & dont vous ne pouuiez auoir cognoissance par la contemplation de ses ouurages, que mesmes de celles que vous pouuiez tirer de ses œuvres & de leur conduite par sa prouidence : enuoloppées qu'elles estoient, voire enseuelies en tant d'erreurs, qu'il n'y auoit que la seule Parole du Seigneur qui les en peust demesler. A raison de quoy l'Apostre dit qu'il a falu que çait esté par foy que nous cognussions & creussions que les siècles ont esté formez de la main de Dieu, quoy que de foy mesme le monde

ctie si haut qu'il a Dieu pour auteur. Et sans la puissance de l'Esprit qui l'accompagne, & qui ne pouvoit estre iointe à aucune autre dispensation; quand la lumiere eust esté beaucoup plus grande, quand ces veritez manifestées es œuvres de Dieu eussent esté en plus grand nombre; quand elles eussent esté moins meslées qu'elles n'estoyent de doctrines estrangeres, vous n'eussiez pourtant sceu les appercevoir a cause de l'aveuglement dans lequel vous estiez de vostre nature. Et partant comme les peuples ne peuvent estre sauvez, qui ne croient point en Iesus-Christ; aussi les Pasteurs ne le peuvent estre non plus qui n'exhortent point les peuples a y croire. Comme les peuples demeurent en leur ancienne condamnation qui ne cognoissent point le rédempteur: aussi y a il condamnation sur les Pasteurs qui enseignent autre nom aux hommes pour estre sauvé, qui pour estre sauvé n'enseignent point ce nom de Iesus-Christ aux hommes. L'Apostre Saint Paul a dit qu'il ne vouloit

rien sçauoir entre les Corinthiens  
 sinon Iesus-Christ & iceluy crucifié ;  
 & maudit est de Dieu qui ne le veut  
 pas sçauoir , proche de malediction  
 qui veut sçauoir avec luy quelque  
 autre chose : qui ne met en ceste vo-  
 cation à laquelle il nous a appellez , en  
 ce glorieux ministere qu'il nous a cõ-  
 mis , tout son soin à bien entendre la  
 doctrine de la Croix de Christ , pour  
 en donner vne claire & solide intel-  
 ligence aux autres. Eslongné finale-  
 ment de la grace & benediction de  
 Dieu , est celuy qui ne renonce à tou-  
 tes opinions , à tous sentimens , soit  
 d'autruy soit de soy-mesme , pour em-  
 brasser la verité , de quelque main  
 qu'elle luy soit présentée. Nous nous  
 aimons naturellement nous mesmes ,  
 mes Freres , & aimons pareillement  
 les choses esquelles nous auons esté  
 nourris , ou desquelles nous sommes  
 imbus de longuemain , ou qui nous  
 ont esté enseignez par personnages  
 que nous estimons , ou que nous a-  
 uons enseignés aux autres. Où tou-  
 tes ces choses viennent à se mesler en  
 la recherche de la verité , qui pensez  
 vous qui soit capable de la recognoi-

stre ? Certes i'ay ceste opinion là de plusieurs honnestes gens de l'Eglise Romaine, que ce n'est pas cõtre leur conscience qu'ils disputent contre nous ; qu'en plusieurs poincts de la Religion ils pensent tenir le parti de la verité, & combattre le mensonge. Mais ils ne prennent pas garde d'assez près que les interets humains degoient leurs entendemens, & l'entendement deceu abuse la conscience. Pour estre vray disciple de la verité, il faut mettre bas toutes autres considerations, & ne regarder pas si celui qui parle est Iuif ou Grec, ieune ou vieil, celebre ou de peu de nom, de la communion de Rome, ou de la creance de Geneue. Ce que nous alleguons Calvin n'est pas que nostre foy soit fondée dessus les escrits : c'est pour leur monstrier qu'il n'est pas tel qu'ils se l'imaginent ; & qu'ils ne scauroient tant dire de choses à la louange de la misericorde de Dieu, qu'il n'en ait enseigné encore d'auantage. Ce que nous reiettons les escrits de leurs Docteurs, ce n'est pas pource qu'ils sont de leurs Docteurs, c'est pource que nous n'y trouuons pas ceste verité, ceste doctrine de sa-

lût que nos ames cherchent. Car au-  
 reste nous ſçauons qu'il eſt arriué a  
 des Saints & a des Martyrs de tenir  
 des erreurs en la Religion : & au-  
 contraire, quelquesfois a des hereti-  
 ques tres-peſtilens de dire des choſes  
 excellentes. Que s'il eſtoit aduenü à  
 leurs gens d'eſcrire quelque choſe  
 de bon, nous la receurions auide-  
 ment : ſc aux plus grands hommes  
 d'entre nous, d'enſeigner quelque  
 choſe contre la verité, nous les def-  
 auoüerions en cet égard, & ne vou-  
 drions auoir rien de commun avec  
 leurs fautes. Mais grâces à Dieu que  
 nous auons à nous glorifier de leurs  
 vertus, non à nous mettre beaucoup  
 en peine d'excuser en eux les infirmi-  
 tés humaines. Et ce qui nous fait  
 hardis en cet examen de toutes cho-  
 ſes, eſt le commandement expreſ 1. Theſſ  
 ſ. 21.  
 que l'Apoſtre nous fait de tout ef-  
 prouuer, & la regle que Dieu nous a  
 donnée en ſa parole pour diſcerner  
 ce qui eſt bon d'avec ce qui eſt mau-  
 uais. Car eſtant droite & parfaite  
 comme elle eſt, elle ne nous laiſſera  
 point tromper en ce qui importe à  
 noſtre ſalut, ſi non autant que nos

passions nous aveugleront nous mesmes. C'est pourquoy nous exhortons les hommes à se despouiller de toutes passions, à vuidier leurs esprits de tous preiugez, à entrer ainsi en la la recherche de la verité, en renonçant entierement a eux mesmes. Pource qu'autant comme il reste de l'homme en l'homme, autant est-il incapable des choses qui sont de Dieu : autant qu'il demeure de pensees de la terre en nos cœurs, autant, tenebreuses qu'elles sont, empeschent-elles que nous n'y receuions la lumiere de la verité celeste. Le Seigneur nous doint à tous l'esprit de verité & de charité; & à luy Pere Fils & S. Esprit soit gloire eternelle. A M E N.





## SERMON IV.

2. C O R. 3. 6.

*Dieu nous a rendus suffisans pour  
estre ministres du nouveau Te-  
stament : non pas de lettre,  
mais d'Esprit.*

**T**O UT ainsi, qu'il arrive  
quelques-fois, mes freres,  
que les oiseaux emportans  
des fructs entre leurs ser-  
res, les laissent tomber en volant ; &  
si en tombant ils se rencontrent en-  
tre des cailloux, ils s'y perdent & s'y  
corrompent ; au contraire s'ils trou-  
vent vne bonne terre, ils y germent  
& s'enracinent, & puis, si quelcun a  
le soin de les cultiver, deviennent de  
grands arbres qui portent du fruct  
plantureusement. Ainsi aduient-il  
aux Ministres de l'Evangile que le  
vol de leurs pensees pendant leurs

predications emporte, de laisser tomber quelques sentées dans les cœurs de leurs auditeurs, qui si elles ne les trouuent bien disposees s'esteignent & perissent là dedans : & si au contraire cette terre les reçoit doucement en son sein, elles y desployent premierement cette vertu à raison de laquelle nostre Seigneur appelle sa parole de ce nom de semence, & puis par le soin du saint ministère croissent & produisent des fructs de foy & de sanctification en abondance. Or nous souvient-il qu'en l'action que nous fîmes Dimanche dernier deuant vous, nous vous dismes qu'en l'efficace de la grace par laquelle Dieu conuertit les hommes à foy, il faut considerer deux choses : son origine, en ce qu'elle est surnaturelle & son vsage en ce qu'elle est destinée à nous faire voir clairement la miséricorde de Dieu qui nous est offerte en Christ par l'Euangile. De façon que là où Dieu a donné quelque reuelation de sa miséricorde, mais neantmoins par vne voye naturelle comme en la patience & en la longue attente dont il a vsé enuers

les Gentils, il n'a point fait sentir la vertu de son Esprit : & là où la reuelation a esté surnaturelle, mais où toutes-fois il n'y a point eue de declaration de la misericorde diuine, comme en la Loy, là Dieu n'a non plus fait esprouuer cette sienne diuine efficace. Pource que là, la reuelation conuient bien avec la grace del'Esprit quant à l'vsage, mais non pas quant à l'origine & à la maniere de la dispensation. Icy, la reuelation conuient bien avec la vertu de l'Esprit quant à l'origine, mais non quant à l'vsage. Et pour ce qui regarde la patience de Dieu & sa longue attente enuers les Gentils, nous en parlâmes suffisamment. Mais ce que nous dismes de la Loy fut si brief qu'il y a danger qu'il n'ait pas esté remarqué de plusieurs, ou s'il a esté recueilli, qu'il ne puisse pas germer & fructifier, sinon que nous, y apportions la diligence de nostre culture. C'est pourquoy nous auons choisi ce texte que vous auez entendu, comme fort propre à nostre dessein, & duquel quant à vous, si vous y estes attentifs, vous pourrez tirer vne utilité singuliere.

Il est donc manifeste, mes freres, que l'Apostre fait icy opposition de son ministere avec celui de Moyse. Car voicy la suite du passage. Vous estes l'Epistre de Christ administree par nous, & escrete non point d'encre, mais de l'Esprit de Dieu vivant: non point en plaques de pierre, mais en plaques charnelles du cœur. Or auons-nous vne telle confiance en Dieu par Christ. Non point que nous soyons suffisans de penser quelque chose de nous, comme de nous mesmes, mais nostre suffisance est de Dieu: lequel aussi nous a rendus suffisans pour estre ministres du nouveau Testament: non pas de lettre, mais d'Esprit: car la lettre tuë, mais l'Esprit viuifie. Que si le ministere de mort escrit en lettres, & engraue en pierres, a esté glorieux, tellement que les enfans d'Israel ne pouuoient regarder en la face de Moyse pour la gloire de sa face ( laquelle gloire deuoit prendre fin. ) Comment ne sera-plustost glorieux le ministere de l'Esprit? Car si le ministere de condamnation a esté glorieux, le ministere de iustice surpasse beaucoup en

gloire. Mais la question est comment cette opposition se fait.

Quelques vns d'entre les anciens ont esté de cette opinion que par la lettre se deuoit icy entendre le sens literal du Vieil Testament; & par l'esprit, le sens allegorique. Comme si l'intention de l'Apostre auoit esté seulement de dire que le ministere de Moyse a consisté, en ce que quand il a enseigné le peuple d'Israel, & a écrit les liures que nous auons maintenant de luy en l'Eglise, il n'en a donné que l'escorce au sens literal, c'est à dire, qui se presente le premier a la rencontre quand on luyent à la lecture de ces liures. Mais qu'il y a dessous des mysteres profonds qui ont esté reuelez par l'Euangile, dont le ministere & la predication a esté cōmise aux Apostres. Certes nous recognoissons que les liures du Vieil Testament, & particulièrement ceux de Moyse, sont mysterieux en beaucoup d'endroits, & voyons que l'Apostre S. Paul a diuinement expliqué quelques allegories. Il y en a vn bel exemple au 4. chapitre de l'Epiistre aux Galates : vn autre au chap.

9. de l'Épistre aux Rom. Icy mesme, où il est fait mention de la face de Moyse, il y a, comme nous verrons tantost, quelque chose de plus sublime que l'histoire de prim-abord ne semble porter. Mais que pour cela tout ce qui est escrit és liures de Moïse, doive estre interpreté allegoriquement, c'est chose non seulement eslongnee de la raison, mais de l'apparence de la raison mesme. Que mesmes les choses qui ont vn sens mystereux & allegorique n'en ayent point de literal, c'est ce que nul homme de iugement ne dira iamais. Encore qu'Ismael soit le type de ceux qui cherchent à estre iustifiez par la Loy; & Esau de ceux qui sont reprouvez: Isaac de ceux qui sont iustifiez par la foy en la promesse; Iacob de ceux de ceux qui sont esleus pour estre appelez efficacement à la participatiō de la grace de Christ: Est-ce à dire qu'il n'y ait iamais eu d'Ismael ni d'Esau, d'Isaac ni de Iacob au monde? & que par les allegories il nous faille tellement alembiquer & subtiliser toutes ces histoires que nous les tournions en fumee?

Et

Et finalement de croire que ce soit au sens literal que gise la condamnation & la mort, la iustice & la vie au contraire en la seule allegorie, & qu'il n'y ait que les seules allegories qui nous sauuent, c'est vne opinion merueilleusement bigearre.

De dire aussi que l'Apostre fait icy opposition entre le nouveau Testament, & tout ce qui est contenu en l'ancien, comme si Dieu n'auoit iamais employé la vertu de son Esprit en la vocation d'aucun, fors en la predication de l'Euangile qui s'est faite par les Apostres, & non en cette œconomie de la Loy qui a duré depuis Moysé iusques à Christ, ce seroit chose iniurieuse à la bonté de Dieu qui auoit choisi Israel pour luy donner la cognoissance de ses statuts, & à la foy & pieté de tant de grands personnages de l'Ancien Testament, qui nous sont proposez en exemple. Car quoy? ou n'auroyent-ils pas esté véritablement fideles, veu que l'Ecriture sainte recommande leur foy si magnifiquement? Ou s'ils ont esté véritablement gens de bien, comment l'auroyent-ils esté autre-

ment que par l'efficace de cette grace? Ne se peut pas aussi maintenir que cela se die seulement par comparaison; & que pour ce que Dieu n'a pas manifesté cette vertu de son Esprit en si grande mesure sous le Vieil Testament, comme sous le Nouveau, l'Apostre parle du Nouveau avec si grand auantage. Car bien qu'en telles sortes de comparaisons, la splendeur de l'une des choses comparees offusque ce qu'il y peut auoir de lumiere en l'autre, si est-ce que si cela ne se disoit par l'Apostre que de cette façon, il ne se fust pas exprimé avec tant d'energie que d'appeler à diuerses fois le ministere de la Loy, ministere de mort, ministere de condamnation, ministere de lettre qui tue. Il n'y a comparaison qui peust excuser ces expressions s'il n'y auoit autre difference entre les choses que l'Apostre oppose icy, que ce qui dependroit du plus & du moins en la dispensation de la grace. Ioinct que ce n'est pas seulement icy que S. Paul parle de la Loy & du ministere de Moyse en ceste façon; mais ailleurs il enseigne constamment que



la Loy n'a iustificié personne ; qu'elle n'a point esté donnée pour viuifier : & attribue cette louange purement à l'Euangile à l'exclusion de toute autre chose.

Finale<sup>ment</sup> il ne se peut pas dire que les Apostres ayent eu la vertu de rendre leur predication efficaceuse par la grace de l'Esprit ou il leur plaisoit, & que Moyse ait esté destitué de cette prerogative : Car il n'appartient qu'à Dieu seul d'employer cette sienne grace ou il luy plaist : cela ne depend nullement de la disposition de l'esprit de l'homme. S'il eust dependu des Apostres & de leur iugement pour le certain ils eussent conuertí tous ceux à qui ils ont presché, & n'eussent pas permis qu'aucun fust demeuré obstiné contre l'Euangile. Car icy il n'en est pas de Dieu comme des hommes. Dieu est à bon à merueilles à la verité. Et toute nostre bonté non seulement vient de luy, mais n'est rien en comparaison de la sienne. Mais comme nous le vous auons dit ailleurs, il est souuerainement libre en la dispensation de cette misericorde qui conuertit les cœurs

des hommes & y cree la foy : & n'y a aucune loy qui l'oblige de la faire sentir qu'ou bon luy semble. Mais entre les hommes il y a vne certaine societé & communion de sang qui les oblige les vns aux autres naturellement : & là dessus est en partie fondé le commandement par lequel Dieu nous ordonne de procurer de de tout nostre pouuoir le salut de tous nos semblables. Voila pourquoy ou les Apostres n'eussent peu manquer à ce deuoir sans pecher contre celuy de la charité & de la pieté, Dieu a peu vser de sa liberté a son bon plaisir, non seulement sans que ses creatures ayent aucun droit de censurer ses actions , mais mesmes sans rien cōmettre contre ces vertus de iustice & de misericorde qui rendent sa nature si aimable & si venerable. Mais en cela les Apostres & Moÿse ont eu autant de vertu les vns que les autres. Tout ce qu'il y a eu d'eux en leur ministere a esté exterieur. Ce qui concerne le dedans depend d'une dispensation merueilleusement differente.

Il en faut donc reuenir à l'inter-

pretation de Calvin, qui distingue en toute cette æconomie du Vieil Testament, entre les choses qui estoient proprement du ministère de Moyse & celles qui n'en estoient pas. Et quant à celles qui estoient proprement du ministère de Moyse, il les appelle la Loy: des autres il dit qu'elles appartenoyent à l'Evangile. Car voicy comme il parle. On pourroit demander, à sçauoir si Dieu en l'Ancien Testament a seulement retenti de voix externe, & qu'il n'ait point parlé au dedans es cœurs de ses fideles par son Eprit. Premièrement ie respon qu'icy S. Paul a considéré ce qui estoit propre à la Loy. Car combien que Dieu besongnast alors par son S. Esprit, toutes-fois cela n'estoit point du ministère de Moyse, mais de la grace de Christ: comme il est dit au premier chapitre de S. Iean. La Loy a esté donnée par Moyse, mais la grace & la verité est venue par Iesus Christ. Il est bien vray que la grace de Dieu n'a point esté oisive en tout ce temps là: mais il suffit que ce n'estoit point par le

moyen de la Loy, car elle n'auoit point cela de propre: veu que l'office de Moÿse consistoit seulement à proposer au peuple la doctrine de vie, y adioustant les menaces & promesses. Pour cette cause il appelle la Loy, lettre: pour autant que de soy c'est vne predication morte: & l'Euangile, Esprit; pour ce que le ministère de l'Euangile est vif, voire viuifiant. Secondement ie respon: que ces choses ne sont point dites simplement tant de la Loy, que de l'Euangile: mais entant que l'vn est opposé à l'autre: car aussi l'Euangile n'est pas tousiours Esprit. Mais quand on vient à faire comparaison des deux, il est vraiment & proprement dit que la nature de la Loy est d'enseigner litteralement les hommes, en sorte qu'elle ne passe point les oreilles: & que la nature de l'Euangile est d'enseigner spirituellement, pour ce qu'il est l'instrument de la grace de Christ. Et au mesme lieu apres auoir dit plusieurs autres choses de la nature de la Loy & de l'Euangile, qu'il seroit trop long de rapporter;

il dit encore : l'Evangile est a bon „  
droit reputé doctrine de vie, pour „  
autant qu'il est l'instrument de re- „  
generation & qu'il nous offre la „  
reconciliation gratuite avec Dieu : „  
mais la Loy pource qu'elle prescrit „  
seulement la reigle de bien-viure, „  
& ne reforme point les cœurs en „  
l'obeissance de Justice, & denonce „  
la mort eternelle aux transgres- „  
seurs, elle ne nous peut apporter „  
autre chose que condamnation. „  
Ou si on aime mieux le dire autre- „  
ment, l'office de la Loy, est de mon- „  
strer la maladie sans monstrier „  
aucune esperance de gueri- „  
son. L'office de l'Evangile est de „  
donner remede aux hommes les „  
trouuant despourueus de toute es- „  
perance. Car puis que la Loy „  
laisse là l'homme en soy-mesme, el- „  
le le condamne necessairement à „  
mort : mais l'Evangile amenant à „  
Christ, ouure la porte de vie. „

Le ministere de Moysè donc  
doit estre consideré en deux egards :  
ou bien entant que c'estoit vn grand  
Prophete choisi de par Dieu pour  
renouueller parmi le peuple d'Israel  
les promesses qui de toute ancienne

té auoyent esté faites touchant le Messie, & en adiouster encore d'autres : ou bien entant qu'il estoit entremetteur d'une alliance que Dieu traittoit particulièrement avec ce peuple. Si vous le considerez en ce premier egard, il a eu des compagnons en sa charge. Dauid, Esaie, Ieremie, Ezechiel, Daniel, Malachie, & les autres; ont comme luy interpreté les oracles anciens, & en ont laissé à l'Eglise de nouveaux, touchant la redemption laquelle nous deuions auoir en Iesus Christ. Mais si vous le considerez en l'autre, il n'a iamais eu de compagnon: il a esté seul moyennneur de l'alliance legale. En ce premier egard donc, il ne se peut pas nier que le ministère de l'Esprit ne luy ait esté commis, autant comme la condition des temps le portoit. Car qui doutera que Dieu n'accompagna la publication authentique de ces oracles du Redempteur, & des promesses de misericorde qui en dependoyent, de la secrette vertu de son Esprit en la conuersion de ses élus, pour les amener à la iouissance de la vie eternelle? Mais si vous le con-

fiderez en ce second egard; il n'auoit nullement le miniftre de l'efprit; pource que la vertu d'iceluy n'accompagnoit nullement la predication legale; fi; di-je, vous confiderez la predication legale-precifement en elle mefme. Et voila quel a eſté l'auantage des Apoftres par deſſus Moÿſe.

Quoy donc, dira quelcun : La doctrine de la Loy eſtoit-elle pas reuelee d'une façon ſurnaturelle? Auoit-elle pas eſté donnée par l'infpiration des cieux? Dieu mefme n'auoit-il pas engraué de ſon doigt les deux tables en la montagne? Conuenoit-elle donc pas avec cette grace de l'Eſprit que nous diſons eſtre ſurnaturelle & celeſte? Elle y conuenoit certes, comme nous vous auons deſia dit, quant à l'origine; mais elle ne ſ'y accorderoit nullement quant à l'vſage. Car en quoy conſiſte, mes freres, l'vſage de cette grace qui illumine nos entendemens, & par laquelle Dieu nous appelle? Certes à nous faire receuoir les promeſſes de miſericorde que Dieu nous preſente: à nous faire comprendre la grandeur de ſa charité en

nostre redemption: a nous consoler par l'assurance de la remission qui nous en vient: à nous sanctifier par l'admiration de cette charité de Dieu enuers nous: & en suite à engendrer en nos cœurs l'esperance de la gloire eternelle. C'est là la fin pour laquelle Dieu besongne en nous par son Esprit, à ce que nous puissions receuoir toutes ces choses qui exterieurement nous sont presentees par sa parole.

Or la Loy, si vous la considerez en elle mesme, n'a rien de tout cela. Vous trouuerez bien dans les liures de Moyse des promesses de remission: vous y rencontrerez des oracles du Messie: vous y remarquerez des resmoignages indubitables que ces choses n'estoyent pas alors preschées en vain, & qu'il y en auoit quelques vns en qui Dieu operoit par elles. Mais rien de tout cela n'appartenoit à l'alliance de la Loy; tout regardoit la doctrine de l'Euangile. Et de vray l'Apostre S. Paul au chapitre troisieme de l'Epistre aux Galates, faisant opposition de ce qu'il appelle la Promesse avec la Loy, remarque expres-



fement que ce sont choses qui ne se  
peuvent en façon du monde confon-  
dre : & que le temps mesme monstre  
la prerogative de l'une par-dessus  
l'autre, en ce que la Loy n'estoit ve-  
nue que quatre cens ans apres la Pro-  
messe donnée à Abraham ; & que  
par consequent elle n'a peu prejudi-  
aux droits que la promesse preten-  
doit en la iustification des hommes,  
& à leur donner toute seule la iouys-  
sance de l'heritage. Et c'est de là qu'il  
tiré tant d'admirables raisonnemens  
que ce ne peut estre par la Loy que  
nous obtenons la iustification, ni en  
tout ni en partie. Pource que ces  
deux alliances sont d'une nature si  
differente, qu'il est impossible que  
les matieres s'en puissent mesler ni al-  
lier ensemble. Qu'est-ce donc que la  
Loy considerée en elle mesme ? C'est  
une alliance en laquelle d'un costé  
les hommes promettent à Dieu une  
entiere observation de ses comman-  
demens, & au reste, s'ils ne les ac-  
complissent, se soubsmettent à la  
malediction que la Loy denonce. Et  
de l'autre, Dieu promet la vie à ceux  
qui les accompliront, à ceux qui les

transgresseront, il denonce malediction eternelle. De façon que toute l'alliance legale est contenue en deux formules : *Fay ces choses & tu viuras: Et. Maudit est quiconque n'est permanent en toutes les choses de cette Loy pour les faire.* De remission, de misericorde, d'esperance de pardon, elle n'en laisse point. La denonciation y est seueré, rigide & inexorable. Si donc l'usage de la grace de l'Esprit consiste à nous ouvrir les yeux de l'entendement, pour croire aux promesses de misericorde & de remission, comment est-ce qu'elle eust peu accompagner la predication de la loy en laquelle il n'est fait mention ni de remission ni de misericorde?

Je neveux pas dire, mes freres que Dieu n'ait peu accompagner, que reellement & de fait il n'ait accompagné la predication de la Loy, mesme considerée en elle, de quelque vertu de son Esprit: mais ie dy que cene pouuoit estre ceste efficace de l'Esprit laquelle conuertit les hommes a salut, & que l'on peut appeller l'Esprit de foy & de repentance. Et de fait, que la predication de la Loy ait esté

ait esté quelques fois conjointe avec quelque vertu surnaturelle, il est assez clair par l'Apostre S. Paul au chapitre huitième de l'Epistre aux Romains, ou il oppose l'esprit d'adoption que nous receuons par l'Euangile de Christ, a l'esprit de seruitude qui auoit eu vigueur sous l'alliance legale. Mais voicy briuelement en quoy consistoit son vsage. En la Loy il y a deux choses principalement. La iustice du commandement, comme parle l'Apostre, Rom. 7. Car soit que vous ayez egard à la Loy morale, elle est puisée des sources de la nature mesme : soit que vous regardiés à la ceremonielle, Dieu par elle n'a rien imposé a son peuple, qu'il n'eust tout droit d'exiger de luy : & par consequent l'obeissance a son commandement estoit de iustice. Puis après, la verité de la promesse de la remuneration, & de la denonciation de la vengeance. Car c'est d'une mesme fermeté inuariable de la nature de Dieu & de ses arrests, que fust venue la recompense, si quelqu'un eust obserué la Loy, & que la denonciation de la peine estoit si seueré & si inexo-

Q

rable. Pour l'homme d'autre costé, si vous le considerez en sa nature ; il y a en son entendement vn merueilleux. auement, en son cœur & en sa conscience vne dureté inuincible & vne stupidité estrange. De façon que si Dieu n'eust rien fait en la predication de l'alliance legale, sinon proposer exterieurement le commandement, la promesse & la menace : l'homme n'eust de soy-mesme peu appercevoir la iustice de ce commandement, ny la verité des promesses & des denonciations qui y estoient attachées, mais se fust endormi en vne profonde securité & eust tenu toutes ces choses là pour vaines & frivoles. Ce que l'Apostre Saint Paul remarque estre arriué a plusieurs, dont il fait ceste excellente description au chapitre troisieme de l'Epistre aux Romains, laquelle il compose de diuers passages des Pseaumes. *Il n'y a nul iuste, non pas vn seul. Il n'y a nul qui entende, il n'y a nul qui recerche Dieu. Ils ont tous fouruoyé, & ont esté ensemble rendus inutiles: il n'y a nul qui face bien non iusqu'a vn. C'est vn sepulcre ouuert que*

leur gosier : Ils ont frauduleusement  
 usé de leur langues, sous leurs leures  
 il y a venin d'aspic. Desquels la bon-  
 che est pleine de malediction & d'amer-  
 tume. Leurs pieds sont legers à espandre  
 le sang. Destruction & misere est en  
 leurs voyes. Il n'ont point cognu la voye  
 de paix. La crainte de Dieu n'est point  
 devant leurs yeux. Puis il adiouste, que  
 tout ce que la Loy dit, elle le dit à ceux  
 qui sont sous la Loy : pour appren-  
 dre à toute la nation, que s'il y en  
 auoit quelques vns ent'reux à qui  
 ceste description ne conuint pas en-  
 tierement, la difference venroit d'ail-  
 leurs que d'eux mesmes : mais qu'au-  
 reste c'estoit là la peinture de leur na-  
 ture. Dieu donc qui auoit institué  
 l'alliance de la Loy pour reueiller les  
 consciences des hommes qui estoient  
 si profondement endormies, & les  
 amener par les espouuantemens de  
 ses iugemens à chercher leur repos en  
 sa misericorde, pour faire que la Loy  
 ne demeurast pas entierement inutile  
 à ce dessein, l'accompagnoit enuers  
 quelques vns de quelque vertu sur-  
 naturelle, afin qu'au moins ils vin-  
 sent à comprendre qu'il ne comman-

doit rien que de iuste , ne promet-  
toit rien que de vray , ne denonçoit  
aussi rien que de terrible & inexora-  
ble tout ensemble.

Mais quoy ? Certes si ceste vertu  
ne passoit point ce degré (& elle ne  
le passoit sinon en ceux qui estoient  
esleus) ni cela ne pouuoit consoler,  
ni cela ne pouuoit sanctifier les con-  
ciences des hommes. Non consoler  
premierement. Car la consolation  
de la creature pecheresse depend de  
l'assurance de la remission de ses  
pechez. D'où vient que Dauid s'es-  
crie au Pseaume trente-deuxieme.  
*O que bien heureux sont ceux de qui les  
pechez sont conuerts ! O que bien heu-  
reux sont ceux de qui les transgressions  
sont remises !* Or nous auons desja  
dit que la Loy ne donnoit aucune  
esperance de remission. La denon-  
ciation y estoit precise & ne s'y pou-  
uoit rien changer. Maudit est qui-  
conque n'est permanent en toutes  
les choses de ceste loy pour les faire.  
Non sanctifier aussi. Car outre que  
ceste vertu n'alloit pas iusques à re-  
purger les conuolitises de l'homme,  
mais le laissoit en la domination de

la loy de peché qui estoit en ses membres, comment eust-il peu se faire que la creature se fust veritablement conuertie enuers Dieu, qui ne voyoit aucune esperance d'obtenir pardon de sa misericorde? Et quel droit eust elle eu de l'esperer, où Dieu declare hautement & clairement qu'il punira eternellement la moindre transgression de ses ordonnances? Tout cela donc que cet Esprit a peu produire en l'homme, en est reuenu là, d'engendrer en luy non vne vraye amour des choses bonnes & honestes & conuenables à la volonté de Dieu; mais vn desir mercenaire de la recompense: non vne vraye haine du peché, mais vne crainte seruile & vne perpetuelle treueur à cause de la vengeance. Or estoient bien ces deux passions capables de retenir quelques fois vn peu en bride les conuoitises de l'homme, lors qu'elles n'estoyent pas fort emeuës. Mais non tellement pourtant que quand elles commēçoient à deuenir vn peu plus turbulentes, elles ne le subiugassent entierement, & ne l'emmenassent tousjours prisonnier.

soubs la domination de la loy de pe-  
ché qui regne naturellement en nos  
membres. Voila pourquoy l'Apostre  
appelle cela, esprit de seruitude. Non  
pource que de soy il porte les hom-  
mes a des affections mercenaires &  
esclaues : car s'il eust rencontré vne  
ame bien disposée il y eust engendré  
la vraye sanctification. Mais pource  
que le vice & la corruption de l'hom-  
me est telle, que là où Dieu ne passe  
point plus auant en son cœur que de  
luy persuader tellement, quellement  
la verité de la Loy, il est impossible  
qu'il ait d'autres mouuemens ni  
d'autres affections que d'esclaue.  
Posé donc qu'en cette fienne ope-  
ration Dieu se soit arresté là, & n'ait  
point amené les hommes à contem-  
pler en sa parole autre chose que la  
Loy, qu'en pouuoit-il reüssir sinon  
le desespoir, & par consequent la  
condamnation & la mort? Car quel-  
le destresse pouuoit engendrer en  
l'ame d'un homme, non seulement  
la pensée de se voir priué de la recom-  
pense que la Loy promet a ceux qui  
l'observeront, mais l'apprehension de  
la punition & de la malediction que



elle denonce ? Certes comme c'est chose horrible de tomber entre les mains du Dieu vivant, aussi est-ce chose qui cause en l'esprit vne merueilleuse horreur, de peusset qu'il est ineuitable qu'on n'y tombe.

De cela, mes freres, pouuez-vous aisement cognoistre qu'elle a esté la necessité de l'Enangile, c'est à dire de la promesse de la redemption en nostre Seigneur Iesus, ie ne di pas maintenant si vous opposez l'Enangile à la declaration que Dieu a faite de sa misericorde par la voye de la nature & la condnité de sa providence : mais mesmes si vous l'opposez à la Loy, dont la reuelation a esté celeste, surnaturelle & diuine. C'est que ne se pouuant faire que l'Esprit de foy & de vraye sanctification accompagnaist la Loy, pour corriger la peruersité de l'homme & l'amener à repentance, il luy a fallu proposer vn autre obiect deuant les yeux, auquel cette grace de l'esprit donnaist entree. Et voila pourquoy l'Apostre appelle la Loy, de ce nom de lettre. Car il regarde à ce que Dieu l'auoit à la verité engrauee de

son doigt dedans les deux tables: mais au reste ne l'auoit point imprimée dedans le cœur de l'homme par l'esprit de sanctification, ains auoit tousiours laissé dominer & regner en luy ses conuoitises. Au lieu que par la reuelation de la misericorde, qui toute estoit fondée en la promesse du Redempteur Dieu s'est dès le commencement insinué dedans le cœur de ses esleus; & par l'assurance de la remission des pechez & l'esperance de l'immortalité glorieuse, y a engendré vne paix & vne ioye innarrable, & encommencé vne regeneration digne de la sainteté de l'esprit qui l'operoit, & de l'excellence de la doctrine qu'il a voulu y seruir de semence.

Ne pensés donc pas, freres bien aimés, que ce ce qu'Adam, ce que Seth, ce que Noë, ce que Sem & Abraham, & Isaac, & Iacob, & les autres Patriarches, ont esté fideles & saints, que cela soit venu de l'alliance de la Loy. Le ministère de Moysé n'estoit point encor en vſage. Leur foy qui est si particulièrement recommandée en l'Epistre aux He-

brieux ; leur sainteté qui est propo-  
 sée en exemple a tous les siècles , est  
 venue de la promesse de la redemp-  
 tion comme de sa source, n'a peu estre  
 produite par aucune autre chose. C'a  
 esté elle seule qui a peu se rendre  
 maistresse de l'esprit humain ; &  
 triompher de ses conuoitises. Ne  
 pensez pas que ce que Moyse, & Aa-  
 ron, & Iosué, & les Iuges, & Samuel,  
 & David, & les autres Prophetes, en  
 vn mot tous les gens de bien qui ont  
 vescu sous le Vieil Testament, ont  
 gousté l'esperance de la vie de là  
 haut ; cela soit venu de la predication  
 de la Loy. La conscience du peché,  
 la denonciation de la punition, fer-  
 moit a tous ceux qui estoient seule-  
 ment sous la Loy, la porte a toute  
 esperance de felicité soit és cieux, soit  
 en la terre. Ce qu'ils en ont gousté  
 est venu de la promesse de la redem-  
 ption ; & la promesse de la redemp-  
 tion n'auoit fondement que sur le  
 Messie. Pour les sauuer il a esté ab-  
 solument necessaire qu'ils aient creu :  
 pour les amener à croire il a esté pa-  
 reillemét absolument necessaire que  
 Dieu y mist la main de son Esprit ;

pour y mettre d'un costé ceste main de son Esprit, il estoit encore necessaire de mesmes que de l'autre il leur presentast ses infinies compassions en la promesse du Sauueur du monde. Et voila d'où sont puisez toutes ces admirables raisonnemens de l'Apotre S. Paul & contre la Iustification par les œuvres de la Loy, & pour monstrier que nous n'auons la vraye sanctification que par les promesses de l'Euangile.

Mais ce n'est pas le tout. Bien: diraput-estre icy quelcun. L'Euangile a esté entierement necessaire en ceste façon. La foy ne pouuoit venir de la Loy. Il falloit qu'elle prist sa naissance des promesses de redemption qui sont esparées deçà delà dedans l'ancienne Alliance : & il est clair qu'il estoit impossible que les hommes se passassent de ces promesses. Mais puis que Dieu les auoit données & les auoit meslées a trauers la Loy, & que par leur moyen il a amené ses élus d'entre les Israelites à salut, qu'estoit il besoin qu'il changeast toute la forme de la dispensation dont il s'estoit seruì alors, & nous pre-

sentast l'Euangile d'une tout autre maniere qu'il n'auoit esté offert, annoncé & manifesté aux hommes en Judée? N'eust-il pas peu suiure tousiours vne mesme methode en la conuersion des hommes? Icy, mes Freres, nous opposons, non l'Euangile à la Loy considérée precisement en elle mesme; mais l'Euangile à l'Euangile: c'est à dire, l'Euangile comme il nous est reuelé tout a nu, au mesme Euangile voilé de ceste œconomie en laquelle la Loy resonnoit si haut, & les ceremonies apportoyent vn peu d'ombrage & d'obscurité à la predication Euangelique. Et en ce cas certes l'Euangile n'a pas esté necessaire d'une si précise & absoluë necessité: mais si est-ce que mesmes en cet égard nous pouuons dire qu'encore estoit il necessaire.

Or ne dirons nous pas ce que nous traittions il y a peu de iours, que la gloire de la Iustice de Dieu & de sa misericorde qui a paru es souffrances de nostre Seigneur pour le genre humain, si lumineuse & si éclatante, requeroit qu'elles fussent clairement publiées par toute la terre. Ni que

la gloire de la sainteté de la vie de  
Christ, de la splendeur de ses mira-  
cles, de la divinité de sa doctrine, &  
de la charité incomprehenfible qu'il  
a montrée en sa mort, ne deuoit pas  
demeurer estouffée dedans les om-  
bres de la Loy, mais resplendir aux  
yeux de l'Vniuers selon sa naturelle  
excellence. Je ne feray pas mesmes  
mention des rayons de sa resurre-  
ction d'entre les morts, & de la ma-  
gnificence de son Ascension és Cieux,  
qui ne pouuoient souffrir l'obscurité  
des figures & des ceremonies de l'an-  
cienne Alliance, non plus qu'un bel  
Orient les nuages qui l'environnent,  
mais les ont deu nécessairement es-  
carter & dissiper, pour paroistre com-  
me quand le Soleil reluit en sa force.  
Je diray seulement qu'il estoit neces-  
saire que l'Euangile fust presché tout  
a descouuert, & nostre Seigneur Iesus  
proposé deuant les yeux du monde  
sans aucun ombrage de la Loy, soit  
que vous regardiez la vocation des  
Gentils en corps, soit que vous con-  
sideriez encore la plénitude de la foy  
& de la consolation de ceux que  
Dieu appelle par l'efficace de sa  
grace.

Certes la Loy estoit composée de trois sortes d'ordonnances, politiques, ceremonielles, & morales; & ceste formule, fay ces choses & tu viuras, obligeoit indifferemment à l'observation de toutes. Or ie vous prie mes freres, comment estce que les nations eussent peu estre induites en croyant en Christ, a changer les formes de leurs gouuernemens, & de leurs polices, & reduire leurs republiques au modele de la Iudaïque? Les loix politiques sont elles pas, par la sapience de Dieu qui preside sur la societé humaine, accommo-  
dées au naturel de chacune nation & de chacun pays? Et toutes les nations ont-elles vn mesme genie que la posterité d'Abraham, tous les pays du monde sont-ils d'vne mesme constitution que la Iudee? Et comme ainsi soit que la vocation des Chrestiens deust estre, comme dit l'Apostre, de peu de sages, de peu nobles, de peu de riches. & de peu de puissans selon le siecle, & que le gouuernement des republiques soit entre les mains des nobles, des sages, des riches & des puissans, quel de-

fordre eust mis la predication de l'E-  
uangile entre les nations , quels ru-  
mutes , quelles seditions , quelles  
tempestes ? Si l'Euangile de nostre  
Seigneur pour doucement qu'il ait  
esté presché , pour grande qu'ait  
esté la deference qu'il a voulu qu'on  
ait renduë aux puissances superieu-  
res , pour expressement qu'il ait en-  
joint qu'on se soubsmist a tout or-  
dre humain selon les formes de cha-  
cune republique , a tant souffert de  
contradiction , qu'eustce-esté s'il se  
fust mis a remuër les gouvernemens  
des peuples , & a sapper l'authori-  
té des Rois & des Monarques de la  
terre.

Pour les ordonnances ceremo-  
nielles , c'estoit chose absolument  
impossible que les nations les obser-  
vassent & se rangeassent avec la  
nation Iudaique a mesmes seruices.  
Ni les riuieres & les montagnes &  
les mers , ne permettoient pas que  
tant de nations se peussent trouuer  
aux Festes solennelles en Ierusalem ;  
ny la Iudée n'eust pas peu fournir de  
bestail pour les victimes ; ny , ie ne  
diray pas le Temple , ie ne diray pas



la ville de Ierusalem , mais le pays tout entier n'eust pas esté capable de contenir les peuples qui y eussent accouru de toutes parts, s'il eust fallu qu'eust esté accomplie à la lettre ceste parole du Prophete Esaie au chapitre deuxieme ; *Il aduiendra és derniers iours que la maison de la Montagne de l'Eternel , sera affermie au sommet des montagnes , & sera eslenée par-dessus les costaux, & toutes nations y aborderont. Et plusieurs peuples iront & diront , venez & montons à la montagne de l'Eternel , à la maison du Dieu de Iacob.*

Quant à la Loy morale qui est comprise ez deux tables de l'alliance, elle contient bien à la verité des choses auxquelles les hommes sont tenus naturellement , & que toute nation peut , si elle n'estoit point en l'estat de peché , & doit rendre & à Dieu & à ses prochains en quelque plage du monde qu'elle puisse estre. Mais la publication en eust esté directement opposée à la fin de l'Evangile. Car qu'estce l'Evangile sinon vne bonne nouuelle, vne annoncia-tion de paix, vn message de ioye &

de contentement inenarrable ? Et comment eust peu compatir avec cette paix & cette ioye à laquelle l'Euangile deuoit appeller les nations, cette rigoureuse formule, *Fay ces choses* ; & cette autre espouventable denonciation, *Maudit est quiconque ne les fait* : qui estoit pour engendrer dans les esprits des hommes plus de trouble, plus d'agitation, plus de tremblement, plus de tourbillons & de tempestes, plus de voix d'espouuamment, & par maniere de parler, de cris d'alarme, qu'il ne s'en entendit autresfois quand on la publioit dessus la montagne ? C'est pourquoy l'Apostre remarque si expressement que nous ne sommes point venus à

*Heb. 12* *une montagne qui se puisse toucher à la*  
*18.* *main, ni au feu brulant, ni au tourbil-*  
*lon, ni à l'obscurité & tempeste, ni à la*  
*voix des paroles : laquelle ceux qui l'oy-*  
*oient requirent que la parole ne leur*  
*fust plus longuement adressée : car ils*  
*ne pouuoient porter ce qui estoit enioint ;*  
*à sçauoir, si mesmes une beste attonche*  
*la montagne, elle sera lapidee ou percee*  
*d'un dard. Et Moïse (tant estoit terri-*  
*ble ce qui apparoiſſoit) dit, Je suis espou-*

uante & en tremble tout. Ains nous sommes venus à la montagne de Sion, & à la cité du Dieu vivant, à la Ierusalem celeste, aux milliers d'AnGES: & à l'assemblée & Eglise des premiers nez qui sont escripts es cieux; & à Dieu qui est iuge de tous, & aux esprits des iustes sanctifiez: & à Iesus Mediateur de la Nouvelle Alliance, & au sang de l'aspersion prononçant choses meilleurs que celuy d'Abel. Partant, mes freres, pour appeller les Gentils à la cognoissance de Dieu, il estoit entierement necessaire que l'Euangile leur fust proposé tout à descouvert, déueloppé & deschargé des choses qui appartoient au ministere de Moyse.

Pour ce qui regarde la plenitude de la foy & de la consolation de ceux que Dieu deuoit appeller d'entre les nations. Je vous prie, mes freres, de considerer icy l'excellente remarque que fait nostre Apostre en ce chapitre. Nous ne sommes point, dit-il, comme Moÿse qui mettoit un voile sur sa face, à ce que les enfans d'Israel ne regardassent à la fin de ce qui deuoit estre aboli. Vous sçavez d'hystoire. Moÿse descendant de la montagne, de ceste

si estroite communication avec Dieu, auoit la face si resplendissante que le peuple ne la peut supporter : à cause dequoy Dieu luy cōmanda de mettre vn voile dessus, à ce que ces rayons n'esbloüissent pas les yeux du peuple. Mais si la lettre de ceste histoire est aisée, le mystere en est profond pourtant. La resplendeur de la face de Moyse estoit le type de la claire manifestation de l'Euangile; c'est à dire de ceste excellente lumiere de verité que Iesus-Christ nostre vray Moyse, nous deuoir apporter des cieus, de cet intime & familier cōmerce avec Dieu, qui luy fait dire

*Jeun. 1. qu'il est au sein du Père; & que nul*  
*18. & 3. n'est monté au Ciel sinon celuy qui est*  
*33. descendu du ciel; à sçauoir le Fils de l'homme qui est au ciel. Le voile est*  
 l'image de la Loy qui a couuert la splendeur de cet Euangile, tandis qu'elle a subsisté, & a empesché que les rayons n'en esclataffent si vifs & si brillans, comme ils eussent fait s'ils n'en eussent point esté couuerts. La foiblesse des yeux du corps du peuple d'Israel qui ne pouuoit soustenir ceste splendeur, estoit l'image de la foi-

blessé des yeux de l'esprit, qui ne pouuoit alors soustenir l'esclat d'une claire manifestation de l'Euangile. Je di la foiblesse de l'esprit, non en égard à la constitution naturelle des facultez de l'homme: car en cet égard ce n'est pas foiblesse, c'est auement. Je di foiblesse, en égard à ce que Dieu ne donnoit pas alors de son Esprit pour l'ordinaire en si grande mesure comme il a fait depuis l'apparition de Christ, pour pouoir contempler attentiuement la lumiere de ceste doctrine qu'il nous a manifestée. Car de fait, si nostre Seigneur a dit à ses Disciples autresfois, i'ay beaucoup de choses à vous dire, mais vous ne les pouuez encore porter, que pouoir ce estre des disciples de Moïse? Comme donc s'il y auoit quelcun parmi le peuple d'Israel qui eust la venë du corps sombre & hebetée, depuis que Moïse eut couuert sa face, cestuy-la ne voyoit plus que son voile, & n'apperceuoit du tout rien des rayons de son visage: Ainsi s'il y auoit quelcun à qui Dieu eust seulement donné ce que l'Apostre appelle l'esprit de seruitude pre-

Iean 16.

12.

eusement, il ne voyoit rien en Moyse  
sinon le ministère de la Loy, & ne ti-  
roit point de consolation de la cog-  
noissance des promesses de l'Euangi-  
le qui y sont meslées. Mais comme  
s'il y en auoit quelques vns qui euf-  
sent les yeux du corps vn peu per-  
çans, ils apperceuoient quelque cho-  
se de la splendeur de la face de Moyse  
au trauers de son voile: aussi s'il y en  
a eu qui eussent les yeux de l'esprit  
dauantage illuminez de l'Esprit de  
Dieu, comme certes il y en a eu qui  
appartenoyent a l'election de Dieu,  
au trauers du ministère de Moyse &  
de l'Alliance de la Loy ils ont apper-  
ceu les promesses de grace & de mi-  
sericorde que Dieu y presentoit es  
oracles de son Vnique. Mais quoy  
que c'en soit, ne plus ne moins que  
pour bons & perçans que les Israeli-  
tes eussent les yeux du corps, si ne  
voyoyent ils ceste splendeur du visa-  
ge de Moyse qu'obscurement a cause  
du voile: ainsi pour illuminez que  
fussent alors les entendemens des Is-  
raelites selon la condition du temps  
d'alors, si ne voyoyent ils la Religion  
Chrestienne es promesses du Re-

dempteur , qu'un peu sombre & comme offusquée de la dispensation Legale.

Et de vray , mes frères, ie vous prie , mettez vous un peu à lire les livres de Moïse , notamment ceux ou l'Alliance Legale est establie , l'Exode , le Leuitique , les Nombres & le Deuteronomie; & y considerez attentivement d'un costé les choses qui appartiennēt à l'alliance de la Loy, & de l'autre celles qui regardent l'alliance de la Grace & les promesses du Messie. Vous verrez que les choses qui y concernent le Messie, les oracles , dis-je, qui le promettent , & les declarations que Dieu y fait de sa misericorde, sont premierement en plus petit nombre que les autres , puis apres qu'elles y sont couuertes & ombragees de tant de constitutions, de tant d'observations , de tant de ceremonies, de tant d'ombres, de tant de nuages , de tant de promesses des choses temporelles , de tant de menaces de maledictions de toute nature , de tant de choses en somme, qui n'appartiennent nullement à l'Evangile de Christ tel que les Apo-

ſtres le nous ont enſeigné; que ce ſont  
comme belles eſtoiles à la verité,  
mais entees en vn ciel de nature dif-  
ferente; belles pierreries & brillan-  
tes, mais enchaffées deçà de là en  
vne tapifferie merueilleuſement bi-  
garree & vn peu obſcure tout enſem-  
ble. De façon qu'il a fallu que Dieu  
ait donné à ſes eſleus vne grace par-  
ticuliere pour les bien appercevoir,  
& tirer de leur lumière la conſola-  
tion qui leur eſtoit neceſſaire contre  
cette obſcurité de la Loy & les fra-  
yeurs que ſa predication pouuoit  
engendrer en leurs ames. Mais auſſi  
certes n'y a t'il eu aucun de ceux  
qu'il auoit donnez à ſon Fils en ſon  
eternelle predeſtination, qui apres  
les diuerſes peines que luy pouuoit  
donner tout ce grand embarras de la  
Loy, n'ait trouué vn paiſible repos és  
promeſſes du Redempteur; apres les  
diuerſes alarmes que luy auoit don-  
nees ſa conſcience excitée par ces de-  
nonciations, ne trouuaſt le neceſſai-  
re ſoulas en la miſericorde que l'E-  
ternel y auoit manifeſtée. Voyons  
donc maintenant qu'elle pourroit  
eſtre noſtre foy, noſtre conſolation,



& nostre sanctification si l'Evangile eust esté presché de la même maniere.

Premierement l'Evangile nous apprend que nous sommes iustifiez par la seule foy en nostre Seigneur Iesus, & par la remission de nos pechez en Christ. Je vous prie quel empeschement pourroit donner à ce que nous ne le nous persuadassions ainsi, cette repetition si frequente de ces mots, *Fay ces choses?* Ces protestations si expressees que Moysé fait au peuple d'Israel, qu'il met deuant luy le bien & le mal, la vie & la mort, selon qu'ils observeront exactement ou manqueront en vn poinct seulement a observer ses commandemens & ses ordonnances? L'Evangile nonobstant perceroit pour le certain par l'assistance de l'efficace de l'Esprit dans le cœur des esleus de Dieu, comme il faisoit autresfois, mais ce ne seroit pas sans auoir de la luite avec les pensées que la Loy engendre. Et de fait, n'a ce pas esté la matiere du scandale des Iuifs, & l'opinion que l'Apôstre S. Paul a tant essayé d'arracher de leurs esprits, par ces diuines dis-

putes de la Iustification que nous  
 auons en l'Epiſtre aux Romains, aux  
 Ephesiens & aux Galates? Et n'est-ce  
 pas encore ce qui maintenant perd  
 ceux de l'Eglise Romaine, qu'au lieu  
 de s'arreſter à la doctrine de l'Euan-  
 gile, comme nous l'auons au Nou-  
 uveau Testament, ils vont quand il eſt  
 queſtion de la doctrine de la Iuſti-  
 fication ramaffer deçà delà dans l'An-  
 cien, toutes les promeſſes que Dieu  
 fait à l'oſeruacion de ſes commande-  
 mens, & reſſuſcirent ceſte formule,  
*Fay ces choſes & tu viuras*, que l'Euan-  
 gile auoit enſeuelie? Puis des liures  
 de la Loy ils paſſent dedans les Pro-  
 phetes, & là recueillent toutes les  
 manieres de parler nées de ceſte diſ-  
 penſation Legale, qui conuenoyent  
 à ces temps là, mais ſont tout à fait  
 hors de ſaiſon en la predication  
 Euangelique, pour en argumenter  
 contre nous, c'eſt à dire contre la do-  
 ctrine du S. Apoſtre? Je di, mes Fre-  
 res, que c'eſt comme vne eſpece de  
 miracle qu'un homme nourri en la  
 doctrine de la Loy, puiſſe gouſter la  
 doctrine de la Iuſtification par la ſeu-  
 le foy; & en voyons tous les iours à  
 noſtre

nostre grand regret les experiences  
 en ceux de la communion Romaine,  
 a qui Dieu a donné quelque goust de  
 la verité de nostre profession : qui ne  
 se peuuent, qu'aucc vne difficulté in-  
 croyable, défaire de l'empeschement  
 que donne a leur esprit la predica-  
 tion du ministere de Moysé qui est  
 remise sus parmy eux, & le perpetuel  
 conflict qui est entr'elle, & les paro-  
 les, disputes & raisonnemens de l'A-  
 postre S. Paul en l'Euangile. Ce n'est  
 pas, mes freres, que cela doie estre  
 proprement imputé à la Loy. Au con-  
 traire, elle auoit esté expressement  
 donnée pour faire cognoistre aux  
 hommes la corruption de leur natu-  
 re & la neantise de leur iustice, pour  
 les faire recourir à ceste iustice eter-  
 nelle que le Sainct des Saincts deuoit  
 amener en auant, comme dit Da-  
 niel au chap. 9. Et ce deuroit estre là  
 le seul vsage que nous tirassions en  
 cet égard de la lecture & predication  
 legale. Mais c'est que l'homme est  
 naturellement hypocrite & glori-  
 eux, & que ce qui luy est présenté  
 pour luy estre matiere de consterna-  
 tion & d'humilité, il le tourne, si Dieu

par son Esprit ne remédie a ceste peruerse inclination naturelle , en occasion de presumption & de superbe.

Quant à la consolation , comme elle naist de la doctrine de la Iustification par la foy, selon ce que l'Apostre dit , *Qu'estans iustifiez par foy, nous auons paix enuers Dieu par nostre Seigneur Iesus* , Rom. 5. Aussi est elle merueilleusement alterée & inquiétée par le meslange de la doctrine de la Iustification par les œuvres. Car ou la Loy dit, *Fay ces choses* ; qui se peut asseurer de les auoir faites ? Et ou elle dit, *Maudit est quiconque n'est permanent en toutes les choses de ceste Loy* , qui se peut vanter d'estre deliuré de ceste malediction ? Et ou ces choses resonnent perpetuellement aux oreilles du corps & de l'esprit, combien est troublée la tranquillité que la mort de nostre Seigneur Iesus doit engendrer és ames des hommes ? Certes le Prophete Dauid le nous a assez appris par son exemple. Il viuoit en vn temps auquel les promesses du Messie estoient encore beaucoup plus claires qu'au siecle de Moïse. Il auoit receu de Dieu des graces

rare & ausquelles il y en auoit peu de comparables. Et neant-moins pource qu'il viuoit sous l'œconomie de la Loy, qui insiste perpetuellement sur les commandemens & les defenses, sur les promesses & les menaces en suite de l'obeissance ou de la transgression, il entre quelques fois par le sentiment de ses offenses en des destresses extremes, & au Pseaume 32. il dit qu'elles luy ont donné des inquietudes comme inimaginables. Puis ne trouuant point de repos qu'en l'assurance de la remission, il s'escrie, comme nous auons tantost dit, avec admiration; *O que bien-heureux est celuy duquel les pechez sont couverts ! O que bien heureux est celuy duquel les transgressions sont remises !* Paroles dont l'Apostre S. Paul tire au chap. quatrieme de l'Epistre aux Romains, vn argument inuincible contre la doctrine de la iustification par les œuvres. Et c'est ce qui fait dire en quelque lieu à ce grand auteur que nous auons nommé au commencement, qu'encore qu'il soit arriué sous la dispensation legale que quelques particuliers ayent eu

vne plus grande foy que pour la plus part nous ne l'auons, tels qu'ont esté Moyse & Daud, si ne faut-il pas laisser de considerer que l'Esprit de seruitude qui tient les hommes en crainte, estoit de son ministere. Si, dit-il, la Loy est consideree en soy elle ne peut, sinon, en tenant desia les hommes sous vne miserable seruitude, les enfermer encore de l'horreur de la mort, d'autant qu'elle ne leur promet aucun bien que sous condition *de faire*, & d'autre part denonce la mort à tous transgresseurs. Parquoy, comme dessous la Loy estoit l'esprit de seruitude lequel pressoit de crainte la conscience : ainsi sous l'Euangile est l'esprit d'adoption qui resiouit nos ames par le tesmoignage de nostre salut. Mais pource que telle estoit la dispensation de Dieu alors, s'il permettoit que ses enfans fussent quelques fois grieuement affligez en leurs consciences par la crainte de la punition de leurs offences; il venoit pourtant à leur secours, & leur donnoit selon la mesure de la condition des temps, l'esprit de consolation qu'il espan-

doit comme vn doux baume és playes de leurs ames. Maintenant que ceste dispensation est abolie par son ordonnance, ceux qui la remettent sus, s'enferrent eux mesmes en de mortelles frayeurs, & pour punition d'auoir si indignement corrompu son Euan-gile, Dieu les priue de cet Esprit de consolation qu'il faisoit sentir aux autres. De-la viennent ces frayeurs, ces destresses, ces angoisses, ces tremblemens continuels, ces cruelles defiances qu'ont ceux qui doutent s'ils seront sauuez ou s'ils ne le seront pas, s'ils sont en estat de grace ou bien s'ils n'y sont pas, s'ils doiuent prendre la hardiesse de leuer les yeux vers les cieux, ou s'ils se doiuent resoudre, si resoudre on se pouuoit, à la souffrance des peines eternelles. Cela vient, di-je, de ce qu'on leur corne perpetuellement aux oreilles le ministère de la Loy; qu'on leur denonce la malediction de Dieu sur ceux qui manquent à la faire: qu'on leur propose le Royaume des cieux pour guerdon de leurs bonnes œuvres & de leur saincteté, & qu'on leur retranche l'esperance d'y paruenir au-

trement que sur les eschelles de leurs merites.

Il en est de mesmes pour le regard de la vraye sanctification. L'Evangile nous apprend que Dieu nous a donné la vie en nostre Seigneur Iesus, a celle fin de nous rendre saints, & que nous sommes sauvez afin de faire de bonnes œuvres. La Loy au contraire nous commande afin d'auoir la vie d'estre saints, & de nous proposer le salut pour prix de nos bonnes œuvres. Ainsi en l'Evangile nous auons la vie en la mort de Christ, pourueu que nous croyions, auant qu'estre saints; en la loy il nous faut estre saints & obseruer les commandemens auant qu'auoir la vie. En l'Evangile donc c'est Dieu qui nous donne la sainteté par la communion que nous auons avec son Fils en qui nous croyons; en la Loy nous la deuons auoir de nous mesmes. En l'Evangile nous sommes saints par gratitude enuers Dieu de ce qu'il nous a sauuez, & ainsi c'est l'amour de Dieu qui domine en nous: là ou ceux qui sont sous la Loy n'essayans a estre saints que



pour estre sauuez, sont sans doute beaucoup moins possédez de l'amour de Dieu que d'eux mesmes. En l'Euangile nous sommes saincts pource que nous sommes enfans qui de uons représenter l'image de nostre pere celeste: en la Loy s'il n'y a qu'elle qui nous gouerne, nous n'essayôs a estre saincts que par l'esperance de la recompence ou la crainte de la peine : qui sont proprement les mouuemens des mercenaires & des esclaués.

Qu'est-il donc arriué, mes freres, aux esleus de Dieu sous la dispensation legale, en laquelle ces alliances estoient, ce sembloit, si meslées ensemble ? Certes ils y ont aperceû nostre Seigneur Iesus: c'est à luy seul que leur election les appelloit. Mais voulez-vous que ie vous die comment ? Non seulement obscurément, pource que les promesses n'approchent iamais de la clarté de la reuelation de la chose mesme: mais encore au trauers de la Loy qui donnoit à la doctrine de l'Euangile alors quelque peu de chose de sa teinture. Comme si vous voyiez vn homme en

vn lieu obscur & au trauers d'vn verre peint; vous apperceuriez bien la conformation de ses membres iusques à dire, c'est vni homme : mais neantmoins vous ne remarqueriez pas distinctement ses lineamens, & encore le verriez vous en des couleurs vn peu estranges que le verre luy communique contre sa nature. Ainsi ont-ils veu la redemption par Christ, & l'ont recognuë suffisamment pour leur salut : mais ç'a esté imparfaitement au prix de l'excellence de nostre cognoissance. Ils ont veu la iustice qui est par la foy, mais ce n'a pas esté sans auoir souuent aluiter contre la pensée de la Iustification par les œuvres. Ils ont veu la consolation par l'assurance de la remission : mais ce n'a pas esté sans sentir souuent de merueilleuses alarmes en leurs consciences. Ils ont veu la vraye sanctification & en ont esté faits participans : mais ce n'a pas esté sans y meller quelque chose de ceste crainte seruile qui est si esloignée de la doctrine de la foy. En vn mot ils ont veu la Religion Chrestienne à la verité & ont esté sauuez par elle; mais

ils l'ont veüe de loïn ; & encore tellement habillée à la Iudaïque, que qui la nous presenteroit ainſi deuant les yeux, la nous feroit meſcognoiſtre, accouſtumez que nous ſommes à la voir ſans aucun déguiſement, & en ſa couleur & ſtature naturelle. Que ſ'il y en a eu quelques vns a qui Dieu ait donné des lumières extraordinaires & des cognoiſſances qui approchaſſent de celles que nous auons maintenant ſoubs le Nouveau Teſtament ; cela ſ'eſt fait par enthouſiaſmes & rauiffemens particuliers, & non pas ſelon la voye commune & ordinaire que Dieu ſuiuoit alors pour amener ſes eſteus à ſa cognoiſſance ſalutaire.

Qui doutera donc, mes freres, apres cela que la claire predication de l'Euangile ne fuſt abſolument neceſſaire, pour nous oſter vne fois tout net toute imagination que noſtre ſalut dependiſt de nous, & ne nous laiſſer plus à combattre contre la bonne opinion de nous meſmes. Pour engendrer en nos conſciences vn profond repos, & ne permettre pas qu'il ſoit troublé d'aucune fra-

yeur de malediction ni de vengeance ? Pour produire en nous l'amour de la vraye sanctification par l'admiration des compassions de Dieu en nostre salut, & nous deliurer pleinement de toutes pensées seruiles & mercenaires ? En vn mot pour nous faire sentir avec vne ioye inenarrable & glorieuse l'Esprit d'adoption qui nous fait crier Abba Pere, & qui rend tesmoignage à nostre esprit que nous sommes enfans de Dieu, & nous oster tout ce qu'il y pouuoit auoir antres-fois meslé és fideles de cet esprit de seruitude qui nous eust tenus perpetuellement en crainte ? Et pleust à Dieu que nos aduersaires de l'Eglise Romaine peussent bien comprendre quelle difference il y a entre le Vieil & le Nouveau Testament ; qu'elle a esté la necessité de l'abrogation de la Loy, & de la publication nuë & descouuerte de l'Euangile. Mais il leur en arriue en la lecture du Vieil Testament, comme il est arriué à plusieurs en la lecture du vingt-quatriesme chapitre de S. Matthieu. Là nostre Seigneur Iesus respond à deux questions merueil-

leusement differentes : de la destruction de la ville de Ierusalem & de son second aduenement pour le iugement du monde. Et pource que le temps auquel il respondoit le requeroit ainsi , il mesle ses deux responses ensemble; ses disciples n'estans pas encore en estat d'en tirer de l'edification s'il les eust clairement distinguees. Au lieu donc d'interpreter les responses par la consideration de la matiere mesme & de la chose dont il s'agit, & attribuer à chacune question les responses qui luy conuiennent , ils les ont brouillees & peslemeslees & en ont peruersti toute l'intelligence. Ainsi ne considerans pas que Dieu en la dispensation legale mesle ensemble deux choses extrêmement diuerses , l'Euangile & la Loy, pource que le temps & cet aage de l'Eglise le demandoit ainsi; au lieu de mettre a part dedans le Vieil Testament ce qui regarde la Loy, & en tirer pour l'instruction de l'Eglise Chrestienne ce qui est purement Euangelique, comme sont les oracles du Messie, les promesses de misericorde, les beaux exemples de foy, les

ne. En sa vie, vn exemple incomparable de sainteté, sur lequel nous ayons à former la nostre avec toute sorte de soin & de diligence. En sa predication vne source inespuisable de sapience, vne lumiere celeste, vne doctrine diuine qui esclaire nos entendemens en la cognoissance des choses appartenantes à l'immortalité glorieuse. En ses miracles vne preuue indubitable de sa diuinité, vn symbole de la puissance qu'il deploye en la guerison de nos esprits, en la restauration, en la resurrection de toutes nos facultez à son seruice: vne arde finale de cette excellente grandeur de vertu & de puissance par laquelle il ressuscitera nos corps en sa iournee bien-heureuse. En sa mort, vn bouclier impenetrable aux traits des frayeurs & des espouuantemens de la nostre: la satisfaction pour nos pechez, le payement de nos debtes, le sacrifice inestimable qui a fait la propitiation de toutes les souilleures de nos consciences. En sa croix le triomphe de nos craintes & de nos passions tout ensemble. Là voyons nous lacere l'o-

bligation qui nous estoit contraire. Là voyons-nous attachees les conuoitises de la chair. Là contemplons-nous la malediction tournee en benediction : là le vieil homme crucifié qui nous donnoit autres-fois tant de peines. En sa resurrection nous voyons portraites les victoires qu'il a remportees de Satan & de la mort : les pieces de leur empire brisees & fracassees : & qui des yeux de la foy le contemple sortant du tombeau, y voit escrite en caracteres plus lumineux que les rayons du Soleil mesme, la declaration authentique que Dieu y fait que son ire est appaisée, que desormais il iustificra tous les croyans, qu'il n'y a plus rien qui mette empeschement à ses misericordes. En son ascension és cieux nous voyons le glorieux triomphe non seulement des ennemis de nostre salut, qu'il y tient enchainez sous des liens de fer qu'ils ne scauroyent briser ; mais des cœurs de ses esleus encore qu'il emporte avec soy attachez par la cognoissance & admiration de ses infinies compassions, & par l'Esprit de sanctification qui tient en vne ioye

inénarrable toutes leurs affections prisonnières. En son intercession là haut nous voyons les appuis inébranlables de la perseuerance de nostre foy, les sources de cette force inuincible que l'Esprit infinie en ses racines, qui fait qu'elle les enfonce si auant, qu'elle y deuient si forte & si vigoureuse, qu'elle ne craint ni les tentations de Satan, ni les allechemens du monde, ni la legéreté de nostre propre volonté, dont la puissance de la grace a fixé la naturelle inconstance. Et finalement en la gloire qu'il possède és cieux à la dextre de son Pere, nous voyons en partie le modele de nostre future glorification; car nous sommes predestinez à estre rendus conformes à son corps glorieux; en partie l'assurance de nostre protection contre tous nos ennemis, en cette infinie puissance que Dieu luy a donnée és cieux & en la terre. En vn mot nous voyons celuy par lequel nous auons accez au Pere, qui nous donne la hardiesse d'approcher du thosne de grace avec assurance, qui nous est vn pleige immortel d'estre secourus en temps op-



portun, par qui nous adressons nos prieres à Dieu, qui les luy presente luy mesme & les recommande, & qui ayant vestu nostre nature sçait compatir à nos infirmités, & enuoyer des cieus en nos cœurs son Esprit de force & de consolation qui les rende insurmontables à toutes tentations, & nostre ioye perennelle. Sans luy la conscience du peché, les frayeurs continuelles de la mort, les denonciations de l'ire de Dieu, les malédictions de la Loy, tendroyent nos nos ames en des frayeurs irremediables, les engloutiroient en vne tristesse selon le monde, les precipiteroyent en vn desespoir inconsolable. Sans luy nostre peché regneroit absolument en nous, le Diable y auroit encore cet empire qu'il y auoit autres-fois & domineroit avec vne efficace merueilleuse en nos conuoitises. Christ est celuy qui nous a deliuré de tout cela: Christ est celuy dont la cognoissance nous assure de cette deliurance. Christ est l'eschelle par laquelle nos cœurs montent dès maintenant dedans les cieus, & les Saincts Anges descendent des cieus.

pour la defense des esleus de Dieu en la terre. Christ est en sommel l'image de Dieu en laquelle nous osons contempler celuy duquel on disoit autres-fois, nous mourrons car nous auons veu l'Eternel. C'est en luy que s'est reuelé celuy dont l'essence est incomprehensible à nos esprits, & de la face courroucée de qui sortent des flammes & des esclairs insupportables à la creature pecheresse.

Or voyez-vous, mes Freres, comme nous auons tasché a vous représenter bien particulièrement la necessité de l'Euangile de nostre Seigneur Iesus, soit que vous faciez comparaison de l'Eglise Chrestienne avec les nations Payennes destituées de la cognoissance du Redempteur; soit que vous en faciez comparaison avec l'Eglise Iudaïque sous l'œconomie de la Loy. C'est dont a vous desormais a le retenir en sa pureté, & vous donner bien garde d'y rien mesler ni des idolatries & superstitions des Gentils, ni des ceremonies & doctrines des Iuifs mesmes; sinon certes entant que les doctrines des Iuifs se trouueront estre en l'ancien Testament les

doctrines de l'Euangile. Moyse n'est pas vostre mediateur : c'est Iesus-Christ. L'alliance de la Loy n'est pas celle par laquelle vous auez à estre saueez , c'est celle de la grace. Tout ce que vouspouuez tirer de Moyse si vous le considerez comme Prophete, c'est qu'il a predict le Christ. Mais Christ s'est representé soy mesme au monde. Les oracles des predictions seruent desormais a iustifier la verité de la manifestation du Redempteur, par la conformité admirable que nous y trouuons avec elle. Tout ce que vous en pouuez tirer encore si vous le considerez comme entremetteur du Traitté de la Loy, c'est qu'il a esté figure de Christ. Mais Christ en se representant soy-mesme a chassé les figures & les ombres. Elles seruent à ceste heure à nous faire admirer la sapience de celuy qui auoit ainsi pourtrait les choses si long temps deuant qu'elles arriuaissent. Tout ce que vous pouuez recueillir de l'Alliance de la Loy & du ministration de Moyse considéré en soy-mesme, est la cognoissance de ceste misere naturelle & de ceste male-

dition à laquelle vous estes assubiet-  
tis, pour estre si fort eslongnez de la  
saincteté que les commandemens des  
deux tables exigent de vous ; mais  
c'est afin de vous faire recourir à ce-  
luy en qui vous auez salut & deli-  
urance. Aussi estoit-ce là certes la fin  
de son institution autresfois. Si elle a  
engendré quelques autres pensées en  
l'esprit des hommes, si elle y en en-  
gendre maintenant, comme vous  
voyez que ceux de l'Eglise Romaine  
y cherchent les preuues de leur do-  
ctrine de la Iustification par leurs œu-  
res, cela est venu du vice de l'esprit  
humain naturellement enclin a se  
flatter soy-mesme. Qui trouue ses  
vices tousiours petis, & ses preten-  
duës vertus il les qualifie de merite.  
Qui diminue tousiours tant qu'il  
peut l'horreur de ses pechez, & enfle  
ses actions qui ont la moindre appa-  
rence d'honnesteté, d'éloges & de  
louanges. Qui n'ayant rien de quoy  
se couvrir contre le iugement de  
Dieu, ose se promettre des recom-  
penses de sa iustice.

Cependant, mes freres, & de la  
foy de Moÿse, & de la foy de eua-

saincts Personnages qui ont embras-  
sé la misericorde de Dieu desployée  
au Christ à venir, puisez & des ex-  
hortations puissantes, & des exem-  
ples efficaces, & des consolations  
vives pour estre esleuez en mesme  
esperance. Voire d'autant plus que  
vostre condition est sans comparai-  
son plus avantageuse. Ils ont creu en  
Christ. Mais c'estoit en Christ à ve-  
nir. Quelle consolation vous est-ce  
de le voir reellement descendu des  
cieux, incarné parmi vous, & pre-  
senté si clairement au monde ? Ils  
l'ont apperceu : mais ç'a esté de loin  
& obscurément. Quelle consolation  
vous est-ce de le voir pourrait de-  
vant vos yeux par la predication de  
l'Euangile ? De voir tous les tenans  
& les aboutissans de la doctrine de  
salut, la lumiere & la proportion ad-  
mirable de la Religion Chrestienne ?  
Ils l'ont recognu ; mais ç'a esté au  
trauers de la Loy, en vn habillement  
estrange, en des couleurs peregrines  
& esloignées de sa nature. A vous il  
est monstré tout à nu ; vous le pou-  
uez voir en son naturel, sans estran-  
gété, sans meslange ni bigarrure.

quelconque. Ils ont veu les rayons de sa splendeur: mais ç'a esté autant qu'il en pouuoit passer au trauers d'un voile. A vous il est donné de contempler la gloire de sa face pour estre transformez en la mesme image de gloire en gloire comme par la vertu de son Esprit. Le Iuif a eu un incomparable auantage sur le Gentil autresfois: le vostre sur la nation Iudaïque n'est pas si grand, mais neantmoins il est fort considerable. Si donc ce peuple a eu subiet de rendre graces a Dieu de ce qu'il auoit fait blanchir la premiere aube de ce beau Soleil sur ses montagnes, pour le conduire au milieu des espais es tenebres du monde, au lieu qu'il auoit laissé les autres nations en leur ignorance naturelle, & si ceste nation luy en a rendu les recognoissances par sacrifices d'actions de graces en son Tabernacle: ne luy offrons pas quant à nous des gasteaux & des taureaux, ne nous amusons pas a respendre du sang dedans son Temple, mais rendons luy les boueaux de nos leures & la gratitude de nos cœurs, pource qu'au lieu de ce peu de lumiere qui:

resplendissoit dans le ciel de la Judée, il a fait leuer sur nous l'Orient que ceste nation attendoit, & amené le Soleil de Iustice sur nos testes. C'est toute la recompense que requiert de nous celuy a qui est den toute gloire, force & empire és siecles des siecles. A M E N.





# SERMON V.

ROM. chap. XI. v. 33.

*O profondeur des richesses, & de la  
sapience & de la cognoissance de  
Dieu! que ses iugemens sont in-  
comprehensibles, & ses voyes im-  
possibles à trouuer!*

**S**I nous auons iusques à  
ceste heure, mes freres,  
celebré le plus hautement  
qu'il nous a esté possible,  
la grande misericorde de Dieu enuers  
les humains; celle, di-je, qu'il a tes-  
moignée aux nations en sa patience  
& en sa longue attente, c'est à dire  
par la voye de la nature & de la pro-  
vidence: & celle qu'il a monstrée par  
priuilege special aux Iuifs, par la re-  
uelation extraordinaire & surnatu-  
relle de sa Parole; ne pensez pas que  
ç'ait esté pour rien diminuer de l'em-



pire que Dieu a dessus ses creatures, tant à cause de la dignité infinie de sa nature, comme à cause de ce que par leur creation il leur a donné leur estre. Encore moins à c'esté pour rien rabbatre de la liberté qu'il a de disposer de ses creatures à son bon plaisir, soit pour les appeller efficacement à la communion de sa grace, soit pour les laisser gisantes en leur condamnation, sans leur tendre ceste main qui seule conuertit les hommes: soit mesmes pour s'en seruir à l'illustration de la gloire de ses vertus, selon qu'il le iuge expedient en sa sapience incomprehensible. C'est sa bonté infinie qui l'a induit à créer l'yniuers, & il n'y peut auoir eu d'autre cause de sa creation. Mais neant-moins il a esté tellement en sa puissance de la créer ou de ne le créer pas, que l'vsage de cette sienne bonté luy a esté entierement & absolument libre. Il s'est monstté infiniment misericordieux en enuoyant son Fils au monde pour la redemption du genre humain pourueu qu'il le reçoie; Mais neantmoins il a esté entièrement en sa disposition de l'enuoyer ou de

ou de ne l'enuoyer pas. Il a monsté son inclination à la pitié enuers les pecheurs repentans à toutes nations. Et toutes-fois ç'a esté de son bon plaisir qu'aux vns il ne l'a fait voir que fort obscurément, & encore par la voye naturelle de la conduire de sa prouidence, aux autres il l'a voulu faire paroistre par vne reuelation plus claire, & par vne voye extraordinaire & surnaturelle. Enfin il a voulu accompagner la predication de sa misericorde reuelée en son Fils de l'efficace inuincible de sa grace en quelques vns, & neantmoins ç'a esté de la liberté de sa volonté qu'a dependu qu'il ne l'a pas fait sentir aux autres. Que si de ces choses vous nous demandez les raisons, que vous pourrions nous respondre sinon, *O profondeur des richesses & de la sapience de Dieu ! que ses iugemens sont incomprehensibles, & ses voyes impossibles à trouuer ?* C'est ce qui nous a fait choisir ce texte, mes freres, pour vous parler plus au long de ceste liberté de Dieu : non en examinant chacune de ses paroles à part ; beaucoup moins en essayant d'approfondir les abyf-

mes que l'Apostre S. Paul dit icy excéder de si loin toute cognoissance: mais pour remarquer les occasions pour lesquelles il s'escrie ainsi, afin d'apprendre à son exemple a ne rien penser des actions de Dieu qu'avec respect, n'en rien dire qu'en toute sobrieté, n'en chercher point de raisons quand il ne nous en propose point d'autres que sa volonté, & en reprimant la curiosité & temerité naturelle de nos esprits, adorer ses secrets en vn profond silence.

Si nous voulons prendre l'occasion de ceste exclamation des paroles qui precedent prochainement, elles nous en fourniront certes vne belle. *Dieu*, dit l'Apostre, *a enclos tous sous rebellion, afin qu'il fist misericorde à tous.* En tout le propos qui precede en ce chapitre S. Paul ne fait rien autre chose que d'admirables considerations, sur ce que Dieu ayant esleu autres-fois le peuple d'Israel pour dresser avec luy ses alliances à l'exclusion de toutes nations de la terre, neantmoins il l'auoit laissé tomber en cette horrible rebellion alencontre de Christ, & à cause de son incre-

dulité l'auoit reietté & ce sembloit tout à fait rompu avec luy les conuentions traittees avec les Patriarches. Tellement qu'il n'y auoit eu qu'un petit nombre appartenant à son election gratuite & eternelle qui en eust esté reserué, tout le reste de la nation ayant esté abandonné à ceste obstination contre le Redempteur du monde. Que de ceste reietction là il auoit pris l'occasion d'appeller les Gentils; & les enter comme greffes sauages en son alliance salutaire, comme en vn oliuier franc. Mais en telle sorte pourtant qu'il se donne assez clairement a entendre qu'en fin quand la plenitude des Gentils seroit entrée, Dieu rappelleroit Israel, a cause de son election qu'il en auoit fait autres-fois, quand il auoit traicté son alliance avec leurs peres: *Et cela pource que les dons & la vocation de Dieu sont sans repentance.* De celà il vient finalement a conclurre que Dieu les a tous enclos sous rebellion afin qu'il fust misericorde a tous. Par lesquelles paroles mes freres, il ne nous veut pas dire, comme quelques vns l'ont estimé, que

reellement & defait Dieu ait resolu de sauuer en fin tout le monde. Il est vray que selon ceste distinction laquelle vous auez cy-deuant entenduë de nous, Dieu veut que tous hommes soyent sauuez en egard à ceste volonté qui depend de la premiere sorte de misericorde qui exige de la creature la foy & la repentance. Mais en egard à ceste seconde sorte de misericorde qui crée la foy es hommes, il ne le veut pas. Car il n'a pas ordonné de donner la foy a tous. Cest pourquoy non seulement tous les hommes ne seront pas sauuez, pource que la plus-part du monde refuse son salut : mais il ne se peut faire en façon quelconque qu'ils soyent sauuez, puis qu'en egard à la corruption de leur nature il est impossible qu'ils croient.

Il ne veut pas non plus par ces paroles nous donner à entendre que si Israel n'eust point reietté le Redempteur il eust esté autrement sauué que par misericorde, & que Dieu ait voulu expressement qu'il soit tombé afin qu'il le sauue par sa mercy & non autrement. Je vous prie posé le

cas que les Iuifs eussent creu au Redempteur quand il leur a esté anoncé par la predication des Apostres, leur salut eust il esté fondé en autre chose qu'en la miséricorde de Dieu, puis qu'ils estoient autant comme Dauid conceus en peché & eschauffez en iniquité, & qu'il n'y en auoit aucun qui en la duree de sa vie n'eust donné vne infinité de preuues de sa naturelle corruption par la transgression des ordonnances diuines ? Certes nulle chair ne peut esperer d'estre par ses œuvres iustifiée deuant Dieu. Et partant nul ne peut estre sauué que par la miséricorde de Dieu en nostre Seigneur Iesus.

Mais voicy ce que c'est. Depuis que Dieu auoit choisi la posterité d'Abraham, afin de luy faire des traitez particuliers avec elle & luy commettre la garde de ses oracles, il auoit laissé cheminer les nations en leurs voyes, se contentant seulement de la reuelation qu'il auoit faite de soy en la nature & en l'administration de sa prouidence. Et au reste cette reuelation estant si indignement mesprisée par les Gentils,

Dieu auoit versé dessus eux son ire d'une façon espouventable, les abandonnant à toutes sortes d'affections infames. De sorte que comme à l'enuy & à qui en feroit pis, ils auoyent mené une vie non licentieuse & desbordée seulement, mais entierement horrible. En Iudee il n'en estoit pas ainsi. D'un costé il y auoit plusieurs gens de bien & veritablement fideles, en qui, comme nous vous disions dimanche dernier, les promesses du Redempteur accompagnees de la vertu de l'Esprit auoyent eu une grande efficace. D'autre costé il y en auoit plusieurs qui bien qu'ils n'eussent que l'esprit de seruitude qui estoit destiné au ministere de la Loy, sans rien sentir de celui de la vraye sanctification qui fait embrasser la parole de la grace : si est-ce que le frein de la Loy reprimoit l'impetuosité de leurs cupiditez, & empeschoit que quand à l'exterieur ils ne menassent une vie fort subiecte à reprehension. Et de cette sorte estoient tant de Pharisiens, tant de Scribes, tant de docteurs de la Loy, tant de gens de cette nature, dont l'hypocri-

fic est si souuent & si seuerement taxée en l'Euangile. Le reste du peuple viuoit en quelque obeissance des loix, & peut-estre que le peuple n'estoit pas la pire partie de la nation Iudaïque. Partant a faire comparaison de ces deux sortes de peuples ensemble, les Iuifs & les Gentils, il eust peu arriuer par la dissemblance de leur vie, à l'estimer par l'extérieure conuersation, qu'on eust creu les Iuifs beaucoup-plus honnestes gens que les Gentils, & qu'ou bien ils n'eussent point eu a faire de redempteur, ou que s'ils en eussent eu a faire, c'eust esté beaucoup moins que les autres. De façon que peut-estre le salut des Iuifs, a le considerer en soy-mesme, eust esté creu fondé en quelque façon en la misericorde de Dieu; mais à le comparer avec celuy des Gentils, il eust peu sembler tenir autant de la Iustice que de la misericorde. Afin donc de faire paroistre clair comme la lumiere, que ni les vns ni les autres ne pouuoient estre sauuez que par vne pure & simple misericorde, Dieu par son iuste iugement a permis que les Iuifs soyent tombez



en ceste extreme rebellion, & par ceste rebellion, en vne sorte de vie qui n'est rien meilleure que celle des Gentils pour infame qu'elle puisse estre. Ainsi quand Dieu viendra a les releuer de la ruine en laquelle ils sont tombés, alors toute ame quelle qu'elle soit, sera contrainte de confesser qu'en cet egard les Iuifs n'ont point d'auantage par dessus les Gentils, & que ce que les vns & les autres sont sauuez, c'est de pure misericorde. Ces mots donc, *a celle fin de faire misericorde à tous*, se doiuent entendre non de la chose en elle mesme, mais de la declaration & manifestation de la chose. Comme il est assez ordinaire en la langue hebraïque dont le nouveau Testament imite les phrases, de dire que les choses se font à l'heure qu'elles paroissent & viennent en euidence. *Ainsi est-il dit que le frere & l'amy naissent au iour de l'affliction*, pource que c'est alors que se montrent ceux qui le sont veritablement : & *que Christ a esté engendré le iour de sa resurrection*, pource que lors tout le monde a deu recognoistre qu'il estoit sans doute

le fils de Dieu.

Or en cela, mes freres, Dieu montre bien vne grande liberté, mais qui neantmoins ne fait rien contre ceste vertu que nous nommons en luy la Iustice. La liberté se descouure en ce qu'ayant autresfois traitté des alliances avec ce peuple, si estroites, si particulieres, que toutes les autres nations du monde auoyét esté negligées & n'auoyét eu aucune part en ces prerogatiues, neantmoins il vient à le laisser tomber d'une cheute si estrange que le desbordement de la vie des nations, pour infame qu'elle ait esté, n'est point comparée à la crucifixion de Christ & à l'endurcissement & obstination qui s'en est ensuiuie. Comment estce, pourroit dire quelcun, que tout a coup ses affections ont manqué enuers luy ? Comment a changé en vn moment la bonne volonté qu'autres-fois il luy auoit portée ? Luy estoit-il pas aisé d'illuminer leurs entendemens, & de fleschir leurs cœurs en l'obeissance de son vniue ? Que si on ne regarde cela que des yeux de la chair, la matiere du scandale croist si vous venez.

a considérer la fin pour laquelle il les a laissés tomber; c'est de faire paroître que c'estoit par misericorde qu'ils auoyent a estre sauuez, & que nul ne s'imaginast que ce fust par iustice. Car quoy? cherche t'il matiere de gloire en la ruine des humains? Et encore ruine qui ne peut arriuer que par des crimes si atroces? C'est donc là où l'Apostre S. Paul s'escrie, *O profondeur des richesses & de la sapience de Dieu! que ses ingemens sont incomprehensibles & ses voyes impossibles a trouuer!* Car pour le certain il y a là des choses qu'il ne faut pas que l'esprit humain essaye de sonder.

Et toutes-fois en ce procedé il n'y a rien que la raison humaine mesme puisse accuser d'estre contre la iustice. Car d'un costé l'Apostre remarque expressement que les esleus n'ont point esté perdus. *Dieu, dit-il, n'a point debouté son peuple lequel il auoit precognu*: c'est a dire preueni de ses compassions en son election eternelle. Aucun de ceux-là n'est peri, & a esté impossible qu'ils perissent. Puis apres, tous ces autres gens, ou qui suyuoient leurs

conuoitises à l'abandon , ou qui les auoyent boüillantes au dedans & n'estoyent saincts qu'en l'escorce seulement , estoyent ils pas bien dignes , si nous en voulons faire vn droit iugement , que Dieu manifestast leur hypocrisie à leur honte & confusion eternelle ? Que s'il a pleu à Dieu se seruir d'eux en ceste façon pour faire paroistre la grandeur de sa miséricorde quand il viendra à reconcilier à soy ceste nation , qui se plaindra qu'il les ait voulu employer à cet vsage ? Luy a il pas esté libre en vsant de sa iustice dessus eux , & sans leur faire tort quelconque ( car de quel supplice ne sont ils point dignes deuant luy ? ) d'en vser ainsi pour la manifestation de la gloire de ses vertus émerueillables ? Et certes c'est à ce propos que l'Apostre S. Paul au 9. chap. de ceste mesme Epistre , dit que Pharaon a esté suscité à ce que Dieu declarast en luy sa puissance : & qu'il est en la disposition du potier d'vsr de son argille comme il luy plaist. Car puis que ceste masse , ceste argille , est si corrompue & si pourrie en elle mesme , quel tort luy fait le Createur,

en la laissant en sa corruption, de s'en servir pour la gloire de sa misericorde ou de sa puissance? Car au reste il ne procure iamais la gloire de sa puissance, ny de sa iustice, ny de sa misericorde par l'employ des vaisseaux de son ire a tels vsages, sinon ou pource qu'il est ainsi vtile pour le reste du genre-humain & de son Eglise particulieremēt; ou pource qu'il ne conuient pas a sa sagesse de souffrir que ces vertus soyent où mesconnuës, où mesprisées. Voila pourquoy il dit si souuent dans les Prophetes, & qu'il ne donnera point sa gloire a vn autre, & qu'il ne permettra point qu'on la luy raiſſe. C'est a dire ne souffrira pas ce qu'on imputeroit a lascheté ou a meconnoissance de la dignité de ses loix & de sa maiesté, a vn Prince qui deuroit estre veritablement genereux & magnanime. Car pource que nous ne cognoissons point la nature de Dieu en elle mesme, & qu'il n'y a point de langage qui la nous puisse représenter, & que quand il y en auroit, nous ne serions pas capables de l'entendre, l'Eſcriture se sert de ces manieres

manieres de parler empruntées des façons de faire des hommes, pour nous faire au moins concevoir quelque ombre de ce qui est sans doute d'une façon toute differente de nostre chetive humanité, en la nature diuine.

Et ie ne sçay, mes freres, si ie dois dire que Dieu a monsté vn exemple merueilleusemēt memorable de ceste sienne liberté en ceste grande reuolte que l'Apostre nous auoit predite, afin que sa puissance & sa misericorde parust d'auantage, quand il viendrait à retirer son peuple & le deliurer du ioug de ceste insupportable captiuité. Car de cōbiē la restauration de l'Eglise a elle esté plus glorieuse, que si les choses fussent allées à l'ordinaire, & demeurées en leur estat ancien? Cependant, quelque desordre qui soit arriué en ceste grande partie de l'Eglise, il ne s'est pourtant perdu aucun des esleus de Dieu. Il les a tous preservez du mal & retirés par deuers soy selon le conseil de son eternelle ordōnance. Or est ce bien là la plus prochaine occasion de l'exclamation de l'Apostre, si vous

regardés à la situation des paroles & à la connexion des sentences precedentes. Mais il ne faut pas s'en arrester là pourtant: l'Apostre y comprend toutes les choses qui sont contenues en ce chapitre. Quelles sont elles donc? Ce Calvin dont le nom est si odieux parmi ceux qui n'ont pas receu la dilection de verité, mais dont la memoire pourtant doit estre en benediction en l'Eglise de Dieu, & dont les graces out esté incomparables au siecle passé en l'intelligence de l'Ecriture, recognoist en ce chapitre deux sortes d'elections. Car il y remarque premierement l'election particuliere des personnes, de laquelle l'Apostre parle au chapitre huiëtiesme de l'Epistre aux Romains, au neufiesme de la mesme; & ailleurs en beaucoup d'endroits: Et la trouue, comme aussi y est elle tres-clairement & tres-expressement en ces paroles. *Dieu n'a point debouté son peuple lequel il a au parauant connu. Ne sçauex vous pas que l'Ecriture dit d'Elie? comment il fait requeste a Dieu contre Israel disant, Seigneur ils ont tués tes Prophetes, & ont démolí tes au-*

tels, & ie suis demeuré moy seul, & si  
 taschent à m'oster la vie. Mais quel luy  
 luy fut il respondu de Dieu? Je me suis  
 reserué sept mille hommes qui n'ont  
 point ployé le genouil deuant Baal. Ainsi  
 donc aussi au temps present il y a du  
 residu selon l'election de grace. Et, quoy  
 donc? Ce qu'Israel est apres à chercher il  
 ne l'a point obtenu, mais l'election l'a ob-  
 tenu, & les autres ont esté endurcis. Et  
 enseigne ce grand homme selon la  
 parole de Dieu, que ceste election  
 est precise, absolue, qu'elle ne de-  
 pend d'aucune condition, mais crée  
 la condition en l'homme: qu'elle  
 n'est fondée sur aucune preuision,  
 mais sur le seul bon plaisir de Dieu:  
 qu'elle ne peut estre empeschée par  
 aucun mauuais accident, mais sur-  
 monte toutes d'empeschemens, pre-  
 uient toutes sortes d'accidens, & ar-  
 rive à son but nonobstant toute re-  
 sistance: Et c'est ceste election qui est  
 demeurée ferme nonobstant la ruine  
 du peuple des Iuifs. Car bien que la  
 plus grande partie se soit rebellee &  
 endurcie contre Christ, si est-ce  
 pourtant que ceux qui appartenoyēt  
 à l'election de Dieu ont creu, & sont



venus par la foy à la iouissance de la gloire eternelle.

L'autre election est celle des peuples entiers que ce seruiteur de Dieu appelle election vniuerselle & generale : dont la nature est bien fort differente de l'autre. Car en quoy consiste t'elle ? l'Apostre nous en propose en ce chapitre deux exemples. Le premier est en la nation des Iuifs, la posterité d'Abraham, que Dieu auoit esleuë & choisie d'entre les autres peuples pour luy donner la cognoissance de des ses loix, au lieu qu'il auoit laissé les nations cheminer en leurs voyes. L'autre est l'election des Gentils que Dieu a appellés a la communion de la parole & des promesses du Redempteur, qui estoient auparauant estrangers des alliances d'Israel, & n'auoyent point d'esperance. Or ceste election icy à considerer les peuples tous entiers, ne peut pas estre vne election precise a auoir la foy : car si ainsi estoit, tous les particuliers croiroient & l'experience monstre le contraire. C'est seulement vne election à la participation de la parole, c'est à

dire à ces promesses du Redempteur & à ceste reuelation de la misericorde de Dieu que nous auons dite estre surnaturelle & celeste, & le seul instrument efficace duquel Dieu se sert pour amener les hommes au salut.

Or voyez-vous bien de vous mesmes, mes freres, que quand Dieu fait prescher son Euangile parmi vn peuple, lequel n'en auoit encore rien entendu, il luy fait vne grande grace à la verité, mais cela n'empesche pas qu'il n'exige de luy la foy, & la perseuerance en sa benignité. S'il vient à se monstrier indigne de ceste grace, Dieu oste son chandelier, & le porte ailleurs : c'est à dire, il reiette ce peuple là, & vient à en faire appeller vn autre par la predication de son Euangile. Comme il a paru au peuple des Iuifs qui a esté retranché, & comme S. Paul menace icy les Gentils d'estre retranchés, s'ils ne perseuerent en la benignité du Seigneur. La premiere election donc, que ce grand-homme appelle particuliere, est vne election à sentir la vocation interieure de l'Esprit. La

seconde qu'il appelle vniuerselle, est vne election a receuoir la vocation externe de la parole, au lieu qu' auparauant on n'en auoit aucune cognoissance. Et cela merite d'estre considéré vn peu plus auant en la comparaison dont l'Apostre se sert, du tronc de l'oliuier & de ses branches.

Les promesses du Redempteur, mes freres, lesquelles Dieu auoit données a Abraham, & qui sont le ciment de tout ce corps mystique que nous appellons Christ & l'Eglise, sont cet oliuier franc: les hommes sont les branches qui y sont entées. Mais comme le corps mystereux de nostre Seigneur peut estre considéré en deux egards, aussi les hommes peuvent estre dits entez en luy en deux manieres. Car premierement on le peut considerer entant que reellement & defait les hommes y sont entés, par vne vraye foy: & que ce corps est, comme nous auons accoustumé de parler, inuisible, pource que la foy est vne chose imperceptible aux sens du corps, dont il n'y a que Dieu & chacun fide-

le qui'en est doué, qui ait vne certaine cognoissance. Et si vous le considerez en cette maniere, comme on ne peut estre enté en luy que par cette vraye foy, aussi ne peut on auoir ceste vraye foy qu'en vertu de ceste election precise, absolue & particuliere. De sorte que ceste election est le decret par lequel Dieu a ordonné d'amener cestuy-cy & cestuy-là, ainsi qu'il luy a pleu choisir les hommes selon son bon plaisir, à croire veritablement en Christ Sauueur & Redempteur du genre humain, & estre par ce moyen veritablement fait participant de sa grace. Puis apres on le peut considerer entant que les promesses du Redempteur estans proposees aux hommes par la predication exterieure seulement, ils s'y adioignent aussi par l'exterieure profession, & composent ce corps que nous appellons l'Eglise visible. Pour ce que la profession externe est vne chose qui se cognoist & se remarque par les yeux, & qu'on ne laisse pas d'appeller Chrestiens tous ceux qui font profession du nom de Christ, encore qu'on n'ait aucune certaine

cognoissance de la sycnerité de leur foy & de leur repentance. Et si vous le considerez en cette maniere, on peut estre en cette façon enté en luy par la vocation exterieure seulemēt, quand Dieu fait la grace à vn peuple de faire prescher son Euangile au milieu de luy, & que ce peuple fait profession de le receuoir & de croire à sa parole. Et pour estre enté de cette façon là, il ne faut auoir part qu'en ceste election generale & vniuerselle des peuples tous entiers. Cette election vniuerselle donc est le decret par lequel Dieu a ordonné d'appeller certaines nations par la predication exterieure de sa Parole, à la profession du nom de son Fils. Selon cette premiere sorte d'election quiconque est enté au corps de nostre Seigneur Iesus par vne vraye & viue foy, en suite & en vertu de cette election particuliere, il est impossible qu'il en soit retranché. Ceste mesme bonté de Dieu de laquelle il a esté preuenue, continue tousiours. Cette mesme main de laquelle il a esté enté en ce tronc, & qui le fait participant de son suc, de sa seue & de sa vie, l'y

conserue & ne permet pas ni que de son propre vice il s'asseche, ni qu'aucun accident l'en arrache, ni que violence aucune, quelle qu'elle soit, l'en separe. Mais quant à ceste seconde sorte d'election, certes l'experience monstre que ceux qui n'ont point autrement esté entez au corps de nostre Seigneur que par la vocation exterieure de sa parole, en peuvent estre retranchez. Car qui ne le void en la nation des Iuifs ? Et combien y a t'il eu depuis la predication de l'Euangile, de nations parmi lesquelles il y auoit des Eglises merueilleusement florissantes, où maintenant le nom de Iesus Christ n'est pas cognu; Dieu ayant, pour des raisons que nous ne sçauons pas, transporté son Euangile parmi d'autres peuples qui n'en auoyent point de cognoissance?

Or voyez vous comme ie croy quel subiet il y a de s'escrier, ô profondeur des richesses & de la sapience de Dieu ! que ses iugemens sont incomprehensibles & ses voyes impossibles à trouuer ! Car est il question de l'election particuliere ? Qui

est ce, comme nous vous disions il n'y a pas long temps, qui puisse faire rendre raison à Dieu de ce qu'il a plustost esleu cestuy cy que cestuy là. Qu'il ait decreté de donner la foy aux vns & de laisser les autres en leur misere naturelle ? Certes il ne s'en peut rendre aucune raison que celle de son bon plaisir. Il en a plus aymé les vns ; en comparaison de l'amour qu'il leur a portée il peut estre dit auoir eu les autres en haine : Selon qu'il est escrit, j'ay aimé Jacob, & j'ay haï Ezau, Mais d'où vient la difference de cet amour, c'est ce qui est aux hommes impossible d'intelligence. Et Dieu a expressement voulu monstrier qu'il n'auoit esté induit à ces diuerfes affections que de son bon plaisir, en ce que des- auparauant que les enfans fussent nez & qu'ils eussent fait ne bien ne mal, il a fait prononcer cet oracle, Le plus grand seruira au moindre. Est il question de l'election generale & vniuerselle des peuples ? Qui pourra rendre la raison pourquoy Dieu a autresfois esleu les enfans d'Israel, & laissé les autres peuples sans leur donner au-

cune manifestation de sa grace és promesses du Messie? Ce peuple estoit-il ou plus sage, ou plus puissant ou plus entendu, ou plus considerable que les autres? Certes Moysé nie absolument que c'ait esté aucune telle consideration qui ait emeu Dieu à faire ce choix. Voire apres auoir reproché a Isaac que c'estoit vn peuple de col-roide, il ne rend autre raison de ceste election que celle de l'amour de Dieu, autre raison de cet amour, que celle de sa liberté souveraine. Dieu luy mesme au chapitre 16. de son Prophete Ezechiel fait ainsi parler à Ierusalem: *Tu as esté extraite & es nee du pays des Cananeens; ton pere estoit Amorrhéen, & ta mere Hethienne. Et quant à ta naissance, 'au iour que tu nasquis ton nombril ne fut point coupé, & tu ne fus point lauee en eau pour estre adoucie ni salee de sel, ni aucunement emmaillottée, &c.* C'est à dire, si on t'eust considerée en toy-mesme, tu estois d'une extraction & d'une condition entierement indigne que Dieu te regardast pour dresser avec toy ses alliances. Et de mesmes en est-il des Gentils. Ce ne peut

Deut. 9.

5.6.7.



auoir esté condition quelconque considerable ou attrayante qui ait émeu Dieu a les faire appeller par la predication des Apostres. Sinon que ces belles qualitez que S. Paul leur attribué au chapitre premier de l'E-pistre aux Romains, ayent esté pour conuier Dieu à leur faire prescher sa misericorde & les preferer aux Iuifs en la predication de ceste grace salu-taire.

Et ramenons vn peu ie vous prie la chose a l'experience de nos temps, & a ce dont nous mesmes pouuons auoir vne plus exacte cognoissance. Vous voyez comment en la reformation de l'Eglise & au renouellement de l'Euangile Dieu a partagé toute l'Europe : donnant a quelques nations vne grande lumiere de sa verité & vne grande liberté de la professer : quant aux autres il les a laissées en leurs anciennes tenebres, & s'il y a penetré quelque rayon de sa clarté, il a esté incontinent esteint par la violence des persecutions & par des inquisitions barbares. Qui pourroit rendre la raison de ceste distinction ? Et ou la pourroit on prendre

dre ailleurs qu'en la pure & simple liberté de la volonté diuine? Car s'il faut faire comparaïson de nous avec les autres, estions-nous pas naturellement aussi corrompus qu'eux, & les tenebres d'ignorance estoient-elles pas aussi espaiſſes en vne nation comme en l'autre? Et s'il faut comparer nos peres & nos ayeuls, il n'y auoit aucune difference non plus, l'ignorance en la religion, la corruption au ſeruite de Dieu, & la desbauche és vices, estoit non ſeulement vniuerſelle, mais egale. Derechef, mes freres, en ce monde nouueau qui a eſté deſcouuert depuis enuiron deux cens ans, les nations qui y habitent ont eſté egaleement abandonnees de Dieu, ſont deuenues egaleement ſauuages & barbares. Leurs peres ont eſté de meſmes depuis pluſieurs ſiecles en çà, & ſi auant dedans le temps paſſé que ces miſerables peuples n'ont aucune memoire qu'il y ait iamais eu difference entr'eux & leurs anceſtres. Neantmoins par le moyen de la nauigation l'Euangile commence à ſe porter en quelques endroits, & y a quelques-vns de ces

peuples qui le goustent. D'où vient donc ceste difference ? Si on dit que c'est que la nauigation a plustost conduit en cet endroit qu'en cestuy-là , nous demanderons pourquoy Dieu a plustost adressé là la nauigation des hommes. Et si on dit que les vents y ont porté, ou que les ports y ont inuité, nous continuerons à demander pourquoy la prouidence de Dieu a voulu que les vents soufflassent plustost en tel ou en tel endroit , pourquoy, soit d'elle mesme; soit de l'industrie humaine elle a rendu les ports plus commodes en vn lieu qu'en l'autre. Pourquoy finalement ceste nation plustost qu'une autre s'est rencontrée en cette plage ou les ports & les descentes se sont trouuees plus commodes. De dire au reste qu'ils en ont esté plus dignes que leurs voisins, ou que les autres peuples sauages qui habitent plus auant dans le pays, c'est aller contre le sens commun & la raison , qui ne trouue rien qu'une mesme barbarie en tous ces peuples. Encore cela ne resoudroit-il pas la difficulté ; car nous reuiendrons à

démander d'où il est arriué qu'en vne corruption vniuerselle & egale de tout le genre humain, en vne barbarie si estrange de toutes ces nations, les vnes s'en sont trouuees plus ou moins indignes que les autres. Car on ne pourroit pas donner la gloire de ceste pretenduë dignité à autre qu'à Dieu ; & ne pourra-on rendre raison pourquoy il aura disposé les cœurs des vns plustost que des autres à receuoir la predication de l'Euan-gile, qu'à sa pure & libre volonté. Mais l'Apostre, mes freres, nous enseigne bien au rebours. Car non seulement il nous dit qu'en la vocation des Corinthiens il y en auoit peu de forts, peu de sages, peu de nobles, mais que Dieu a choisi les choses folles de ce monde pour rendre confuses les sages, & les choses foibles de ce monde, pour rendre confuses les fortes, & les choses viles & mesprisées, voire celles qui ne sont point afin d'abolir celles qui sont. Et au chapitre 6. de la mesme Epistre, apres auoir dit, ne vous abusez point, ni les paillards, ni les adulteres, ni les effeminez, ni les larrons, ni les auari-

cieux, ni les yurongnes, ni les mesdisans, ni les raiſſeurs n'heriteront point le royaume de Dieu: Il adioute; & telles choses estiez vous quelques-vns. Mais vous en'avez esté lauez; mais vous en avez esté sanctifiez, mais vous en avez esté iustifiez au nom du Seigneur Iesus, & par l'Esprit de nostre Dieu. Il en faut donc reuenir là. C'est que Dieu a bien eu ſoin de tout le genre humain à la verité, en luy procurant vn Redempteur qui fist la propitiation des pechez de tous les hommes pourueu qu'ils ne s'en monstrent point indignes. Dieu tesmoigne bien ſa misericorde en quelque façon, par ſa patience & par ſa longue attente, voire entre les peuples les plus barbares. Mais quant à ce qui regarde la predication de ſa parole, qui eſt le ſeul moyen efficace pour nous amener à la participation de ſon Fils, il diſpoſe de cela ſelon qu'il eſlit tantost vn peuple, tantost vn autre. Mais de ceste eſlection, on ne peut rendre raiſon, que ſon bon plaisir. C'eſt pourquoy il ſe faut eſcrier avec l'Apotre, *O profondeur des richesses & de*

*la sagesse de Dieu! Que ses ingemens  
sont incomprehensibles, & ses voyes im-  
possibles à trouver!*

Mais ce n'est pas pourtant encore tout ce qui se peut observer és occasions qui font ainsi parler l'Apostre. Ceste election generale des peuples, mes freres, qui regarde la predication exterieure de la Parole, est bien vn tesmoignage bien exprés d'une faueur bien particuliere de Dieu enuers les nations auxquelles l'Euangile est adressé. Car ie vous prie; si le peuple des Iuifs a reietté le Redempteur, la grace de Dieu qui le luy a offert en a elle esté pour cela moindre en son endroit? Si les Apostres n'ont pas conuertt tous ceux a qui ils ont presché, leur ministere enuers les nations en a t'il esté vn moins certain tesmoignage de la benignité diuine? Si grande partie de l'Euangile s'est reuoltée de la foy selon les propheties; la foy pourtant que Dieu luy auoit fait annoncer estoit elle vn moins euident argument de la misericorde de Dieu enuers elle? Mais neantmoins la principale fin de la predication de l'Euangile parmi les hommes, est de

recueillir les esleus de Dieu. Ceste election, di je , generale des peuples. se fait principalement pour amener a effect l'election particuliere des personnes que Dieu a precognuës de sa predestination eternelle. Car il en est de cela comme de la fin de l'enuoy de nostre Seigneur Iesus au monde.. Il est bien venu pour la propitiation des pechez de tous les hommes pourueu qu'ils croient : & en cela paroist la grande misericorde de Dieu. enuers le genre humain. Mais pource, que si Dieu n'eust point eu d'esleus, nul des hommes n'eust creu, le Fils de Dieu ne fust point venu pour faire vne propitiation qui n'eust produit aucun effect au salut des homes. D'où on peut dire ou qu'il est venu principalement pour les esleus, ou mesmes qu'en ceste comparaison il n'est venu que pour eux. Ainsi encore que l'E-uangile soit presché aux nations toutes entieres, pour estre salutaire a chacun pourueu qu'il le recoiue: Dieu pourtāt ne le feroit point prescher ou il n'auroit du tout point d'esleus; n'estant pas conuenable à sa sagesse. que sa parole demeure entiere.

mét sans efficace: parquoy ou l'Euan-  
gile est principalement pour les esleus  
de Dieu qui sont particulieremét pre-  
destinez, ou mesmes en ceste compa-  
raison il n'est presché que pour eux  
au monde. Les esleus donc ne se re-  
cueillent ou ne s'entrent au corps de  
nostre Seigneur Iesus que par la foy:  
& la foy ne s'engendre que par l'effi-  
cace de l'Esprit; & l'efficace de l'Es-  
prit n'accompagne comme nous a-  
uons dit, aucune autre dispensation  
que celle de la predication de la pa-  
role. Il faut donc que la parole soit  
preschée au lieu ou Dieu veut re-  
cueillir ceux qu'en son conseil eternal  
il a donnez à son Fils.

Et de cela semble qu'il se peut fai-  
re vne obseruation vtile pour l'in-  
telligence de ce que l'Apostre nous  
enseigne en ce chapitre. C'est que  
pource que l'election des peuples est  
destinée a amener a chef l'election  
particuliere des personnes, l'Apostre  
en ceste longue comparaison qu'il  
fait des Iuifs avec les Gentils, melle  
en quelque façon ces deux elections  
ensemble. Et comme quand nous  
parlons de l'homme, pource qu'il est  
composé de parties merueilleuse-



ment differentes de nature, l'ame qui est spirituelle & immortelle ; & le corps, qui est mortel & materiel: mais qui ne composent qu'une meisme personne pourtant : nous nous seruons de manieres de parler qui doiuent estre interpretées selon la conuenance qu'elles ont avec ces natures differentes. De façon que si nous disons que l'homme est mortel, on l'entend eu égard a son corps: & si nous disons que l'homme est immortel, on l'entend eu égard à son ame. Et si finalement on dit que l'homme est vn animal raisonnable, on l'entend de la personne toute entiere. Ainsi pour ce que de l'effect de ces deux elections meslées ensemble resulte l'assemblée de l'Eglise visible, qui est composée de personnes de qualitez fort differentes: les vnes douées de la vraye foy qui ente veritablement en Christ: les autres qui n'en ont seulement que la profession externe : l'Apostre se sert icy de diuerses manieres de parler qui ne peuuent estre bien interpretées que selon le rapport qu'à chacune a ces qualitez & elections differentes. Car pour exemple ces paroles, *quelques-vnes des branches*

ont esté retranchées, ne peuuent conuenir qu'à cette election vniuerselle des peuples & à l'effect qui en depend, c'est à sçauoir la profession externe. D'autant qu'il n'est pas possible que ceux à qui l'election particuliere appartient, apres auoir esté veritablemēt entez en l'oliuier franc, s'en retranchent. Et quant à celles-là, *tu es debout par foy*, elles ne conuiennent qu'à cette election particuliere. Car c'est elle seule qui par la vertu de l'esprit engendre la foy es ames des hommes. Mais ces paroles, *tu as esté coupé de l'oliuier qui de nature estoit saunage, & as esté contre nature enté en l'oliuier franc*; peuuent conuenir à l'une & à l'autre maniere d'estre enté au corps de Christ, par la vertu de la foy & par la profession externe, & par consequent peuuent appartenir à toutes ces deux elections dont l'une engendre la foy par l'efficace de l'esprit, & l'autre iuuē à la foy par la predication de la parole. Car il se peut bien faire à la verité que quelcun face profession externe du nom de Christ qui neantmoins n'y croye pas; & c'est chose

trop ordinaire. Mais il ne se peut pas faire que celuy qui croid veritablement, n'en face profession exterieure. Et quant à cette exhortation, *ne t'esleue point par orgueil, mais crain* ; elle peut auoir son rapport à toutes les deux elections encore, mais en deux egards merueilleusement differens. Car eu egard à l'election particuliere de laquelle la foy depend necessairement: c'est seulement vne exhortation de laquelle Dieu se sert pour confirmer & entretenir la foy. Car comme elle s'est engendree par exhortation, c'est par exhortation encore qu'elle se conserue. Mais aureste elle n'induit nullement que ceux qui ont veritablement creu en Christ s'esleuent tellement par orgueil qu'ils tombent. La où si vous la rapportez a l'election generale des peuples, non seulement c'est vne exhortation, mais vne declaration encore que reellement & defait l'euenement peut arriuer que le peuple qui s'est esleué par orgueil vienne a estre retranché & tombe. Car Dieu scait tellement dispenser les choses par sa sapience, mes freres, que quand il luy plaist permettre que des Eglises

se ruinent de fonds en comble , & que son nom & le nom de son Fils Iesus ne soit plus connu en vn pays ou il estoit presché auparauant , cependant il pouruoit à ses esleus en telle façon qu'il est impossible qu'ils se perdent. Et ainsi c'est inutilement tout a fait & a contre-sens , que les aduersaires de la perseuerance des Saincts se seruent de ce passage.

Mais pour retourner à nostre propos, la principale fin de la predication de l'Euangile en quelque lieu du monde qu'il soit annoncé , est de recueillir les esleus de Dieu. D'où il s'ensuit necessairement que par tout ou il fait prescher son Euangile , là il a des esleus. Veu donc que la predication de l'Euangile est si diuersement dispensée : que les Iuifs premiere-ment l'ont eüe par les oracles du Vieil Testament: que depuis les Gentils ont esté appelez & les Iuifs reiettez: qu'entre les Gentils ceste grace de la vocation externe a esté si inégalement distribuee : que tantost ceste lumiere a resplendi en vn endroit & tantost en vn autre : que là où autres-fois fleurissoit la croix de

Christ, là sont les mosquées de Mahomet : là ou au contraire les temples & les seruices de deuotion estoient consacrez aux fausses diuinités, voire mesmes aux demons; car comme l'Apostre l'enseigne, c'estoyent les dieux des nations, là retentit la parole de Dieu & le nom de Iesus Sauueur du monde : il faut que l'élection de Dieu ait esté merueilleusement diuerse de mesmes. Or qui pourroit rendre raison de ceste diuersité, que Dieu ait voulu prendre ses eleus de la nation des Iuifs autresfois & non des Gentils? Qu'entre les Gentils il en ait iadis voulu recueillir vn grand nombre de l'Asie mineur, cependant qu'en nos Gaules Satan auoit vn empire si vniuersel & si absolu; & qu'au contraire, il ait maintenant beaucoup d'enfans en ces régions, & en ces autres pays il n'y en ait du tout point, ou qu'ils y soient en si petit nombre; comme s'il auoit semé du sel és regions fertiles par cy deuant; & au contraire conuerties les rochers les plus steriles en campagnes ou les moissons blanchissent de toutes parts? Certes, mes freres, on  
ne

ne peut répondre à cela sinon, O profondeur des richesses & de la sapience & de la cognoissance de Dieu ! Que ses iugemens sont incomprehensibles & ses voyes impossibles à trouver ! Et que sçavons nous s'il n'y a point vn temps limité à la prédication de l'E-uangile es pays où il fleurit maintenant, après lequel expiré, pour le mépris que les hommes en font, Dieu transporte son chandelier entre les Americains, ou parmi les Barbares de la Guinee ? Le monde est comme vne mer : la predication de l'Euan-gile, comme vn filé : les diuers peuples comme les diuerses plages auxquelles Dieu adresse la pesche des hommes : tantost icy, tantost là, selon qu'il y a des esleus a ramasser. Mais pourquoy il y en a aujourd'huy en vn endroit & demain en vn autre, nul ne le sçait que celuy qui les a choisis, & qui en ceste grande mer d'hommes qu'il a ordonné déuoir naistre dès le commencement, ou il y a tant d'abysses, les a designez de son œil, pour les amener à la participation de sa grace.

Et neantmoins, mes freres, bien

que l'Apostre S. Paul trouue en cela des profondeurs qui ne se peuuent sonder; des raisons des iugemens de Dieu & de ses voyes, qu'il est impossible qu'on entende; (En quoy il nous a voulu apprendre que Dieu en toutes ces choses a vſé d'une ſouueraine liberté, & qu'il ne nous en faut point, quant à nous, chercher d'autre raison que ſa volonté;) ſi eſt-ce pourtant qu'il ne laiſſe pas d'appeller cela, ſageſſe. Et comment ſageſſe? Certes ſageſſe qui excède noſtre comprehension & noſtre intelligence. De vray, ſi nous y regardons tant ſoit peu de près, nous trouuons que les œuvres de la ſageſſe de Dieu, ſont de deux ſortes différentes. Car il y a quelques vnes de ſes œuvres qui deſcouurent les raisons de la ſapience que Dieu a obſervées en leur production, & ſont que nous l'y admirons à la verité, mais l'y admirons avec cognoiſſance. Comme, pour exemple, ce que la terre tient au monde le lieu le plus bas, c'eſt bien une œuvre de la ſageſſe de Dieu: mais c'eſt en telle façon que nous apperceuons la raison de ceſte conſtitution

des choses. Car Dieu y a eu égard à leurs qualitez, & les a agencées selon leur nature. La terre estant vn element si pesant, il faloit necessairement qu'il occupast le lieu le plus bas du monde. Ce que la mer fait vn mesme globe avec la terre, mais en telle sorte pourtant qu'elle n'occupe pas vn hemisphere tout entier, ains tournoye de tous costez, afin que partout il y ait & du sec & de l'humide, c'est vne œuvre de la sapience de Dieu encore. Mais il est assez clair qu'il en a esté ainsi ordonné pour la commodité des exhalaisons, pour la facilité du commerce & de la communication, & peut-estre encore pour la distribution des sources des ruisseaux & des riuieres par les canaux sousterrains pour venir arroser & embellir la face de l'vniuers. Et en est ainsi de tant d'autres ouurages de Dieu de la contemplation desquels les Payens mesmes sont venus à la cognoissance de la sagesse de la prouidence. Mais il y en a quelques autres dont nous ne comprenons nullement les raisons, & ou par consequent nous admirons la sagesse de



Dieu; mais c'est sans cognoissance, en vne humilité profonde : comme à l'égard de chose qui excède infinimēt toute intelligence. De ceste sorte dōc est la sapience dont l'Apostre parle en cet endroit, en ce qui concerne la vocation des hommes à la participation de la grace de Dieu : soit que vous regardiez cette vocation en ce qu'il y a d'externe seulement, à cause de la variété selon laquelle Dieu appelle tantost vn peuple & tantost l'autre. Soit que vous la consideriez en l'efficace interieure de l'Esprit, qui depend de l'election de telles & telles personnes particulieres. Chacun peuple donc à qui Dieu adresse le nom de nostre Seigneur Iesus, se peut bien vanter qu'il a vne grande prerogatiue sur ceux à qui il ne l'adresse pas. Chacune personne à qui il a fait sentir la vertu de son Esprit en foy, en consolation & en sanctification, se peut bien vanter qu'il a esté aimé de Dieu dés-auparavant la fondation du monde, d'une façon tres-particuliere. Mais si en faisant comparaison de soy avec autrui il cherche la raison de ceste inégalité,

qu'il se donne bien garde de l'attribuer, ni à ses merites ou cachez ou descouverts: car il ne peut auoir mérité que la mort. Ni aux merites de ses ancestres: car nous sommes tous d'une condition egale, & taillés d'un mesme rocher, & formés d'une mesme argille. Ni à ce que Dieu ait preueu qu'il vseroit mieux de sa grace qu'un autre ne feroit: car le bon vsage de la grace de Dieu vient de la vertu de son election, & l'élection n'a autre raison qui nous soit manifestée qu'elle mesme. Et neantmoins qu'il sçache que tout cela ne s'est pas fait sans une sagesse profonde & admirable en elle mesme, bien qu'elle nous soit incomprehensible.

Mais cet aduertissement que nous donnons ainsi vague à toutes sortes de gens, vous doit estre particulièrement appliqué, mes freres, pour les graces singulieres que Dieu vous a faites, dont vous ne poués rendre autre raison que sa pure & simple benignité enuers vous. Il vous a premierement créés hommes. Qui l'empeschoit ou de vous laisser dans le neant, ou de vous faire comme

les cailloux des rochers, ou comme les bestes de charriage ? Il vous a appellés a la participation des promesses du Redempteur. Qui l'empeschoit de vous laisser, comme tant d'autres nations, vous egarer & vous perdre en vos voyes ? Il vous a fait naistre au temps de l'Euangile de son Fils. Pouvoit il pas se contenter de vous faire venir au monde du temps de l'œconomie de la Loy ? Il vous a réservés au temps auquel on le presche si purement que depuis le siecle des Apostres il ne l'a pas esté d'avantage. Pouvoit il pas luy suffire de vous en donner vne lumiere plus sombre ? Il vous a recueillis en vn lieu auquel depuis tant d'annees il y a quelque chose de particulier pour l'intelligéce de sa verité, en ce qu'il a establi non seulement le ministere au milieu de vous, mesme l'escole du ministere : ou vous avez eu autres-fois, où vous avez encore maintenant, si vous mettez a part celuy qui parle maintenant à vous & ses infirmités, des personnaiges recommandables entre les autres. Encore nous pouvons-nous vanter à la louange de la gloire de

la grace de Dieu, que si nostre lumiere ne luit avec autant d'esclat comme ont fait plusieurs grands flambeaux qui nous ont deuancez, elle est pourtant de mesme nature, ainsi pure, ainsi sincere, ainsi prise de la seule parole de Dieu, non meslee des raisons de la chair, non offusquee des traditions des hommes. Et c'est toute la louange que nous desirons. Pour le reste, que nos aduersaires de la communion de Rome denigrent tant qu'ils pourront ou nostre ministere ou nos personnes. Il nous suffira d'auoir vos consciences pour tesmoins que nous ne faisons pas comme ceux qui paissent leurs peuples de toute autre chose que de la parole de Dieu ; mais que nous ne mettons en auant que ce qui peut seruir à vostre edification. Oserions bien dire come l'Apostre S. Paul, que nous n'auons point afaire d'Epistres recommandatoires ou de par vous, ou enuers vous: Que vous estes nostre Epistre au Seigneur : les tables charnelles de vostre cœur estans toutes pleines des traits & de la graueure de la parole de Dieu, que le Seigneur y a

imprimees par nostre ministere. Chose de laquelle n'oseroyent se vanter ceux & qui font gloire de ne prescher pas l'Escripture sainte, & qui recommandent à leurs peuples sur toutes choses que se donnent bien garde d'estre asseurez qu'ils ayent senti l'efficace de l'esprit de Dieu en leurs cœurs, & que le doigt de l'Eternel ait engravé ses loix en leurs entendemens, de peur de tomber en vne presumption pernicieuse. Et partant, mes freres, c'est à vous à rendre à Dieu toute la gloire de ces beneficences si singulieres, & ne vous en attribuer chose quelconque : mais vous souuenir que plus grandes ont esté les graces de Dieu enuers vous, plus auez vous d'obligation à sa bonté, plus luy en deuez vous de recognoissance. A vous donc s'adresse l'exhortation de l'Apostre en ce chapitre icy. Regardez la seuerité de Dieu enuers vos voisins. Pour auoir mesprisé la verité qu'on leur preschoit autresfois, elle leur a esté ostée, de sorte qu'ils sont tombez en ces espaisles tenebres que vous voyez auoir saisi toute la face du monde.

Ils sont tombez par incredulité & vous estes debout par foy. Ne vous esleuez point par orgueil ; n'ayez point ceste opinion que cela vienne de vos merites , ni d'aucune chose qui fust considerable en vous : Mais craignez ; vivez deuant Dieu en vne humilité profonde : autrement vous seriez aussi retranchez. Et ce beau & lumineux chandelier que Dieu a allumé au milieu de vous ou seroit renuersé , ou seroit transporté ailleurs à vostre honte. Mais nous auons de vous , freres bien-aimez , meilleures esperances. Le peuple qui gisoit autres-fois en tenebres a veu vne grande lumiere ; & comme il s'y est esgayé , aussi cheminera-il tousiours en icelle. La parole de l'Eternel sera vne lampe à vos pas & vne lumiere à vos sentiers , pour vous conduire au milieu de l'obscurité du siecle , & vous amener par la voye de la vraye sanctification à la iouyssance de ce salut eternal auquel l'Euangile vous appelle. Ainsi soit-il mes freres , & à ce-luy qui nous a donné ceste esperance, le Pere , le Fils , & le S. Esprit , vn seul Dieu benit eternellement , soit

gloire & louange, force & empire és  
siecles des siecles. A M È N.



# SERMON VI.

IEAN. chap. VI. v<sup>s</sup>. 45.

*Quiconque a ouy du Pere, & a  
apris, vient à moy.*



PRES auoir ample-  
ment parlé deuant  
vous, mes freres, de  
ces deux sortes de mi-  
sericorde de dieu, que  
sa Parole nous ensei-  
gne, dont l'une, pour se faire sentir  
en la remission des pechez, exige de  
ceux qui les ont commis, la foy au  
Redempteur du monde, l'autre se  
desploye a engendrer ceste foy en  
nos ames. Apres auoir monstré que  
de l'une dépend la vocation exterieu-  
re des hommes à salut, & que sur l'au-  
tre est fondée l'election qui produit

la vocation interieure par l'efficace de la grace. Apres auoir bien particulierement declaré comment ceste vocation externe qui cōuie les hommes a repentance à esté fort inegalement dispensée, Dieu s'estant contenté de la faire paroistre aux nations és richesses de sa patience & de sa longue attente, & ayant reuelé ses ordonnances à Israel; puis par les euénemens des choses esclarci les oracles qu'il auoit donnez en depost à la posterité d'Abraham, & publié son Euangile par le ministere de ses Apostres. Et finalement apres auoir monstré comment il a dispensé la predication de son Euangile parmi les nations, d'une façon en laquelle paroist vne souueraine liberté, pour recueillir deçà delà ses esleus qu'il a espars en diuers temps és différentes plages de la terre. Que nous reste t'il plus pour mettre fin a ces exercices dont la matiere est vn peu extraordinaire depuis trois semaines en ça, sinon que nous disions quelque chose de ceste autre sorte de vocation que Dieu execute au dedans par la vertu de son Esprit, & monstrions quelle est l'ef-



ficace de ceste grace par laquelle il separe ses esleus du reste du monde ?

Or y a t'il de la controuerse entre nous & ceux de l'Eglise Romaine touchant ce Point, & la dispute en est venuë a certaines subtilitez deliées & speculations profondes, qu'il est vn peu difficile de faire entendre en ceste nature de propos, qui doiuent estre populaires & accommodez à l'intelligence de chacun. Mais neantmoins nous esperons que deux choses nous en faciliteront l'exposition, & a vous l'intelligence. L'vne est que nous parlons a vn peuple qui doit estre sage & entendu par la frequency des exercices de pieté, qui luy exposent continuellement les matieres de la religion, esquelles ceux de profession contraire, pource qu'on ne les y instruit pas, se trouueroyent esgarez, comme en vn pays estrange. L'autre, qu'il est question de l'efficace de la grace de Dieu en vostre vocation, de laquelle vous auez le sentiment en vos cœurs, de façon que vous deuez auoir vn ample commentaire a nos propos en vostre propre experience. Car ayans  
esté

esté enseignez de Dieu, pourriés vous rencontrer beaucoup de difficulté en l'explication des choses qui concernent ceste admirable discipline par laquelle il allume sa cognoissance en nos entendemens, & fléchit nos cœurs en son obeissance? Nous aurions donc, si nous voulions estre exacts a examiner ce texte, trois choses principales a y considerer. Premièrement que c'est que venir a Christ. Secondement que c'est qu'ouïr du Pere & apprendre. Et en troisiésme lieu, comment quiconque a ouy du Pere & à appris, vient a Christ. Mais le premier de ces poincts est si clair que nous n'auons pas a y faire longue insistence.

En tout ce chapitre nostre Seigneur prend pour vne mesme chose, *venir à luy, croire en luy, le contempler, manger sa chair & boire son sang.* Manger sa chair & boire son sang est entrer par la foy en la communion du sacrifice lequel il deuoit alors offrir, & que depuis il a offert pour satisfaire à la iustice de Dieu, pour la redemption du monde. Car il adioust incontinent que le pain lequel il vou-

loit donner c'est sa chair, laquelle, dit-il, ie donneray pour la vie du monde. Et ceste maniere de parler est en partie prise de la similitude que les choses corporelles & les spirituelles ont ensemble. Pour ce que ce qu'est au corps la nourriture du pain & du vin, cela mesme est la mort de nostre Seigneur Iesus à l'ame. En partie aussi de l'occasion qu'on auoit présentée à Christ de parler ainsi, en faisant mention de la manne qui auoit esté mangée au desert par les Israélites. Car pour l'ordinaire, de ce qui se presentoit à ses yeux, ou se proposoit à ses oreilles, il prenoit occasion d'annoncer les choses appartenantes au Royaume des Cieux, & donnoit à la grace spirituelle dont il est auteur, les noms des choses dont il prenoit l'occasion de l'annoncer aux hommes.

Le contempler est entrer en la communion de toutes ces graces par l'entremise de la cognoissance. Et est aussi ceste maniere de parler prise en partie de la nature de la chose. Pour ce que la foy est vne lumiere de l'entendement, & l'office de l'entende-

ment est de contempler & de cognoistre les choses. En partie aussi de la figure du serpent d'airin esleué au desert, pour la guerison des Israelites blessez par les serpens bruslans. Car nostre Seigneur fait vne bien expresse mention de ce serpent au chapitre troisieme de ce mesme Euangile, comme d'une figure par laquelle il estoit representé, & quant & quant, la maniere par laquelle nous sommes faits participans de la vertu viuifiante qui est en luy. C'est que comme les Israelites estoient gueris en contemplant des yeux du corps le serpent esleué au desert, nous le sommes en contemplant des yeux de l'ame nostre Seigneur Iesus esleué en la Croix.

Le mot de croire n'a point besoin de particuliere consideration. Car est ce pas celuy duquel l'Ecriture sainte se sert ordinairement pour exprimer la condition que Dieu requiert de nous en l'Evangile? Et n'y a personne qui ne sçache que croire est estre persuadé de la verité d'une chose qui nous est proposée a entendre: mais, di-je, estre persuadé de sa verité selon la nature de la chose

mesme. Car autre est la persuasion que nous auons que l'eclipse du Soleil vient de l'interposition de la Lune entre luy & la terre ; Et autre celle que nous auons que Dieu est vne nature souuerainement aimable & à laquelle la creature doit la recognoissance de tout ce qu'elle est. Ceste premiere sorte de persuasion s'arreste là, & ne tire apres soy aucune action en consequence. L'entendement ayant trouué ceste verité se repose la dessus & s'en contente. L'autre sorte de persuasion, si elle est telle qu'elle doit estre, tire apres soy necessairement l'amour de Dieu, & la deferéce que la creature luy doit rendre en & par dessus toutes choses. Or est nostre Seigneur Iesus mort pour l'expiation de nos offences, & resuscité pour l'assurance de nostre justification, vn obiet de ceste nature, que la foy par laquelle on l'embrace ne consiste pas seulement en quelque vague pensée de sa verité ; mais est vne persuasion viue, profonde, qui descend si auant en l'ame qu'elle la penetre, qui tire apres soy toutes les affections & emmene prisonnières

routes les pensées des hommes.

Venir à luy finalement est vne parole metaphorique pour la signification de la mesme chose : qui est aussi prise, comme toute metaphore, de quelque similitude qui est entre la chose dont on parle, & celle dont on emprunte le mot. Car comme les hommes qui sont eslongnez les vns des autres se conioignent ordinairement par le moyen du marcher; Dieu leur ayant donné comme aux autres animaux ceste faculté d'aller & de venir, de reculer & d'auancer selon la necessité des occurrences. Ainsi estans naturellement eslongnez de nostre Seigneur Iesus & separez de sa communion salutaire & viuifiante, il n'y a autre moyen d'en estre faits participans que de le conceuoir comme il faut & tel qu'il faut en nos entendemens, & le loger en nos ames par le moyen de la foy. Car nos ames ne peuuent auoir d'autres mouuemens propres pour s'en approcher que celui de la cognoissance & de l'amour que la cognoissance engendre. Il pourroit estre aussi que Christ auroit icy eu quelque égard à l'occasion pre-

és Prophetes. *Ils seront tous enseignez de Dieu. Quiconque donc, dit-il, a ouy du Pere & a appris vient à moy.* Mais hors cela il est impossible qu'il en vienne aucun autre.

Pour donc venir au second Point, il n'y a personne qui ne sçache que c'est qu'ouyr & apprendre. Et le texte s'explique icy de soy mesme. Car apres auoir dit, *ils seront tous enseignés de Dieu.* Christ adiouste, *quiconque donc a ouy du Pere & a appris vient à moy.* De sorte qu'estre enseigné, c'est ouir & apprendre: & ouir & apprendre est estre enseigné. Et la raison de cela doit estre considerée. Es choses humaines & naturelles ceux qui auroient les facultés de l'entendement fort excellentes, l'esprit vif & penetrant, la ratiocination vigoureuse, & la constance grande en la contemplation; pourroyent deux mesmes beaucoup apprendre. Toutes-fois pour ce que tout le monde n'a pas ceste admirable force d'esprit qui seroit necessaire pour approfondir les choses de soy mesme: & que quand on l'auroit, si ne parviendroit-

on à l'acquisition des sciences par ceste voye là qu'avec beaucoup de peine, encore peut estre ne les acquerroit on qu'imparfaitement: chacun premierement a fait ses obseruations. Puis des obseruations différentes de plusieurs ont esté dressées les disciplines & les arts. Et puis encore on a institué les moyens d'enseigner soit en particulier soit en public; c'est à dire, verser dans les esprits des auditeurs par l'entremise des oreilles, les remarques qui ont esté faites de la nature des choses par les deuanciers, & leur en donner l'intelligence, sans que d'eux mesmes ils aient la peine de les tirer des cachettes de la nature par la force de la contéplation: ce qui seroit vne voye comme i'ay desia dit, merueilleusement laborieuse & subiette à beaucoup de paralogismes. Mais és choses de la Religion Chrestienne & qui appartiennent à l'Euangile de nostre Seigneur, cette sorte d'enseignement par les oreilles estoit absolument necessaire, voire eussions-nous les facultez naturelles de l'ame les plus excellentes qui se puissent imaginer. Car



il n'est pas possible que l'homme pour profondément qu'il medite, pour attentivement qu'il vacque à la contemplation des œuvres de Dieu, peust deviner que le Fils eternal devoit descendre des cieux en la terre, prendre nostre nature humaine pour y souffrir la mort, & ressusciter glorieux apres avoir racheté le monde par ses souffrances. Il falloit que nous en fussions enseignez d'ailleurs & que nous receussions ces choses là par les oreilles.

Mais comme ainsi soit, mes freres, que pour apprendre il faille deux choses; l'une est l'enseignement externe, qui propose par le dehors ce qu'il faut sçavoir; l'autre est la faculté de l'esprit, qui rende celuy qu'on enseigne capable de le comprendre; à raison dequoy les esprits émouffez & demi brutes ne comprennent rien es sciences, l'endoctrinement externe ne nous est pas seulement necessaire en la religion, il y faut quelque autre chose qui dispose au dedans les facultez de nos ames. Car l'experience nous apprend que si on ne fait rien sinon parler au dehors, le dedans ne

s'en émeut pas : où s'il s'en émeut, c'est, ainsi que parle le Prophete, comme pour vne chanson d'amourettes. Cela ne fait que toucher, s'il faut ainsi parler, la surface de l'ame seulement : comme si vous escriuiez en de l'eau, les caracteres incontinent s'effacent & se confondent. Et nostre Seigneur Iesus qui sçauoit bien le naturel de l'homme, represente ceste dureté de son cœur d'une façon fort elegante. *Mal-heur sur toy*, dit-il, *Matth. Corazin, Mal-heur sur toy Bethsaïda :*  
*II. 21.* *car si en Tyr & en Sidon eussent esté faites les vertus qui ont esté faites au milieu de vous, ils se fussent pieça amendez avec sac & cendre.* Car que pensez vous qu'il vueille dire là, mes freres ? Ne croyez pas qu'il vueille attribuer aux Tyriens & Sidoniens quelque vertu de croire en l'Evangile s'il eust esté presché entr'eux, ou aux miracles de Christ s'ils les eussent veu faire. Tant s'en faut. Il exagere en ces mots la dureté de leurs cœurs : mais en leur comparaïson, par vne maniere de parler hyperbolique, il taxe la dureté des cœurs des Iuifs encore dauantage. Car c'est

comme quand voulans reprocher a quelcun qu'il a vn esprit impitoiable, nous disons, si i'auoy autant supplié vn Turc ou vn Barbare, ie l'auroy fleschi. Ou comme quand vn maistre veut reprocher à son disciple que toute la diligence qu'il employe à l'enseigner est inutile, à cause de son peu de memoire & d'entendement, il dit, si i'auoy autant de fois repeté ceste leçon a vn cheual, il l'auroit entenduë & retenuë. Ce n'est pas que nous pretendions recommander ou l'humanité des Turcs, ou la capacité des cheuaux a apprendre les lettres: mais, comme i'ay dit, exagerer par ceste comparaison les vices de ceux à qui nous auons a faire. Car au reste les Tyriens & Sidoniens non seulement estoient de mesme nature que les Iuifs: mais encore en leur vie externe il y auoit sans doute vn desbordement plus estrange. Afin donc que ceste diuine doctrine de la Croix de Christ entre en nos entendemens, il faut que l'Esprit de Dieu y agisse, voire y agisse de telle façon, y desploye vne telle puissance qu'il n'en arrive pas comme aux mauvais escholiers a

qui on dit cent fois vne chose & si ne la comprennent pas ; ou s'ils la comprennent superficiellement aujourdhuy , demain ils l'auront oubliée : mais que ces celestes enseignemens s'engrauent tres-profondement , & que les traits en demeurent tout a fait ineffaçables. C'est pourquoy le Prophete , & apres luy nostre Seigneur Iesus , appelle cela , *estre enseigné de Dieu , & apprendre de luy* : pour opposer le ministere des hommes à l'efficace de l'Esprit. Car les hommes parlent au dehors , mais c'est pour neant si Dieu n'y besongne. Ne leur donnez pas seulement la parole, mais faites les tonner, & si vous le voulez ainsi, que les flames & les esclairs accompagnent leurs voix, les cœurs des homes pourtāt n'en sentiront iamais aucun bon mouuement , si Dieu mesme au dedans ne les amollit & ne les ploye en son obeyssance. Car naturellement l'aveuglement de nos esprits est merueilleusement espais. Et quand il ne le seroit pas tant ( quoy que l'experience de l'incrédulité du genre humain montre assez quel iugement on en doit faire ) la corrup-

tion

tion de nos affections est telle qu'il n'y a que ceste seule puissance par laquelle Dieu a crée le monde & resuscité les morts, qui puisse apporter en nos esprits la chose nécessaire pour estre conuertis par la parole.

Mais il est icy singulierement a remarquer, que l'Apostre appelle cela ouïr & apprendre du Pere. C'est à dire que ceste operation de Dieu se fait ou entierement ou principalement dessus les entendemens des hommes, afin de leur faire voir l'excellence de la doctrine qui leur est proposée; & par le moyen de ceste veüe, c'est à dire de ceste cognoissance, emmener toutes les pensees des hommes prisonnières sous l'obeissance de Christ, & se rendre absolument le maistre de toutes les affections de nos ames. Car le mot, *apprendre*, represente vne chose qui a sa relation a l'intellect; & celuy *d'ouïr* estant, comme on parle, metaphorique, a cause de la ressemblance qui est entre les sens du corps & les facultez de l'esprit, ne peut estre reduit à sa signification propre, qu'il ne signi-

fié la comprehension de l'entendement & ceste puissance de nos ames par laquelle nous receuons les images des choses qui nous y sont portees : comme nous receuons les sons & iugeons de leurs diuerfes qualitez par les oreilles.

Et de vray, mes freres, si vous regardés les facons de parler desquelles l'Escripture sainte se sert pour représenter la maniere en laquelle Dieu opere la conuersion des hommes, vous verrés qu'elles ont presque toutes leur rapport a ce que nous appelons l'intelligence, soit que ces facons de parler soyent propres, soit qu'elles soyent figurees. L'Euangile est appelé vne *a* science, vne *b* sapience, vne *c* lumiere. Quelle autre faculté en l'homme est destinée a la comprehension de la science, & a l'acquisition de la sapience que l'entendement? Et comment se peut voir la lumiere que par les yeux? Et qu'est ce l'œil au corps sinon ce qu'est l'intelligence en l'ame? Ce par quoy nous receuons l'Euangile, est appelé *d* l'entendement, *e* la raison, *f* les yeux de l'entendement *g* l'esprit de l'entende-

*a* Luc 1.

77.

*b* 1. Cor.

30.

*c* Iéan

8. 12.

*d* Rom.

12. 2.

*e* Rcm

12. 1.

*f*. Eph.

1. 18.

*g* Eph.

4. 23.

nient mesmes, *h* la veuë, *i* l'ouïe, *k* le flairer *l* le gouster, *m* les sens, les sens exercitez à discerner le bien & le mal, voire les sens qui par l'exercice ont acquis vne habitude qui rend leurs fonctions & leurs operations plus faciles & plus seures. Or l'operation de l'entendement consiste à contempler, à entendre, à cognoistre, à comprendre la verité des choses & en estre' persuadé apres l'auoir comprise. Et quant à l'operation des sens sur les obiects qui leur sont destinez selon nature, elle consiste en la distinction & discretion des qualitez des choses, desquelles, chacun selon sa constitution, ils ont quelque espece d'intelligence. L'action de la grace de l'Esprit de Dieu sur celuy de l'homme s'appelle *n* reuelation, *o* illumination, *p* ouuerture de cœur pour entendre & croire, *q* lumiere que Dieu fait resplendir au milieu des tenebres, *r* transport du royaume de tenebres au royaume d'une merueilleuse lumiere, & d'autres manieres de parler semblables, qui toutes ont leur rapport à cette partie de nos ames la plus excellente de tou-

*h* Jean 6. 45.  
*i* Jean 6. 45.  
*k* 2. Cor 2. 14.  
*l* 1. Pier. 2. 3.  
*m* Heb. 5. 14.  
  
*n* Gal. 1. 16.  
*o* Eph. 1. 18.  
*p* Actes 16. 14.  
*q* 2. Cor 4. 6.  
*r* Coloſſ. 1. 13.

tes, qui void, qui entend, qui comprend, qui conçoit la verité des choses qui luy sont proposees. L'action de nos esprits ainsi touchez & illu-

- f* 1. *Cor.* minez de la grace secrette de l'Esprit  
 2. 14. de Dieu, *f* s'appelle intelligence, *t*  
*t* *Ephes.* comprehension, *u* cognoissance, *x*  
 3. 16. cognoissance par la perception du  
*u* 2. *Pier* sentiment, & finalement de ce nom  
 1. 2. de foy; qui sont toutes paroles dont  
*x* *Phil.* les choses ont leur necessaire relation  
 4. 9. à la mesme faculté de nos âmes. Et  
 l'estat de l'homme conuerti par l'effi-  
 cace de l'Euangile s'appelle sagesse,  
 renouvellement de l'entendement  
 renouvellement de l'esprit de l'en-  
 tendement, & de ce mot de re-  
 pentance, qui en la langue originelle  
 du Nouveau Testament, signifie vn  
 changement introduit en l'entende-  
 ment, qui de tenebreux & ennemi de  
 la clarté qu'il estoit auparauant de-  
 uient lumineux & capable de con-  
 duire les affections & les appliquer  
 necessairement à choses belles &  
 honnestes. Au lieu que l'estat opposé  
 s'appelle *y* tenebres, *z* ignorance,  
*a* folie, aueuglement, *b* cœur desti-  
 tué d'intelligence, disposition de l'a-

*y* 1. *Jean*

2. 9.

*z* *Ephes*

4. 18.

*a* *Prove*

1. 22.

*b* *Rom.*

1. 21.



me qui ne discerne rien & ne cognoist point la difference qui est entre les choses, & de ce c nom qui presente le cal & les duretez qui s'engendrent sur les organes des sens, & qui les rendent hebetez en leurs sens. *c Ephef. 4. 18. Rom. 11. 25.*

timens, & incapables de discerner les qualitez de leurs obiects. En vn mot l'Apostre descrit ainsi l'estat des Gentils, *qu'ils ont cheminé en la vanité de leur pensee: Ayans leur entendement obscurci de tenebres, & estans estrangez de la vie de Dieu, à cause de l'ignorance qui est en eux, par l'endurcissement,* ou, comme Calvin le tourne, *par l'aueuglement de leur cœur.* Car de vray l'Apostre dit ailleurs que les entendemens de ceux qui reiettent l'Euangile, sont endurecis. C'est à dire qu'il s'est fait vn cal dessus, comme vne raye espaisse dessus les yeux, qui leur oste la cognoissance des choses, & la iouissance de ceste belle lumiere Euangelique. *2. Cor 3. 14.*

Mais il est temps de voir en troisiéme lieu quelle peut estre l'efficace de cet endoctrinement; & c'est proprement icy le Poinct de la controverse. Car nostre Seigneur disant

que quiconque a ouy du Pere & a appris vient à luy, monstre qu'il n'y a aucun de ceux qui sont ainsi enseignés de par Dieu qui ne vienne à Christ, c'est à dire qui ne croye. Et cependant nos aduersaires de l'Eglise Romaine, & ceux qui en ces choses sont de mesme sentiment avec eux, disent que cet endoctrinement doit par le icy nostre Seigneur, met l'ame de l'homme en tel estar qu'elle peut croire si elle veut : mais que puis apres il depend de l'homme de se determiner, comme on parle, de soy-mesme. Et qu'ainsi ce que nous pouuons croire, vient de Dieu, mais que ce que reellement & de fait nous croyons vient de ce que l'homme estant mis par la grace de Dieu en ceste indifference, se porte de soy-mesme à croire. De sorte que là ou deux hommes ont esté également enseignez de Dieu, ce que l'un croit & l'autre ne croit pas, cela ne peut estre imputé qu'à la liberté de sa volonté, qui a ainsi voulu vser de ceste illumination qui luy a esté ottroyée. Et pensent en cela parler conuenablement à la nature de l'homme & à la

raison. Auparavant donc que d'apporter les passages de l'Ecriture nécessaires pour décider la question, suivons les vn peu par la voye de la raison, & voyons si leurs discours s'accordent avec elle. Et cela en examinant premierement si ce qu'ils disent peut estre vray, que c'est la volonté qui nous determine à croire. Puis apres s'il est possible, que la volonté soit mise en ceste indifférence de croire ou de ne croire pas. Et finalement posé le cas qu'elle y peust estre mise, a qui doit estre donnée la gloire de l'auoir déterminée, & de la balance en laquelle elle estoit, fait encliner plustost d'un costé que de l'autre.

Quant au premier donc, nous vous auons desia dit que, croire est estre persuadé de la verité de quelque chose; de sorte qu'a proprement parler le croire à son siege en l'entendement, comme tout ce que nous auons deduit cy-dessus le monstre necessairement. Aussi est la verité le propre obiet de l'intellect qui luy est destiné par Dieu & par la nature mesme des choses. La volonté donc a propre-

ment parler ne peut pas croire. Le croire, comme nous verrons tantost agit bien necessairement sur la volonté. Mais de soy ce ne peut estre la volonté qui croye. De sorte que si la volonté determine l'homme à croire, il faut que ce soit qu'elle commande à l'entendement de recevoir & embrasser ceste verité. Ramenons donc vn peu cela à l'experience. En conscience croyons nous quelque chose purement & simplement pour ce que nostre volonté nous ordonne de la croire ainsi? Croyons nous pour autre considération que pour ce que nous voyons en la chose des raisons de verité qui nous persuadent? Nous voyons bien des gens qui disent, ie veux croire cela. Mais ceste maniere de parler ou signifie seulement, ie veux faire profession exterieure de le croire, encôre que veritablement & au fonds du cœur ie ne le croye pas, & que mon entendement me dicte assez de raisons au contraire: ou simplement, ie n'en veux pas disputer, & sans examiner si la chose est vraye ou non, ie le passe sôubs silence, estant indifferant ou a mes affaires, ou a

mon propos , & par consequent a mon esprit , si elle est fausse ou veritable. Mais, mes freres, ceux qui ne croiroient point en l'Evangile autrement que de ceste façon-là, penseroit-on qu'ils y creussent ? Est-ce croire en Iesus Christ que de le suivre du corps seulement , & au reste le reietter de l'esprit , ou au moins le tenir en indifferance ? Certes , de gens qui croient absolument & veritablement , c'est à dire , soyent profondement persuadez de la verité de quelque chose , pource qu'ils le veulent ainsi, il ne s'en est iamais trouué aucun au monde. Et s'il estoit en la puissance des hommes de commander ainsi à leur entendement de croire ou de ne croire pas , combien y a t'il de choses vrayes que nous ne croirions pas pource qu'elles nous sont importunes & fascheuses ? combien de fausses que nous croirions volontiers & les nous persuaderions malgré nous , pource qu'elles nous agreent ? Je ne pense pas qu'il y eust aucun pource qui ne voulust croire qu'il est extremement riche & à son aise, afin de se deliurer de l'ennuy que

luy donne le sentiment de sa poureré.

S'ils disent que les commencemens de la foy induisent la volonté à faire que l'homme s'applique à considérer plus attentiuement de l'entendement la doctrine de l'Euangile, afin de l'approfondir dauantage pour se la persuader de plus en plus, & établir plus fermement en soy-mesme ceste creance; ils disent bien ce qui attriue à la verité, mais ils renuersent leur doctrine de fonds en comble. Car ceste premiere creance qui a excité la volonté, n'est pas venue de la liberté de la volonté mesme; elle est venue de ce qu'il est entré des raisons en l'entendement qui bien qu'elles n'ayent pas esté capables de le persuader si profondement comme il desire, ont esté suffisantes pourtant pour exciter en luy quelques bons commencemens de la foy, & l'ont fait entrer en vne bonne opinion de l'Euangile, d'où est né le desir de le cognoistre plus auant, afin d'en tirer de la consolation & de la ioye dauantage. Et ce progrez de la foy qui se fait apres par la consideration plus attentiuue du salut, par l'ouïe de la

Parole de Dieu, par la meditation diligente de la chose mesme, ne vient pas proprement de ce que l'homme par sa volonte a resolu de s'y appliquer, mais de ce que l'entendement s'y estant ainsi applique, il y a reconnu de la verite dauantage. Comme si vn homme a trouue vn bon diamant, qui luy semble bien vn bon diamant a la verite, mais neantmoins il n'en est pas si pleinement assure qu'il desire pour en auoir vne solide ioye: ce que d'abord il l'a creu vn bon diamant, ne vient pas de l'empire de sa volonte, & de ce qu'il a voulu le croire, mais de ce qu'il y a veu vn beau feu, vne belle lumiere. Et cela l'a peu exciter a l'examiner de plus pres, a le considerer avec plus de soin, a le mettre aux espreuues necessaires, a le parangonner avec d'autres diamans, de la comparaison desquels il puisse tirer plus de certitude de ce qu'il cherche. Que si puis apres il vient a se confirmer en ceste creance de plus en plus, cela ne vient pas de l'empire de sa volonte qui l'ordonne ainsi a son entendement, mais de ce qu'il a rencontre en

son diamant tant & tant de marques de bonté, qu'il ne reuoque point en doute que ce ne soit vn precieux ioyau, qui luy a esté mis en main par la prouidence diuine. En vn mot c'est réuerfer l'ordre que Dieu a mis entre les facultés de l'hóme. Car c'est à l'entendement à commander, aux appetits & à la volonté à dependre de son ordonnance. A raison de quoy il est appellé par les Grecs le gouuerneur entre les facultez de l'ame.

De plus, posé le cas que la volonté ordonne quelquesfois à l'entendement, & que l'ordre de ces puissances se renuerse: ie demande pourquoy elle commande à l'entendement de croire? Est-ce pour ce que l'Euangile luy semble veritable pour estre creu, & quant & quant vtile pour estre receu comme proposant & presentant l'esperance indubitable de la vie? Nenny. Ce seroit encore renuerfer d'une autre façon l'ordre & la nature des choses. Car il n'appartient pas à la volonté de iuger de la verité & de l'vtilité d'aucun obiet, c'est à l'entendement seulement. Et si elle ordonnoit de croire pource qu'elle iuge

ge



ge l'Evangile veritable & necessaire  
 elle se mettroit en la place de l'enten-  
 dement, a qui seul il conuient de pro-  
 noncer sur la nature des choses. Est-ce  
 donc pour ce qu'il plaist ainsi a la vo-  
 lonté sans en alleguer autre raison?  
 Il semble qu'ils le vaeillent dire à la  
 verité. Mais en le disant ils com-  
 mettent contre la raison diuerses im-  
 pertinences. Car en premier lieu si  
 nous demandons pourquoy il a ainsi  
 pleu a la volonté, respondront-ils  
 encore que c'est pource qu'il luy a  
 pleu? Ce seroit aller à l'infini. Car no<sup>s</sup>  
 repeterons encore nos demandes &  
 eux leurs responses, & n'arriuerons  
 iamais à aucun terme de respondre &  
 d'interroguer. Il faut donc necessai-  
 rement qu'ils dient que la volonté  
 n'a point de raison de ceste sienne  
 action & de ce commandement qu'el-  
 le fait à l'entendement de croire. Or  
 est-ce vne chose merueilleuse que  
 l'homme que Dieu a doté de raison  
 & d'entendement expressement  
 afin de comprendre les motifs de ses  
 actions, & en cela la tiré du pair des  
 creatures brutes & destituées d'in-  
 telligence, face quelque chose sans

en auoir aucune raison. Nous voyõ  
a la verité quelques gens qui ne ren-  
dent point de raison de leurs actions,  
comme les Princes absolument sou-  
uerains, & pour des causes entiere-  
ment differentes, les enfans, & les  
fols. Mais ce que les Roys ne rendent  
point de raisons, ce n'est pas qu'ils  
n'en ayent point pourtant : c'est qu'il  
n'est pas expedient qu'ils les descou-  
urent. Cela, peut estre, diminueroit  
de la hauteſſe de leur Maieſté & de  
leur authorité royale. Et puis ce n'est  
pas à leurs ſubiets d'examiner & de  
s'enquerir, ſi les raisons qu'ils ont de  
leurs actions ſont bonnes ou mau-  
uaifes. Ce que les enfans n'en alle-  
guent point, c'est qu'ils ne ſont pas  
encore venus en aage d'vſer de la  
raison ; ou que ſ'ils ont quelques pe-  
tites raisons de leurs actions, ils ne  
les peuuent pas dire. Mais que ce ſoit  
la nature de l'homme d'agir par la  
conduite de la raison & par ſon or-  
donnance, il en appert aſſés parce  
que les petits enfans meſmes eſquels  
il y a plus d'eſperance pour l'adue-  
nir, ſont ceux qui s'enquierent le plus  
de la raison des actions qu'ils voyent

frir aux autres , & qui en demandent le pourquoy. Et si on leur répond seulement, c'est que ie le veux ainsi, l'autorité de ceux qui parlent les estonne , mais la responce ne satisfait pas à leur esprit , & ne remplit pas le desir qu'ils ont eu d'en entendre la cause. Pour les fols, ce seroit folie de chercher en eux de la raison. Car s'ils en auoyent ils ne seroyent pas fols, puis que la folie consiste au renuement de la raison mesme. La volonté donc quaud elle ordonne à l'entendement de croire en l'Euan-gile de Christ, ou quand elle induit l'homme à le receuoir par foy, agit elle de la mesme façon qu'agissent les fols qui ont perdu la raison, ou les enfans en qui la raison ne iouë point encore?

Mais finalement posé le cas que les hommes agissent quelques fois sans raison; certes au moins faudroit il que ce fust en choses de merueilleusement legere consequence. Ou il est question de choses importantes, des biens, de l'honneur, de la vie, on ne se contenté pas d'une raison, il en faut auoir maintes & main-

tes pour se resoudre à faire vne action de ceste importance. En l'Euangile donc, ou il est question de Dieu, ou il n'y va de rien moins que du salut & de la damnation eternelle de nos corps & de nos ames, est il imaginable que nostre volonté se puisse mouoir sans raison ? Que l'homme, di-je, se resoluë à l'un ou à l'autre de ces partis aueuglettes & arastons, sans en pouoir alleguer, sans en sentir en soy-mesme aucune cause ? Car si on dit icy qu'elle suit l'invitation des raisons que l'entendement luy monstre, cela ne resoudra pas la difficulté. Pour ce que quoy que e'en soit, selon eux, toutes ces raisons de l'entendement n'ont autre vertu que de mettre la volonté en indifferenee. Or nous cerchons ce qui la tire de ceste indifferenee là, & qui l'induit plustost à suivre les raisons qu'à ne les suivre pas. Et en suivant pied à pied les hypotheses de ces gens, iusques icy nous n'en auons sçeu trouuer aucune. De sorte que nous trouuons bien la raison pourquoy l'entendement inuite plustost la volonté à se tourner de ce costé là

que de l'autre. Mais non de ce que la volonté obtempere à ces invitations, c'est à dire en vn mot, de ce que l'homme embrasse l'Euangile. Mais cela nous tirè trop loin. Voyons plus briuement qu'elle peut estre ceste indifference, en laquelle on s' imagine que l'illumination de la grace de Dieu mette la volonté de l'homme.

Nous parlons icy, mes freres, non des fols & des enfans, comme nous vous disions tantost; mais de gens qui vsent de la raison: & encore de gens eueillez & capables des actions humaines, en qui la raison n'est pas assoupie par le sommeil, ou par quelque autre chose de cette nature. A des gens doncques ainsi faits, on propose d'vn costé Dieu & de l'autre son ennemi: à la droite la pieté & la vertu; à la gauche l'impieté & le vice: là haut le Paradis ouuert, icy les enfers qui s'entre-baillent. Et nous presupposons qu'ils ont l'entendement illuminé par la grace de l'Esprit de Dieu, pour cognoistre la verité de ces choses & en iuger conuenablement à leur nature. En con-

science, mes frères, se peut-il imaginer que la volonté demeure là balancée en indifférence? Qui est l'homme, si quelque maniaque passion ne le possède, ou si quelque desespoir ne le transporte hors de soy mesme, qui voyant euidentement la vie & la mort deuant luy, dont on luy donne l'option, ou choisisse plüstost de se perdre, ou demeure vn moment seulement à consulter quel parti il doit prendre? Certes ou deux partis sont à peu pres également auantageux, il y a lieu à deliberation. Mais où l'on monstre d'vn costé vn grand & excellent bien, & de l'autre vn mal irremediable, là auons nous accoustumé de dire qu'on ne delibere point; le bien l'emporte à la balance sans aucune apparence de contraste.

Au reste comment est-ce que ceux qui se vantent de la raison ne l'escoutent point en ceste dispute? Car s'ils la consultoyent bien à point ils trouneroyent en elle assez de quoi se contenter. Tout le monde accorde que c'est naturellement & necessairement que les hommes aiment leur souuerain bien, & qu'il est im-

possible qu'ils ne l'aiment. L'erreur consiste à le choisir. Car les vns l'establissent en la volupté, les autres es richesses, les autres en l'honneur, les autres en quelque vaine image de la vertu, qu'ils ne voyent que ie ne sçay comment au trauers d'une nuee. Mais en quoy que chacun selon son iugement le colloque, il est absolument ineuitable qu'il ne l'aime. Possé donc que Dieu reuele par la puissance de son Esprit à nos entendemens, comme certes il le fait en toutes esleus, que nostre souuerain bien gist en N. Seigneur Iesus liuré pour nos offences & ressuscité pour nostre iustification, sera t'il pas necessaire & ineuitable que nous aimions le Seigneur Iesus Sauueur & Redempteur du monde? Et de dire icy que nostre Seigneur Iesus n'est pas le souuerain bien, mais le moyen de paruenir au souuerain bien: que les hommes aiment necessairement leur souuerain bien à la verité, mais que la liberté paroist à ehoisir les moyens par lesquels on y arriue, c'est vn eschappatoire inutile. Car, Bien: que nostre Seigneur manifesté en l'Euangile soit

seulement le moyen pour paruenir au souuerain bien. Tant y a que c'est le seul & vnique moyen, & il n'y en peut auoir d'autre. Si donc le S. Esprit nous illumine en la cognoissance de nostre souuerain bien, & si le mesme Esprit nous donne clairement & certainement à cognoistre que Christ est l'vnique moyen d'y paruenir: Il n'est pas plus indubitable que nous aimerons le souuerain bien qui nous est reuelé, qu'il est certain & necessaire que nous aimerons l'vnique moyen qui y mene. Car il y peut auoir de la consultation ou il y a plusieurs moyens qui semblent egale-ment commodes. Mais ou il n'y en a qu'vn, la mesme necessité qui nous determine à l'amour du souuerain bien, nous porte à suivre l'vnique moyen qui nous en met en iouissance. Et si vn homme auoit fermement estably son souuerain bien en la richesse, & que quant & quant son entendement luy dictast tres-certainement qu'il n'y a autre moyen de deuenir riche que de nauiger en Orient; il est absolument impossible que cet homme là ne s'embarque s'il en ala



commodité, pour grands que soyent les perils qui pourroyent se rencontrer en la nauigation des Indes. Et notamment encore s'il auoit, comme nous auons en l'Euangile, des promesses certaines & inuariales de surmonter tous perils, & d'eschapper en fin tous mauuais rencontres. Partant l'illumination de l'entendement telle que nous la presupposons, & ceste indifference que ceux de Rome s'imaginent, sont choses entierelement incompatibles.

Mais posons le cas encore qu'un homme peust estre mis en telle occurrence en indifference. Je di que quand il est question de l'Euangile, cette indifference ne peut estre sinon vn grand peché alencontre de Dieu. Car si vne femme estoit d'un costé sollicitée par vn adultere, & de l'autre inuitee par la consideration de la crainte de Dieu, de l'honneur & de la chasteté, & de la foy qu'elle doit à son mari, peut-elle demeurer tant soit peu en indifference à consulter entre ces deux, & contre-peser la pudicité avec l'adultere, sans se monstrier indigne de la louange de cha-

steté que l'on donne aux honnestes femmes ? Es choses esquelles on ne regarde que l'ytilité on peut bien consulter & se tenir quelque temps en l'equilibre de l'indifference, comme on parle, iusques a ce qu'on ait recognu de quel costé il y a plus d'auantage. Mais es choses où il y va de la pieté enuers Dieu, de l'honesteté & de la vertu, où Dieu nous a manifesté nostre deuoir, comme nous le presupposons icy, & où nous le voyons clairement & distinctement par la reuelation de son Esprit, desormais le consulter & deliberer ne peut estre sans crime. La grace de Dieu donc nous est elle communiquée pour nous laisser en nostre peché ? N'en auons nous autre auantage ? Et que veulent donc dire ces mots que c'est luy qui nous regenere, qui nous viuifie, qui nous reforme, s'il se contente de nous laisser en l'entre-deux de ceste consultation qui ne peut estre autre que criminelle ?

Au fonds, outre toutes les raisons que nous auons alleguées cy-dessus, il est impossible que ce soit la volonté qui se tire de soy-mesme hors de

ceste indifference pour embrasser l'Evangile. Ce que vous iugerez assez si vous considerez ces deux choses. La premiere est, qu'Adam estant autresfois en estat d'integrité ; & neantmoins en vne condition muable : pour entier qu'il fust, la tentation n'a pas laissé de le corrompre, & l'a fait passer de ceste bonne constitution en vne mauuaise. Si donc l'homme estant en vne bonne constitution n'a peu s'y maintenir, comment est ce qu'estant en vne mauuaise ( car nous auons veu que ceste indifference l'est ) il passera de soy-mesme & par la seule liberté de sa volonté, en vne bonne ? Les tentations sont elles a ceste heure moins puissantes qu'autres fois ? Le diable est il moins vigilant à prendre les occasions de nous subuertir ? Et quand ceste indifference ne seroit point si mauuaise qu'elle est, seroit-il pas plus aisé à l'ennemy de tirer à soy la volonté quand elle branle encore irresoluë entre les deux partis, qu'il ne luy a esté autresfois de tirer la volonté d'Adam au mal, du bien vers lequel elle estoit desia excellemment

determinée ? L'autre chose est que nul ne doute que l'homme n'ait de foy-mesme de mauuaises habitudes en la volonté, comme l'auarice, l'ambition, & en vn mot les inclinations merueilleusement violentes à toutes autres choses mauuaises. Je demande donc si quand Dieu par l'illumination de l'entendement met la volonté en indifferance, ces mauuaises habitudes sont corrigées, ou non. Car si elles sont desia corrigées, comme ainsi soit que la sanctification de l'homme consiste en la correction & amendement des mauuaises habitudes de la volonté, l'homme sera sanctifié auparauant que d'auoir creu: car cestuy-là n'a pas creu qui est encore en indifferance. Or est-ce chose prodigieuse en la Theologie qu'un homme soit sanctifié auant qu'auoir la foy. Si elles ne sont point encore corrigées, veu que s'il y a chose aucune qui selon nature soit capable de determiner la volonté, ce sont les habitudes dont elle est imbuë de longuemain, & que les mauuaises notamment la tiennent comme liée deffous leur ioug, cōment estce que d'elle

d'elle mesme elle se pourroit determiner au contraire? Est-ce pas le propre des habitudes d'encliner les facultez aux choses qui leur conuiennent de nature : si elles sont bonnes, aux choses bonnes, si elles sont mauuaises aux mauuaises? La volonté donc estant soubs l'empire de si mauuaises habitudes, comment est-ce que de soy mesme elle se pourroit porter à l'autre parti? Tant s'en faut que cela se puisse faire, qu'il est mesme impossible, rādis qu'elle demeure soubs l'empire de ses mauuaises inclinatioꝝ qu'elle puisse se mouuoir pour paruenir iusques à cette pretendue & imaginaire indifference. Il faut donc necessairement, mes freres, que si la volonté passe de ces mauuaises habitudes a quelque indifference, & de cette indifference, qu'elle qu'elle peust estre à la foy, que cela vienne d'ailleurs que du propre mouuement de la volonté, c'est à dire de quelque puissance qui soit au dessus d'elle qui l'emporte. Or qu'elle peut estre ceste puissance sinon celle de l'Esprit de Dieu? Et c'est icy, mes freres, ou il faut que la raison se taise, & que l'Es-

D d

criture sainte parle, & nous apprenne ce qu'il en faut croire.

Et premierement il faut icy bien distinguer entre l'action mesme de croire, & la vertu par laquelle nous croyons & à qui la louange en doit estre pleinement rendue. Car l'action mesme de croire, est de nos entendemens. Ce sont les hommes qui croient, ce n'est pas Dieu qui croit en eux: comme ce sont les hommes qui se repentent, qui sentent leurs pechez, qui en ont regret, qui pleurent & gemissent par la cognoissance de leur misere, qui goustent aussi la consolation, & se resjouissent par l'assurance de la misericorde. Aucune de ces choses ne peut conuenir à Dieu: mais à luy seul appartient de donner la vertu qui les produit es hommes. Comment donc parle l'Ecriture? Soit qu'elle se serue de manieres de parler propres, soit qu'elle en employe de figurees, elle attribue tousiours, non le pouuoir si nous voulons, mais l'effect mesme du croire, à la grace diuine, comme à la cause dont elle est vniquement produite. L'Apostre escriuant aux Ephesiens

ne dit pas que Dieu nous donne de  
pouvoir auoir la foy si nous voulons,  
mais absolument, que *la foy est un  
don de Dieu*. Ni que c'est par l'excel-  
lente grandeur de la puissance de  
Dieu enuers nous que nous pouuons  
croire si nous voulons, mais que reel-  
lement & de fait nous croyons selon  
*l'excellence de la puissance de sa force*.  
Aux Philippiens il ne dit pas qu'il  
nous a esté gratuitement donné de  
pouvoir croire, mais qu'il nous a  
*esté donné de croire en Christ*: & que  
c'est Dieu qui produit en nous, non  
le pouvoir vouloir & le pouvoir par-  
faire s'il nous plaist ainsi, mais *le vou-  
loir & le parfaire, selon son bon plaisir*.  
Qu'est-ce donc, mes freres, que l'A-  
postre appelle *le vouloir*? Sont-ce les  
premiers mouuemens de nos esprits  
enuers nostre Seigneur, quand la gra-  
ce le nous a reuele, mais encore foi-  
bles & languissans & qui ne paruien-  
nent pas à vne foy & à vne amour qui  
merite ce nom d'aimer & de croire?  
C'est si nous en croyons S. Paul, Dieu  
qui en est l'auteur. Ainsi le parfaire  
sera l'accomplissement, qui selon  
luy viendra encore de l'efficace d'v-

Ephes. 1.  
19.

Phil. 1.  
29.

Phil 2.  
13.

ne mesme grace. Est-ce croire tout a fait & aimer de mesmes le Redempteur ? *Parfaire* ainsi sera perseuerer : & partant nous aurons d'une mesme grace de Dieu la foy & la perseuerance.

Or ne faut-il pas penser eschapper la force de ces passages en disant que la foy est vn don de Dieu, pource que sans l'illumination de l'endement & l'efficace de la grace qui a mis la volonté en indifference, elle ne s'y pourroit mettre d'elle mesme. Car s'il n'y a rien dauantage, nous tiendrons bien ainsi l'indifference de la grace de Dieu : mais quant a ceste determination de nos esprits qui les en tire hors, nous l'aurons de nous mesmes. Or est-ce non en l'indifference que consiste le croire, mais en ce mouuement de nos ames, qui de ceste balance en laquelle elles estoient, selon nos aduersaires, suspenduës auparauant, les encline reellement du costé de l'Euangile. Que si Dieu peut estre dit auteur de la foy pource qu'il a mis la volonté en indifference, quoy que quant à elle, elle se soit déterminée de sa propre



liberté, pourquoy ne sera t'il pas dit l'auteur de l'incrédulité, si par ceste mesme liberté, de ceste indifferance en laquelle elle estoit, elle se determine a reietter l'Euangile ? Autant certes ou aussi peu Dieu aura t'il esté l'auteur de l'vn mouvement que de l'autre. Mais quoy ? nous ne cerchons pas icy vne telle quelle chetive raison, pourquoy Dieu puisse estre dit en quelque façon auteur de nostre-foy. Nous cerchons comment deux hommes estans également illuminez & enseignez de la grace de Dieu, comme ceux contre qui nous disputons le presupposent, l'vn vient pourtant, & l'autre ne vient pas, l'vn obeit à l'invitation de la grace, & l'autre la reiette. Car si cela prouient de la grace de Dieu, ils n'en sont pas touchez également : Dieu agira ainsi plus efficacement en l'vn qu'en l'autre. Et ce sera luy qui aura ployé nostre volonté, cela ne sera pas venu de ceste liberté qu'on pretend luy estre naturelle. Si cela vient de la liberté de la volonté ; en ceste comparaison ce ne sera pas vn effect de la grace de Dieu ; car l'operation d'icel-

le qu'on presuppõe auoir esté égale en l'autre, n'a pas produit effect semblable. Or est-ce en l'obeïssance à l'inuitation de la grace que consiste la foy : & partant en nous comparant avec autrui nous aurons ainsi la foy de nous mesmes. Ce donc que nous auons de nous mesmes sera-il appelle vn don de Dieu? Ce qui vient de la liberté de nostre volonté, sera-il nommé vn effect de l'efficace de son operation? Ce qui procede purement & absolument de nostre franc arbitre, sera-il nommé vn don provenant de l'excellence de la puissance de la force de Dieu mesme? Et au reste que deuiendra ceste interrogation de l'Apostre, *Qui est-ce qui met difference entre toy & vn autre?* Et ceste autre, *qu'as-tu que tu n'ayes receu?* Et si tu l'as receu pour quoy t'en glorifies-tu? Car certes si c'est la liberté de ma volonté & non la grace de Dieu qui met difference entre vn autre & moy, nul ne peut nier que ie n'aye subiect de me glorifier en elle.

Encore est-il singulierement à noter que quand l'Apostre dit aux Philippiens, qu'il leur a esté donné

gratuitement de croire en Christ, c'est en faisant comparaison d'eux avec ceux qui reiettent la grace de l'Evangile. *Conuersez*, dit-il, *dignement comme il est seant à l'Evangile de Christ* : afin que soit que ie vienne & que ie vous voye, soit que ie soy absent, i'entende quant à vostre estat que vous persistez en un mesme esprit, combattans ensemble tous d'un courage par la foy de l'Evangile, & n'estans en rien espouuantez par les aduersaires. Ce qui leur est une demonstration de perdition, mais à vous de salut, & cela de par Dieu. D'autant qu'il vous a esté gratuitement donné pour Christ non seulement de croire en luy, mais aussi de souffrir pour luy. Qui ne voit là l'opposition toute manifeste ? Qui ne void qu'en ceste opposition la difference est en la foy ? Et qui ne void finalement qu'en ceste opposition encore c'est à Dieu qu'est attribuée ceste difference ? Et de vray, mes freres, ces paroles de Dieu mesme sont trop emphatiques pour estre eludées. *Je leur osteray leur cœur de pierre. & leur en donneray un de chair.* Et derechef, *ie mettray mes*

*Jeremie.*  
31.33.

Ezech.  
36. 26.  
27.

loix en leur entendement & les escri-  
ray en leur cœur. Car elles empor-  
tent manifestement vne telle muta-  
tion en toutes nos facultez, que leurs  
dispositions & leurs preparations; &  
leurs actions & operations encore  
sont attribuées a Dieu : voire aussi  
purement & singulierement, sans en  
rien partager avec nous, que s'il nous  
auoit fendu la poitrine, arraché de  
sa main propre le rocher que natu-  
rellement nous y portons, remis en  
sa place vn cœur doiué de nouvelles  
facultez, & en iceluy de la puissance  
de son doigt escrit & engraué que  
Christ est nostre Sauueur & qu'il a  
fait en sa Croix l'expiation de nos  
offences. Encore y adiousté Eze-  
chiel ; *Je mettray mon Esprit au de-  
dans de vous, & feray que vous che-  
minerés en mes Statuts, & que vous  
garderés mes ordonnances & les ferés.*  
Afin que nul ne pense que l'euene-  
ment depende de nostre option &  
de nostre puissance. Mais ce n'est pas  
tout. L'Ecriture dit que c'est Dieu  
qui nous conuertit. Or celuy qui con-  
uertit donne sans doute le mouue-  
mēt, & cestuy là n'a point encore senti

Jerem.  
31. 18.

le mouuement, qui est en indifferen-  
ce. Elle dit que c'est luy qui nous  
*illumine*. Or celuy dont la volonté  
consulte si elle aimera Christ ou si el-  
le ne l'aimera pas, si elle suiura son  
Euangile, ou si elle se tournera de  
l'autre costé, n'est pas illuminé, il est  
encore en tenebres. Car cestuy-là est  
en tenebres qui ne l'aime pas, & ce-  
luy qui delibere s'il l'aimera, n'aime  
point encore. Elle dit que c'est luy  
qui nous *tire*. Certes si celuy qui ti-  
re ne meut, ou il faut que la chose  
soit immobile en elle mesme, ou si  
elle se peut remuer, que celuy qui ti-  
re n'y applique pas vne force propor-  
tionnée à l'effect qu'il a desiré. Or est  
bien la volonté de l'homme entiere-  
ment incapable de se mouuoir d'elle  
mesme au bien: mais à la puissance de  
Dieu il n'y a rien impossible. Si donc  
Dieu tire, il a intétion de mouuoir, &  
s'il a intétion de mouuoir quelque re-  
sistèce que puisse faire la volóté, si faut  
il qu'elle cede. Et si on dit qu'il tire à  
la verité, mais que c'est à ce qu'on sui-  
ue volótaiement: on dit vray. Mais aus-  
si en cela consiste la force de cette at-  
traction, qu'elle fait que ce que nous

*Ephes.*  
1. 18.

*Ieân 6.*  
44.

ne voulions pas , nous le voulons.  
Car sont ce pas les facultez d'enten-  
dre & de vouloir que Dieu attire? Si  
donc il attire afin de mouuoir, il agit  
en intention de donner ceste ve-  
hemente inclination qui met nos  
amés hors de l'indifference. Elle

*Act. 16.* dit que c'est Dieu qui nous *ouvre*

*14.* *Le cœur.* Or par la predication de  
l'Euangile Christ se presente pour en-  
trer en nos cœurs. Si donc le cœur  
demeure fermé, il est reietté pour le  
certain. Mais si Dieu mesmes met  
la main à l'ouurer, il ne se peut faire  
qu'il n'y entre. Et ne seroit de  
dire qu'il entre volontiers à la verité,  
mais que c'est ou on le reçoit. Car  
auoir le cœur ouvert & le recevoir  
quand il s'offre est vne mesme cho-  
se. Elle dit que c'est luy qui nous

*Coloss.* *transporte des tenebres au Royaume de*  
*1. 13.* *lumiere, & qui nous regenere ou engen-*  
*Jean 3* *dre tout de nouveau.* Cestuy-là donc  
est il transporté qui demeure en sus-  
pens s'il sortira de la captivité de pe-  
ché ou non : ou né derechef, qui est  
encore en l'entre-deux de l'estre ou  
du non estre? L'Apostre dit que la  
predication de l'Euangile *enmene nos*

*pensées prissonnières sous l'obéissance de* 2. Cor.  
*Christ. Est-ce donc là laisser nostre vo-* 10. 5.  
*lonté en indifférence ? Le vainqueur*  
*qui veut triompher de celui qu'il a*  
*surmonté, remet-il à son choix de*  
*suivre ou de ne suivre pas le char de*  
*son triomphe ? Il appelle nostre vo-*  
*cation à Christ vne nouvelle creation.* Ephes.  
 Quand donc Dieu crée quelque 2. 10.  
 chose se contente-t'il de la produire  
 en tel estat qu'il dépende d'elle d'estre  
 où de n'estre pas ; Où si absolument  
 il luy donne la iouissance de l'estre ?  
 Il la nomme encor *vne resurrexion* Ephes.  
*d'entre les morts.* 2. 5. 6.  
 Quand donc Dieu  
 ressuscite quelqu'un se contente-t'il de  
 le mettre en vn estat indifferent en-  
 tre la vie & la mort, où s'il luy inspi-  
 re la vie tout de nouveau & l'en met  
 reellement en iouissance ? Il dit que  
 nous croyons selon *l'excellente gran-* Ephes.  
*deur de la puissance de Dieu en vostre* 1. 19.  
*endroit, voire selon l'efficace de la puis-*  
*sance de sa force.* En conscience s'il  
 n'estoit question que de l'indifféren-  
 ce de la volonté, & de nous suspen-  
 dre ainsi entre croire & ne croire pas,  
 feroit-il besoin qu'il desployast vne si  
 insigne puissance ? Et ou il desploye

vne puissance si insignie se peut-il faire que le mouuement de la conuersion, que l'action du croire, que la determination de la volonté ne s'en ensuiue? Encore dit l'Apostre, que c'est la mesme puissance qui a ressuscité Iesus-Christ des morts, pour monstrier que comme c'est la resurrection du Seigneur qui viuifie le nouuel homme en nous, Dieu a desployé pour nous ressusciter en nouueauté de vie, la puissance de sa vertu avec vne pareille efficace, qu'il l'auoit desployée pour ramener Christ du sepulcre. Or n'a t'il pas laissé son fils en vn estat douteux entre la vie & la mort; & partant il ne nous laisse non plus en l'indifference du croire ou du non croire.

Quant à ce qu'on a accoustumé d'excepter que ce seroit inutilement qu'on vseroit d'exhortations enuers ceux qui sont morts, comme l'Euan-gile en vse enuers les pecheurs pour les conuertir, & que par consequent ceste similitude ne doit pas estre prescrite, cela ne diminue rien de la force de nos argumens. Car nous ne mettons pas la similitude en ce que les  
vns



vns & les autres soyent également  
privés de la faculté d'ouir les exhortations. En l'esprit de qui pourroit  
tomber vne telle frenesie? Nous la  
mettons en ce qu'en ceste inegalité  
de faculté d'ouir les exhortatiōs, l'im-  
puissance d'y obeir est entierement  
egale. Pource que le mort corporelle  
n'est pas plus capable d'empescher  
vn miserable cadaure de se releuer  
du tombeau, que la mort spirituel-  
le qui consiste au peché, est capable  
d'empescher le pecheur de se con-  
uertir aux exhortations que la parole  
de Dieu luy adresse. Mais si d'un  
costé vn corps mort n'est point a cō-  
damner s'il ne se releue pas quand  
on le luy crie, d'autant qu'il n'a ni  
entendement pour comprendre ce  
que veulent dire ces exhortatiōs, ni  
mesmes sens pour les ouir, vn hom-  
me mort en son peché ne laisse pas  
d'aggrauer sa condamnation s'il n'o-  
beit à la voix qui l'appelle à la vie.  
Pource qu'ayant & oreilles pour ouir,  
& entendement pour entendre, il n'y  
a que la seule malice qui l'empesche  
d'obtemperer, si profonde & si in-  
ueterée a la verité qu'elle luy rend la

chose impossible : mais plus grande est ceste impossibilité qui vient de la malice de son cœur, plus est il méchant, & par conséquent condamnable devant Dieu & devant les hommes? D'autre costé quand il plaist à Dieu monstrier sa vertu en la resurrection d'un mort, il n'est pas plus indubitable qu'il se releuera, & que la gloire de sa resurrection sera toute due à la puissance diuine, qu'il est certain que ceux là se conuertiront que Dieu appelle selon son propos arresté, & que la gloire de leur conuersion sera due toute entière à l'efficace de sa grace.

Et certes de quelque façon que Dieu agisse en ses esleus pour les amener à croire & à aimer l'Euangile, soit que de la vertu incomprehensible de son Esprit il determine, comme on parle, immédiatement la volonté; soit, ce qui conuient mieux à la nature de l'homme, qu'il le face par l'entremise de l'entendement & la puissance de son illumination, l'écriture nous apprend que iamais il n'illumine de ceste façon que quāt & quāt la volonté ne se fleschisse, iamais

il ne nous enseigne de ceste sorte dōt  
 Christ fait icy mention , que l'eue-  
 nement ne s'en ensuiue. D'où il ap-  
 pert & que quant à l'euenement , il  
 est necessaire , & quant à la puis-  
 sance qui le produit , elle est entie-  
 rement insurmontable. Ce n'est pas,  
 mes freres , que la peruersité de la  
 volonté de l'homme n'y resiste. Si  
 nous ne resistions, nous ne serions  
 pas comme nous sommes naturelle-  
 mēt peruers. Mais c'est qu'il n'y à nul-  
 le resistance que la grace de Dieu ne  
 surmonte. Et l'Apostre le nous en-  
 seigne assés clairement quand il dit <sup>1. Cor.</sup>  
 que si les *Iuifs* eussent cognu le Sei- <sup>2. 8.</sup>  
 gneur de gloire, ils ne l'eussent pas cru-  
 cifié. Car cela seroit-il veritable si l'ef-  
 ficace de ceste cognoissance eust peu  
 estre vaincuë par la peruersité de  
 leurs volontés? Et quand il se con-  
 tente encore de demander à Dieu <sup>Ephes. 1</sup>  
 pour les Ephesiens que leur doint les <sup>19.</sup>  
 yeux de leurs entendemens illuminés  
 par la vertu de l'Esprit. Car seroit-ce  
 pas vn vœu fort imparfait si nonob-  
 stant ceste puissante illumination de  
 l'entendement , la volonté pouuoit  
 prendre vn parti contraire à l'Euan-

gile ? Et nostre Seigneur icy quand il dit : *Quiconque a ouy & a appris du Pere vient à moy.* Car comment cela seroit-il vray s'il se pouuoit trouuer quelcun qui nonobstât cet endoctrinement, c'est à dire, ceste reuelation faite en l'entendement, ne creust pas; puis que comme nous auons veu, ouïr & apprendre est estre illuminé, venir à Christ c'est croire?

Mais en fin, mes freres, car il est temps de finir ; pour decider ceste question qu'un chacun consulte icy les mouuemens de sa conscience. Si quelcun veut tirer vne solide consolation de la cognoissance de nostre Redempteur, s'imaginera t'il qu'il depende de la liberté de sa volonté ou de croire ou de perseuerer à croire? Si cela est, que pouuons-nous attendre de nous mesmes? Qu'y a t'il en nous que corruption pour nous empescher de cognoistre & d'aimer le Seigneur Iesus? qu'inconstance & legereté pour nous empescher de demeurer fermes en la foy, quand Dieu la nous auroit donnée? & par conséquent que matiere de desespoir de paruenir au but auquel on ne parvient

point, que par vne inuincible perseuerance ? Si quelcun veut monstrier qu'il a profité en l'escole d'humilité, penser t'il que ce qu'il n'est pas semblable à tant de gens qui n'ont pas creü, cela vient de la liberté de sa volonté, & partant que ce n'est pas Dieu qui a mis cette difference entre luy & les autres ? Certes si l'illumination de l'entendement est commune à tous, & que l'usage de la grace de l'illumination depende de nous, nous n'auons de Dieu sinon ce qui est commun, ce qui est particulier est de nous mesmes. Cependant c'est de ce qui est particulier que depend le salut. Car nous ne serons pas sauuez pour ce que nous auons peu croire en l'Euangile si nous auons voulu, mais pource que nous aurons creü au lieu que les autres auront reietté l'Euangile. Et partant n'y ayant que deux choses necessaires pour estre sauuez: l'une que le Fils de Dieu nous ait rachetez par sa mort : l'autre que nous le receuions par foy quand on le nous presente ; nous aurons bien la redemption en la mort de Christ de la grace de Dieu, mais pour l'autre

sans laquelle il n'y a rien fait , nous nous en donnerons la louange. Est-ce là mes freres , selon l'exhortation de l'Ecriture, se glorifier au seul Seigneur ? Est-ce là luy donner toute la recognoissance qu'il faut , pour nostre redemption eternelle ? Certes celui qui ne veut pas estre ingrat envers Dieu, ne se contentera iamais de le remercier de cela seulement dont il a fait les autres participans , & qui ne leur a de rien serui , pour s'attribuer à soy mesme la gloire de ce qui seul luy a peu rendre la grace de la redemption profitable. Si quelcun veut prier, se contentera-il de demander à Dieu que mette en indifference sa volonté, que le tienne balancé entre son amour & sa haine, entre les cieux & les enfers , entre la gloire de l'immortalité & la mort & la condamnation des siecles ? Ainsi n'aduienne mes freres , que nous facions iamais de telles prieres. Que nous nous monstions ou si froids envers nostre Seigneur Iesus , ou si indifferens envers son Euangile, ou si peu soigneux de nostre propre salut. Quand nous ployerons les genoux devant Dieu

pour le requérir des choses qui sont de nostre salut, demandons luy qu'il illumine tellement nos entendemens qu'il n'y demeure tenebres quelsconques. Qu'il touche si puissamment nos volontez qu'elles ne fassent point de resistance. Qu'il fléchisse si efficacement nos affections, qu'elles suivent sans contredit son mouvement. Qu'il amollisse si bien nos cœurs qu'ils ne puissent repousser son doigt, qu'il n'y engraue iusques au fonds ses ordonnances. Qu'il établisse de telle sorte son empire dessus toutes nos pensées, qu'elles ne respirent, ne puissent jamais respirer autre chose que son service. Qu'il deploye en somme vne telle vertu en nous & dessus nous, que non seulement il nous touche, non seulement il nous émeue, non seulement il nous tire, mais qu'il nous ravisse entièrement à nous mesmes. Qu'il fende, s'il est besoin, nos poitrines, & faisisant nos cœurs de sa douce, mais invincible main, qu'il nous face ouïr ceste voix, tu es à moy, ie t'ay vaincu, jamais tu ne serviras à aucun autre. Que si cela ne se peut faire sans per-

dre nostre liberté, perdons la gayement. C'est ceste pretendue liberté qui nous fait esclaves de peché. Vaudroit-il pas mieux sans comparaison en estre delivrez. pour estre faits serfs de Dieu & de iustice ? Certes ceux qui le seruent ; & le seruent de cœur & d'affection, voire le seruent en telle façon qu'ils ne peuvent qu'ils ne le seruent, ceux là non seulement sont libres, mais ils regnent. Serions nous donc si affolez de cette vaine liberté que nous ne voulussions pas estre mis en la condition en laquelle sont les Anges ? Dedaignassions d'estre conioints aussi indissolublement avec Christ, comme les esprits bienheureux qui sont recueillis là haut ? Nous plaignissions qu'on nous mist en l'estat auquel nostre Seigneur estoit quand il cheminoit en la terre ? Qui non seulement n'a point peché, mais n'a peu pecher ; qui pour cela ne s'est point plainct d'estre priué de sa liberté ; a pensé qu'en cela consistoit, apres ceste admirable vnion avec la diuinité, tout l'ornement & toute l'excellence de sa nature humaine.

Mais quoy, mes freres ? ne crai-



gnons pas que cette inuincible vertu de la grace de Dieu en nous, nous rauisse nostre vraye liberté. Elle nous dompte, elle nous captiue, elle se rend maistresse de nous absolument, elle plante son enseigne en nos cœurs, elle triomphe de nous & de toute la puissance que le peché auoit en nos ames. Mais pourtant l'action par laquelle elle fait toutes ces choses est si douce, si agreable, remplit nos esprits de tant de ioye & de consolation, engendre en nos volontez des mouuemens si vehemens & si ardens vers nostre salut & son auteur, & nous remplit au reste d'une telle cognoissance de l'excellence de la chose que nous embrassons, qu'il est impossible qu'elle ne nous desrobe à nous mesmes. Ce ne sont pas charmes : car les charmes fascinent les yeux, & la grace de l'Euan-gile les nous ouure. Ce n'est pas contrainte ni violence qui nous entraine malgré que nous en ayons : car toute contrainte est importune à l'esprit humain, & ce que nous croyons en Christ, que nous venons à luy, que nous nous y collons, est conioinct

avec vne incroyable allegresse, vne ioye inenarrable. C'est neantmoins quelque chose de plus puissant que les contraintes les plus violentes; quelque chose de plus doux que les charmes les plus attrayans; quelque chose en somme qui tient tout à fait de la maniere en laquelle Dieu se cōmuniquera à nous dans les cieux, & retiendra nos yeux en l'admiration, & nos affections en l'amour, eternelle de ses vertus émerueillables. C'est que comme on dit que les cieux ne peuuent receuoir de changement, pource que la forme dont ils sont doüez est si excellente & si parfaite, qu'elle remplit, comme on parle, toute l'auidité de la matiere, & ne permet pas qu'elle soit mesmes tentee de l'appetit d'aucunes autres formes, de façon qu'ils demeurent incorruptibles. Ainsi quand Dieu sera tout en tous, il remplira tellement de soy mesme toutes les puissances de nos esprits, qu'il sera impossible qu'il y naisse aucun desir d'autre chose quelconque. Il est vray que tandis que nous sommes icy bas, nous ne le voyons, ne le iouyssons qu'en

partie, & ne luy sommes pas, il s'en faut beaucoup, entierement rendus semblables; ne le serons que quand nous le verrons cōme il est. Mais si est ce pourtant qu'il nous a donné tel goūst de soy, qu'en sa comparaison toutes les choses du monde nous deviennent fades; & comme s'il auoit entr'ouuert les cieux pour nous faire voir quelques rayons de la gloire qu'il nous y a preparée, il en a tellement rauī nos cœurs d'amour, de desir, & d'esperance, que quand la terre pour nous en diuertir viendrait a nous descouvrir tous ses tresors & toutes les richesses de ses mines, si nous sommes veritablement Chrestiens, nous n'en serions pas émeus; quand la mer ameneroit toutes ses vagues dessus nous, elle ne les scauroit pourtant esteindre. Que s'il reste encore des tenebres en nos entendemens & de la peruersité en nostre volonté, comme il n'y en reste que trop pendant que nous sommes en ce corps, cela n'empeschera pas pourtant que le *fondement de Dieu ne demeure fermé*. Comme le propos arresté selon lequel il nous a appelez

n'est fondé que sur la seule volonté,  
& la miséricorde de laquelle il nous  
a preuenus des les temps eternels,  
aussi les dons & la vocation qui en  
dependent sont-ils non efficaces  
seulement, pour conuertir nos cœurs  
quelque resistance qu'y face la chair,  
mais encore sans repentance, pour  
ne laisser iamais la place aux restes  
des peché, ains le combattre con-  
rinuellement, & gagner pied a pied  
dedans son fort, iusques a ce qu'en fin  
l'Esprit en emporte pleine victoire.  
Car si l'Apostre saint Paul a dit cela  
autres-fois de l'ectiō du peuple des  
Iuifs, que *les dons & la vocation de  
Dieu sont sans repentance*, pour la  
constance de l'amour qu'il porte a  
ceste nation; quelque endurcisse-  
ment qui luy soit arriué; que de-  
uons nous dire de l'amour qu'il a  
porté a chacun de ceux qu'il a don-  
nez a son Fils en eternelle predesti-  
nation, & en qui il a infus la grace  
de son Esprit comme vne arre irre-  
uocable de leur glorification future?  
S'il là dit de ceste election externe du  
peuple des Iuifs qui estoit vne figure  
de l'election eternelle de ses enfans  
que

que ne dirons nous point de la chose mesme que la figure a representée? S'il l'a dit de ceste nation a qui il auoit baillé sa loy en depost ; & commis a ses mains la garde de ses oracles, que ne dirons nous point de ceux és entendemens desquels il a reellement engraué ses loix, selon les promesses qu'il en auoit données par ses Prophetes? S'il l'a dit finalement de ce peuple qui à attaché le Redempteur du monde en la Croix, & a qui nonobstant il veut faire misericorde quelque iour, que ne dirons nous point de ceux sans lesquels le genre humain n'eust iamais veu ce Redempteur, & sans lesquels par consequent Dieu n'eust iamais fait paroistre au monde vne estincelle de sa misericorde? Seigneur Iesus paracheue ton œuvre en nous : fai sentir a toute ton Eglise ta protection : a tous tes seruiteurs ton Esprit de verité & de charité : a tous ceux que ton Pere t'a donnez la verité de tes promesses, en les rendant victorieux du monde & de la mort, & de celuy encore qui a son regne en la mort & au monde. Et a toy comme au

Pere & au Sainct Esprit vn seul Dieu  
benit eternellement, soit gloire &  
louange, force & empire es siecles  
des siecles, A M E N.

FIN.



## ERRATA.

Pag. 36. ligne 28. les hommes lisez l'homme  
pag. 46. lig. 3. nos lisez vos. pag. 49. lig. 6.  
seconde effacez seconde. pag. 121. lig. 26 du  
bouclier d'une lisez du bouclier de la statuë  
d'une. pag. 150. lig. 15. eternelle, lisez externe.  
pag. 159. lig. 24. enseignez lisez enseignées.  
pag. 179. lig. 8. preiudi- lisez préjudicier.  
pag. 233. lig. 21. luy faire, effacez luy. pag. 237  
lig. 16. comparée lisez comparable. pag. 257.  
lig. 12. l'Euangile lisez l'Eglise. pag. 303 lig. 1.  
frere lisez faire.

Les autres de moindre importance sont en plus grand nombre ; mais le Lecteur les corrigera aisément de soy même, s'il luy plaist.

*Imprimé à Saumur, par JEAN  
LESNIER, & ISAAC  
DESBORDES.*

---

M. DC. XXXVI.

